

پیشی داماوتی

(پنجابی کہانیاں)



بابر جاویدی اڈ

چھپو اک بزرگ فقیر پاکستان

پستی داسوتی

(پنجابی کہانیاں)

بابر جاوید ڈار

چھپواک

بزم فقیر (پاکستان)

125/3-B2 'ٹاؤن شپ' لاہور 54770

SIPPY DA MOTI

(Punjabi Stories)

By: Babar Javaid Dar

Mob.: +92-(0)306-6653037

Price: Pak Rs.150.00, U.S. \$ 10.00, U.K. £ 5.00

Edition: First, August 2007.

Published by: Muhammad Junaid Akram

Seceratory Bazm-e-Faqir, Pakistan

Mailing Address: 125/3-B2, Township Lahore, 54770

Punjab, Pakistan

Phone: 92-42-5150271

Mobile:92-322-8078863

E-mail:junaidakram65@hotmail.com

طبع و نم: PDF(Portable Document Format) Version:

ترتیب و اضافہ: ندریم اللہ الیہ و کیٹ

سال: ستمبر 2015ء

مُل: 150 روپے

ایڈیشن: پہلی اگست 2007ء

بزم فقیر پاکستان بابائے پنجابی ڈاکٹر فقیر محمد فقیر ہوراں دی یاد وِچ
قائم ہون والا علمی، ادبی تے ثقافتی ادارہ اے۔ اسیں اپنیاں علمی،
ادبی تے ثقافتی سرگرمیاں جاری رکھن وِچ محکمہ اطلاعات تے
ثقافت، حکومت پنجاب، لاہور دے مالی مل ورتن لئی شکر گزار آں۔

اباجی... محمد اصغر ڈار

امی جی... رضیہ بیگم

خالہ زاد بھرا ملک محمد جنید، خالہ ثریا،

خالہ صفیہ تے وڈی بھرجائی فرزانہ بیگم

ماموں محمد مشتاق بٹ تے غلام مرتضیٰ بٹ، قطب الدین ملک

ہوراں دے ناں

ایسہ سارے ہن ایس دُنیا وچ نہیں

پر ایہناں دیاں محبتاں تے  صریاداں دے دیوے ہمیش

میرے دل دی بستی وچ بلدے رہن گے

خاک میں مل جائے گا جب میری ہستی کا نشان
ہو گی تازہ یادگارِ زیستِ اس تصویر سے

(بابائے پنجابی ڈاکٹر فقیر محمد فقیر رحمۃ اللہ علیہ)

پی ڈی ایف صفحہ	صفحہ
8	6 بسم اللہ۔۔ محمد جنید اکرم
9	7 سہتی داموتی۔۔ فرخندہ لودھی
13	11 دُعا۔۔ حسین شاد
16	(i) ”سہتی داموتی“ بارے کجھ گلاں۔۔ ڈاکٹر جاوید اکرم (انتاٹ)
22	14 اپنی گل۔۔۔ بابر جاوید ڈار
26	19 کچا امرود
32	25 حلف
40	33 بندیاں وچکار لکیریاں
46	39 ساز
53	46 رات دی رانی
60	53 جھاتی
67	60 ساحل دی تلاش
76	69 اڈیک
80	73 سہتی داموتی
91	84 وچھوڑا
99	92 کھچ
123	116 زندہ لمحے
136	129 لالی

138	خیال دی بوند	131
142	چوتھی دنیا دا انسان	135
146	اکلا پے دی اگ	139
157	گھمن گھیریاں	150

ضمیمہ

167	چند باتیں۔۔ ندیم اللہ ایڈووکیٹ	(ii)
169	خبراں: بزمِ فقیر پاکستان ولودو کہانیاں دیاں کتاباں دی مکھ وکھالی تقریب	(iii)
171	نمونہ دعوت نامہ تقریبِ رونمائی کتاب ”پسی داموتی“	(iv)
172	تصاویر۔۔ رونمائی کتاب ”پسی داموتی“	(v)
175	اخباری تراشے کتاب ”پسی داموتی“ بارے	(vi)
177	کتاب دانناں: پسی داموتی، لکھاری: بابر جاوید ڈار، ناشر: بزمِ فقیر پاکستان	(vii)
181	”پسی داموتی“ بارے عدل منہاس لاہوری	(viii)
182	پسی داموتی۔۔ رسالہ ”لکھاری“	(ix)
183	پسی داموتی۔۔ تبصرہ نگار:۔ فرزند علی شوق	(x)
184	پسی داموتی۔۔ ایک جائزہ تبصرہ نگار:۔ سید عمران حیدر ایڈووکیٹ	(xi)
187	املا دی درستی	(xii)

بسم اللہ

بابر جاوید ڈار آپ وی اک کہانی وانگ اے۔ اوہدی زندگی نکیاں نکیاں کہانیاں نال بھری ہوئی اے۔ چوکھیاں کہانیاں دا مرکزی کردار اوہ آپ ای ہوندا اے۔ کدھرے اوہ ولن بن کے اپنا کردار اُلکدا اے تے کدھرے اوہ اپنے آپ نوں ہیرو بنا کے پیش کردا اے۔ حقیقت ایسہ وے کہ اوہ اپنی حقیقی زندگی وچ وی اک کامیاب ہیرو اے تے ادبی حوالے نال وی نوکیلا کہانی کار اے۔

ایس توں پہلوں اُردو افسانیاں دا اک مجموعہ بابر ڈار نے چھپوا کے ادبی حلقیاں وچوں داد لئی تے ہن پنجابی کہانیاں دا پلیٹی دا پراگا تہاڑی سیوا وچ پیش کیتا جا رہیا اے۔

آس اے پئی تئیں بابر جاوید ڈار دیاں کہانیاں پڑھ کے ایس نتیجے تے اپڑو گے کہ اوہ واقعی پستی دا موتی اے تے اوہدی ایسہ کتاب پنجابی کہانی کاراں دی صف وچ اک قابل قدر اضافہ اے۔ میری تاں ایہو دُعا اے کہ رب تعالیٰ بابر نوں ایدوں وی چنگا تے ہو ر چنگا کہانی کار بنائے تاں جے اوہ ساڈی رہتل وچ رُردیاں پھردیاں کہانیاں نوں ساڈے پڑھناراں لئی پیش کردا رہوے۔ (آمین)

محمد جنید اکرم
سیکرٹری
بزم فقیر، پاکستان

۷ اگست ۲۰۰۷ء

پستی داموتی

بابر جاوید دیاں اک دو کہانیاں لاہور توں چھپن والے پنجابی بولی تے پنجابی ادب دے نمائندہ مہینہ وار رسالیاں وچ چھپیاں تے میں ناں تے نظر مار کے ”فیر پڑھاں گی“ دے ڈھیر وچ رکھ چھڈیا۔ اوہناں رسالیاں دا ”فیر“ وچ ڈھیر اُچا ہوئی جاندا اے تے کئی سنہری پنے نظراں توں او جھل ہو کے شرمساری دا موجب بن جاندا اے۔ ایسہ میرے جے کاہل بندے دی بڑی وڈی بد بختی نہیں تے ہو رکیہ اے؟

میرے ذہن وچ بابو جاوید گر جاکھی تے بابر جاوید ڈار دے ناں کجھ گڈ مڈ ہوندے رہے۔ بابو جاوید گر جاکھی بڑا مخلص، نگھاتے ذمہ وار لکھاری اے۔ اوہنوں مت سکھن لئی پڑھنا چاہیدا اے۔ ادب دی چس لین لئی نہیں۔ ایس واسطے گر جاکھی جان کے میں بابر نوں وی پاسے رکھدی رہی۔ مت دینا تے مت لینا ہر بندے تے ہر ویلے داکم نہیں۔ سو ایسہ جرم کرن توں میں انکاری نہیں آں۔

بابر جاوید دیاں وڈیاں چھوٹیاں کہانیاں دا پراگا ”پستی داموتی“ اوہناں آپ ای میرے ہتھ دیندیاں آکھیا ”پڑھو... تے دسو“ نال پروفیسر جنید اکرم وی سن۔ تاں میں بابر جاوید نوں بابو جاوید توں وکھ کر کے پڑھیا۔ ”گوجرانوالہ“ ہالی وی دوہاں دی سانجھ بنائی کھڑا اے۔ ”گوجرانوالہ“ ماں بولی دا ہریالہ باغ فقیر محمد فقیر، امرتا پریتم جے سدا بہار پھلاں دی جنم بھومی۔ بابر جاوید توں وی کجھ اجہی آس اے۔ عمر تے تجربے وچ وڈی ہوندیاں ہویاں اینا ای دس سکنی آں پئی پنجابی کہانی دی جو نہہ وچ بابر جاوید ڈار اک بوہت درد مند دل رکھن والا اج دا بندہ اے پر نال ای اک فلسفیانہ فکری رجحان لے کے پنجابی کہانی نوں معتبری دین دے ارادے نال پڑ وچ آیا جا پدا اے۔

حساس لکھاری ہون کر کے اوہدا دھیان قدرتی طور انسان دا مقدر سفاکی تے غیر ہمواری ول جانا اک فطری جہیا رد عمل اے پر اوہ رب دی ونڈ ول کجھ ڈر کے تے نمو جا ہو کے نظر ماردا دسدا اے۔ ہمت دھارن دی کوشش وچ وی اے۔ اوہدے کول جذبات دی اہمیت عقل دے ایکشن تے ری ایکشن دا بڑا ڈونگھا شعور اے۔ اوہنوں پتہ اے کہ اجکل دے دور وچ نرا جذباتی ہونا کسے کارے نہیں۔ Realistic ہونا تے Scientific رویہ اختیار کرن نال انسان دے بوہت سارے مسئلے حل ہو سکدے نیں۔ اوہنوں ایسہ وی پک اے پئی زندگی گزارن لئی فوری جذباتی رد عمل بوہتیاں گنجھلاں تے ناہمواریاں پیدا کر دیندا اے۔ ایس لئی درگزر کرنا انسان دا آدرش ہووے تاں چنگا اے۔ پیار وچ بھیجی دانش ہی زندگی لئی سہل ہو سکدی اے۔

انج کدھرے کدھرے ساڈا ایسہ نووارد لکھاری آپ جذباتی ہو کے فن دیاں حداں اُلا مکھن دی وی کالھ کردا لگا اے۔ خیال دی رو کدھرے رکن داناں نہیں لیندی۔ انج لگن لگ پیندا اے کہ اپنے قاری ٹوں اندروں باہروں خالی متھ لیندا اے جدا کر کے کہانی قاری ٹوں ہجکے لگن لگ پیندے نیں۔ موضوع ذہن نشین ہون دی بجائے بھاں کر کے اڈ جاندا اے، تاثر تے توازن والا تھم ڈولن لگ پیندا اے۔

حساس کہانی کار ہون کر کے بابر جاوید پیار دا نگلھا پرچارک اے۔ پیار فن دی پوڑی تے پیر دھرن دی بڑی وڈی دلیل اے پکی نینہ اے۔ ایسہ دعویٰ میں اپنے مطالعے تے تجربے دی بنیاد تے رکھ کے کہہ رہی آں کہ لکھن یا فنون لطیفہ دی کسی وی راہ لئی شرط اے۔ محبت دا ڈونگھا شعور ڈونگھا احساس جہڑا کہ بابر جاوید کول ہے۔ ہن ایہدی اپنی چون اے کہ اوہ اپنے قاری نوں کیکر تے کس انداز وچ ہینڈل کر کے اپنا ہم خیال بناندا اے تے تسلی کراندا اے۔

ایسہ کہانی پراگا جدا ناناں بابر جاوید نے ”پستی دا موتی“ رکھیا اے۔ ایہدیاں ساریاں کہانیاں شدت احساس دیاں ترجمان نیں۔ ایہناں کہانیاں ٹوں لکھاری نے

جس پیار نال لکھیا اے پڑھن والے دے پلے پے جانیاں نہیں۔ امید مطلب ایسہ نہیں کہ کہانیاں دا موضوع عشق محبت یا رومان اے یا عشق پیار دیاں وارداتاں یا چکیاں دا سنیا ریو لکھیا اے لکھن والے نہیں۔ ایسی کوئی گل نہیں۔ اصل گل جہڑی قائم ہوندی اے اوہ اک محبت بھری فضا جہی اے جہڑی پڑھن والے نوں اپنے آل دوال نظر آؤندی اے۔ پڑھن مگروں پیار دی اک پریرنا جہی ملدی اے۔ بابر جاوید اپنے قاری نوں کہانی وچ اپنے بیان نال پیار دا سچل ماحول مسیا کردا اے۔ جہنوں اوہدے تے رب دی مہر آکھاں تے چنگا اے۔

کہانی ”کچا امرود“، ”بندیاں وچکار لکیراں“، ”رات دی رانی“ ایسہ طرحاں دوجیاں کہانیاں نہیں جنہاں وچ اک اجہی پکڑ اے جمدے ول اُپر دھیان دوا یا گیا۔ مشاہدہ تے اوہدا اظہار ہر قلمکار لئی اک قضیہ ہوندا اے جے اوہ بوہت کجھ نظر انداز کر دیندا اے۔ اپنی طبعی بے نیازی نال یا کھلار نوں کٹھا کرن دا ہر لکھاری کول وچ نہیں ہوندا۔ ”پستی دا موتی“ دے خالق بابر جاوید وی حالی کسی حد تک ایس قضیے دی ولگن وچ نظر آؤندا اے یاں چاتر لفظاں اوہدے قلم نال آڈھالایا ہویا اے جے پنجابی نالوں ودھ اُردو لفظاں اگے آپیندی اے۔ اُنج واقعہ نگاری دا جواب نہیں کسی واقع دی جس آپ تے لیندا ای اے۔ اپنے قاری دا من وی ٹھار دیندا اے۔ ایس دا اندازہ جاوید ڈار دی کہانی ”کھچ“ پڑھن والے نوں اپنے آپ ہو جاندا اے۔ سفر نگاری دے عام اسلوب توں ہٹ کے لکھی گئی کہانی ”کھچ“ اپنے وچ خاص کھچ رکھدی اے۔

بابر جاوید دردمند دل رکھدیاں ہویاں وی کسے ازم وچ نہیں پھسیا۔ نہ ای جذباتی نعرہ بازی اوہدا پروگرام اے جہڑا کہ اِجکل دے بوہت سارے لکھاریاں اپنی ہوند دسن لئی بڑا ضروری سمجھیا ہویا اے۔ پر اوہدیاں کہانیاں دیاں سطران وچ اک انقلاب دی لوڑ دی پکار اے جمدے بناں آؤن ویلے وچ گذر مشکل ہو جائے گی۔ جس انقلاب دی لوڑ نوں بابر جاوید ڈار نے شدت نال سمجھیا اے اوہ ذہنی تے تعلیمی

انقلاب اے۔ اقتصادی انصاف والا انقلاب اسیں کمیونزم دی شکل وچ ویکھ چکے
 آں۔ مقرر کیتیاں حداں ٹپ کے وی عمل اور علم دے کھاپے نہیں پورے کیتے جا
 سکے۔ ویلے دے نال جہڑی تعلیم تے عمل دی لوڑ کسی سماج نوں اگے ودھان لئی
 ہوندی اے بندہ اوہدیاں لوڑاں پوریاں کرن لئی چنا کو جہاد کر سکدا اے بابر جاوید
 ڈار اوس جہاد توں کسی وی کہانی وچ غافل نہیں سگوں انج لگدا اے کہ اوہدی طبع
 موضوع آپ لبھدی اے۔ اجے نکلتے پھڑوی جس توں کوئی وی سوچ سمجھ والا پڑھیا
 لکھیا بندہ اثر لے بغیر نہیں رہ سکدا۔

ساڈا ایسہ نرول کہانی کار اک تے جماند رو حساس ہے اُتوں اٹارنی بن گیا۔ حیاتی
 ہانے پھاڑ کے بابر جاوید ڈار اگے روز کھلو جاندی اے۔ ننگی تے پھٹو پھٹ... مزے
 دی گل ایسہ وے کہ لکھاری اپنے پاتر نال رل کے حال دہائی نہیں پاند ا سگوں سوال
 بن جاندا اے تے اپنے قاری اگے ایسہ اچھ سوال رکھدا ہو یا اک تبدیلی ول دھیان
 دواندا اے۔ تبدیلی جس دی انسانی برادری نوں چراں توں اڈیک اے۔ ہر شعور مند
 بندے اندر بھیستی دُکھ وانگر موجود اے۔ تاکھ وانگر نال رہندی اے۔

بابر جاوید ڈار نوں آپ پتہ نہیں جے اوہ کتے تے اوکھے پینڈ متھ بیٹھا اے۔ پر
 اوہدا رویہ تے اعتماد دس پا رہیا اے کہ اوہ ایس راہ تے لما چر چلے گا۔ ہر پڑاء تے
 روشن نشان چھڑے گا۔ ان شاء اللہ۔

فرخندہ لودھی

9 نومبر 2005ء

دُعا

پنجابی افسانہ لکھن والیاں توں شروع وچ ای اک اوکڑ ایسہ آئی پئی اوہناں اردو افسانے دا عروج دیکھن توں ملیا۔ پاکستان بنن توں تھوڑی دیر توں پہلے تے پاکستان بنن مگروں کجھ دیر تائیں اردو افسانے اوہ مقام حاصل کیتی رکھیا جہدی کوئی وی لکھاری خواہش کر سکدا۔ اوس سے پنجابی افسانہ لکھن والیاں نوں اردو افسانے دا ایسہ مقام ذہن وچ رکھ کے اپنا سفر شروع کرنا پیا۔ فیر ایسہ وی سی کہ پنجابی وچ جویں شاعری وچ نظم دا تے عارفانہ کلام دا اک مضبوط پچھوکڑ موجود سی ایویں دی افسانے وچ کوئی روایت سامنے نہیں سی۔ ایہدے باوجود شروع توں ای پنجابی کہانی کاراں اپنے فن دا اوہ مرتبہ قائم کیتا جنہوں پڑھن والیاں دی اک وڈی تعداد نے من لتا۔ ایہو ای وجہ اے کہ پہلے پنجابی افسانہ نگاراں دے ناں کوئی حالے تائیں وی بھلے نہیں۔ مثلاً افضل احسن رندھاوا، اکبر لاہوری تے نواز دے ناں بھل وی کوں سکدے نیں۔

پنجابی افسانے دی ایہناں لکھاریاں جڑی راہ بنائی اوہنوں مگروں آون والیاں شاہراہ بنا دتا تے اجے نویں لکھاریاں وچ ای بابر جاوید ڈار دا ناں وی سامنے آوندا اے۔ پر اوہ بوہتی جانکاری خورے ایس لئی نہیں حاصل کر سکیا پئی اوہدیاں بوہتیاں کہانیاں صرف مہینہ وار ”پنجابی“ لاہور وچ ای چھپیاں نیں۔ شاید اک ادھی کہانی کدھرے ہور وی چھپی ہووے، پر ایہدا مطلب ایسہ وی نہیں کہ اوہدی کہانی کلا کوئی ٹکی چھپی چیز اے۔

بابر جاوید ڈار دیاں کہانیاں پڑھیاں مینوں انج لگا اے کہ کسی کلا وچ کجھ ظاہر

کرن لئی جہڑی باریک بینی تے ڈونگھی نظردی لوڑ ہندی اے۔ بابر اوہنوں کھ رکھ کے ای کہانی اُلیکدا اے۔ اوہدی اُلکی کہانی نوں اوہے گوہ نال پڑھن دی لوڑ اے جہڑی اک ڈونگھی کلا دی منگ اے۔ کہانی نوں پڑھن والا جتے خلوص نال پڑھے گا، کہانی دا کھار اوہناں ای پڑھن والے دی دل دھرتی اُتے کھلے گا۔ بابر دیاں کہانیاں دا ایہہ وصف اے کہ اوہ پڑھن والیاں اُتے ہولی ہولی کھل دیاں نیں۔ دراصل کہانیاں دا ایہہ ورتاوا پڑھن والے دے اپنے جذبے دے ورتاوی موجب ای ہوندا اے، جے اوہ کہانی ویلا ٹپان لئی پڑھدا اے تے بابر دی اُلکی کہانی ہور طرحاں دا کھ وکھالے گی تے جے پڑھن والا کسے سچے جذبے نال کہانی پڑھدا اے تے فیر کہانی وی کھل کھلا کے اوہدے اُتے اپنے جلوے کھنڈائے گی۔ پر ایہدے نال ایہہ گل اے، جو میں اُتے لکھیا اے کہ بابر دیاں کہانیاں ہولی ہولی کھل دیاں نیں، پر کھل جان دیاں نیں۔ کسے چنگی کہانی دا حسن وی ایہو ای اے کہ اوہ اپنا گھنڈ ہولی ہولی چُکے۔ دھماکہ کرن والیاں کہانیاں وی بھاویں اپنا اک اثر رکھ دیاں نیں، پر جو سواد باریک بینی نال لکھی کہانی دا آوندا اے اوہ دھماکہ خیز کہانی دا نہیں آوندا۔

بابر جاوید ڈار ہوراں دوویں قسم دیاں کہانیاں اُلکیاں نیں۔ ”کچا امروڈ“ دا اپنا سواد اے تے ”حلف“ دا اپنا ذائقہ اے۔ ایہناں دوویں کہانیاں نوں بابر جاوید دیاں نمائندہ کہانیاں کیا جاسکدا اے۔ ایہدا مطلب ایہہ نہیں پئی باقی کہانیاں دا مرتبہ گھٹ اے۔ ہر کہانی اپنی وکھری شناخت اے پر ایہناں وچ اک بڑی سانجھ اے، جو میں ساڈے معاشرے وچ بے شمار تضاد نیں، جو میں تھلویں طبقہ جہنوں سفید پوش آکھی دا اے، اپنی بظاہر صورت وچ کوئی تضاد نہیں رکھدا پر اندر کھاتے دُکھاں وچ رُجھیا پیا اے تے کسے وی فنکار دی ایہو ای خوبی اے کہ اوس رُکھ دا ویر دا کر کے معاشرے نوں ہلونا دیوے۔

اجہیا تضاد تہانوں بابر دیاں کہانیاں ”حلف“ تے ”بندیاں وچکار لکیراں“ وچ ملے گا۔ جتھے ایہناں دو کہانیاں وچ اک وکھریاں ملدا اے اوہتھے ای ”کچا امروڈ“ تے

”بندیاں وچکار لکیراں“ وچ اک سانجھ وی ملے گی۔ دو بچیاں دے خیالاں دی سانجھ، معاشرتی دُکھاں دی سانجھ سائنسی ترقی تے بنیادی حقان دے ایس دور وچ دُکھاں دیاں ایہہ سانجھیاں کتھاواں ساریاں ٹوٹ تے نہیں پر کجھ حساس بندیاں ٹوٹ سوچن تے مجبور کردیاں نیں، پر ساڈے ایتھے ایہہ مصیبت اے کہ سوچن والے سارے بندے بے اختیار نیں تے اختیاراں والے اپنے چاء پورے کرن وچ رُجھے ہوئے نیں۔ کئی لکھاریاں دی طرح بابر جاوید دیاں کہانیاں وی مُتے معاشرے ٹوٹ ہلونا دین دی طاقت رکھدیاں نیں پر ”جاگدے“ لوکی تے ہلوناں نہیں سہندے۔ میں ایتھے بڑے افسوس نال کہواں گا کہ بابر دیاں ایہہ کہانیاں اسیں بے حس معاشرے ٹوٹ کیتھے جگان گیاں۔ مایوسی والے میرے ایس فقرے اُتے کلاکار اعتراض کر سگدے نیں، پر سچ ایہو ای کہ میرے تے بابر دے زمانے ٹوٹ مایوسی نے گھیریا ہو یا اے پر ایہہ مایوسی تھلویں طبقے دے سفید پوشاں، بے روزگار نوجواناں چائلڈ لیبر دے شکار بچیاں تے بے آسرا زنانیاں دا حصہ اے، اک طبقہ تے عیشاں وچ ڈبیا ہو یا اے تے اوہناں دیاں عیاشیاں دو جے طبقے دی مایوسی وچ دنوں دن وادھا کر رہیاں نیں۔ میری دُعا اے کہ بابر دیاں لکھیاں کہانیاں ایہناں دُکھاں مارے لوکاں ٹوٹ مایوسی دی ہنیری رات وچوں کڈھ کے چائن دا ٹکھ وکھالے اوس چائن دا جھڑا کئی طبقیات ٹوٹ اک طبقہ، خوشحالی تے پر اُمید طبقہ بنا دیوے۔ تاں جے جھڑی آس، جھڑے جذبے نال لکھاری کہانیاں لکھدے نیں، اوہ اپنی زندگی وچ اپنے لوکاں ٹوٹ غریبی پاروں ہون والے سماجی عذاباں وچوں نکلدے ویکھ سکن۔ اوس بہار ٹوٹ ویکھ سکن جھڑی حسن تے خیر دی خوشبو لے کے وارد ہوئے۔

حسین شاد

17 اکتوبر 2005ء

بابر جاوید ڈاردی کہانیاں دی کتاب ”پسی داموتی“ بارے کجھ گلاں

از: ڈاکٹر جاوید اکرم

فون دی گھنٹی وَجی، فون چُکلیا تے پنجابی ادب دے جنید بغدادی پروفیسر جنید اکرم ہوراں نال ہمکلام ہون دا شرف حاصل ہو گیا۔ دریافت احوال توں بعد جنید صاحب نے حکم فرمایا کہ بابر جاوید ڈاردی کتاب دی مکھ وکھالی تقریب اے تے تساں وی اپنے خیالات دا اظہار کرنا اے۔ میرے ورگے پراگندہ خیال شخص لئی کسے اک موضوع تے خیالات دا اظہار کرنا کنھاں اوکھا ہوندا اے، جنید صاحب تے اوہناں ورگے سنخور ہرگز نہیں جان سکدے۔ بہر حال بابر جاوید ڈار صاحب دے پیار دا قلم پھڑ کے جنید ویردی محبت دی روشنائی وِچ ڈوب ڈوب کے لکھنا شروع کردتا تے جو کجھ وی بنیا سر یا اے، لیا کے حسبِ توفیق تہاڈی سیوا وِچ پیش کر رہیاواں۔ ایس تر لے دے نال پئی۔

شر بت سمجھ کے پی لیناں ساڈا وختاں دا پانی جے

کجھ چر پہلے مینوں بابر جاوید ڈار ہوراں اپنی کتاب ”پسی داموتی“ بچھوائی تے نالے حکم وی دتا کہ بھاء جی! کتاب ضرور پڑھنا تے مینوں اپنی رائے وی دینا۔ میں او سے ای رات سون لگیاں بابر دیاں کہانیاں دا مجموعہ پھڑ کے بسترے وِچ جاوڑیا تے حسبِ عادت سون توں پہلاں ڈار صاحب دیاں کہانیاں پڑھن لگ پیا۔ لیٹ کے پڑھدیاں پڑھدیاں میں پاسہ پر تیا تے محسوس ہو یا کہ میریاں اکھاں دیاں سپیاں وِچوں وگن والے اتھرواں دے موتیاں نے میرا سر ہانہ ای گلا کر چھڈیا ہو یا اے۔ اوس رات کجھ سردی سی تے سر ہانہ گلا ہون پاروں مینوں ٹھنڈ لگن لگ پئی۔ میں سوچی پے گیا کہ سلیاں کہانیاں دی ایہ کتاب سیال وِچ پڑھن والی نہیں، لیہنوں گرمیاں وِچ پڑھاں گے۔ حالی میں ایس بارے کوئی حتمی فیصلہ نہیں سی کیتا کہ میری بیگم نے کولوں ٹچکر کیتی ”کنہوں بادکر کے دُسکدے پئے او“

(ب)

میں اوہنوں تے کوئی جواب نہ دتا، چپ چپتے ”پسی داموتی“ سائیڈ تے دھری،
عینک لائی تے اکھاں پونجھ کے سو گیا۔ فیصلہ ہو گیا کہ ایہہ کتاب گرمیاں دے موسم وچ اوس
دن پڑھاں گا جدوں بڈھی پیکے گئی ہووے گی، پر جنید صاحب دا ٹیلی فونک آرڈر ملن دے
بعد اپنیاں کتاباں دے ڈھیر وچوں ”پسی داموتی“ لہھی تے اپنے کمرے دی کنڈی لا کے
پڑھن بہہ گیا۔ ”پسی داموتی“، ”کچا امرود“، ”حلف“ تے ”بندیاں وچکار لکیراں“ ایہہ چار
کہانیاں پڑھن توں بعد میرے اندر کتاب دا مزید مطالعہ کرن دی تاب نہ رہی۔ مینوں
بابائے پنجابی ڈاکٹر فقیر محمد فقیر ہوراں دا ایہہ شعر یا دآن لگ پیا۔

موتی بنن والا ہر قطرہ سہ آ پے لہ لیندا

ڈڈواں کک منکیاں دے نہیں منہ وچ جا کے ڈھیندا

تے مینوں محسوس ہون لگ پیا کہ ایہہ دنیا جہنوں کہ انسانان داسمندر آکھیا
جاندا اے، اسی سارے انسان ایس سمندر دے قطرے آں تے ایہناں قطریاں وچوں جہیا
قطرے جہدے نصیبیاں وچ موتی بننا لکھیا ہوندا اے، اوہ بابر جاوید ڈارا اے۔ جہنوں ساڈے
ادب وسیب دی پسی آپوں ای لہ لیندی اے۔ بابر جاوید ڈار دیاں تحریراں پڑھ کے مینوں انج
لگدائے کہ اوہ قلم دا کدال موڈھے تے دھر کے ساڈی عظیم مگر مدفون تہذیب تے ورثے
نوں کھودن نکلیا ہویا اے۔ اوہ اعلیٰ انسانی قدراں داسموندجیو داڑو تے خوش اخلاقی دا ہڑپہ
دریافت کیا کرنا چاہندا اے۔ اوہ بندیاں وچکار لکیراں پاٹن نکلیا ہویا اے تے ساڈے سماج
وچ پائی جان والی طبقاتی تفریق تے دولت دی کافی وٹنوں منانا چاہندا اے۔ ساڈے
وسیب وچ دھن داناں دے سوتر جہان تے ثنا خوان ہوندے نیں، اوہ بے نوالو کاں دا تر جہان
اے۔ اساں سنیا اے کہ کولمبس نے نویں دنیا دریافت کیتی سی پر نویں دنیا نے سپر پاور بن کے
نویں نویں چن چاہڑنے شروع کردتے تے ہلاکو بن کے انسانی حقوق دے بغداد اکھاڑ
دے۔ شاید ایسے لئی پنجابی دا ایہہ کولمبس پرانی دنیا دریافت کرن ٹریا ہویا اے تے اپنی ایس

(پ)

کوشش وِچ اوہ کامیاب وی اے۔ اوہنوں مادہ پرستی تے ہوس کیشی دی پھنڈی ہوئی انسان
نما مخلوق وِچوں اُج وی پسی داموتی دے ہیر و طاہر تے حلف دی ہیر وُن انیلہ ورگے انسان لہج
جاندے نیں جنہاں نوں اوہ ساڈے ساہمنے رول ماڈل دے طور تے پیش کردا اے۔ اوہ
اپنیاں لکھتاں دے چانن وِچ راہوں کراہے پئے ہوئے اپنے قارئین دی انسانی حیاتی دی
معراج وُل نوں راہنمائی دی کردا اے تے اپنیاں تحریراں راہیں مدرس، مصلح تے واعظ داپا تر
وی نبھاندا اے پر بڑے ای من موہنے تے من ٹھار انداز وِچ۔

اوہ اک اجیہا ماسٹر اے جہڑا سنانوں سبق یاد کران ویلے سوٹیاں وی نہیں ماردا پر فیر
وی خورے کیوں رون نکل جاند اے تے اتھرو وگدے ای جاندے نیں۔ اوہ دے قلم دیاں
چیرکاں تہذیب، اخوت، خوش اخلاقی، بھائی چارے تے احترام آدمیت دیاں شاہراواں وُل
ساڈی رہنمائی کردیاں نیں تے لوکاں نوں بھاویں دُور ای سہی، فلاحی معاشرے دی منزل
دِسن ضرور لگ پیندی اے۔ اوہ آکھدا اے زبان نوں قابو نہ کیتا جاوے تے اوہ بھنڈ چھڈ دی
اے، خورے اوہنوں پھنڈے جان دے ڈرتوں ای چپ لگی رہندی اے تے ایہو ای وجہ
اے اوہنے عملی زندگی وِچ وی مقرر دی بجائے محرر بن دا فیصلہ کیتا تے تقریر دی بجائے تحریر
وُل زور دتا، پر شاید اوہنوں ایہہ نہیں سی پتہ کہ تحریر وی انسان نوں بھنڈ چھڈ دی اے تے بندہ
لکھائی توں وی پھر کت دا اے۔ بابا غالب ایہدے نالوں ڈھیر سیانا سی تے اوہنوں ایس گل
دا ادراک وی سی، ایس لئی اوہنے اللہ پاک دے حضور ترلہ لیا کہ

پکڑے جاتے ہیں فرشتوں کے لکھے پر ناحق

آدمی کوئی ہمارا دم تحریر نہ تھا

میرا خیال اے کہ اللہ پاک جی نے غالب دی دعا فوراً قبول کیتی تے آدمیاں
دے وچوں وی کجھ لوک محرر متعین کردتے گئے پر فرشتیاں کولوں ساڈی چند فیروہ نہ چھٹی
کیونکہ ایہہ آدمی دی انسان نما فرشتے ای سن۔ اوہناں ای فرشتہ سیرت آدمیاں وِچوں اک

(ط)

سی، کہ اس میں ایہناں توں وڈے آں تے ساڈے معاشرے وِچ چونکہ وڈیاں کول نکلیاں نوں
ہر حوالے نال نکائی سمجھن دے جملہ حقوق وی محفوظ ہوندے نیں، ایس واسطے اودوں اس میں
ایہناں نوں بالکل Easy لیندے ساں تے Tension دیندے ساں یعنی ایہناں کولوں
زیادہ تر ہوٹل وائے چھوٹے دائی کم لیندے ساں۔ اودوں ایہناں تنناں دیاں ہمہ صفت
موصوف شخصیات وِچ میرے لئی خون دے رشتے دی کھچ تے Attraction تے ہے سی پر
اوہ شخصی حُسن تے وڈیائی بالکل نہیں سی جہڑی بعد ازاں ایہناں خود اکھتسابی طور تے اپنی محنت
شاقہ تے مخفی صلاحیتاں دے بل تے حاصل کر لئی نکلیاں ہون دے باوجود اپنے وڈے
کماں تے وڈیاں سوچاں دے سر اُتے ساڈے کولوں ایہہ اعتراف کروالیا پئی بندے عُمر اں
دی بجائے عقلاں تے کارکردگی پاروں وڈے ہوندے نیں۔ ایہناں دے کارہائے زریں
دیکھ کے جدوں سانوں عقل آئی تے ساڈیاں ساریاں ای مو جاں مُک گئیاں تے سوچاں
ای سوچاں ساڈے پیش پے گئیاں۔

بابر جاوید ڈار دی سخن آرائی نال میری آشنائی اودوں ہوئی جدوں میں تے عزیزی سہیل احمد
نے روزنامہ تہلکہ دا اجراء کیتا تے بابر جاوید ڈار ہوراں اوہدے وِچ کالم نگاری تے کہانی
کاری دا سلسلہ شروع کیتا۔ میں بحیثیت ایڈیٹر اوہناں دیاں تحریراں ایڈیٹ کرن لئی پڑھنیاں
تے سوچاں دی گھسن گھیری وِچ ڈِگ پیناں۔ فیر جدوں سُر ت دا ہتھ پھڑ کے سوچاں دی
گھسن گھیری وِچوں باہر آؤناں تے ویکھناں کہ بابر دی لکھت نوں میرے قلم دی بجائے
میرے اتھروواں نے ایڈٹ کر دتا ہو یا اے۔

تساں وی یقیناً بابر جاوید ڈار دیاں تحریراں پڑھیاں ہون گئیاں تے میرے
وانگوں افسردہ، ملول تے رون ہا کے وی ضرور ہوئے ہوود گے۔ اور ایس لئی کہ بابر جاوید ڈار
اپنیاں تحریراں پڑھیاں ہون گئیاں تے میرے وانگوں افسردہ، ملول تے رون ہا کے وی ضرور
ہوئے ہوود گے۔ اوہ ایس لئی کہ بابر جاوید ڈار اپنیاں تحریراں وِچ ساڈی رہتل اندر اخلاقی

(ت)

جاوید بابر ڈار اے، ہن المیہ ایہہ وے کہ اوہدیاں تحریراں خود اوہنوں وی بھنڈن رہیاں نیں
تے اسیں وی اوہدیاں تحریراں راہین ڈیناں ہوئیاں پھرے جارہے آں۔ اوہدیاں لکھتاں
وی آری وچ سانوں اپنی ذات دے کوہجھ، اپنی خود غرضی، بے حسی، کام،
کرودھ، لوہجھ، ہنکار، کرتے اپنیاں ساریاں کیاں تے کوتاہیاں نظر آؤن لگ پیندیاں نیں
تے اسیں اعتراف کرن لگ پینے آں کہ اسیں اپنے آپ توں کنھے دور آں جد کہ ساڈا لیکھک
کنا خوردبین اے۔ مینوں نہ تے سخن دانی داد عویٰ اے تے نہ ای میں کوئی نقاد آں، ایس لئی
میں نہیں جان دا کہ بابر دیاں کہانیاں نوں فن کہانی نگاری دی ترکڑی تے اصناف سخن دے
وٹے پا کے تولے تے اوہ کس بھاء تلدیاں نیں، البتہ ایہہ دعویٰ اے کہ اوہ اپنے حساس
قارئین نوں اپنیاں تحریراں دار و مال سنگھا کے اغواء برائے تاوان کر لین دافن جان دا اے تے
فیر اوہ اپنے مغوی قارئین نوں اپنیاں کہانیاں دے و لگن ویہڑیاں وچ اوئی دیر توڑی قید کیتی
رکھدا اے جنی دیر تک اوہ اپنے اتھرواں دے موتی تاوان دے طور تے اوہنوں ادا نہیں
کردیندے۔

تساں اکثر ٹرکاں دے کچھے لکھیا ہو یا پڑھیا ہونا اے پئی عقل نہ ہووے تے
موجاں ای موجاں، تے عقل جے ہووے تے سوچاں ای سوچاں۔ اک ویلا آجدوں
ساڈیاں وی موجاں لگیان ہوندیاں سن، سانوں عقل مست تے واجبی جھئی ہے سی پر ساڈی
جوانی دی ہوڑ مست نے سادی عقل مت وی ماردی ہوئی سی تے جدوں مت ماری جاوے
تے کوتاہ بینی تے خود ستاشی دیاں بیماریاں وی لگ جاندیاں نیں۔ ایہہ اوہ دیہاڑے سن
جدوں بابر جاوید ڈار، جنید اکرم تے سہیل اکرم میرے لئی چھوٹے بھراواں توں ودھ کجھ وی
نہیں سن تے ایہناں دامتقام، مرتبہ تے اہمیت وی میری نظر وچ بالکل اوہ ای سی جو ساڈے
مشترکہ خاندانی وسیب وچ نکلیاں دی ہوندی اے۔ مزے دی گل تے ایہہ وے کہ اوس ویلے
ایس گھٹ وقوفی دی پگ بنھ کے تے پھروے ای ساں اتوں ایہہ توت وی کڈھی ہوندی

(ث)

قد راں دی ٹٹ بھج تے نام نہاد اشترافیہ تے غیر انسانی ورتاوے اُتے ساڈی بے حسی نوں
موضوع بناند اے تے سانوں کسے دی بجائے اپنے آپ اُتے رون تے مجبور کر دیندا اے۔
اوہ پنجابی کہانی دے نیلی باردا کوئی سر کڈھواں آبادکار بھاویں نہیں، پر میری پشین گوئی اے کہ
اوہ بوہت چھیتی ایس دُب اکبر دا حصہ ضرور بن جاوے گا۔ میری دعا اے کہ اللہ پاک علمی ادبی
حوالے نال اوہ دے کولوں اصلاح اُمت ورگا وڈا کم لوے، آمین!

اللہ کرے زورِ قلم اور زیادہ

(ماخذ: رسالہ ”پنجابی“ انٹرنیشنل لاہور، شمارہ: جنوری 2008ء)

اپنی گل

جد وی میں لنگھی حیاتی ول جھاتی مارناواں تاں اک مقام اُتے پہنچ کے میریاں
 نظراں کھلو جانیاں نیں۔ اگانہہ کجھ وکھالی نہیں دیندا۔ کوئی چار پنچ ورھیاں دا ہواں
 گا جدوں میں اک گلی دی منکر تے کھلوتا سوچی پیا سی۔ کریا نے والے بھاء بالے نے
 اک سکھ لے کے اوہدے بدلے کوئی شے دے دتی سی... پر اوہنے بے دھیانے کجھ
 ہو ر سکے وی میرے ہتھ پھڑا دتے سن۔ تاں ہن میں ٹری جا رہیاں کہ کسے
 اندروں اٹھن والے جذبیاں دی آواز ہیٹھ میرے قدم رُک گئے... ”ایہہ پیسے
 مینوں بھاء بالے نوں موڑ دینے چاہیدے نیں“ سوچ دا اک نکا جہیا کنکر میرے دماغ
 دی ندی وچ ڈگا سی۔ اک ہلچل مچی سی... پر اوس ویلے مینوں ایس گل دا کوئی علم
 نہیں سی کہ ایس آواز نوں کیہ کہندے نیں... جد میں زائد پیسے بھاء بالے نوں موڑ
 دتے تے اوہنے خوش ہوندیاں، دعاواں دیندیاں میرے ہتھ وچ کھان لئی ”نگدی“
 تھما دتی... جد میری ماں نوں ایس گل دا پتہ لگا تاں اوہنے خوشی نال میرا منہ چم لیا۔
 مینوں اپنے ایس عمل اُتے اجہی تسکین ہوئی... پر ابے تیک میں لفظاں توں واقف
 نہیں ساں۔ ایس لئی ایہدا اظہار کسے اگے نہ کر سکیا۔ ایہہ جذبے روشنی وانگوں وجود
 دیاں ڈونگھیاں وچ وڑ کے رچ ورس گئے تاں ہولے ہولے ودھدے پھلدے
 رہے تے اظہار دیاں راہواں لبھدے رہے۔ اک دو ورھیاں بعدوں اسیں اوہ محلہ
 چھڈ کے کسے دوجے محلے وں لگ پئے۔ مینوں اوس ویلے دے سنگی ساتھیاں توں
 وچھڑن دے دُکھ نے ڈاڈھا اُداس کر دتا۔ اوہناں ان کسے جذبیاں وچ وچھوڑیاں دا
 وی وادھا ہو گیا۔ جہناں دی اثر انگیزی وچ میں پلدا تے بلدا رہیا۔ فیرا سیں اوہ محلہ

پر ایہناں جذبیاں ٹوں ایس گل دا پتہ نہ لگ سکیا کہ چاک تے کوں گھمیا جاندا اے۔
 مٹی ٹوں ون سونیاں تے رنگ برنگیاں شکلاں دین والے ایس فنکار دا پتر اج سرجن
 ڈاکٹر حبیب الرحمن دے ناں نال پچھانیا جاندا اے۔ ویلا لنگھدا رہیا تے میں لفظاں نال
 جذبیاں ٹوں جوڑدا رہیا۔۔۔ پر ایسہ کوئی اجہی تے واضح شکل اختیار نہ کر سکے۔ بس
 مٹی دے کھڈونیاں وانگوں ٹنڈے تے بھجے رہے۔۔۔ فیر میں بی اے وچ داخلہ
 لے لیا۔ میرے مشاہدیاں، جذبیاں، کیفیتاں نے گلی مٹی وانگوں گجھ کے اوس چاک
 اُتے کھمنا شروع کر دتا جہڑا کئی ورہیاں توں میرے دل، دماغ وچ کسے مینار وانگوں
 کھلوتا سی، تاں ایسہ سب کجھ چند اردو افسانیاں دی شکل وچ سامنے آیا۔ سب توں
 پہلا افسانہ گورنمنٹ کالج گوجرانوالہ دے رسالے ”خبر و نظر“ وچ تے دوجا افسانہ
 روزنامہ ”جنگ“ دے جمعہ میگزین وچ شائع ہويا۔ میں اک افسانہ اپنے سنگی خواجہ
 ندیم ٹوں پڑھن لئی دتا۔ کجھ دیر بعدوں اک دوجے کلاس فیلو نے اوہدے کولوں
 افسانہ لے کے پڑھنا شروع کر دتا۔۔۔ اوس کلاس فیلو نے کسے قسم دا تبصرہ کرن دی
 بجائے کہانی مینوں موڑ دتی۔۔۔

میں اوہدے — رویے ٹوں ڈاڈھا محسوس کیتا۔۔۔ شام ویلے اوہ کلاس فیلو میرے
 گھر آیا۔ میں کجھ حیران ہويا سی ایس لئی کہ اج توں پہلاں اوہ کدی میرے گھر نہیں
 سی آیا۔ اوہنے آندیاں ای آکھیا کہ توں بہوں اچھی کہانی لکھی اے۔ میں ایس لئی
 تیرے کول آیا واں کہ نہ صرف تینوں دا دیواں۔۔۔ بلکہ میں تینوں کجھ ہو روی آکھنا
 چاہنا واں کہ ”پنجابی پڑھیا کر ایسہ ساڈی مادری زبان اے۔۔۔ توں جے پڑھیں گا۔۔۔
 تے فیر یقینا ایس زبان وچ لکھیں گا۔۔۔ کیوں جے ایسہ بڑی مٹھتی تے سوادلی تے
 ڈونگھے جذبیاں دی ترجمان زبان اے۔۔۔“ میں اوہدی ہاں وچ ہاں ملائی تاں اوہنے
 آکھیا کہ بابائے پنجابی ڈاکٹر فقیر محمد فقیر میرے نانا جی نیں تے میں تینوں اوہناں دیاں
 کتاباں پڑھن لئی دیواں گا۔۔۔ تئیں سمجھ ای گئے ہوو گے کہ اوہ کلاس فیلو کون
 اے۔۔۔ اوہ پنجابی زبان لئی دن رات کم کرن والا تے ”پنجابی“ رسالہ شائع کرن والا

شاعر تے ادیب محمد جنید اکرم اے... فیر کالج دور توں لے کے یونیورسٹی تائیں ساڈے ویسہ ورھے اک دوجے دی سنگت وچ گزر گئے۔ محمد جنید اکرم پروفیسر بن گئے تے میں قانون دے میدان دا راہی... پر اوہناں مینوں پنجابی دا ایسوجھیا چسکا لا دتا سی کہ میں اپنی اردو وچ افسانیاں دی کتاب ”آزاد کرنیں“ چھپن توں بعد بوہتا پنجابی وچ ای لکھیا اے... تے میریاں زیادہ کہانیاں ”پنجابی“ رسالے وچ ای شائع ہوئیاں۔

کجھ ورھیاں توں مینوں جنید اکرم ہو ری کہہ رہے سن کہ ہن تیریاں کافی ساریاں کہانیاں شائع ہو سگناں نیں تے ایہناں ٹوں کتابی صورت وچ آنا چاہیدا اے۔ فیر میں اوہناں دے کہن اُتے اپنیاں کہانیاں اکٹھیاں کر کے اوہناں دے حوالے کر دتیاں نیں۔ مینوں ڈاڈھا پک اے کہ اوہ جھڑے کم دا بیڑا چک لیندے نیں اوہنوں پورا کر کے رہندے نیں۔ اج کل اوہ بیمار نیں اللہ اوہناں نوں صحت تے ہمت دیوے۔ (آمین)

آخر وچ میں حافظ انجم سعید ایڈووکیٹ، جلیس احمد میر ایڈووکیٹ، شیخ احسان الحق ڈسٹرک پبلک پراسیکیوٹر دا شکر گزار آں کہ اوہناں ہمیش میری کہانی ٹوں سراہیا تے نالے بہتری لئی کوئی نہ کوئی گل دی... بہوں تھورے ایسے ججن ہوندے نیں جھڑے بڑے چنگے سامع ہوندے نیں۔ زاہد سلیم نارو تے ریاض ظفر دی ایس خوبی دی بدولت مینوں اپنی کہانی لکھن دے نال اوہناں ٹوں سنان دا موقع وی ملدا رہیا۔ شاہد ڈار میرا اوہ بھرا اے جتنے میریاں لکھتاں دی اودوں حوصلہ افزائی کیتی جدوں میریاں تحریراں مٹی دے کھڈونیاں وانگوں سن۔ اوہناں دی ہلاشیری میرے لئی تحریک دا سبب سی۔ مینوں ایس گل دا اعتراف اے کہ میری اپنی بیوی صغریٰ خانم نال کدی کدار حیاتی دے معاملیاں اُتے گل بات نے میرے شعور ٹوں نکھاریا تے ڈونگھا گیتے امی جی دے دنیا توں رخصت ہون بعدور، وڈی بھرجائی شاہدہ پروین دیاں دعاواں مینوں حوصلہ دتا۔

میں اپنی سس ممتاز بیگم دا ایس لئی ذکر نہیں کر رہیا کہ اوہ میری سس نہیں بلکہ
ایس لئی اوہ پنجابی نال عشق کرن والی عورت اے۔ ”پنجابی“ رسالے وچ چھپن والا
اک اک اکھراوہناں دی نظرتوں گزردا اے۔ ایس لئی اوہناں دیاں دعاواں وی
مینوں ملدیاں رہیاں تے شاباش وی۔ میں محمد جنید اکرم دے خلوص بارے کیہ
دساں۔ ایہو ای تے اوہ شخصیت اے جنہ میرے اندر دے کہانی کارنوں ہمیش جگائی
رکھیا اے۔

میں فرخندہ لودھی صاحبہ تے حسین شاد صاحب دا شکر گزار آں کہ اوہناں دے
تبصریاں نے مینوں بہوں حوصلہ تے راہنمائی دتی اے۔
آخر تے میں اوہناں پڑھیاں دا پیشگی شکریہ ادا کرنا واں جڑے ”پستی دا
موتی“ ٹو پڑھ کے تے مینوں اپنے چنگے مشوریاں نال نوازن گے۔



بابر جاوید ڈار

Postal Address:

Babar Javed Dar, District Public Prosecutor
503 B, Model Town, Gujranwala, Pakistan.

Mob.: +92-(0)306-6653037

E-Mail: babarjaveddar@hotmail.com

Facebook: <https://www.facebook.com/babarjaved.dar>

کچا امرود

عمر اپنی ماں کولوں وچ پھڑ رہیا سی.....

نئی عمرے ای اوہنوں چُپ لگ گئی سی. بالینے دیاں خواہشاں چنکاں وانگوں
سڑدے بھجڈے حالات دی سواہ وچ دب گئیاں سن. حیاتی نے اک جھٹکے نال
اوہدے کولوں اوہدا بچپنا کھوہ لیا سی. سارے کھڈونے تے کھیڈاں توں اوہدا جی اُٹھ
گیا سی. اوہدے پیو نے اوہدی ماں نوں طلاق دے دتی سی تے اوہ اپنے پیکے گھر آگئی
سی. اوہنے عمر نوں حاصل کرن لئی عدالت وچ دعویٰ کیتا سی.

عمر دے نانکیاں دا گھراک نکلے جے پنڈ وچ سی. گھر وچ ون سونے بوٹے لگے
ہوئے سی. اج اوہ اپنے نانے دے گھرانہ دے درخت ہیٹھ کھلوتا آپوں آپ وچ
گواچا ہویا سی. چند ورھے پہلوں دا اک منظر اوہدے دماغ وچ اُبھریا سی، ”پتر توں
کس کول رہنا چاہنا ایس..... ماں کول یا پیو کول.....؟“ اج اوہنوں پتہ سی کہ اوہ
عدالت وچ کھڑا اے تے ایہ سوال کرن والا بندہ جج اے. پر اوہوں اوہ چوکھا نکا سی.
ایس لئی اوہنے کوئی جواب نہ دتا تے اپنے کول کھلوتی اپنی پھپھتی ول ویکھدیاں
اوہدیاں لتاں نال چنبر گیا. پھپھتی فاتحانہ انداز وچ مسکرائی سی. دوجے لانبھ کھلوتی
اوہدی ماں دیاں اکھاں وچوں ہنجو چون لگ پئے. جج نے اُس ویلے عقل مندی نال
کم لیا تے آکھیا ”ہن بچے توں ماں نال کھڑا کر چھڈو.....“ تے فیر جج نے پچھیا ”عمر
پتر توں کس کول جانا چاہنا ایس..... ماں کول یاں پیو کول.....؟“ تے اوہنے کوئی
جواب نہیں سی دتا تے ایس داری اوہ اپنی ماں دیاں لتاں نال چنبر گیا سی.

عمر جی ٹوں جواب وی کیہ دے سکدا سی۔ ویلے تے قانون نے اوہنوں ایس مقام اُتے لیا کھلھاریا سی جتھے اوہنوں اپنی دو محبوب ہستیاں ماں تے پو وچکار کسے اک دی چون کرنی سی۔ اوہنوں اوہ دوراہا وکھالی دے رہیا سی جہدے اک پاسے چھاں کرن والے رُکھ سن تے دُوبے پاسے پھل دین والے بوئے۔ اک راہ وچ محبتاں، لوریاں تے گیت کھلے پئے نیں تے دُوبے لانجھے طاقت تے تحفظ دیاں پناگاہواں۔ عمر ٹوں دوویں راہ چنگے لگدے سن۔ اوہ کیہ چون کر سکدا سی۔ بازار وچ خریداری کردیاں زنانیاں تے بندیاں ٹوں ویکھو۔ اوہ رنگ برنگیاں شیواں تے کپڑیاں دی چون کرن لئی گوگھو دی حالت وچ کھڑے وکھالی دیندے نیں۔ اوہناں لئی ایہ سر پیڑ بنیا ہوندا اے کہ اوہ اپنے واسطے کھڑے رنگاں دی چون کرن تے کس قسم دے کپڑے خریدن تے فیر عمر لئی ایہ گل کہ اوہ ماں یا پو وچوں کسے اک دی چون کرے۔ کینا اوکھاسی تے اوہنوں سوچ دے کھڑے کھڑے زاویاں تے کھڑا کر سکدا سی۔ ایس دوراہے نے اوہدی شخصیت ٹوں اندروں تروڑ پھوڑ دتا سی۔ سگوں ایس تھاں اُتے لے آؤندا۔ جتھے اوہ کدی پھپھتی دیاں لتاں نال چنبردا تے کدی ماں دیاں لتاں نال۔ فیر جی نے اپنا فیصلہ سنا دتا کہ عمر اچے ست ورھیاں دا ہون تائیں ماں کول ای رہوے گا۔ عمر نے ایہ ویلا ماں نال گزاریا۔ اوہنوں کدی کدار عدالت دے حکم مطابق پو نال وی بلایا جاندا۔ اوہ کجھ سیانا ہو گیا سی تے ایہو جہیاں گلاں باتاں بوہت محسوس کردا سی۔

”ایہدی تے ویکھنی بالکل پو وانگ اے۔“ ”ایہ تے پو وانگوں بڑا ضدی اے۔“ ایہ ساریاں گلاں نانکے گھر ہوندىاں سن۔ دادکے گھروں کوئی چبھدی گل اوہنوں سنائی دیندی ”ماں وانگوں بڑا غصیلا اے۔“ عمر دا دل کردا کہ اوہ ایہ سارے ماحول ٹوں چھڈ چھڈا کے نس جائے پر اوہ کتھے جاسکدا سی۔ اوہنے اپنا جی ویٹھے وچ اُگے رُکھاں نال لا لیا۔ جتھے انب، امرود، انار دے درخت تے موتیے، گلاب دے بوئے لگے ہوئے سن۔ اوہنے دُوبے بالاں وانگوں نہ کدی پھل توڑے تے نہ کدی

کچے پھل توڑن لئی درختاں ٹوٹ روڑے مارے۔ ایہ سارے رُکھ اوہدے سنگی بلی
سن جہڑے اِکو جگہ اُگے تے اپنے من وچ ڈُبے اوہدے وانگوں خاموشی نال حیاتی
دے ڈنگ پورے کر رہے سن۔ عدالت دی مقرر کیتی تاریخ اِج پوری ہو رہی سی۔ مگر
بھرے پنچایت وچ ایہ طے پا گیا سی کہ عمرہن پو کول ای رہوے گاتے عمر دی ماں
اوہدی تحویل لئی کوئی دعویٰ نہیں کرے گی۔ ایہ فیصلہ اوہدے نانے ہوراں کجھ
مطالبے من پاروں قبول کر لیا سی پر اصل گل وچوں ایہ سی کہ عمر دا اوہدی ماں کول
رہنا اوہدی ماں دا اگوں رشتہ لبھن وچ رُکاوٹ پیدا کر رہیا سی۔ اِج کجھ بندے عمر
ٹوٹ لیجاوَن لئی آئے ہوئے سن۔

عمر دی ماں نے اوہنوں تیار کر کے سوہنے کپڑے پُوائے۔ ”عمر توں مینوں یاد
رکھیں گا۔۔۔۔۔“ اوہدی ماں نے اوہدیاں اکھاں وچ سُرمہ پاؤندیاں آکھیا سی۔
”ماں۔۔۔۔۔“ عمر صرف اینا ای آکھ سکیا تے اوہدے ہونٹھ کنبن لگ پئے۔
اوہدے جذبے پوری طرحاں لفظاں وچ نہ بدل سکے۔ سگوں زبان توں تلھک کے دل
تے دماغ دے سمندر وچ ڈُب گئے۔ فیر اکھاں وچوں ہنجو بن ڈھلکن لگ پئے تے
سُرمے دیاں لکیراں اُتے بہندے اوہناں توں وی اگانہ لنگھ گئے۔ ماں نے اوہدا
مُونہ چُمیا تے فیر عمر دے کپڑے ٹھپ کے اِک وڈے بیگ وچ رکھنے شروع کر
دے۔ عمر ویڑے وچ اُگے رُکھاں کول جا کھلوتا۔ اوہدی ماں نے چونہاں موسماں
دے کپڑے بیگ وچ رکھ دتے تے بوٹاں جُتیاں دا اِک وکھرا شاپر بنا دتا۔ سکول بیگ
وی اوٹھے لیا رکھیا۔

فیر چار چوہیرے خالی خالی نظراں نال ویکھنا شروع کر دتا۔ جویں کوئی شے رہ گئی
ہو دے تے اوہدا چیتا نہ آ رہیا ہو دے۔ فیر اوہدی نظر دیوار تے لگی عمر دی فوٹو تے
پئی۔ دو سالہ عمر ویڑے وچ لگے امرود دے بوٹے بیٹھ کھلوتا سی۔ ٹاہنیاں نال کچے کچے
امرود لگے ہوئے سن۔ عمر دے چہرے اُتے حیرت تے معصومیت سی۔

”ساڈا عمر مسکراتے نہیں رہیا پر فیروی فوٹو وچ کتی کھچ اے۔۔۔۔۔“ عمر دے پو

آصف نے اوبھی ماں ٹوں آکھیا سی۔

”ایہ فوٹو مینوں وی بڑی چنگی لگدی اے۔ امیدیاں دو وڈیاں فوٹوواں بنوا کے اک امی دے گھرتے اک اپنے گھر دیواراں اُتے لاواں گے.....“ عمر دی ماں راشدہ نے آکھیا سی تے فیر راشدہ خیالاں وچ ڈب گئی۔ اوہنوں بوہت کجھ یاد آونا شروع ہو گیا۔

”راشدہ..... ساڈی حیاتی وچ کتنا سکھ اے..... کتنا پیار اے..... میں کتنا خوش نصیب آں..... تیرا ساتھ ملیا اے۔ جی کردا اے بس تیرے کول بیٹھا رہواں..... ایہ دُنیا دے کم دھندے ای نہیں چھڈ دے..... پر ایہ سارا کجھ وی تے تہاڈی خاطر اے.....“ آصف نے پیار نال آکھیا۔ اوہ اگوں چپ رہی۔ ویاہ دے مگروں گزرن والا کجھ عرصہ انج دے جذبیاں نال ای بھریا ہوندا اے۔ ہر پاسے سبزہ ای سبزہ تے پھل کھلے وکھالی دیندے نیں۔ شادی شدہ جوڑے پرندیاں وانگوں نیلے اسمان اُتے اُڈدے محسوس کردے نیں۔ حیاتی اوہناں ٹوں اک مٹھا سُفنا لگدی اے۔

”ٹوں کوندی کیوں نہیں..... اج ایہناں ساریاں کم دھندیاں ٹوں چھڈ کے تیرے لئی میں ایہناں سوہنیاں وادیاں وچ آیا واں..... ایہتے آکے تے دل مستیاں کردے نیں تے گوئگے وی بولن لگ جاندے نیں..... آصف نے رومانیک ہوندیاں آکھیا۔

”سچ پچھدے او تے کجھ دساں.....“ راشدہ نے آکھیا۔

”ہاں، ہاں کیوں نہیں.....“ آصف نے آکھیا۔

”مینوں تہاڈے کولوں تے آون والے ویلے توں ڈر لگدا اے۔“

”جھلی ہو گئی ایس..... ڈرن والی کھڑی گل اے؟ آون والے ویلے وچ

سنہرے خواب ہوندے نیں۔ اُمنگاں، خواہشاں ہوندیاں نیں..... ون سونیاں رنگ برنگیاں اُڈیکاں ہوندیاں نیں..... ویکھدی نہیں لنگھے ہوئے ویلے نالوں اج دا زمانہ کتنا چمکاں مار رہیا اے..... پرانے لوکی تے ایویں اپنے ویلے دے گن گاؤندے

رہندے نہیں..... میں وی تے تیرے سامنے کھلی کتاب وانگوں آں..... سہاگ
رات توں پہلے دی ساری حیاتی دا اک اک ورق پلٹ کے تیرے سامنے رکھ دتا
اے۔ کوئی گل وی تیرے کول نہیں چھپائی فیروی تینوں ڈر لگدا اے.....“ آصف
نے آکھیا۔

”کھلی کتاب دے اگر کجھ ورقے چنگے نہ لکھے ہوون..... کسے دا دل
ڈھاران..... کسے دے خوف وچ وادھا کرن..... کسے دی حیاتی وچ زہر
گھولن..... اوہناں ٹوں پڑھن دی کھڑی لوڑ ہوندى اے..... پردے وچ ای
حُسن ہوندا اے۔ ایس لئی تے دُنیا جہان دیاں وڈیاں حقیقتاں پردے وچ چھپیاں
ہویاں نیں۔“ راشدہ نے آکھیا۔

”پڑھی لکھی زنانی دا ایہو ای نقصان ہوندا اے کہ اوہ دیلاں دیندی اے۔ اوہ
بندے دیاں سونہیاں گلاں ٹوں وی نہیں سراہندی۔ چل چھڈ ایہناں گلاں ٹوں تے
ہن اوہ درختاں دے جھنڈ ول چلیے۔ فوٹواں کھچے تے حیاتی دیاں پیاریاں یاداں
بنائیے۔“ آصف نے راشدہ دا بازو پھڑکے کھچیا تے ایس جھٹکے نے راشدہ ٹوں وی
حسین وادیاں وچوں کڈھ لیا۔ زندگی وچ آؤن والیاں تریڑاں راشدہ دی نظراں
سامنے گھمن لگ پئیاں۔ فیر رتاں بدلیاں تے آصف وی بدل گیا۔ ہن راشدہ نال گل
بات کردیاں اوہدیاں اکھاں اوہدا ساتھ نہیں سی دیندیاں۔ اوہدے اندر کوئی ہو ر ای
سما گیا سی۔ حیاتی دی نینہ کھوکھلے جذبیاں تے رکھن والے اپنی جھگی وی ساڑ لیندے
نیں۔ کامیاب ازدواجی حیاتی حقیقت پسندی تے سچے جذبیاں دے رلوں بیہ وچوں
پھندی اے۔ سوہنے تے پیڑھے رُکھ وانگوں سماج دے سینے اُتے اپنی شناخت
بناؤندی اے..... راشدہ نے آصف دے لکھ ترے کیتے۔ عمر دی حیاتی دے واسطے
دے ہر اوہ در کھڑکایا جہڑا اوہدے لئی آس ہو سکدا سی پر آصف کجھ سنن لئی تیار
نہیں سی۔ اوہ تے چمک دا شیدائی سی۔ بھٹکیاں جذبیاں نے اوہنوں انھا بولا کر دتا سی
تے اوہدے بھین بھراواں وی آصف ٹوں سمجھاؤن دی بجائے راشدہ وچ ای کیڑے

کڈھنے شروع کر دتے۔ فیر دوہاں خانداناں وچ نفرتاں ودھدیاں گئیاں تے اج
 راشدہ اپنے عمر دا سامان بنھ کے اوہنوں اپنے ہتھیں ٹور رہی سی۔
 ”عمر..... عمر.....“ راشدہ نے عمر ٹوں آواز دتی۔ عمر نے سارے رُکھاں ول
 اُداس نظراں نال ویکھیا تے فیر ہولے ہولے رُدا ماں کول آکھلوتا۔ ماں نے اوہدے
 سِر وچ ہتھ پھیریا۔ عمر نے اپنے ہنجواں ٹوں وگن توں ڈکن لئی اپنے ہتھاں دیاں
 مٹھیاں بنا کے اکھاں اُتے رکھ دتیاں۔ اندروں نکلن والیاں سسکیاں تے قابو پاؤن
 لئی اوہنے اپنا ساہ ڈک لیا پر اوہ جھٹا چر اپنے اُتے قابو نہ رکھ سکیا تے ہو کے لے کے
 رون لگ پیا۔

اوہدا سامان تیار سی۔ سب گھر والیاں اوہنوں پیار کیتا۔ عمر ٹوں پنچایت دے
 آئے بندیاں دے حوالے کیتا۔ راشدہ نے کمرے دے بوہے دی اوڑھ وچوں ویکھیا۔
 عمر پنچایتی بندیاں دے اگانہ نکتے نکتے قدماں نال رُدا مین گیٹ ول جا رہیا سی۔ راشدہ
 ٹوں انج لگا جویں اوہدے دل دی حرکت بند ہو گئی اے تے کالجاکٹ کے ڈگ پیا
 اے۔ لتاں بانہواں وچوں جان نکل رہی اے۔ عمر دے مین گیٹ وچوں نکلن توں
 پہلوں واء دا اک تیز بُلھا آیا۔ سارے رُکھ کنبن لگ پئے۔ ”شاں“، ”شاں“ دیاں
 آوازاں آہواں وانگوں بلند ہوئیاں۔ اک کچا امرود درخت نال ٹٹ کے ڈگا.....
 لڑھکدیاں ہوئیاں مین گیٹ وچوں باہر نکل گیا۔
 عمر دی اوہدے پچھے پچھے سی۔



حلف

”تئیں اٹارنی او؟“

کمرے وچ مٹک مٹک کے وڑدیاں تے تکلف دیاں ساریاں حداں پار کردیاں
اوہنے مینوں پچھیا تے گواہیاں دی اڈیک وچ بیٹھے پلے اکھاں پاڑ پاڑ کے ایکسے
مشین وانگوں اوہدے معائے وچ لگ گئے۔ رات دے گشت دیاں تھکاوٹاں دُھند
وانگوں چھٹ گئیاں۔

”جی... تشریف رکھو“ اپنے اگے پئی ہوئی اک خالی کرسی ول اشارہ کردیاں
میں آکھیا۔ اوہدے کرسی تے نیٹھن دا انداز کسے ماڈل گرل ورگاسی۔ مونڈھے تے لمکے
کالے بیک ٹوں اوہنے اپنی گود وچ رکھ لیا۔ سج ہتھ دی کہنی کرسی تے رکھ کے
اُنکلاں تے تلی دا پیالا بناندیاں چہرہ اوہدے اُتے رکھ دتا۔ اوہدی عمر کوئی ویسہ
ورہیاں توں بوہتی نہیں سی لگدی۔ سمارٹ سی۔ سانولے رنگ دے باوجود اوہدے
چہرے وچ بوہت کھچ سی۔

”دو منٹ انتظار کرنا... اک بیان دیکھ لواں۔“ میں اوہنوں آکھیا۔ کمرے وچ ہر
پاسے خوشبو کھلر گئی سی۔ کجھ پل لئی ایسہ مینوں ناگوار لگا پر تھوڑی دیر بعد ایہدا
احساس مُک گیا۔ ماحول دی بدلی انسانی کمزوری اے۔ اکثر تا ٹوں توڑن والی ہر چیز
بندے ٹوں چنگی لگدی اے۔ میں بیان پڑھ کے اُتانہ نظراں چُک کے اوہدے ول
دیکھیا۔

”اٹارنی صاحب! سدھی تے جی گل اے کہ مینوں ایس قتل بارے کجھ پتا
نہیں تے نہ ای میں کجھ دیکھیا اے۔“ اوہنے بڑے اعتماد نال گل کردیاں میرے
نیزے ہوندیاں آکھیا۔ اوہدے ساہواں داسیک خوشبو نال رل کے میریاں ناساں وچ
گیاتے میں پچھتے ہو کے کرسی نال ٹیک لا دتی۔ ”اٹارنی صاحب! تہاؤں خوشبو توں

الرجی تے نہیں۔ ایسہ تے پیرس دا بہترین سینٹ اے۔ ایہنوں ورتن والے دے دوالے لوکی انج بہندے نیں جویں شہد دوالے مکھیاں۔“ ایسہ کہہ کے اوہ مسکرائی۔ اوہدے منہ تے مسکان انج کھلردی گئی جویں وٹا دریا وچ سٹن نال لہراں دے دائرے کھلردے ہوئے کنڈھیاں تک چلے جاندے نیں۔ س

”چنگی خوشبو کنٹوں پسند نہیں تے نالے ہواتے چلدیاں ایسہ تے نہیں سوچنا کہ گلاب دی خوشبو لے چلو تے موتیے دی چھڑ جاؤ۔ ہوا چل دی اے تے اپنے نال ساریاں خوشبوواں ولھٹ کے اگانہ ودھدی جاندی اے۔ کئی واری تے مٹی تے بندیاں دی مہک وی ایہدے نال رل جاندی اے۔ جے تے ایسہ ہوا مستی نال ہولے ہولے کولوں لنگھے تے دل ٹوں ڈاڈھی چنگی لگدی اے۔ تے جے اوہ واء ورو لے وچ بدل جائے...“ میں اپنا فقرا ادھورا چھڑ کے اوہدے ول گوہ نال ویکھیا۔ اوہ کھل کے ہسی۔ انج لگا کہ اوہ کسے دفتر وچ نہیں بلکہ اپنیاں ہجولیاں وچ بیٹھی ہووے۔

”تیس پڑھے لکھے لوک او... دو جے ٹوں سمجھاؤں دا دل جان دے او۔ سچی گل جے میں تے آپ واء ورو لیاں دی ولھٹ وچ آگئی آں۔ تیس میرے اُتے اک مہربانی کر چھڑو تے میری گواہی کٹوا دیو۔ میں تہاڈا احسان کدی نہ بھلاں گی۔ میں سیموئل ٹوں قتل ہوندیاں نہیں ویکھیا۔“ اوہنے مینوں التجا کردیاں آکھیا۔

”تہاڈا ناں انیلا اے؟“ میں اوہنوں پچھیا۔

”جی“ اوہنے آکھیا۔

میں تہاڈا بیان پولیس فائل توں ویکھ لیا اے تے نالے تیس موقعے دے دواں تے گواہ او۔ تہاڈی گواہی نہ دین نال مقدمہ کمزور ہو جاندا اے تے نالے قتل ہوون والا تہاڈا بھراوی اے۔“ میں اوہدا اندر جگان دی کوشش کردیاں آکھیا۔

”اثارنی صاحب! میں کجھ ویکھیا ہووے تاں بیان دیواں پولیس نے آپے میرا بیان لکھ لیا اے۔ قتل ہوون والا میرا بھرا ہے تے ملزم میرا خاوند جے۔ خورے

تہانوں ایس گل دانہ پتا ہووے۔“ انیلا نے وضاحت کردیاں آکھیا۔

”مینوں سب پتا اے۔ کچھلی تاریخ تے تہاڑی بھرجائی نصرت مینوں سب کجھ

دس گئی اے۔“ میں اوہدے ول معنی بھرے انداز نال ویکھیا۔

”میری بھرجائی نصرت بڑی چنگی اے۔ اوہ میرے بھرا سیموکل دا بڑا خیال

رکھدی سی۔ میرے بھرا دے قتل دی وجہ نال اوہدا گھرا جڑ گیا۔“ اوہدے منہ توں

بھرجائی دی تعریف سن کے مینوں بڑی حیرانی ہوئی۔ نصرت نے میرے اگے انیلا دیاں

بڑیاں بدخویاں کیتیاں سن سگوں اوہنوں بدکردار تک آکھیا سی۔

”جے تئیں اپنے بیان توں مکر گئے تاں میں تہانوں منحرف گواہ قرار دوا کے

تہاڑے اُتے جرح کراں گاتے جدوں جرح کریئے تے گواہ دی حیاتی دا ہر انگ کھل

کے سامنے آجاندا اے۔ میرا خیال اے تئیں میری گل سمجھ گئے ہوو گے۔“ میں

اوہدیاں اکھاں وچ اکھاں پا کے گل کہتی۔

”لگدا اے کہ تہانوں نصرت نے میرے بارے بوہت کجھ دسیا اے۔ چلو جی جو

وی دے پر اوہ ہے بڑی چنگی۔“ انیلا نے ایسہ کہندیاں ہویاں کرسی نال ٹیک لادتی۔

اوہدے گلے دوالے ولھیٹے ہوئے دُپٹے دے دوویں کونے سڑک تے سدھے ہو گئے۔

اوہنے دُپٹا فیر گلے دوالے ولھیٹن دا جتن نہ کیتا۔

”تئیں نشے دے مقدمے وچ ملوث وی رہے او“ میں اوہدی گل دا جواب دین

دی بجائے اگلی گل کردتی۔

”اٹارنی صاحب! مینوں کوئی پارسائی دا دعویٰ نہیں۔ نہ ای مینوں کوئی اپنے

آپ نوں چنگا آکھن دا چاء اے ایس لئی کہ مینوں اپنے عملاں دا وی پتا اے تے

نالے اپنے گناہواں دا اعتراف وی اے۔ اسیں عیسائی لوک آں۔ سانوں پر مٹ ملیا

ہویا اے۔ جے میں ایہدا کوئی غلط فائدہ چکھیا اے تاں اوہدی میں آپ ذمے وار آں۔

جہڑے مقدمے ول تئیں اشارہ کر رہے او‘ اوہدے وچ میں بری ہو چکی آں نالے

نصرت اک شریف تے گئے۔ یلو زبانی اے تے اسیں روٹین دی زندگی دی ڈگر توں ہٹے

اُڈ دے پنچھی. مندا کراں گے تے آکھاں گے مندا کیتا اے. چنگا کراں تے چُپ وٹ
لواں گے۔“

”ایہہ مندا نہیں کہ تئیں اپنے بھرا دے حق وچ گواہی دینا نہیں چاہندے تے
خاوند نوں بچاونا چاہ رہے او۔“ میں سوال انیلا نوں کر دتا پر سچی گل ایہہ اے کہ
اوہدے اپنے بارے اعتراف نے مینوں متاثر کیتا سی. دنیا وچ اجے لوک بڑے گھٹ
نیں جڑے اپنیاں غلطیاں تے گناہواں دا کھلھے دل نال اعتراف کردے نیں تے
ایہہ گل ہو روی اوکھی ہو جاندی اے جدوں اعتراف کرن والی کوئی عورت ہووے.
میرے گل کردیاں نصرت وی کمرے وچ آگئی تے انیلا بولن دی بجائے چُپ ہو کے
بہہ گئی۔

”پولیس فائل توں تہا نوں گواہی دس دیاں؟“ میں نصرت نوں پچھیا.
”تئیں کچھلی واری وی مینوں گواہی بارے سیاسی ے نالے میرے وکیل نے
وی مینوں میری شہادت دس دتی اے۔“ اوہنے آکھیا.
”اثارنی صاحب! نصرت دے بیٹھیاں ای گل کرنی اے تے پہلے وی نصرت نوں
میں ایہہ گل کیتی اے۔“

”توں میرے بھرا سیموئل دی بیوی ایس. تیریاں بچیاں میرے بھرا دیاں نشانیاں
نیں. ایہناں دے مستقبل دی وی مینوں انج ای فکر اے جویں تینوں... میں چاہنی
آں کہ اپنا گھر ایہناں دے نال لا دیواں. نصرت میں تیری منت کرنی آں کہ میری
گواہی کٹوا دے تے ایس کٹرے وچ کھڑا نہ کر جتھے اک پاسے میرے بھرا دی لاش
وکھالی دیوے تے دوجے پاسے خاوند دا چہرہ. اک پاسے بھرا دیاں بچیاں نیں تے
دوجے پاسے میرا تن ورھیاں دا منڈا... تے نالے اثارنی صاحب! جے میں کجھ ویکھیا
ہوندا تاں وی کوئی گل سی. نصرت ایہہ کہندی اے کہ میں ایویں تیرا گھر اپنیاں
بچیاں دے نال نہیں لوانا چاہندی. توں ساڈے نال راضی نامہ کر لے تے راضی
نالے بد لے ایہہ گھر میریاں بچیاں دے نال لودے... دسو اثارنی صاحب! میں

مکان تے بچیاں دے ناں بغیر کسے شرطوں لانا چاہنی آں تے لواوی دتا اے... پر
خاوند ولوں ہو کے اپنے بھرا دے خون دی معافی بھر جائی کولوں منگاں تے نالے ایس
بدلے وچ مکان بچیاں دے ناں لواواں تے میرے بھرا دی روح مینوں سوال نہیں
کرے گی؟“ انیلا نے وضاحت نال گل کردیاں آکھیا۔

”اپنا گھر بھرا دے بچیاں دے ناں لوا کے توں اپنے بچے نال کتھے جاویں گی؟“
میں انیلا توں پچھیا۔

”ساڈا کیہ اے... اسیں تے اُڈدے پنچھی آں۔ کدھرے ہو ر آکھنا پا لواں
گے۔“ اوہنے آکھیا۔ اوہدا کھلا اعتراف تے آون والی زندگی دیاں اوکڑاں مشکلاں توں
بے فکری ایس گل دا ثبوت سی کہ اوہ اک عام عورت نہیں۔ لگی بدھی سماجی حیاتی
توں ہٹے ہوئے لوک اپنیاں ای بنائیاں ہوئیاں پگڈنڈیاں تے چلدے رہندے نیں۔
اوہناں توں کوئی پتا نہیں ہوندا کہ اوہ چلدے چلدے کسے جنگل وچ ٹر جاون گے یا
گلستان وچ... اوہ بس چلدے جانڈے نیں تے کئی کئی واری اوہناں پگڈنڈیاں وچ
آون والیاں کھائیاں وچ ڈگدے جانڈے نیں۔ خورے سدھے راہ دا اوہناں توں
پتہ ای نہیں یاں ڈنگے راہواں وچ چلن دا اوہناں توں سواد پئے جاندا اے۔ کدی
کدار انج وی ہوندا اے کہ سدھے راہواں تے چلن والے پگڈنڈیاں وچ گواچ
جانڈے نیں تے پگڈنڈیاں تے ڈنگے راہواں تے چلن والے سدھے راہواں تے آ
جانڈے نیں۔

”اسیں انیلا دا مکان ایویں اپنے بچیاں دے ناں نہیں لواں۔ پر اسیں ایہہ فیصلہ
کیتا اے کہ اسیں انیلا دی گواہی نہیں کروانی۔ ایہہ درخواست اے تے تئیں انیلا
دی گواہی کٹوا دیو۔“ نصرت اپنی گل کردیاں آکھیا تے انیلا نے بے وی نال میرے دل
دیکھیا جو یں اوہنوں شک ہووے کہ میں انکار کردیواں گا۔

”مقدمے دی آواز ہوون تے میں درخواست جج صاحب دے سامنے پیش کر
دیواں گا۔ تئیں گواہی لئی تیار رہو۔“

میں درخواست تے دستخط کردیاں آکھیا تے انیلا دی جان وچ جان آئی۔
 ”میں اپنی بھرجائی نصرت تے اٹارنی صاحب تماڈے دوہاں دی شکر گزار آں کہ
 تئیں مینوں اک امتحان وچوں باہر کڈھ لیا اے۔ نصرت تیری ایس نیکی نوں دلوں یاد
 رکھاں گی۔ ایسے برے لوک تھوڑے ہوندے نیں جہناں دے ضمیر مردا ہو جاندا
 نیں۔ حالات دے پھنڈے ہوئے عام برے لوکاں دے وجود وی کسے کوئے کھدے
 وچ انساناں نال پیار دے دیپ ضرور بل رہے ہوندے نیں۔ ایس معاملے وچ مینوں
 کمزور سمجھ کے معاف کردئیں۔“ انیلا نے شکر گزار ہوندیاں آکھیا تے نال ای بوٹا بنام
 سرکار دی اواز بلند ہوئی۔ انیلا دی گواہی ترک ہوئی تے نصرت دی گواہی ریکارڈ ہوئی۔
 ایس کیس وچ دو تین تاریخاں ہو رہیاں تے ایسراں واہوا دن لنگھ گئے۔

”ایسہ کیہ گل ہوئی؟ بندہ کسے تے نیکی کرے تے دل کھلھار کے کرے۔ جے
 میری گواہی کٹوا ای چھڑی سی تے فیر دوبارہ بلاون دی کیہ لوڑ پئے گئی سی۔ تماڈے
 کولوں مینوں ایسہ اُمید نہیں سی...“ انیلا نے کمرے وچ وڑیاں اکو ای ساہ وچ
 ساریاں گلاں کردتیاں تے نالے میرے اگے پئی کرسی اُتے کسے ناگن وانگوں پھن
 کھلھار کے بہہ گئی۔ اوہدے کول اوہداتن سال دا بچہ وی سی۔

”میں تے تماڈی گواہی مستغیث دی درخواست اُتے ترک کر چھڑی سی تے
 تہاؤں دوبارہ بلاون دی استغاثا نوں کوئی لوڑ نہیں سی...“

”تے فیر مینوں کہنے بلایا اے؟“ اوہنے میری گل نوں پورا ہوون توں پہلاں
 ای سوال کر چھڑیا۔

”تہاؤں تماڈے خاوند نے درخواست دے کے بلایا اے۔ اوہ اپنے حق وچ
 تماڈی گواہی کرانا چاہندا اے۔“ میں اوہنوں دسیا۔

”ایہدا مطلب ایسہ اے کہ اج گواہی دینی پئی اے۔“ اوہنے لے لے ساہ
 لیندیاں آکھیا۔

”ایہ بیٹا تماڈا اے؟“ میں اوہدی گل دا جواب دین دی بجائے اوہنوں پچھیا۔

”ایہہ میرا پتر اے۔ پچھدا سی میرے اباے نوں ہتھکڑیاں کیوں لگیاں نہیں۔ دسو اٹارنی صاحب! ایہدا ماما مر گیا۔ پیو ملزم بن کے کٹہرے وچ کھلوتا اے۔ ماں گواہ بن کے عدالت وچ کھلوتی اے۔ حیاتی نے ایہنوں کیہ دکھایا اے۔ ایہدا قصور کیہ اے۔ مینوں اپنی حیاتی دی تے پرواہ نہیں پر ایہدا کیہ بنے گا۔“ انیلا نے گل کردیاں میرے دل دیکھیا۔

”تئیں ایہنوں اپنے نال کیوں لے آئے او؟“ ایہنوں کے کول چھڑ آونا سی۔
میں آکھیا۔

”نہیں اٹارنی صاحب! جواج دیکھے گا، اوہدا ہیولا ایہدے دماغ وچ رہوے گا۔ میں چاہنی آں کہ ایہ ہیولا ایہدے دماغ وچ رہندیاں ای پرورش پاوے۔“ انیلا نے آکھیا۔

میں دوبارہ دوجے کیساں دیاں فائلاں دیکھن لگ پیا۔ کجھ دیر بعد بوٹا بنام سرکار دی اواز پئی۔ انیلا عدالت وچ ٹر گئی۔ ملزم دا وکیل تے مدعی دا پرائیویٹ وکیل وی موجود سن۔

”انیلا نے حلف چکیا تے ملزم دے وکیل نے پچھیا۔ ناں، ولد، قوم، عمر، پیشا، رہائش تے فیراوہ آپ ای بولدی چلی گئی تے اوہنے ضابطہ فوجداری دی دفعہ 161 بیٹھ ریکارڈ ہو یا بیان ای دوہرایا کہ اوہدے بھرا سیموئل نوں اوہدے خاوند بوٹا نے 30 بور پستول دے تن فارما کے ہلاک کیتا اے تے اوہنے ایہہ واقعہ اپنے گھر دے کوٹھے توں دیکھیا اے جتھوں سیموئل دے گھر دا ویٹرا دکھالی دیندا سی۔ انیلا دا بیان سن دیاں اوہدے خاوند بوٹا نوں ترلیاں آگیاں۔ اوہنے دھون تھلے سٹ دتی تے پاٹیاں پاٹیاں نظراں نال زمین نوں تگن لگ پیا۔ موت دا خوف موت نالوں وی بھیانک ہوندا اے تے فیرنال جدوں ایس گل دا پتا ہووے کہ اوہدی موت کسے نظریے، سوچ یاں وڈے کم دے نتیجے وچ نہیں، کسے جرم پاروں آ رہی اے۔

اوہدا خیال سی کہ اوہدی بیوی نے اوہدے خلاف گواہی نہیں دتی تے ایس لئی

اوہدے حق وچ گواہی دے دیوے گی۔ پر ہن تے اوس گواہ نے اوہدے خلاف گواہی
دتی سی جہڑا اوہنے آپ بلوایا سی۔ اپنے دفاع وچ پیش کرن لئی اوہدے کول ہن کجھ
نہیں سی رہ گیا۔ میں اپنی تھاں حیران اپنے دفتر وچ آ گیا۔ کرسی تے بیٹھیا تے انیلا دے
غیر متوقع بیان بارے سوچیں پے گیا۔


”اٹارنی صاحب! انیلا نے کمرے وچ وڑدیاں آکھیا تے کرسی تے بیٹھن دی
بجائے میرے سامنے کھلو گئی۔ اوہداتن سال دا بچہ وی اوہدے نال سی۔ میں نظراں
جک کے اوہدے ول گوہ نال ویکھیا تے کجھ نہ بولیا۔

”اٹارنی صاحب! تہائوں غصہ ہووے گا کہ میں تہائوں آکھی سی کہ میں کجھ
نہیں ویکھیا تے ہن میں ایسہ بیان دے دتا اے...“ انیلا نے میری چپ پاروں آپ
ای کہہ دتا۔

”غصہ تے نہیں، حیرانی ضرور اے... جدوں کوئی اپنی ذات دا دفاع نہ کرے،
اپنے برے عملاں توں منے، اپنے بھرا دی اولاد لئی اپنیاں آسائشاں قربان کرن لئی
تیار ہووے تے ایڈا جاندار تے ایڈا سچا نظر آون والا کردار ہمیشہ انج ای وکھالی دینا
چاہیدا اے تے نالے تہائوں پتا کہ تہاڈا بیان تہاڈے خاوند توں پھاہے لوا دیوے
گا...“ میں ایس انداز نال اوہنوں مخاطب ہو یا کہ ساری گل نتر کے میرے سامنے آ
جاوے۔

”اٹارنی جی! اسیں ماڑے لوک آں... عیسائی آں... حلف چک کے جھوٹھ
نہیں بولدے... بھاویں ساڈا کجھ نہ رہوے تے تئیں ہن ویکھ ای لیا اے...“ ایسہ
کشدیاں اوہدیاں اکھاں وچوں ہنجو نکلنا شروع ہو گئے۔ ”تہاڈے نال جہڑی غلط بیانی
کیتی سی، اوہنوں معاف کر دینا...“

ایسہ کشدے ہوئے اوہ بھاری قدماں نال چلدی کمرے وچوں باہر نکل گئی۔



بندیاں وچکار لکیراں

اوہ کلی سی... تے کلم کلی اک کرسی تے بیٹھی سی۔ چھ ست ورہیاں توں ودھ نہیں سی لگدی۔ میز دوالے پٹیاں باقی ساریاں کرسیاں خالی سن۔ میز تے کوئی کھان والی شے وی نہیں سی۔ اوہ پٹ پٹ فضاواں وچ گھور رہی سی۔ ایہہ نیانی کون ایس؟ رات دا ویلا اے۔ ایہدے نال کوئی وی تے نہیں۔ میں ریسٹورنٹ دے باہر لان وچ یا کرسیاں تے بیٹھے لوکاں ول اک نظرے ویکھیا۔ ٹھنڈی ہوا دا اک بلا ایا۔ گرمیاں دا موسم اپنا بوریا بستر لھویٹ رہیا سی۔ خزاں رت اپنیاں اداسیاں فضا وچ رچان لئی اکٹھیاں کر رہی سی۔ دوہاں موسماں دا وچکار لا ویلا وی اجہیا ہوندا اے جہڑا بندے نوں بے چین کر دیندا اے۔ تبدیلی دا عمل سوہنا وی ہوندا اے تے کوڑا وی۔ ویلے دے لنگھن دا احساس وی دیندا اے تے نویں خواب وی دکھاند اے... پر میں کوئی سپنا تے نہیں سی ویکھ رہیا۔... میرے سامنے اک جیوندی جاگدی نکلی جی نیانی میز تے دوویں کہنیاں رکھ ے کرسی دے سرے تے بیٹھی ہوئی سی جے اوہ کرسی نال ٹوہ لاندی تے اوہدے پیر زمین نال نہ لگدے اوہدے نیسٹھن دا انداز کسے سیانے تے ذمہ دار بندے وانگ سی۔ اوہد ارنگ سانولا سی تے پیلاہٹ چرے تے صاف پئی دسدی سی پر اوہدیاں اکھیاں وچ حیران کردین والی چمک سی۔ جہڑی کسی بڑی سوہنی بازار دی گڈی دیاں اکھیاں وانگ سی۔ اوہ لوکائی دی کافی ونڈ توں اوقف نہیں سی۔ اوہنے فراک تے سوہنا ای پایا ہو یا سی پر کجھ لماتے کھلا سی۔ انج جاپدا سی کہ اوہنے کسے اپنے توں وڈی کڑی دے لبتے کپڑے پائے ہون۔

”ایسہ نکلی جی نیانی کلم کلی، رات دا وقت تے فاسٹ فوڈ ریسٹورنٹ...“ ایسہ گل میری سوچ دے دائرے وچ نہیں سی آرہی... اچانک اوہدی نظر میرے ول پئی چمکدیاں اکھیاں مسکراہٹ تے شرارت توں نا آشنا چہرہ... میں اوہدے کول جان دا فیصلہ کیتا ای سی کہ ویٹرنے اوہدی میز تے فرائز تے کچج اپ، پانی دا جگ تے گلاس رکھیا ”کیتھے گواچ گیا ایس تے کھڑیاں سوچاں وچ ڈب گیا ایس“ میرے سامنے بیٹھے میرے یار نے پچھیا۔ ”توں تے ہر ویلے غیر حاضری رہنا ایس... بوتل چوں ساری گیس نکل گئی آ...“ دو جا سنگی بولیا۔ میں بوتل چکی تے فنانٹ پی کے لانجھے رکھ دتی۔ ریاض ظفر تے زاہد سلیم کسے ملکی مسئلے تے اک دوجے نال بحث کرن لگ پئے... میں فیروسی نیانی ول ویکھیا۔ اوہ اپنے نکلے نکلے ہتھیں نال چپس ٹوں کچج اپ لا کے کھا رہی سی۔

”تیرا کوئی سنگی نہیں؟ تیری ماں کیتھے وے؟ تیرا پو کیتھے وے تیرے بھین بھرا رات دا ویلا توں کلی... توں کسے شہر دی نہیں لگدی... کسے پنڈ دی ایس... مینوں ڈاڈھا یقین اے... میں تیرے چہرے ٹوں پڑھ لیا اے تیری اکھاں دی چمک نے مینوں دس دتا اے... تیرے ماں پو تیرے کول نہیں رہندے... توں کسے دے کول ایس پر کلی... تینوں ہنیرے کولوں ڈر نہیں آوندا...؟ میں جد تیرے جڈا ساں میری ماں مینوں بھیرے کولوں ڈراؤندی سی۔ میں شرارتاں چھڈ کے ماں نال چنبر کے سوں جاندا ساں توں تے کلی ہنیرے وچ فرائز کھا رہی ایس۔ توں فرائز کھا کے خوش نہیں۔ مینوں پتہ اے توں اداس ایس۔ تینوں ماں یاد آرہی اے؟ اوہ ضرور افقوں پار کسی نکلی جتی بستی وچ منجی تے لمی پئی ہوئی جن ول منہ کر کے تینوں یاد کر رہی ہونی اے...“ پتہ نہیں میں ایہنوں ویکھدا تے سوچدا جا رہیا ساں... میرا مشاہدہ میری حساسیت نال مل کے لفظاں دی صورت اختیار کر رہیا سی پر ایسہ گل سمجھ وچ نہیں سی آرہی۔ نکلی جتی نیانی، رات دا ویلا تے کلی... ”ننھی ادھر آؤ، یہ برگر لے لو“ اک عورت دی آواز آئی اوہ اُنھی پندراں

وہیہ قدم رُ کے لان دے اوس پاسے گئی جتھے دس باراں بندے زنانیاں بچے کرسیاں اُتے بیٹھے ہوئے سن۔ میزاں اُتے برگر، فرائی چکن، فرائی فش تے بوتلاں پئیاں ہوائیں سن تے سارے خوش گپیاں وچ رُجھے ہوئے سن۔ اوہ برگر لے کے دوبارہ اپنی جگہ اُتے آ کے بہہ گئی۔ ایہہ برگر کسے دے نہ کھان پاروں اوہنوں مل گیا۔ میں ساری گل سمجھ گیا کہ ایہہ کڑی کون اے تے ایہہ لوک کون نیں۔ لیہناں لوکاں اوس کڑی نوں اپنے توں دور تے الگ بٹھایا ہویا سی، جویں اوہ کوئی دوجی مخلوق ہووے مینوں انج لگا میرا دل کسے شیشے وانگ ٹٹ گیا تے کرچی کرچی ہو گیا اے۔ ایہہ کرچیاں میرے پورے وجود وچ کھب گئیاں نیں۔ جہناں میری روح نوں ڈاڈھا زخمی کر دتا اے۔ میں اسماناں ول ویکھ کے چاہیا کہ ساریاں ستاریاں نوں نوچ لواں تاں جے اینا ہنیرا چھا جائے کہ ایہہ مکروہ منظر ویکھن نوں نہ ملے ”کہتھے اپڑ گیا ایس؟“ ریاض نے مینوں اُٹھدیاں ویکھ کے آکھیا۔

دس منٹ لئی مینوں کلا چھڑ دیو۔ میں ہنے تھانوں دسناواں... میں ایہہ کہہ کے کجھ دور جا کے ننھی دے نیڑے والی اک کرسی تے بیٹھ گیا... ریاض تے زاہد اک دوجے نال گلاں وچ مصروف ہو گئے۔

ننھی نے غور نال میرے ول ویکھیا تے ناگواری دا اظہار نہ کیتا۔
 ”ننھی توں ننھی جو ہوئی... تینوں پتہ ای نہیں... تیرے نال کیہ ہویا اے...
 ایہہ لکیراں نیں... بندیاں وچکار لکیراں ظلم دیاں لکیراں...“ میرے منہ وچوں نکلدے فقریاں نوں سن کے اوہنے حیرت نال میرے ول ویکھیا۔ اوہنوں کجھ سمجھ نہ آئی پر اوہدے اُتے کجھ اثر ہویا۔

”بابو جی تئیں میرے نال گل کردے او...“ اوہنے معصومیت نال پچھیا۔ مینوں انج لگا کہ اوہے ننھے جتے دماغ وچ میرے فقرے پھراں وانگ ڈگے نیں تے لہراں پیدا ہوئیاں نیں ”ننھی تیری ماں تے پو کہتھے نیں؟ کیہ کردے نیں اوہ... تیرا ماں کول جان نوں جی کر دتا اے۔“ اک دم میں کئی گلاں پچھ لتیاں تاں جے ننھی نوں

کوئی بلانہ لوے۔ میں ننھی دل ویکھیا تے اوہ چُپ بیٹھی سی۔

”ننھی توں میری گل دا برا منایا اے...“ میں ندامت نال پچھیا۔

”نہیں بابو جی... مینوں کدی کسے پچھیا ای نہیں... تئیں کیوں پچھدے او...“ اوہنے ٹھہر ٹھہر کے گل کیستی زمانے دیاں ٹھوکراں نے اوہدے بچپن نوں پختگی وچ بدل دتا سی۔

”ننھی... اسیں سارے انسان آں... تے ساڈے ساریاں دے وچکار اک رشتہ اے... انساناں دا رشتہ... انسانیت... کجھ لوک ایس رشتے نوں یاد رکھدے نہیں تے کجھ جھُل جانڈے نیں... ہر انسان دا فرض اے کہ اوہ دوسرے انسان دے دُکھ درد وچ شریک ہووے۔“ میں ننھی نوں سمجھاؤن والے انداز وچ آکھیا... ننھی دیاں اکھیاں وچ پانی تیرن لگا۔

”اسیں سارے انسان آں... میں وی؟...“ ننھی نے پچھیا۔

”ہاں سارے...“

”بابو جی، بابو جی...“

”ہاں ہاں... بول“

”میری ماں بڑی چنگی اے... اوہ میرے چھوٹے بھین بھراواں نوں تے مینوں بڑا پیار کردی اے... میرا ابا نشہ کردا سی... اوہ کوئی کم نہیں سی کردا... نشہ کر کے تے سارا دن منجی تے پیا رہندا سی... میری ماں لوکاں دے گھر کم کردی سی۔ اک دیہاڑی میرے ابا نے میری ماں کولوں نشے لئی پیسے منگے۔ میری ماں دے انکار تے اوہنے ڈنڈے مار مار کے لتاں باہواں تروڑ دتیاں... میرے مامیاں میرے ابا نوں جیل بھجوا دتا... تے میری ماں اج وی منجی تے پئی اے...“ ننھی دیاں اکھیاں وچوں اتھرو کرن لگ پئے تے اوہدیاں گلھتاں تے آگئے۔

”ساڈے پنڈ وچ اک مائی اے جھڑی چھوٹے بچیاں نوں شہر وچ کم لواندی اے... میری ماں دے کسں تے اوہ ساڈے گھر آئی... جد اوہ میرے کپڑیاں دی

پوٹلی ہتھ وچ پھڑ کے مینوں نال لے کے چلن لگی تے منجی تے پئی ہوئی میری ماں نے ہوکا لیا... میں نس کے اپنی ماں دے پیراں نال چنڑ کے رون لگ پئی۔ مینوں پہلی واری نکلی جہی عمروچ پتہ لگا کہ وچھڑنا کیہ ہوندا اے۔“

”جے انج ای ہو کے لئے... تے ہو کے لیندی لیندی مرجائیں گی۔ دل وڈا کر جے منجی توں اٹھنا ای...“ مائی نے میری ماں نوں آکھیا تے نالے مینوں باہواں توں پھڑ کے گھسینا شروع کر دتا۔

”چل نی سدھی طرحاں رُجے ماں دا خیال ای تے...“ مائی نے آکھیا تے میں اپنی ماں ول ویکھیا۔

”ننھی پتر جا... رات نوں چن ول ویکھیا کریں... میں وی ویکھیا کراں گی... تے توں مینوں جتھے وی ہو ویں گی نظر آویں گی... چن وی دوہاں نوں نظر آوے گا... چن دا رشتہ دوریاں ختم کر دے۔“ ماں نے آکھیا۔

”عنایتے... شہردی دنیا وچ بڑے چن ہوندے نیں... سوکھی ہو جاویں گی... دل چھوٹا نہ کر...“ مائی نے آکھیا تے میں بے بس ہو کے اوہدے نال رُپئی...“

ننھی نے سسکیاں لیندیاں آکھیا۔

”باؤ جی... اک گل چُچھاں۔“

”پُچھ پتر!“

”تئیں مینوں اپنی دھی سمجھدے او۔“

”ہاں ہاں کیوں نہیں۔“

”تماڈے کتے بال نیں؟“

”میریاں تن دھیاں نیں۔“


”میرے جڈی وی کوئی ہے...“

”ہاں ہاں بالکل تیرے جڈی وی ہے اے...“ ایہہ سن کے ننھی نے اپنی چچی

وچ پئی ہوئی سلور دی چھاپ اُتاری ”ایہہ اوہنوں پا دینا...“ اوہنے آکھیا میں اوہ

سلور دی چھاپ اوہدے کولوں پھڑلئی۔

”ننھی ادھر آؤ... یہ شاپر پکڑ لو...“ اک عورت نے آکھیا ننھی سر دے اشارے نال سلام کر کے دوڑی ہوئی گئی تے شاپر چُک لیا۔ اوہنے اک نظر چُک کے میرے ول ویکھیا تے فیر شاپر پھڑ کے خاموشی نال اوہناں لوکاں دے پچھے پچھے رُنا شروع کر دتا... اوہدے اک پاسے زندگی دیاں لوڑاں سن تے دوسرے پاسے ظلم دیاں لکیراں۔



ساز

”باؤ جی..... باؤ جی..... میرا گھوڑا مر گیا اے.....“ اوہدے منہ وچوں لفظ
انج نکلے جو یس چینی وچوں دھواں. اتھرو برف وانگوں اوہدیاں اکھاں وچ جم گئے تے
اوہ پتھرا گیا.

”تیرا گھوڑا فیر مر گیا اے.....“ میں حیرت نال اوہدے ول ویکھیا تے اوہ کجھ نہ
بولیا، اوہنے دندان تھلے جیبھ دے لئی سی تے کسے بُت وانگوں کھلوتا دکھالی دے رہیا
سی. ایس بُت دا دل ڈاڈھا تیزی نال دھڑک رہیا سی. اندر دا ساڑ خون وچ رل کے
ناڑاں تائیں پہنچ گیا سی. ایہدے نال اوہدا سارا جُتھ تپ رہیا سی.
”توں فکر نہ کر..... سب ٹھیک ہو جائے گا.....“ میں اوہدے موڈھے نوں
ہلانڈیاں تے تسلی دیناں آکھیا. اوہ فیروی نہ کویا.

”یار انو دل وڈا کر..... ہمت کر..... نواں گھورا خریدن دا کوئی نہ کوئی سبب
ضرور لگے گا.....“ میں انو ول ویکھدیاں آکھیا.

”باؤ جی..... ایسہ گل تے تئیں اودوں وی آکھیا سی جدوں میرا پہلا گھوڑا مر
سی..... تے فیر دوجا..... تے اج وی تئیں.....“ انو نے ایسہ کہندیاں اپنی گل
ادھوری چھڈ دتی. اوہدیاں اکھاں وچ جمی برف گھلنا شروع ہوئی. تھوڑے جے ہنجو
اوہدیاں اکھاں وچ نکلے تے دوہاں گلھتاں اُتے لکیراں بناؤندے چلے گئے. میں چاہندا
ساں اوہ کھل کے بولے. اوہدا دل ہولا ہووے. ”تینوں اوکڑاں تے ضرور آئیاں
نیں..... پر کوئی نہ کوئی سبب پیدا ہو ای جاندا رہیا..... تے حیاتی دی گڈی ٹردی

رہی اے.....“ میں اوہنوں اُمید دو اندیاں آکھیا۔

”کھڑی حیاتی..... تے کھڑی گڈی، گڈی ٹردی رہی..... پچھلے تن ورھیاں
 وچ تن گھوڑے مر گئے نیں..... پہلا گھوڑا مریا تے بالاں دے امتحان دے نیڑے
 سن۔ اوہناں توں سکول نہ پہنچانداتے اوہ کوئی دو جاٹا ننگا لوالیندے..... انج دی گڈی
 والیاں کم دا مندا کر چھڈیا اے..... بچے چنگ چیاں دے شوقین ہوندے جا رہے
 نیں..... ساڈے جے ماڑے لوکاں دے گھر پیسا دھیلا کتھے۔ کوئی لوڑ جاگے تے سارا
 ٹبر سر پھڑکے بہہ جاندا اے۔ پہلا گھوڑا مریا تے بیوی دیاں باہواں خالی ہو گئیاں۔ ویاہ
 دی نشانی چوڑیاں ساڈے کولوں کھس گئیاں۔ دو جا گھوڑا مریا تے گھر دیاں کئی شیواں
 وک گئیاں۔ قرضے ہیٹھ آگیا تے ہن میرے کول کجھ وی نہیں۔ تھلے آوے تے پیڑ
 دا وی پتا اوہنوں لگدا اے۔ ساڈے غریباں دی گڈی پڑول نال نہیں باہواں نال
 دھکیلی جاندی اے۔ آساں، اُمیداں دا زور تے لوڑاں دا خوف وی امیدے وچ رل
 جاندا اے۔ پر ہر چیز دی حد ہوندی اے نا باؤ جی.....“ انو بولدے بولدے سوالیا
 انداز وچ چپ کر گیا۔

”تیریاں گلاں وچ سچائی اے..... دُکھ اے..... پر ایسہ گل پلے رکھ لوں ہر
 چیز دی اوہو ای حد ہوندی اے جھڑی اسیں سمجھ لینے آں.....“ میں اوہنوں
 سمجھاؤن والے لہجے وچ آکھیا تے نالے اوہدا ہتھ پھڑکے گھر دے پچھلے گیٹ توں
 اندر لے آیا۔

کارنر مکان ہون پاروں گھر دے دو بوہے سن..... مکان دیاں باہر لیاں دیواراں
 جتھے ملدیاں نیں او تھے پچھلا بوہا اے۔ پچھلے بوہے تے باہر لیاں دیواراں اُتے سایہ
 دار ویل پھیلی ہوئی اے۔ مینوں بیٹھک وچ نیسھن دی بجائے ایس ویل دی چھاویں
 بہنا بوہتا چنگا لگدا اے۔ میں تے انو منجی ڈاہ کے ایس ویل جھلے بہہ گئے۔ کجھ دیر بعد
 میری وڈی دھی دو کپاں وچ چاہ پا کے لے آئی جھڑی انو دے ٹانگے تے بہہ کے
 سکول جاندی سی۔

”باؤ جی! کسے دے گھر دا کماؤن والا جی مر جائے تے اوہدی دنیا ہنیر ہو جاندی اے۔ لوکی آوندے نیں تے گھر والیاں نوں دلا سے دے دلا کے رُ جان دے نیں۔ جے کر کے نے دلجوئی کیتی اے تے ساڈے نال کیتی اے، شیرے دے مرن دا افسوس نہیں کیتا، گھوڑا ساڈے گھر دا فرد ہوندا اے باؤ جی.....“ انو نے اُداس ہوندیاں آکھیا تے نالے چاہ پین لئی کپ چکيا۔

”ایسہ ساریاں گلاں احساس دیاں نیں۔ مشیناں نے ترقی تے کیتی اے پر انسان بڑا پچھتے رہ گیا اے۔ انسان انسان دے نیڑے جاون دی بجائے اک دو جے توں دور ہوندا جا رہیا اے، اپنے اپنے خول وچ بند جویں اکو جہیاں شیواں نوں ون سونے ڈبیاں وچ بند کر دتا جاوے..... میں اپنی گل مُکا کے کپ چکيا تے چاہ دی چسکی لئی۔“

”باؤ جی..... میں ان پڑھ بندہ واں پر تہادی گل میرے دل نوں لگی اے..... ویکھو نا باؤ جی..... میرا مسئلا حل ہوندا کہ نہیں پر تہاڈے نال گل بات کر کے میرا دل حوصلے نال ٹھہر گیا اے۔ بندے نوں بندے دے نیڑے آونا چاہیدا اے تے اک دو جے دا دُکھ درد سمجھنا چاہیدا اے۔ ایہو ای حیاتی اے۔ باقی کم نصیباں دے نیں.....“ اوہنے آکھیا۔

”توں فکر نہ کر۔ گھوڑا لین دا کوئی نہ کوئی سبب ضرور پیدا ہووے گا۔“ میں چاہ مُکاندیاں انو نوں آکھیا۔

”باؤ جی مینوں اُمید اے کہ تئیں گھوڑا خریدن تائیں ضرور اُڈیکو گے تے بچے میرے ای ٹانگے تے گھلو گے پر میں دو جے بالاں دا کچھ نہیں آکھ سکدا۔ چلو جو اللہ نوں منظور اے۔“ اوہنے آپ ای سوال کیتا تے آپ ای جواب دتا۔ اوس دا اک بوہا کھلدا وکھائی دے رہیا سی۔ ماڑیاں دی حیاتی وچ آس مُک جائے تے حیاتی مُک جان دی اے۔ فٹ پاتھاں تے بیٹھے قسمتیں دا حال دسن والیاں نوں اپنی قسمت دا وی پتا نہیں ہوندا پر فیرونی ماڑے لوکاں دے لکیراں والے ہتھ اوہناں اگے سوالیا نشان بن کے آوندے نیں۔ ایس لئی نہیں کہ ایسہ آپ بنے نجومی اوہناں نوں آدن

والے ویلے دی خبر دے دیندے نیں۔ اصل گل تے ایسہ وے کہ نجوی آس اُمید دے اوہ دیوے بالدے نیں جہناں دی مدھم تے ٹمٹماؤندی روشنیاں وچ لیہناں نوں تلاش لگ جاندی اے تے اوہ اپنے سرتے اوکڑاں، مصیبتاں دیاں پتنداں چکدیاں سراب نوں پانی سمجھ کے تپدی ریت وچوں گزر دے سدے چلے جاندے نیں۔ خور اوہناں نوں کجھ لبھدا اے کہ نہیں پر انج ای حیاتی نال لڑیاں، گھلدیاں اوہناں دا کنا سارا پینڈا مک جاند اے۔

”باؤ جی..... مینوں ہسپتال والی گل کدی نہیں بھلدی..... جدوں میری لت ٹٹ گئی تے تئیں مینوں آکھیا سی کہ ساڈے باؤ لوکاں دیاں جیباں وی خالی ای ہوندیاں نیں۔ سگن ساڈے حالات تہاڈے جے ای ہوندے نیں۔ فرق صرف ایہنا ای ہوندا اے کہ تہاڈے حالات وکھالی دیندے نیں تے ساڈے وکھالی نہیں دیندے پر فیروی انو تیرا علاج میں سول ہسپتال وچوں مفت کراواں گا..... تے باؤ جی میں تہاڈے نال ہسپتال دے سب توں وڈے ڈاکٹر دے کمرے وچ پہنچیا۔ اوتھے ہو روی کئی ڈاکٹر بیٹھے سن۔ تئیں بولنا شروع کیتا تے فیرو بولدے چلے گئے۔ وڈا ڈاکٹر تے دو جے ڈاکٹر تہانوں گوہ نال سن دے رہے تے فیرو وڈے ڈاکٹر اپنے او سے دفتر وچ مینوں لٹا کے میری ٹٹی لت دا معائنہ شروع کر دتا تے نالے اپنے عملے نوں ہدایت کیتی کہ ایہدا چنگی طرحاں علاج معالجہ کیتا جاوے..... تے فیرو تئیں آکھیا ”ایہدی دوائی دا وی چارا کیتا جائے۔ مہینے دی اخیرلی تاریخ اے..... میری حالت وی ایہدے ورگی اے۔“ اوتھے بیٹھے ڈاکٹر ایسہ گل سن کے ہس پے تے اک ڈاکٹر نے آکھیا سی ”تئیں تے چنگے بھلے افسرا.....“ تے تئیں نما جہیا مسکرا کے آکھیا سی ”چنگے بھلے انج دے ہوندے نیں۔“ تے فیرو وڈے ڈاکٹر نال دو جے سارے ڈاکٹر وی کھڑکھڑا کے ہس پے۔“ انو نے تفصیل نال گل کردیاں میرے ول ویکھیا۔

”بندے تے ویلے ہوندے نیں۔ سارے کم سوارن والی اللہ دی ذات اے۔“

میں انو نوں آکھیا۔

”اچھا باؤ جی. میں چلنا واں.“ انو نے اجازت لیندیاں آکھیا. فیر انو نے کئی دیہاڑیاں اپنے ساتھی ٹانگے والیاں دے ترلے پاؤندیاں گزار دیتیاں.

اوہدے ٹانگے تے چوداں پندراں بال جاندے سن. ہن اوہ ون سوتے ٹانگیاں تے جاندے سن تے انو وی اوہناں دے نال ہوندا سی. اوہدے کول گھوڑا خریدن لئی پیسیاں دا چارا نہ ہویا. اوہدے ساتھی ٹانگے والے وی اوہدے توں کتران لگ پئے. فیر انو نے اپنے اک ساتھی ٹانگے والے نال ایہہ گل متھ لئی کہ انو دے ٹانگے دے بال اوہ اوس ویلے تائیں لے جاندا رہوے گا جد تائیں اوہ نواں گھوڑا نہیں خرید لیندا تے ایس وچکار اوہدا ساتھی ٹانگے والا شیدا ای بالاں نوں سکول چھڈن دا معاوضہ لوے گا. ہن نواں ٹانگے والا شیدا میریاں دھیاں نوں سکول لے جاندا سی.

کافی دنوں توں انو وکھالی نہ دتا تے نہ ای اوہدے بارے کجھ پتہ چلیا.

”ابا جی..... اسیں اج چاچے انو نوں ویکھیا اے. اوہ سکول دے باہر ولے گیٹ دے لاگے صفائی کر رہیا سی. ایہ سکول وڈے پارک دے نیڑے وے.“ میری دھی نے آکھیا جھڑی سکول جاؤن دی تیاری کر رہی سی. میں ایہہ سن کے سوچیں پے گیا.

”مئی دا مہینہ وی عجب ہوندا اے. گرمی آوندی اے. کئی گنا بوہتے بل آوندے نیں. بالاں دیاں تن مہینیاں دیاں فیاں منگیاں جاندیاں نیں. بھڑولے وچوں کنک مک جاندی اے. سارکاری بندے لئی تے ایہہ مہینہ چوکھا ای بھاری ہو جاندا اے..... تے فیر انو تیرا گھوڑا ایسے ای مہینے مرنا سی..... میں اپنے آپ نال گلاں کردیاں آکھیا.

”چلو بچیو چلو“ شیدے نے چھانٹے دا لکڑ والا حصہ گیٹ نوں مار دیاں آکھیا.

”تھوڑی دیر اڈیک لے. بال حالاں تیار ہو رہے نیں.“ میں باہر نکل کے شیدے نوں آکھیا.

”ٹھیک اے باؤ جی تے ہن تماڈے بالاں نوں میں ای سکول لے جاواں کریا

گا۔ انو نے ٹانگا چار ہزار وچ مینوں وچ دتا اے۔ کئدا سی نکا بال بیمار ہو گیا اے۔“
 شیدے دی گل سن کے میرا اوتھے کھلونا اوکھا ہو گیا۔ میں اندر آیتے ہاتھ روم وچ
 وڑ کے کئی دیر ہنجو وگاندا رہیا تے منہ دھوندا رہیا۔ فیر ایسہ گل سوچدا رہیا کہ کدی
 کدار محنت وی بندے دا ساتھ کیوں نہیں دیندی بھٹڑے حالات کیوں آسیب
 وانگوں بندے نال چٹبڑ کے اوہنوں رواندے نیں۔ خورے ایسہ دنیا دے سٹیج اُتے
 ہون والے ون سوتے کرداراں دی ونڈا اے۔ ایسہ گل سوچ کے میرے اُتے
 مایوسی چھا گئی۔ میں سارا دن بزار رہیا تے کوئی کم وچ نال نہ کیتا۔

”ابا جی۔ چاچا انو آیا اے۔“ باہر گھنٹی وجن تے میری دھی باہر گئی تے اوہنے آ
 کے دیا۔ میں اک دم انج اُچھلیا جو یں کرنٹ لگ گئی ہووے۔ فیر فوری گھرتوں باہر
 گیا۔ انو گیٹ دے باہر کھلوتا سی۔


”کیتھے رُ گیا سیس؟ کتے دنن توں توں آیا ای نہیں۔ ٹانگا وچن توں پہلاں توں
 کوئی گل ای نہیں کیتی۔ بندہ کوئی سوچدا اے۔“ میں دو تین سوال اکو داری کر دتے۔
 ”باؤ جی! سوچن والی کوئی گل نہیں سی۔ ہن تے کجھ کرن والی گل سی۔ بچہ ڈاڈھا
 بیمار ہو گیا سی۔ ڈاکٹر ہوراں مہنگے مہنگے ٹیکے دے سن۔ ہن میرا پتر ٹھیک ہو گیا اے۔
 ٹانگے دا کیہ اے اوہدا وی کدی نہ کدی کوئی چارا لگ ای جائے گا۔ ایسہ گل تئیں
 آپے ای تے مینوں کئدے او.....“ انو نے آکھیا تے مینوں کجھ حوصلہ ہویا۔
 ”ایسہ کیہ اے؟“ میں انو دے ہتھ وچ پھڑی چیزول ویکھیاں آکھیا۔

”ایسہ ساز اے جی۔ میرے گھوڑے دا ساز۔ گھوڑے نوں جون ویلے اوس
 دے گل وچ پائی دا اے..... گھوڑا مر گیا اے تے ٹانگا وک گیا اے پر ایسہ ساز
 ابے تائیں میرے کول اے۔ ایہنوں میں کدی نہیں وپچنا۔ کیہ پتا کھڑے ویلے
 حالات بدل جاؤن..... ٹانگا گھوڑا خرید لیا تے ایسہ ساز اوس گھوڑے نوں پاواں
 گا۔“ اوہنے مینوں دسدیاں آکھیا۔

”نواں ٹانگا گھوڑا لوں گاتے ساز وی نواں لے لوں۔“ میں آکھیا۔

”ایہہ ساز ای نہیں۔ میری آس اے۔ ایہہ وک گیا تے میری آس ٹٹ جاوے گی۔“ ایہہ کھنڈیاں اوہدیاں اُپر والیاں پکاں تھلے وکلی پکاں نال ٹکرائیاں پر اوہنے اپنے ہنجواں تے قابو پالیا۔

”ایہہ ساز اپنے کول سنبھال لو۔ لوڑاں بڑیاں ڈاڈھیاں ہونڈیاں نیں۔ میرے کول رہیا تے کدھرے ایہہ آس وی نہ ٹٹ جاوے۔“ اوہنے ترلا کردیاں آکھیا۔ میں اوہدے ساز نوں پھڑکے تے ڈبے دل نال اندر گیا تے اوہنوں ایسی تھاں سانہہ چھڈیا جتھے اوہ مینوں وی وکھالی نہ دیوے۔ ایہہ ساز نہیں سی بلکہ انودی اُمید سی جہڑی انو کولوں مینوں منتقل ہو گئی سی۔ خورے ایس ساز نال انودی حیاتی دا ساز وی مڑکے وچ اُٹھے۔



رات دی رانی

ویلا رات دا ہووے تے اوہ وی خوشبوواں وچ رچیا ہویا تے بندے نوں اک
 اجہی کیفیت توں دوچار کر دیندا اے پئی اوہدا دل اس اداس فضا وچ خوشبوواں لٹان
 والے دا کھوجی بن جاندا اے۔ ایس پل معاشرے وچ کھلریاں ہوئیاں انسانی جذبیاں
 نوں کچل دیاں ہویاں تے مادیت نال بھریاں قدراں رواں دے گولیاں وانگوں بے
 حقیقت اڈ دیاں نظر آوندیاں نیں۔ سورج دی منہ دکھائی توں لے کے منہ لکائی تک
 لکھاں انساناں دیاں کوششاں دے ان گنت زاویے خوشبوواں نال بھری رات وچ
 خورے کیوں اکوجے نظر آوندے نیں۔ ایہو ای اوہ چسکا اے جہڑا مینوں سندر روڈ
 ول لے جاندا سی جتھے سارے مکاناں اگے وڈے وڈے لان موجود سن تے اوہناں
 اگے اک وڈی ساری پکی سڑک وی لنگھ رہی سی جہڑی اک فرلانگ تک سدھی جا
 کے مڑ جاندی سی اوہدی منکر تے اک ٹٹا بھجا مکان سی۔ جہدے اگے اک چھوٹا جھیا
 لان بنیا ہويا سی۔ اوہدے اندر اگے ہوئے ون سونے پھلاں دے بوٹے اوس گھر دے
 مکھڑے دا میک اپ سن۔ لال، چٹے، پیلے، نیلے..... پھلاں دی بھرمار سی..... انج
 جاپدا سی کہ اس مکان وچ وس والے نوں ایس گل نال عشق اے کہ فطرت اپنے
 سارے رنگاں سمیت اوہدے نکتے جہے لان وچوں پھندی ہووے اکاڈ کا سرو تے مور
 پنکھ دے بوٹے لگے سن جہڑے اوہناں رنگاں وچ اپنی ہریالی دا رنگ بھر رہے سن۔ دو
 درخت سفیدے دے اُتامنہ اسمان ول منہ کر کے کھڑے سن۔ انج جاپدا سی جو یں
 محبوب دی اڈیک وچ عشق اڈیاں چک چک اوہدیاں راہواں پیا نکدا اے۔ انگوراں

دی ویل کندھ نال ولھیتی ہوئی اک کونے توں دوجے کونے تک اپڑ رہی سی۔ جتھے ان ختم ہو کے سڑک دے نیڑے ہوندا سی۔ اوتھے رات دی رانی دا بونا لگا سی۔ ایہو ای اوہ رات دی رانی اے جہڑی ہر روز شام ویلے اپنی خوشبو وند دی اے تے سندر روڈ ہو روی سندر ہو جاندی اے۔

اج راتیں فیر ایسے نشے وچ مدہوش ہوون لئی جد میں سندر روڈ اپڑیا تے رات دی رانی دے کول مینوں ناصر علی نظر آیا۔ اوہنوں ویکھ کے میں چونکیا اوہدا منہ ”رات دی رانی“ ول سی تے کنڈ میرے ول۔ اوہ اپنے من وچ دُبا دنیا توں بے خبر خورے کیہ لہھ رہیا سی۔ رات دی رانی دی خوشبو تے سارے سندر روڈ تے پھیلی ہوئی سی۔ فیر ایہہ مہان افسانہ نگار ایچھے کھڑا کیہ کر رہیا اے۔ میں تے اوہدے ہتھ ہمیشہ قلم ای ویکھیا سی پر اوہ تے رات دی رانی کول انج کھلوتا سی جوہیں اوہنوں گلو کڑی پائی کھڑا ہووے۔ خورے اوہنوں میرے ورگے نشے دا چسکا پے گیا اے؟ میں ناصر علی بارے سوچدیاں ایہناں خیالاں وچ کھب گیا۔

ناصر علی دا شمار اپنے دور دے مہان کہانی کاراں وچ ہوندا سی۔ جہدیاں کہانیاں وچ کردار اپنے طبقاتی کچھو کڑ سمیت اپنیاں جنگلیاں تے برائیاں نال کھل کے سامنے آوندے سن تے کہانی ختم ہوندىاں قاری ناصر علی دے پیدا کیتے ماحول دی لپیٹ وچ آجاندا سی۔ اج دے الیکٹرانک دور وچ وی اوہدی نئی کہانی پڑھن والے اوہدی کہانی دا انتظار کردے سن۔ ناصر علی دی زندگی دا ہر دور میریاں اکھاں اگے گھم گیا۔.... بال پن وچ شرمیلا تے اکلاپے وچ رہن دا عادی تے لکھائی پڑھائی وچ ہر ویلے مست..... کالج اپڑدیاں ای شعلہ بیان مقرر..... محفلاں دی رونق..... لیڈر..... ناصر علی وچ ایہہ تبدیلی انج ای آئی۔ جوہیں مٹھی ٹور ٹردے پانی وچ اک دم طوفان آجاوے تے وہندیاں وہندیاں وڈے وڈے درخت وی تیلیاں وانگوں روڑدھے پے جاندے نیں۔ جدوں طوفان مکدا اے تے پانی فیر اپنی معمول دی ٹور ٹرن لگدا اے۔ ایویں ای ناصر علی دی زندگی وچ آؤن والا طوفان جدوں رُکیا تے اوہ

اس موڑ تے آن کھلوتا سی جتھے اوہدی شخصیت نکھر گئی..... باوقار.....
 شریف..... بردبار نظر آندا سی..... ہن اوہ ٹھہر ٹھہر کے گل کردا سی..... جذبے
 ہن اوہدے کنٹرول وچ آ چکے سن..... اوہنوں جذبیاں دیاں شکلاں مطابق اوہناں
 نوں لفظاں دے رنگ برنگے لباس پوانے آ گئے سن..... تقریراں دی جگہ تحریراں
 نے لے لئی..... فیر ہو لے ہو لے اوہدیاں لکھتاں ادبی میدان وچ پنگر دیاں ہوئیاں
 درخت بن گئیاں۔ چہناں دی ٹھنڈی چھاویں بھلے و سرے تے خیالاں دی دنیا وچ
 گواچے پڑھنار آ بہندے۔ ادبی دنیا وچ اوہدے چاہواناں دی گنتی ودھدی گئی تے
 اوہدے پرانگے سنگی سخن اوہدے توں دور ہوندے گئے۔ اس دور وچ وی میری
 اوہدی کدی بیٹھک ہوندى سی..... تے فیر ملاقات دا سلسلہ ہولی ہولی دنیا دے
 سپایاں وچ گواچ گیا۔ کدی اوہدی تحریر کسے رسالے وچ نظر آ جاندی..... فیر کجھ
 ورہیاں توں نہ ای اوہ ملیا تے نہ ای اوہدی کوئی کہانی نظر آئی..... خورے کتھے
 گواچ گیا سی؟

ناصر علی نے پرت کے میرے دل ویکھیا تے میرے خیالاں دا سلسلہ ٹٹ گیا۔
 ”ناصر علی..... ناصر علی..... ایستے کیہ کر رہیا ایں؟“
 بے تکلفی دے نال ایسہ لفظ میرے ہوٹھاں وچوں نکلے۔ ناصر علی نے کوئی
 جواب نہ دتا تے خالی خالا اکھاں نال میرے دل تکیا۔ اوہدی اکھاں دی لالی کسے سورج
 دے ڈبن دا منظر پیش کر رہی سی۔ سٹریٹ لائٹ تھلے دو وکھو وکھ کیفیتاں دے شکار
 انسان اک دوجے دے سامنے کھڑے سن۔
 ”ناصر علی..... بولدا کیوں نہیں..... ایستے آ کے سٹاپا انسان وی جاگ پیندا
 اے..... تے حیاتی کروٹ لے کے اٹھ کھلوندى اے..... توں کیوں ججھ گیا
 ایں.....؟ تیرے قلم نے کہانیاں لکھنیاں کیوں بند کردتیاں نیں..... بول ناصر علی
 بول.....“
 ناصر علی دے موڈھے تے ہتھ رکھدیاں میں آکھیا۔

”میں تخلیقی لحاظ نال بانجھ ہو گیا واں..... میری کہانی میرے اندر گواچ گئی اے۔ میں اوہنوں لبھدا پھرناں۔“

ناصر علی ایسہ کہندے ہوئے پھٹ پیا۔

”اوہ کھڑی کہانی اے؟..... تے اوہدا کردار کون اے۔“ میں اپنے اندروں اٹھن والے ان گنت سوالاں تے قابو نہ رکھدیاں ہوياں پچھیا۔

”ایسہ گل میں تینوں کل ایسے ویلے ایستے ای دساں گا۔ اج توں مینوں میرے حال تے چھڈ دے.....“ ناصر علی نے منت کردیاں آکھیا۔

”پتہ نہیں کیوں ناصر علی نے مہنتوں اپنے گھر آن لئی نہ کیا تے کل فیر ایستے ای ملن دا وعدہ کیتا اے؟“ میرے دماغ نے سوچدیاں اپنے آپ توں آکھیا..... تے فیر میرا دھیان اوس پرانے مکان دے گیٹ توں لگے ہوئے تالے تے پیا میں دھون گھما کے ناصر علی ول ویکھیا جہڑا اپنے آپ وچ مست ہو چکا سی۔ میں خاموشی نال گھروں رُ پیا۔

اڈیک دیاں ایسہ گھڑیاں میں تے سولی تے لٹکدیاں لنگھائیاں فیر دو جے دن ناصر علی میرے سامنے سی اوہنے اک بند لفافہ میرے حوالے کیتا تے آپ تیز تیز ردا خورے کدھر چلا گیا۔ میں جد اوہ لفافہ کھولیا تے اوہدے وچ موجود کانغذ اتے جھڑی تحریر لکھی سی اوہ کجھ انج سی۔

از سند روڈ

ناصر جی! السلام علیکم!

تماڑے افسانے پڑھنے تے کئی واری ایسہ سوچن تے مجبور ہوئی کانغذ دے ورقیاں تے ون سونیاں لکھتاں لکھن والا تخلیق کار دنیا دے سب توں وڈے تخلیق کار دیاں تخلیق کیتیاں ہوئیاں رُ دیاں پھر دیاں تخلیقاں توں کیوں دور اے؟

اوہدے افسانیاں دے کرداراں وچ حیاتی دی گرمی تے جذبیاں دی شدت اے پر آپ اندروں برف وانگوں ٹھنڈا کیوں اے۔

ناصر جی!

پتہ نہیں فیر کیوں برف دے بت دیاں اکھیاں حرات نال پھکن لگ پئیاں تاں
جے تہانوں رات دی رانی دی خوشبو دا احساس ہويا۔ فیر تئیں بھنورے وانگ سندر
روڈ دے دوالے ای چکر لانے شروع کر دتے۔

ناصر جی!

میرا ایسہ خیال سی کہ تئیں کوئی روایتی انسان نہیں۔ وڈے وڈے کردار جنم
دین والے تخلیق کار او۔ چھیتی نال سامنے آن کھلوو گے تے آسانی نال کہہ چھڈو
گے۔ رانی..... دنیا دے تمام دستور رواج پچیاں جذبیاں اگے بے وجود نیں۔ وجود
تے فطری جذبیاں دا اے۔ بس ویکھن والی اکھ دا فرق ہوندا اے۔ میں تاں بھلی
اڈیکان وچ روگی ہو گئی پر تئیں اکھیاں دے سفر تک ای رہے۔

ناصر جی!

جدوں انسان جاگدیاں اکھیاں دے نال سفنے ویکھدا اے اودوں حیاتی دیاں
گنڈھاں ضرور کھل دیاں نیں پر اوہدی سمجھ وچ کجھ نہیں آندا۔ اوہدے ہتھ بس اک
حیرت ای آوندی اے۔ جھڑی اک کک وچ ڈبی ہوندی اے۔

میں تہاڈے وانگوں کوئی ادیب تے مفکر نہیں پر لگاتار اک احساس دے نال
میرا وجود ہولے ہولے سڑ رہیا اے اندرو اندر سڑن دے ایس عمل نے مینوں
عجیب و غریب تے سمجھ وچ نہ آن والی حالت دا شکار کر دتا اے۔ آہندے نیں مشرقی
نسوانی وجود دا اندرو اندر انج سڑ دیاں رہنا ای اوہدا حسن ہوندا اے۔ سوچنی آن
خورے اپنے سڑے ہوئے وجود دی راکھ دے ڈھیر تے جدوں میرے اتھرو
ورھدے مینہ وانگ وسن گے تے خورے قفنس وانگ میرے ہور کئی وجود دنیا تے
آجان ایسے آس اُمید وچ کئی وجود سڑدے سڑدے راکھ دا ڈھیر بن کے مٹی وچ مٹی
ہو گئے ہوون گے۔

ناصر جی! تئیں کہانی کار او تے مہان تخلیق کار او اک گل تے دسو..... محبت

دا عمل انسانی وجود دی راہ ای کیوں بنا دیندا اے۔ دل دی ککھ چوں جمن والی ایس
محبت ٹوں اک نویں زندگی کیوں نہیں ملدی۔ زندگی وچ اک نویں حیاتی دی آس
کیوں نہیں جمدی؟ محبت دی آبیاری لئی اک ظالم سماج کیوں چاہیدا اے..... محبت
دے ودھن پھلن لئی اپنی وڈی قربانی دی چون کیوں کیتی جاندی اے؟

ناصر جی! تئیں کیہ دسو گے..... تئیں تے ہن تیک میرے ماپیاں بارے ای
سوچدے رہے او..... جی ہاں..... مزدور تے ماشکی لوک افسانے دے کرداراں
لئی چنگے لگدے نیں۔ کہانیاں وچ اوہناں ٹوں رتبہ ملدا اے پر معاشرے وچ نہیں۔
اونچ نیچ دے نظام اتے تقریراں کرنا تے تحریراں لکھنا آسان اے پر اوہدے وچوں
نکلنا بڑی ہمت تے جرئت دا کم اے۔

ناصر جی!

تماڈے ولوں محبت پروان نہیں چڑھی۔ اوہ مشرقی ریتاں دے معیار تے وی
پوری نہیں اتری۔ تماڈے دل کسک دا شکار وی نہیں ہویا۔ اوہدے دوالے طبقاتی
غلاف دا ہالہ آگیا اے جھڑیاں کروڑاں بے چینیاں کنیاں رانیاں دے نصیب وچ
آوندیاں نیں تئیں اوس توں محروم او۔
ہاں جی تئیں اس معاشرے وچ زندگی جو گزارنی اے۔ تئیں دل وی لاوندے
اوتے دماغ دے نال وی سوچدے او۔

ناصر جی!

مینوں ڈاڈھا افسوس اے کہ تئیں ہمیشہ کہانی دی کھوج وچ ای رہے زندگی
نوں کدی تلاش نہیں کیتا۔ اس لئی تماڈے ہتھ صرف کہانی آئی اے۔

ناصر جی!


رانی ٹوں اوہ بیماری لگی اے جمدی منزل موت اے۔ کینسر کشتے نیں ایہنوں
تماٹوں خط ملن تک اس منزل تے اپڑ جاواں گی۔ جتھوں کوئی واپس نہیں آؤندا۔

ناصر جی!

کدی غور کیتا جے..... رات دی رانی نے خوشبوواں ونڈن لئی رات دا ویلا
ای کیوں چنیا اے۔ کیہ کریئے..... تہانوں تے خوشبو نال پیار اے۔ خوشبوواں
ونڈن والے وجود دے اپنے سینے نوں پھاڑ کے اپنا آپ مکا جاون والے نال نہیں۔
سنو ناصر جی!

جد زمین تے چانن تے سویرا ہوندا اے رات دی رانی کلیاں کسے مہاتما
وانگوں سارا دن آپو آپ وچ ڈب کے تریل دے نال ملاپ دا انتظار کردے نیں۔
رات جد تریل ایہناں کلیاں نوں چمدی اے تے ایسہ محبت نال اپنا دامن چاک کر
دیندیاں نیں۔ تاں خوشبوواں دی محفل ہر پاسے سج جاندی اے۔
ناصر جی!

میں ایسہ خط نہ لکھدی پر تہاڈی کہانی دی تکمیل کرنی سی..... تہانوں کہانی دی
لوڑاے نا..... اے مہان کہانی کار لکھ..... رانی مرگئی پر اوہدیاں کلیاں نوں تریل
نصیب نہیں ہوئی..... اوہدی خوشبو کسے دھندلی چنگاری وانگوں راکھ وچ دب گئی۔
اوہدے گھراگے لگی رات دی رانی اج وی خوشبوواں ونڈ رہی اے۔
جد خط پڑھ کے میں نظراں اُتاتہ نہ نوں کیتیاں تے اوتھے..... ناصر علی موجود
نہیں سی۔ دور گلی وچ دوڑدا ہویا اک سایہ سی۔



جھاتی

”میں تیری جھگی ساڑ دیاں گا..... جھتیاں دا شاہر اے تک انج ای بجھا پیا اے..... کھڑے ویلے دادے کے گیا ہویا آں. شام پے گئی اے.....“ نوجوان نے لال پیلے ہوندے دھندے چہرے نال سخی محمد ٹوں گھوریا..... تے اوہنے سکون نال اُتانہہ ویکھ کے کوئی جواب دے بغیر ہتھ وچ پھڑی آر دے دھاگے نال جھتیاں گنڈھن دا کم جاری رکھیا. اوہدا انداز حیران کر دین والا سی. گلے، شکوے، غصے تے نفرت توں خالی..... پدھرے تے سدھے راہ وانگ جھڑا دور تک جاندا جاندا درختاں دے جھنڈ وچ گواچ کے کسے نویں منزل دی خبر دے رہیا ہوندا اے..... اوہ انداز اک بے نیازی دا شاہکار وی سی..... ایس لئی تے نوجوان دا پیخنا اوہنوں پانی دے اوس بلبلے وانگ لگ رہیا سی جھڑا پانی دی سطح اتے بن دا اے تے فیر فافٹ ای پھٹ کے اپنا آپ گوا بیٹھدا اے. سخی محمد دے انداز تے نوجوان ٹوں بولن جو گانہ چھڑیا تے اوہ جھتیاں دا شاہر اتھے ای چھڈ کے غصے نال واپس ٹر گیا.

کنا بد تمیز منڈا سی؟..... پرے زمین تے پئے ہوئے اک پتھر تے بیٹھے بڈھے نے حقے دا سوٹالے کے نک راہیں دھواں کڈھ دیاں آکھیا تے نال ای حقہ کول بیٹھے دو بجے بڈھے ول ٹور دتا.

”خورے کنج دا زمانہ آ گیا اے؟..... چھوٹے وڈے دا احترام ای کوئی نہیں.....“ حقہ اپنے ول سدھا کر دیاں دوسرے بڈھے نے آکھیا..... جھڑا چادر دی ہک مار کے چھوٹی موٹی وانگ اٹ اُتے بیٹھا ہویا سی.

”ساڈے ویلے تے کوئی وڈا وڈیرا گلی چوں لنگھدا سی..... تے اسیں کھیڈ
تماشے چھڈ کے ادب نال کھلو جاندے ساں. ہن تے شرم ای مک گئی اے. اک
مڈھلی عمر دے بندے نے آکھیا جہڑا لکڑی دی چوکی اُتے بیٹھا ہویا سی.

سخی محمد سب کجھ سن رہیا سی. جد وی کوئی بولدا اوہدے ہونٹ اوہدے چہرے
تے پھیل جاندے تے اک ننھی ننھی مٹھی مٹھی مسکراہٹ لہراں وانگ اوہدے منہ
تے کھل جاندی تے اپنے آل دوالے دے من کھچویں ماحول نوں اپنی لپیٹ وچ لے
لیندی. انج جاپدا جویں کوئی بی ویندیاں ویندیاں زمین وچوں پھٹ کے سہجے سہجے
اک بوہت وڈے سایہ دار رُکھ وانگ بن گیا اے. ایسہ اوہ قدرتی مسکراہٹ سی
جہڑی معاشرتی آلودگی تے ناہمواری توں کدی فتح نہ ہو سکی تے ایسہ محبت تے امن
دے دائریاں وچ تقسیم ہوندى جا رہی سی. ”چنگے لوکی اج وی موجود نیں..... بس
دیکھن والی اکھ چاہیدی اے.“ میں سخی محمد ول دیکھدیاں آکھیا. جہدے ہنروچ وڈیائی
دامینوں پہلے ای پتہ سی پر اج اوہدے وڈے پن دا اک اجیہا کچھ میرے سامنے کھلیا
جہدے توں میں پہلے جانو نہیں ساں. سخی محمد نے گوہ نال میرے ول دیکھیا تے فیر
میری ٹٹی ہوئی جُتی دا اک پیر پھڑ کے اُتوں تھلیوں دیکھن لگ پیا. کجھ چر بعد اوہنے
جُتی نوں دوہاں پیراں نال پھڑ لیا. نال ای اوہنے نسواری رنگ دا دھاگا لیا تے اوہنوں
دو جے ہتھ وچ پھڑی موم وچ پھیرنا شروع کر دتا. اوہنوں دیکھدیاں دیکھدیاں میں
خیالستان دی دنیا وچ گواچ گیا.....

”اج توں ویسہ ورھے پہلوں نیو ٹاؤن دا علاقہ نرا پُرا جنگل سی. شہراں دیاں
گلیاں محلیاں وچوں نکل کے کوٹھیاں بناؤن دے شوق وچ لوکی ایہتھے آوے. ایسہ
علاقہ شہر دے نیڑے ہون دی وجہ نال اہم ہو گیا تے امیر لوک وی ایہدے وچ وینے
شروع ہو گئے. کجھ ورھیاں توں ایسہ شہر دا منگا ترین علاقہ بن گیا سی. سخی محمد ایس
علاقے دی اُجاڑ بیانی دا سنگی سی. اوہ پچھلے ویسہ ورھیاں توں بوڑھ دے درخت تھلے
بیٹھا اس علاقے دے لوکاں دیاں جُتیاں گنڈھ رہیا سی. اوہدے ویندیاں ویندیاں

چار چوہرے ون سونیاں مارکیٹاں بن گئیاں۔ اوہنوں ایسہ جگہ چھڑنی پئی۔ مارکیٹ والیاں اپنیاں عالی شان دُکٹاں اگے لان جو بنانے سن۔ اوتھے وی اک لان بن گیا جتھے اوہ بہہ کے ویسہ ورھے کم کردا رہیا سی۔ احتجاج اوہدی فطرت وچ ای نہیں سی۔ اوہ چپ کر کے سڑک دے کندھے دے نیڑے توں لان توں کجھ دُور بہہ گیا۔ اوہنے چار چھ ڈانگاں زمین وچ گڈ کے اوہناں دوالے ترپال پا دتی، جھڑی اوہنوں کسے گڈی والے باؤ نے خوش ہو کے دتی ہوئی سی۔ ایسہ ترپال اوہنوں گرمیاں دے دناں وچ چھاں کر کے سورج دے غیض و غضب توں بچاؤندی سی۔ اس طرحاں اک جھگی جہی بن گئی سی، جتھے بہہ کے سخی محمد لوکاں دیاں پرانیاں ٹٹیاں ہوئیاں جُتیاں وچ اپنے فن دی روح پھونک کے اوہناں ٹوں نویں حیاتی دیندا تے اپنے تے اپنے بالاں دے ڈھڈ دی اگ بجھاندا رہندا سی۔ سخی محمد نے نویاں جُتیاں بناؤن دا کم وی کیتا پر اوس کم ٹوں اوہنے جلدی چھڈ دتا۔ نویاں جُتیاں بنا کے ویچن لئی اپنا سرمایہ دوجے لوکاں تھلے لانا پیندا اے پر اوس کول اپنی دولت کتھوں آؤندی؟ اوہ جو کماندا سی اوہدے نال اپنے وڈے ٹبر دیاں لوڑاں ای پوریاں کر سکدا سی۔ ماڑے ملکاں دے ماڑے لوکاں لئی ایہو ای گل عیاشی ہوندى اے کہ اوہناں دیاں ڈھیر ساریاں لوڑاں وچوں کجھ پوریاں ہو جاوون۔ میں جد وی سخی محمد کولوں لنگھیا اوہنوں اپنے کم وچ کھاپایا۔ اپنے کم وچ اوہدی مہارت تے مستی نے اوہنوں ہر گلوں بے نیاز بنا دتا ہو یا سی تے اوہنوں ہنرمندی دیاں حداں چوں کڈھ کے اوس فنکارانہ اُفق تے لے آئی سی جتھوں ویکھن نال شیواں چھوٹیاں وکھالی دیندیاں نیں پر چھوٹیاں ہوندیاں نہیں۔ کوئی پیشہ چھوٹا وڈا نہیں ہوندا۔ اوہنوں کرن والا چھوٹا وڈا ہو سکدا اے۔ نیو ٹاؤن دا سارا علاقہ سخی محمد دی مہارت ٹوں من دیاں ہو یاں اوہنوں ڈاکٹر سخی محمد کہندا سی۔ کجھ منچلے اوہنوں جُتیاں دا پی ایچ ڈی کہندے سن۔ لوکی جُتیاں دے شاپر بھر کے مرمت کروان لئی سخی محمد ٹوں دے جاندے سن۔ اوہ واری آون اُتے اوہناں جُتیاں دی مرمت کردا رہندا۔ سچ تاں ایسہ وے کہ مینوں اوتھے بہہ کے جُتی مرمت کروان دا اجہیا

سواد آؤندا جھڑا خورے لفظاں وچ بیان کرنا میرے وس وچ نہیں جد سخی محمد رنبی نال چمڑے ٹوں اک پاسیوں چھلدا تے مینوں انج لگدا جویں اوہ میل نال لہڑے ہوئے میرے دل ٹوں کھرچ کے صاف کر رہیا اے تے میں اوہدے اوس کم وچ جویں گواچ جہیا جاندا۔ سیانیاں دی اس گل تے مینوں ڈاڈھا یقین اے کہ ہر بندے دے اندروں کجھ شعواواں نکل کے اوہدے دوالے اک دائرہ جہیا بنا دیندیاں نیں، جھڑا اوہدی شخصیت مطابق اثر رکھدا اے۔ خورے ایسے لئی نیو ٹاؤن دیاں وڈیاں وڈیاں عمارتاں دی بجائے جھگی دوالے بیٹھے اٹاں، پتھراں اتے ایسہ لوک پرسکون نظر آندے رہندے۔ سخی محمد نیو ٹاؤن دے رہن والے لوکاں دے حالات توں ڈاڈھا باخبر رہندا سی۔ رنگ رنگ دی جُتی اوہدے کول آؤندی تے اپنا دُکھ سانندی۔ اوہ سارے دُکھ سمیٹ لیندا تے چُپ وٹ کے بیٹھا کم کردا رہندا۔ ایسے لئی تے اوہ تھیں صرف دائرے ای دائرے سن۔ محبتاں دے..... امن دے..... خوشبوواں دے..... اک واری میں پھسی ٹٹی ہوئی جُتی دے ددویں پیر سخی محمد دے سامنے رکھے تے اوہنے آکھیا۔

”ایسہ نہیں ٹھیک ہو سکدی۔“ سخی محمد دے منہ چوں نکلے لفظ انج ای سن جویں جُتی ٹوں کینسر ہو گیا اے۔ ایسہ جُتی میں اسی روپے دی لنڈے چوں کل ای خریدی سی، سردیاں جو آگنیاں سن۔ سلپروانگوں لگدی سی۔ ربڑ دے سول تے کالے رنگ دا کاڈرے دا کپڑا لگا سی۔ بڑی نکھی جُتی سی۔ میں پیرس پاؤندیاں ای ایہنوں خریدن دا فیصلہ کر لیا سی۔ پچھلی رات جراثیماں توں ڈردیاں ایہنوں سرف نال مل مل کے دھوتا سی۔ مینوں دیسی بندے ٹوں کیہ پتہ سی کہ ایسہ جُتی سُکلی جگہ تے قالیناں تے چلن والیاں لئی بنائی گئی اے۔ جُتی ٹوں دھون دی وجہ نال ربڑ دے سول اُتے لگا گتا گھرو لے وانگ جُتی وچ اکٹھا ہو گیا سی۔ پیر ٹوں چھلدا تے نالے اڈی دے دوالے ربڑ کجھ کھسک گیا سی تے جُتی وچوں صاف وکھالی دیندا سی..... باہروں جُتی جُتی خوبصورت نظر آؤندی اندروں اوئی کھوکھلی..... کسے مندی ہوئی سنہری تہذیب

وانگ.....جُتی ٹوں کوڑے دے حوالے کرن ٹوں جی نہیں سی کردا.....

”ایہدا کوئی حساب تے لاؤ..... ڈاکٹر صاحب!“ بے اختیار میرے منہ چوں ڈاکٹر نکل گیا۔ سخی محمد دے ہونٹھ پھل گئے..... اوہدے چہرے تے مسکراہٹ کھلر گئی..... بے نام جہی مسکراہٹ۔ میں اوہدی اوس ویلے دی مسکراہٹ ٹوں ناں دے کے محدود نہیں کرنا چاہندا۔ اوہنے جُتی نال لگے ربڑ دے سول ٹوں دکھرا کر دتا۔ کاڈرے دے کپڑے تے ربڑ دے سول وچکار گتا کٹھا ہو چکیا سی۔ جُتی دی مضبوطی اک دکھاو سی تے ہن اوہ اک تماشا بن کے رہ گئی سی۔ ”جُتی اندر لگا گتا سکتی جگہ تے لوہے وانگ تے گلے تے کاغذ اے“ سخی محمد نے مینوں دسدیاں آکھیا ”میں ہن کیہ پیریں پا کے گھر جاواں گا..... توں تے جُتی ٹوں ادھیڑ چھڑیا اے.....“ میں آکھیا تے سخی محمد نے کوئی جواب نہ دتا سگوں چپ کر کے جُتی ٹوں چک کے لانجھے رکھ دتا۔ اوہنوں میری بے چینی دا اندازہ ہو گیا سی..... ایسے لئی تے اوہنوں ڈاکٹر سخی محمد کاندے سن کہ اوہ صرف لوکاں دیاں جُتیاں ای نہیں سی مرمت کردا سگوں انسانی جذبیاں تے احساس دا احترام وی کردا سی۔ میں سخی محمد دے ہتھاں ول دیکھدا رہیا جہناں وچ کدی شیشنی کدی آر، کدی مونگلی تے کدی ہتھوڑی دکھالی دتی تے فیر اوہنے انگریزی جُتی ٹوں سروان تے رکھیا تے مینوں اندازہ ہویا کہ اوہنے کئی مہارت نال اک ماہر سرجن دی طرحاں اک پرانی دیسی جُتی دے ربڑ ٹوں کٹ کے اس انگریزی جُتی اندر فٹ کر دتا سی تے اس مرو جُتی وچ اپنے فن دی روح پھونک کے ایہنوں اک نویں شکل دے دتی سی۔ ہن ایہہ میرے پیراں ٹوں نگھ وی دیندی سی تے آرام وی۔

”لو جی“ سخی محمد نے جُتی مرمت کر کے میرے اگے رکھدیاں آکھیا تے میرے خیالاں دا سلسلہ ٹٹ گیا۔

”ایہہ جوان تیرے نال نال اوکھا بولدا گیا اے کدھرے کوئی نقصان نہ پہنچائے.....“ میں تشویش نال سخی محمد ٹوں آکھیا ”اللہ بہتری کرے گا.....“ ایہہ

کہہ کے اوہ فیر اپنے کم وچ رُجھ گیا..... مینوں اینج لگا جویں کئی بلبلے پانی دی سطح اُتے آ کے پھٹ گئے نیں۔ اوہناں وچ تکبر دی ہوا نکل گئی اے تے اوہ فنا نال ہمکنار ہو کے سمندر بن گئے نیں۔

”زندہ باد..... زندہ باد..... چودھری سلطان..... زندہ باد.....“ ساڈے سامنے اک جلوس چلا آ رہیا سی۔ ایہہ انتخابی جلوس سی۔ ڈھول و جن دیاں آوازاں ودھدیاں جا رہیاں سن۔

”چودھری ساڈا شیر اے..... باقی ہیر پھیر اے..... آوے ای آوے.....“ چودھری ساڈا..... آوے ای آوے۔“ ایس جھگی کول اپڑ دیاں ایہناں آوازاں دے نال نال نوجوان بھنگڑے تے لڑیاں پارہے سن۔ سخی محمد نے نظراں اُتانہ کر کے کجھ دیر لئی جلوس ول ویکھیا..... تے کوئی تبصرہ کیتے بغیر رنبی نال چمڑا چھلنا شروع کر دتا۔ مینوں اینج لگا جویں بہوں سارے بلبلے پانی دی سطح اُتے آ چکے نیں..... تے اک وڈے بلبلے دے دوالے اکٹھے ہو گئے نیں..... پتہ نہیں ایہہ بلبلے بنن تے فنا ہوون دا عمل کد تک جاری رہوے گا۔ میرے دل و دماغ وچ اک شور برپا سی..... جلوس نیڑے سی پر اینج لگتا سی جویں آوازاں بوہت دور توں آ رہیاں نیں۔ ایس پل اک سوچ میرے دماغ وچ آئی..... اک عطا وانگ..... کوئی کہہ رہیا سی۔

”اے تاریخ دی کتاب..... تیری چون دی کسوٹی کیہ اے..... توں صرف اپنے ورقیاں تے حکمراناں دے کارنامے لکھنی ایں..... تے عام لوکاں دے کارنامے تے اوہناں دے عمل توں بے خبر ایں؟


تیرے لئی شخصیتاں دی اثر انگیزی کافی اے..... اوہناں دے اندر دی منافقت تینوں کدی دکھالی نہیں دیندی..... توں وڈیاں شخصیتاں توں وی اوہناں دے عملاں دی بجائے اثر انگیزی دے حوالے نال ای پرکھیا اے؟ زندگی دے چہرے توں حسین تے روشن بناؤن والے لوکاں دی اک بڑی تعداد تیرے ورقیاں دی زینت نہ بن سکی۔ توں ودیائی توں سمجھ ای نہیں سکی۔ لوکاں وچ ٹر پھرتاں جے

تیریاں اکھاں اگوں دُھند چھٹے تینوں سچ نظر آوے۔ کدی کدی کونیاں کھرڑیاں وچ بنیاں چھوٹیاں چھوٹیاں جھگیاں ول جھاتی مار کے ویکھ لیا کر..... ہیرے تے لعل انج ای لہدے نیں۔“

”کیہ آکھیا جے باؤ جی“ سخی محمد نے پچھیا تے میں خود کلامی توں باہر آ گیا..... میرا آخری فقرہ میرے ہونٹھاں چوں نکل کے خود کلامی دی حد پار کر کے کلام تک پہنچ گیا سی ”کچھ نہیں“ میں اپنی شرمندگی مٹاوندیاں آکھیا ”چلو جی مینوں ای بھلیکھا لگ گیا اے..... وڈیرا ہو گیا واں نا..... کن وجن لگ پئے نیں.....“ سخی محمد نے اک واری فیر اپنی وڈیائی دا ثبوت دتا تے کچھ دیر بعد میرے ول ویکھدیاں ہو لے ہو لے آکھیا ”پتر جی! جے جھاتی مارنی جے تے پہلے اسماناں ول مارو..... تے فیر دل ول.....“ مینوں انج لگا جو یس کسے نے جھنجھوڑ کے جگا چھڑیا جلوس دور ہوندا جا رہیا سی تے آوازاں آ رہیاں سن۔

”زندہ باد..... زندہ باد.....“ اوہناں آوازاں نال میرے ہونٹھ وی ہلنے شروع ہو گئے۔

”زندہ باد..... زندہ باد..... سخی محمد..... زندہ باد“ میرے ہلدے ہونٹھاں نے جلوسیاں دے نعراں دے الفاظ بدل دتے سن۔



ساحل دی تلاش

انور حسین نے چھٹی زمین توں چکی. فافٹ لفافہ کھولیا. سوہنے تے پھلدار صفحے
اُتے لکھیاں سطران توں پڑھنا شروع کر دتا.

لندن

پیاری شازو!

السلام علیکم.

سمجھ وچ نہیں آوندا کتھوں مڈھ بنھاں. جد کئی ورھیاں پچھتوں کسے ول مڑ کے
ویکھدا اے تے رسمی فقرے اپنی اہمیت کھو دیندے نیں. جذبے شرمندہ ہو کے
لفظاں توں اکھاں پھیر لیندے نیں.

شازو! ایہ سچ اے کہ کدی کد ار حیات دے رستے اُتے چلن والا مسافر سوہنیاں
تے من کھچوایاں راہواں وچ گواچ کے گھر توں بھل جاندا اے. جد کدی اوہدا دل
ایہناں نظاریاں توں بھر جاندا اے تے فیر گھڑیاں آون والے زمانے توں ڈردیاں
ماضی دا رُخ کردیاں نیں. اُس ویلے وسوسیاں تے چھپیاں خفاں نال اوہدا جی گھابر
جاندا اے.

مینوں یاد آ رہیا اے کہ اسیں ریت دے گھر بنایا کردے ساں تے توں آکھیا سی
”نہ جی بھلا ریت دے گھر وی کوئی گھر ہوندے نیں.“ ذرا ہتھ پھیرو تاں ریت ای
ریت. میں سوچنا وں کہ تیری بھلی بھالی گل وچ کئی سچائی سی. شازو! جد برسات

وِچ چتے بدل کالیاں گھٹاواں توں اپنے دامن وِچ سمیٹ کے رقص کردے ہوندے
سن تے اسیں اسمان وِل مُونہ کر کے ”کالیاں اٹاں کالے روڑ مینہ و سادے زورو
زور“ دی گردان کردے گلیاں وِچ دوڑدے پھردے ساں۔ بدل اپنا غبار کڈھ کے
چلے جاندے تے میدان پانی نال بھر جاندے سن۔ اسیں کانڈ دیاں کشتیاں پانی وِچ
چھڑدے تے نالے پانی وِچ روڑے مار کے لہراں پیدا کردے ہوندے ساں۔
چمکدے پرندے سانوں بڑے چنگے لگدے سن۔ اک دن یاد ای؟ بابے بودی دے
باغ وِچ کوئی گھگھی اپنے آپ وِچ ڈب کے ڈاڈھے سوز نال کوئی گیت گا رہی سی۔
میں بے تکلفی وِچ تیری بانہ پھڑ کے تینوں بابے بودی دے باغ ول لجانا چاہیا۔ پر توں
اک جھٹکے نال اپنی بانہ چھڑا کے نظراں دوجے پاسے پھیر لئیاں۔ ایہ کجھ گھڑیاں نے
بچپن دے گزر جان دی خبر دے دتی تے گھگھی دا گاؤن میرے دل دی ترجمانی کرن
لگ پیا۔

شاذو! خوشی تے غمی دے لیہناں جذبیاں دی میں اج وی دل توں قدر کرناواں
جڑے تیرے چہرے اُتے اوس ویلے واضح سن جدوں مینوں گورنمنٹ کلج لاہور
وِچ داخلہ ملیا۔ تیتھوں دور رہ کے تیری ذات دا احساس اک نویں انداز وِچ ہویا تے
توں میری شام سویر دا مرکز بن گئی۔ ہفتے دے دن دی اڈیک میری زندگی دا حصہ بن
گئی۔ جد گھر آونداتے ون سونے کھانے میری راہ تک رہے ہوندے۔ توں خاص کر
میرے لئی شامی کباب بناندی سی۔ تیرے ہتھاں دی بنی ہوئی کھیر میں بڑے شوق نال
کھاندا ساں۔ توں ہمیشہ مینوں بُوہے تیک چھڈن آندی سی۔ خالہ بشری دیاں نظراں
توں اوہلے ہو کے تیرا ہتھ نال کیتا ہویا اک الوداعی اشارہ دل تے پھٹ لا کے مینوں
اُداس کر جاندا۔ پر ایس تلخی وِچ وی اک خاص لذت چھپی ہوندی سی۔ ساڈی منگنی
تے بچپن وِچ ای ہو گئی سی پر ایہدا احساس ہن اُبھریا سی۔ میری ماں نے تینوں پیار
کردیاں آکھیا سی ”شاذو تے بس میری ای دھی رہوے گی“ تے خالہ بشری نے میرا
مُونہ چُم کے آکھیا سی ”نابی تیرے توں ودھ کے مینوں کون چنگا لگ سکدا اے۔“

ایہناں دوہاں فقریاں نال اسیں زندگی دے کنڈیا لے پینڈے اُتے اکٹھے چلن والے
راہی بن گئے۔

شاذو! اوہناں دُکھ بھریاں گھڑیاں ٹوٹ میں کدی نہیں بھُل سکدا۔ جدوں
میرے ماں پو اک حادثے وچ ہلاک ہو گئے تے مینوں ایس دُنیا وچ کلم کلیاں چھڈ
گئے۔ خالہ بشریٰ نے ماواں وانگ دُکھاں تے زخماں ٹوٹ محبت تے شفقت دے مرہم
نال ہولی ہولی تندرست کیتا تے میری پڑھائی مکمل کروائی۔ میری ٹہل سیوا کرن وچ
کوئی کسر نہ چھڈی۔ میں اوہناں دیاں دعاواں تے تیرے خلوص نال یونی ورثی وچ
ایم اے سوشالوجی مکمل کرن وچ کامیاب ہو گیا۔

شاذو! تینوں پتہ اے مینوں جھوٹھ نال نفرت اے۔ مینوں ایس چیز دا اعتراف
اے کہ کلاس وچ کجھ کڑیاں نے مینوں متاثر کیتا۔ پر ایہدا قطعاً ایہ مطلب نہیں کہ
تیرے نال محبت نہیں رہی۔ سگوں توں ہر قدم تے ہر موڑ اُتے میرے نال رہی۔
کالیاں اُداس راتاں وچ تیرے ای خیال نال میرے دل تے دماغ چمکدے
رہندے۔ لاہور دے ہنگامے تے من کچھویں منظر مینوں تیتھوں دُور نہ کر سکے۔ توں
ہمیشہ مینوں پڑھن دیاں نصیحتاں کیتیاں۔ تیری گل من دا مینوں سواد آندا سی۔ تیریاں
نصیحتاں رنگ لیاں تے میں یونی ورثی وچ اول پوزیشن حاصل کیتی۔ تیری خوشی
دی کوئی انتہا نہ رہی تے توں خبر سن دیاں ای بے اختیار ہو کے میرا ہتھ چم لیا تینوں
فوراً اپنی دلیری دا احساس ہو یا تے توں شرما کے مونہ دو جے پاسے پھیر لیا۔ میرے لئی
ایہ لمحے بیش قیمت موتیاں وانگوں نیں جھڑے میری حیاتی دے بھیرے راہواں تے
چانن کردے رہن گے۔

شاذو!

میں تیریاں خاموش سسکیاں تے چپ چاپ خواہشاں دے احتجاج ٹوٹ سمجھدا
ساں پر سرکاری وظیفے نال انگلینڈ جا کے پی ایچ ڈی کرن دا موقعہ گنوا ناوی تے مناسب
نہیں سی۔ خالہ بشریٰ نے مینوں منان دی بڑی کوشش کیتی پر میں نہیں منیا۔ تداوہناں

روندے ہوئے آکھیا ”شازو نال ظلم نہ کر۔ اوہ خورے کدوں دی تیری اڈیک وچ بیٹھی اے۔ ایہ سن کے میں خالہ بشریٰ توں انگلینڈ نہ جان دا یقین دلا دتا۔ ایہ توں ای سی چنے دل تے پتھر رکھ کے تے اپنی ٹٹی پھٹی طاقت کٹھی کر کے اعلان کیتا کہ میں پی ایچ ڈی کرن ضرور جاواں گا۔ تیری ضد دے سامنے خالہ بشریٰ توں ہتھیار سٹے پئے۔

شازو! جد ہوائی اڈے تے تیرے نال جدا ہون لگاتے توں میرا سجا ہتھ اپنے دوہاں ہتھاں وچ لئے کے ہونٹاں توں لایا۔ تیریاں اکھاں وچوں نکلیں والے ہنچو میرے ہتھ تے ڈگے تے سارے جنے وچ ہلچل مچاندیاں اُداس لہراں پیدا کرن لگ پئے۔ ایس واری توں شرما کے اکھاں نہیں پھیریاں سگوں اکھاں وچ اکھاں پا کے بڑے پیار وچ ڈبے انداز نال آکھیا ”ناجی! مینوں دل توں کدی نہ بھلاویں۔ شازو ہمیشہ تیری اڈیک وچ رہوے گی۔“ پر میں لندن دی شام سویر دا قیدی ہو گیا۔ اتھوں دی نسی بھج دی زندگی نے میرے دل تے دماغ اُتے بنی ہوئی خلوص نال بھری تے سراپا اڈیک وچ پئی تصویر توں دھندلا کر چھڑیا۔ میں نہیں جان دا کہ کدوں مارگریٹ میری حیاتی وچ داخل ہو کے میری ساتھی بن گئی تے میں تیری یاد توں بھل کے اُن ڈٹھی منزل ول ودھنا شروع کر دتا۔ پی ایچ ڈی اک حسین خواب بن کے رہ گئی۔ مینوں کدی کدی اندروں ٹٹ کے کھلر جان دا احساس ہوندا۔ رستے سراب وانگوں میرے اُتے ہسدے۔ اک دن اڈول ای مارگریٹ میری حیاتی وچوں نکل گئی جو یں کجھ ہو یا ای نہیں تے میں کسے گواچے ہوئے راہی وانگ کسے دلدل وچ پھس کے ہنچو کیرن لگا۔

شازو! مینوں اعتراف اے کہ میں تینوں بھلا دتا۔ میں تیرے جذبیاں دی قدر نہ کیتی۔ میں احسان فراموشی کیتی۔ پر توں ہمیشہ میری اڈیک وچ رہی۔ مینوں پتہ اے کہ توں شادی نہیں کیتی۔ میں تینوں یقین دانا واں کہ جڑے ناجی نال توں محبت کردی سی ایہ ایہو ای ناجی اے۔ میں انسان آں، فرشتہ نہیں۔ بھلن دا اعتراف اے۔ میں اک مہینے دے اندر پاکستان آ رہیا واں۔ جے تیرے دل دے کھلار وچ میرے

لئی کوئی تھاں ہووے تے میں ایہنوں اپنی خوش نصیبی سمجھاں گا۔ جے تُوں انکار کیتا تے کوئی مارگریٹ ناجی تُوں خوش نہیں کر سگدی۔ پاکستان آ کے خالہ بشریٰ دے پیراں وچ سر رکھ کے معافی منگاں گا۔ مینوں ایس گل دا ڈاڈھا دکھ اے کہ میری وجہ نال اوہناں تُوں تکلیف پہنچی۔

فقط تیرا ناجی

چھٹی پڑھدے ہوئے انور حسین تُوں احساس ہو چکیا سی کہ ڈاکیا غلطی نال کسے دی چھٹی اوہدے گھر سٹ گیا اے۔ پر خورے لفظاں وچ کھڑی کھج سی کہ اوہ خط پڑھدا ای گیا۔ اوہنے چھٹی دی پشت اُتے لکھیا ہويا پتہ پڑھیا تے آپ ٹھیک پتے تے جا کے اوہنوں پہچان دا فیصلہ کیتا۔ اوہنوں خورے شاذو دے احساسات تے فیصلے بارے تجسس ہو گیا سی۔ انور حسین نے اپنی پُرانی موٹر سائیکل تُوں ٹاکی نال صاف کیتا تے لک مار کے شارٹ کیتا۔

”کدھر جا رہیا ایس پتر!“ انور حسین دی ماں نے صحن وچ آوندیاں آکھیا۔
 ”کسے دی چھٹی غلطی نال ساڈے گھر آگئی اے۔ اوہ درست پتے اُتے پہچان جا رہیا واں۔“ انور حسین ایہ کہندے ہوئے گیسٹر لا کے ریس دیندیاں ہولی ہولی کلچ چھڈیا تے گیٹ تُوں باہر نکل کے مین روڈ وِل موٹر سائیکل دوڑانی شروع کیتی۔ اوہ شہر دے چپے چپے تُوں واقف سی۔ اوہنوں چھٹی پڑھدیاں ای شاذو دے گھر دا اندازہ ہو چکیا سی۔ جہڑا پیپلز ٹاؤن وچ واقعہ سی۔ پندراں ویہ ورھے پہلوں ایہ علاقہ ویران سی۔ شہر دے مُنڈے ایہتے فٹ بال کھیلڈن آوندے ہوندے سن تے شاموں پہلے گھر رُ جانڈے سن۔ ماسی جھلی وال کھلار کے ایس علاقے وچ گھمڈی رہندی سی۔ اوہ کدی شاہ بانو دے ناں نال جانی پچھانی جاندی سی۔ اکثر ویاہ دیاں تقریباں اُتے گانے گان لئی بلائی جاندی سی۔ جد اوہ ویاہ دے گیت گاونڈی تے جوان کڑیاں مُنڈیاں دے دل دھڑکن لگ پیندے تے انج لگدا جو یں سارے زمانے دیاں خوشیاں اپنے پیراں وچ گھنگرو بن کے رقص کر رہیاں نیں۔ حیاتی تے بس خوشیاں دا ناں وکھالی دیندی اے۔

پر جدوں کدی شاہ بانو گرمیاں دیاں تاریاں بھریاں راتاں وچ اپنے سردے تاج چراغ سائیں دی یاد وچ ڈب کے کوئی غماں نال بھرا گیت گاؤندی تے رات دی رانی دی طرحاں اوہدی خوشبو ہر پاسے پھیل جاندی۔ اک دن جیلے بد معاش نے شاہ بانو توں بلو شوکر والے دے ڈیرے تے جا کے گاؤن لئی آکھیا تے شاہ بانو نے اوہنوں انکار کر دتا۔ جیلے بد معاش نے مجبور کیتا تے شاہ بانو آکھیا ”جیلے میری گل گوہ نال سن..... شاہ بانو کوئی بازاری عورت نہیں، جھڑی بلو شوکر دے ڈیرے تے جا کے گائے..... اوہ صرف شریفاں دے گھر گاؤندی اے۔“

”میں تینوں چک کے لے جاواں گا۔“ جیلے نے آکھیا۔

شاہ بانو دے کلم کلے پتر تینوں نے غیرت وچ آ کے جیلے دے مونہ تے چھیڑ کڈھ ماری تے جیلے نے خنجر کڈھ کے تینوں دے ڈھڈ وچ تن چار وار کیتے۔ تینوں نے تڑفدیاں ہویاں جان دے دتی۔ شاہ بانو ایسے دُکھ نال پاگل ہو گئی تے ہر ویلے اپنے بیٹے تینوں توں واجاں ماردی رہندی۔ شاہ بانو دی خوبصورت آواز مائی جھلی دے قمقییاں وچ بدل چکی سی۔

”خورے مائی جھلی ہن کتھے ہووے گی..... کتے انج نہ ہو جائے کہ شاذو مائی جھلی بن گئی ہووے..... نہیں نہیں انج نہیں ہو سکدا.....“ انور حسین نے خیالاں وچ بڑبڑاندے آکھیا۔

چھیتی اوہدی نظر کھلے ریلوے پھانک اُتے پئی ورنہ ٹرین دی اڈیک وچ اوہنوں چوکھی دیر اوتھے کھڑا ہونا پیندا۔ پھانک کراس کر کے اوہ پیپلز ٹاؤن دے علاقے وچ وڑ گیا۔ کجھ موڑ مڑ کے اوہ متعلقہ پتے تیک اپڑ گیا۔ اوہنوں کسے توں پچھن دی لوڑ محسوس نہیں سی ہوئی۔ انور حسین نے موٹر سائیکل کھڑی کر کے لاک کیتی تے گیٹ دے کول جا کے گھنٹی وجائی۔ کجھ چر بعد اک اُدھیڑ عمر دی عورت نے تھوڑا جھیا بُوہا کھولدیاں پچھیا ”کون اے.....؟“

”جی اوہ تہاڑی چھٹی ڈاکیا غلطی نال ساڈے گھر سٹ گیا اے.....“ انور حسین

نے رُکدیاں رُکدیاں آکھیا تے اوہ عورت بُہا کھول کے باہر آ گئی۔ اوہ گورے رنگ تے درمیانے قد دی سی۔ اکھاں وِچ ویرانی جہی نظر آ رہی سی۔ چہرے دے خدو خال جوانی دا پتہ دے رہے سن۔

”ایہ تہاڈی چھٹی۔“ انور حسین نے اگے ودھ کے اوہ چھٹی اوس زنانی نوں دے دتی جہدے بارے اوہ اندازہ لا چکیا سی کہ اوہ خالہ بشری اے۔

”لنگھ آ پتر۔۔۔۔۔ کوئی چاہ پانی۔۔۔۔۔“ اوس زنانی نے خلوص نال آکھیا۔ انور حسین اوہدے خلوص توں متاثر ہويا پر اندر اوہنوں اوہ تجسس لے گیا جہڑا چھٹی پڑھن دی وجہ نال اوہدے اندر پیدا ہو چکیا سی۔

”شاذو۔۔۔۔۔ شاذو پتر۔۔۔۔۔ ایدھر آ۔۔۔۔۔“ اوس اُدھیڑ عمر زنانی نے اُچی آواز نال واج ماری تے اک کڑی بیٹھک وِچ داخل ہوئی۔ جہڑی لے قد تے دبلے پتلے جسم دی سی۔ اوہدیاں موٹیاں اکھاں تے تکھانک اوہدی الھڑ جوانی وِچ رنگ بھر رہے سن۔ اوہنے پیازی رنگ دی شلوار قمیص پائی ہوئی سی۔ گوہ نال ویکھتے تے اِنج لگدا سی کہ گلاب دی پتی زمین اُتے ڈگ کے اپنی تازگی تے شگفتگی کھو چکی اے۔

”بھرا لئی شربت بنا۔“ اوہنے بیٹھک وِچ وڑدیاں انور حسین نوں ویکھیا ای نہیں سی۔ ایس لئی اوہنے سلام دے نال معذرت وی کیتی تے شربت بنان لئی چلی گئی۔

”خورے کھڑے خیالاں وِچ اُجھي رہندی اے۔۔۔۔۔“ عورت نے آکھیا۔

”کوئی گل نہیں۔“ انور حسین نے آکھیا۔

”تہاڈا گھر کتھے وے؟“ عورت نے پچھیا۔

”نیو ٹاؤن۔“ انور حسین نے جواب دتا۔

”ٹیس بڑی تکلیف کیتی۔۔۔۔۔“ عورت نے شکریہ ادا کردیاں آکھیا۔

”مینوں افسوس اے کہ میں تہاڈی چھٹی اپنی چھٹی سمجھ کے کھول لئی تے پڑھنی شروع کر دتی۔ ایہ اندازہ ہون پاروں وی کہ ایہ چھٹی میری نہیں۔۔۔۔۔ میں ایہنوں خورے کیوں پڑھدا رہیا۔۔۔۔۔ میں تہاڈے کولوں معافی چاہندا واں۔ مینوں تہاڈی چھٹی

نہیں سی پڑھنی چاہیدی۔“ انور حسین نے آکھیا۔

”کوئی گل نہیں..... تماڈا بچ تے اعتراف ای بڑی گل اے۔“ شازو نے ٹرے میز اُتے رکھدیاں آکھیا۔ اوہنے انور حسین دا آخری جملہ سن لیا سی۔ شازو دی ایس گل توں انور حسین نوں اوہدی ذہانت تے بے نیازی دا اندازہ ہویا۔

”ایہ لوؤ تئیں.....“ شازو نے شربت نال بھرے ہوئے گلاس ول اشارہ کردیاں آکھیا۔

”شکریہ۔“ انور حسین نے ایہ کہندیاں گلاس ہونٹاں نال لالیا۔

”شازو پتر! ایہ خط ڈاکیا ایہناں دے گھر سٹ گیا سی..... ذرا میری عینک تے لیا..... ویکھاں تے سہی کدا اے..... عینک دے بغیر تے ہن پڑھیا ای نہیں جاندا۔“ اوہدی ماں نے آکھیا۔ اوہنے عینک لیان دی بجائے خط نوں گوہ نال ویکھیا۔ اوہدیاں اکھاں وچ پانی بھکن لگ پیا۔ جہڑا ہنجو بنن دا اعلان کر رہیا سی۔ اوہنے اوہتھے ای کھڑے ہو کے چٹھی لفافے وچوں کڈھی تے پڑھنی شروع کر دتی۔ ہنجوواں دا سفر شروع ہو گیا۔ انور حسین خاموشی نال شازو دے چہرے اُتے لفظاں دے اثرات دا مشاہدہ کرن لگ پیا۔

ہنجو رخساراں تے بیہ رہے سن۔ اوس نے اوہناں نوں پوہنجن دی کوشش نہیں کیتی۔ چٹھی پڑھ کے اوہنے چھت ول ویکھیا۔ فیروصوفے اُتے ڈگن والے انداز وچ بیہ گئی۔

”پتر..... کدی چٹھی اے..... کیہ لکھیا اے؟“ اوہدی ماں نے شازو نوں چٹھی پڑھدیاں ہویاں کئی وار پچھیا پر اوہ خاموش رہی تے اوہ چٹھی پڑھدی رہی۔ ہن جد اوس نے پچھیا تے شازو نے آکھیا ”ناجی دی چٹھی اے.....“

”اوہنے تے گوری چٹری والی ویاہ لئی سی..... ہن اوہنوں ساڈا خیال کیوں آگیا اے.....“ شازو دی ماں نے پچھیا جہڑی انتہائی غصے وچ سی۔

”اوہنوں چھڈ کے چلی گئی ہونی اے ہن.....“ شازو نے ہوا وچ گھوڑ دے

آکھیا۔

”ہن کیہ..... دس ناں.....“ ماں نے آکھیا۔

”اوہنوں اپنے کیتے تے افسوس اے..... اپنی غلطی دا احساس اے..... اوہ میرے نال.....“ شازو کھندے کھندے رُک گئی۔

”ایہ نہیں ہو سکدا..... اوہ بڑے چھوٹے ذہن دا بندہ اے.....“ اوہدی امی نے آکھیا۔


”ماں جی! جے کسے توں اپنی غلطی دا احساس ہو جاوے تے اوہنوں معاف کر دینا چاہیدا اے۔ خورے کدی معاف کرنا وی ممکن نہ ہوندا ہووے..... پر میں تے انج کر سکنی آں.....“ شازو نے ہنجواں وچ مسکرا ندیاں آکھیا۔

”کیہ تئیں ناجی نال ویاہ کر لو گے.....؟“ انور حسین اپنے فطری تجسس نوں قابو وچ نہ رکھ سکيا۔

”ناجی نال نہیں..... خود غرض ناجی نال.....“ اوہدی ماں نے نفرت نال آکھیا۔
جھڑی شازو دے بولن توں پہلے ای بول اُٹھی سی۔

”ہاں..... میں ناجی نال ویاہ کر لوں گی..... ناجی خود غرض نہیں اے امی..... ایہ دُنیا اے‘ ایس سراں دے مسافر اپنا راہ بھُل ای جان دے نیں..... ایہتے فرشتے نہیں انسان رہندے نیں..... ولاں توں کھلاتے وسیع رکھنا چاہیدا اے.....“ شازو نے وسعت نظری دا ثبوت دیندیاں آکھیا۔

انور حسین نے گوہ نال شازو ول ویکھیا اوہدی اکھاں وچوں وگن والے ہنجواں توں کسے ساحل دی تلاش سی۔



اڈیک

دو سیاہ زرگی اکھاں کوٹھے دوالے لگی سیمنٹ دیاں جالیاں وچوں جھانک رہیاں سن۔ اوہناں وچ سہانے سپنے تے اُٹھدیاں اُمنگاں دم توڑ رہیاں سن۔ ایہناں اکھاں دی خوبصورتی دوالے وحشتاں دا ڈیرا سی..... بے حس، اُداس تے بے نیاز اکھاں..... جھڑیاں خورے کدوں دیاں اُڈیکدیاں اُڈیکدیاں انج لگ رہیاں سن جوہیں کوئی چشمہ خشک ہو گیا ہووے۔ ایہناں ٹوٹ ویکھدیاں کسے ایسی بند گلی دا گمان ہوندا جھڑی کسے ناموافق ماحول پاروں کھل نہ رہی ہووے۔

ایہ اکھاں جد ہوش وچ آئیاں تے ایہناں ہرپاسے گندے رسم و رواج دے تیر چلدے دیکھے۔ جنہاں کئی سوہل تے ملوک جشیاں ٹوٹ ایسے پھٹ لائے کہ اوہ ویلے دے لنگھن دے نال نال ڈونگھے ای ہوندے گئے تے اوہناں وچوں خون رسدا رہیا۔ پیڑاں اوہناں جسمیں دے ہڈاں وچ انج رچ و س گئیاں جوہیں اوہ اوہناں دا حصہ ہون۔ ایہناں اکھاں نے رنگاں خوشبوواں تے محبتاں ٹوٹ پیسے دے بُوہے چڑھدیاں ویکھیا۔ اُکھاں، مصیبتاں تے رُسوائیاں ٹوٹ کسے آسیب و انگوں غریبی نال لپٹدے ویکھیا۔ ایہ اکھاں اوس ویلے موجود نہیں سن جدوں من و سلویٰ برابر وٹنڈیا جا رہیا سی۔ ایہ تے جھکھتی پیاسیاں اکھاں نیں جھڑیاں لوکائی کولوں اپنا حق منگ رہیاں نیں..... مادیت نال بھرے سماج توں..... اونچ نیچ والے سماج توں..... ایہناں اکھاں کئی لاڑے دیکھے جھڑے بینڈ واجیاں نال آئے تے اپنیاں دوہٹیاں لے گئے۔ ایہناں اکھاں ٹوٹ اُڈیک اے کہ کوئی لاڑا آئے۔ مگر.....؟

ایہ بانو دیاں اکھاں نیں جہناں توں ویکھدیاں منچلے سیٹی تے وجاندے نیں پر
 جیون ساتھی بناؤن لئی تیار نہیں ہوندے۔ اوہ کلی تے ضرور سی پر اُجڑے گلستان دی
 سی۔ جس دا مالی بانو دے جنم توں دو مہینے پہلوں ای دُنیا چھڈ کے مٹی دے سپرد ہو چکیا
 سی تے فیر ایس گلستان وچ بہار نہ آئی۔ بانو دی ماں حشمت بی بی حوصلہ مند عورت
 سی۔ اوہنے کسے دے سامنے ہتھ نہ پھیلا یا تے بانو توں دس جماعتاں پاس کرا دتیاں
 تاں بے اوہدی دھی بانو چنگے تھاں وی اہی جائے۔ ویلے دے لنگھن نال اک خوف وی
 اوہدے اندر پلدا سی پیا کہ اوہدی بانو ویلے دیاں اوہناں حداں وچوں نہ لنگھ جائے
 جہناں وچ سوہنے سپنے وکھالی دیندے نیں تے اوہناں سپنیاں وچ شہزادے سرے
 بنھ کے آؤندے نیں۔ اوہنوں کیہ پتہ سی کہ بانو تے ہن اندرو اندری سڑدی جاندی
 اے پئی تے اپنے آپ توں اوس تتلی وانگوں محسوس کر رہی اے جمدے رنگ
 سماج دی گھٹن تے جبر ہتھوں پھکے پیندے جارہے نیں۔ اوہ تے ہن اوس موسم توں
 ڈردی اے پئی جمدے وچ نہ ٹھنڈی ہواواں چلدیاں نیں اور نہ ای پتے ہلدے نیں
 تے نہ ای مینہ وسدا اے۔ کدی کدار اوہدے دل دے اندر آس دا دیوا بلدا جد
 نفیس احمد اک نظرے اوہدے ول ویکھدا گزر جاندا اے۔ ایہ بلدا دیوا جلد ای ایس
 سوچ نال بجھ جاندا..... کہ کئی بھنورے آئے تے گئے پر اک کیرن اس انھیرے
 وچ وی چمکدی رہندی..... نفیس اوہنوں دو جیاں نال وکھرا جا پدا سی..... پر بانو کیہ
 کرے اوہدا ناٹھ اوس طبقے نال سی جتھے کڑیاں ظلم دی چکی وچ پسدی حیاتی گزار
 دیندیاں نیں تے کئی کڑیاں اپنے ساجناں دی اڈیک وچ اپنے وال چٹے کر لیندیاں
 نیں۔ اوہنے تے جھڑے سماج توں ویکھیا سی اوہ پھلاں دے گجرے دی بجائے سونے
 دے کنگن دا تقاضہ کردا سی۔ اوہ کڑی دا نہیں کاراں، فرجاں تے وی سی آرتے پیہ
 منگدا سی۔ اس سماج وچ عزت، نیک نامی تے شرافت دے سکے نہیں سگوں سونے،
 چاندی تے اختیار دے سکے چلدے نیں۔ بانو سوہنی سی۔ پڑھائی لکھائی، طریقے سلیقے
 تے شرافت دا زیور اوہدے کول سی۔ پر اوہدے کول اس سماج دے اوہ سکے نہیں سن

جہڑی اوہدی قدر و قیمت دوا سکدے۔ ایس لئی نفیس احمد اک کرن وانگوں بانو دے
دل وچ ہوندیاں وی اوہدے دل وچوں سماج دا خوف نہ کڈھ سکیا۔ سماج وچوں ہمیشہ
اک مایوس کن آواز اُبھردی تے ہر پاسے دُھند پھیلدی جاندی..... بانو نوں ویکھن
لئی کئی لوک آئے تے اپنیاں اپنیاں بولیاں بول کے رُ گئے:

”شکل دی چنگی اے پر گھربار کجھ نہیں۔“

”نہ کوئی فریج نہ ٹی وی..... اک چھڈ کئی ملن گیاں۔“

”غمردی وڈی اے..... وال وی چتے نیں۔“

”اسیں تے مُنڈے دا اوتھ ویاہ کراں گے جہڑے کار دین گے..... بڑی

خنتاں نال مُنڈے نوں افسر کرایا اے.....“

نفیس احمد دی ماں وی اپنے پتر دا رشتہ ایسے بُر وچ کرنا چاہندی سی جہڑے
اوہدے بیٹے نوں کھلا جینز دے سکن۔ پر نفیس احمد پڑھیا لکھیا، روشن خیال، زندگی دی
حرارت اور جذبات دی شدت محسوس کرن والا نوجوان سی۔ اوہنے اپنی ماں دے پیر
پھڑلئے۔

”کیہ گل اے نفیس پتر؟“ ماں نے آکھیا۔

”ماں جی! خدا واسطے میری اک گل من لو۔ مینوں اس رسم و رواج دے غلام

سماج نوں اکھاں وکھان دی اجازت دے دیو..... مینوں سماج وچ پلدے ناسور نوں

نشر مارن دی اجازت دے دیو.....“ نفیس نے التجا کردیاں اپنی ماں نوں آکھیا۔

”میں تیری گل نہیں سمجھی۔“ ماں نے آکھیا۔

”ماں جی! پیسہ ڈھلدی پرچھائیں اے..... اللہ نہ کرے ساڈی جمع پونجی کسی

مصیبت وچ خرچ ہو جاوے تے میری چھوٹی بھین سعدیہ دے ہتھ پیلے کرن لئی


ساڈے کول کوئی پیسہ دھیلہ نہ رہوے..... تے کیہ سعدیہ دے وال چتے ہوندے

رہن..... اوہدی اکھاں دی چمک پھکی پیندی رہوے..... اڈیکدے

اڈیکدے..... اوہ.....؟ ایہ ظلم اے۔ ایسا وہ ناسور اے جہنے سماج نوں اندروں

کھوکھلا کر چھڑیا اے..... خدائے مینوں اس سماج توں اپنے عمل نال سمجھاؤن دا
 موقع دیوتاں جے کوئی کڑی اپنے ماں پو دے بُو ہے بُڈھی نہ ہووے.....“
 ”پتر! مینوں تیری گل سمجھ وچ آگئی اے..... اوہ کڑی کون اے.....“
 ”اوہ بانو اے.....“

”مینوں کوئی عذر نہیں..... تیری جویں مرضی.“
 نفیس احمد دوڑدا ہو یا باہر نکل گیا..... دو اکھاں جالیاں توں جھانک رہیاں سن
 تے ہُن دو اکھاں پورے عزم نال جالیاں ول ویکھ رہیاں سن. اڈیک ختم ہو گئی
 سی..... زندگی اپنے جلو یاں نال ظلم دے نشان مٹا رہی سی.



پستی داموتی

کدی کدار آندیاں جانڈیاں، گھمڈیاں پھردیاں کوئی گل کوئی منظر دل وچ ڈونگھا
 ای کھب جاندا اے۔ یاں فیر دماغ نال اینج چنبر جاندا اے کہ اوس ویلے آلے دوالے
 دا پورا ماحول تے اوتھے ای ہوندا اے پر بندہ ہوندا اوتھے نہیں..... اوہ تے بس
 اندروں ای اندر کسے ندی، دریا وانگوں رُڑھدا کسے حیرت دے سمندر وچ جا ڈگدا
 اے جتھے دُکھ دیاں ڈونگھیاں وی ہو سکدیاں نیں تے موتی جمیاں سپیاں وی.....
 جانڈی بہار دا موسم سی۔ میٹھ پورے زوراں وچ ورھدا پیا سی وگیں وچ میرے
 توں اڈتن سواریاں ہور سن۔ ہور سواریاں آدن دی کوئی آس نہیں سی لائی جا
 سکدی۔ ایس طوفانی بارش وچ کہنے آنا سی۔ ”اج گھر چھتی پہنچنا ممکن نہیں۔“ میں
 حالل ایہ ای سوچیا سی کہ خورے کھڑے پاسیوں اک کنبدی، ٹھردی، میٹھ وچ بھیجی
 وڈیری مائی ہتھ وچ اک میلی کچیلی جی پوٹلی پھڑکے اوکھیاں ہوندیاں وگیں وچ
 چڑھی۔ بوہے دے نال ای باری لاگے سیٹ اُتے بہہ گئی۔

”ماں جی ایہ لانگھا اے۔ ہر سواری نے ایتھوں ای چڑھنا اُترنا اے۔ تئیں تنگ
 ہوو گے.....“ کنڈیکٹر نے آکھیا۔

”گڈی وچ میرا جی کچا پکا ہوندا اے..... تے نالے اُلٹی آؤن دا وی ڈر رہندا
 اے..... باری نیڑے ایس لئی بیٹھی آں.....“

”ماں جی تئیں ایچھے بہہ جاؤ.....“ میں دوجی پاسے باری والی سیٹ توں
 اُٹھدیاں تے مائی ہوراں توں جگہ دیندیاں آکھیا۔

جھڑیاں کوئی چار سواریاں مائی دے آون توں پہلاں بیٹھیاں ہوئیاں سن اوہ
ساریاں باری لاگے سیٹ مل کے بیٹھیاں سن۔

”جیوندا رہ..... اللہ لمی حیاتی کری.....“ مائی ایہ کنڈیاں کھڑکی لاگے سیٹ
اُتے بہہ گئی تے میں اوسے سیٹ توں ذرا اُرا نہہ ہو کے بہہ گیا۔

ایس عمر وچ..... ایس طوفانی موسم وچ..... کلم کلی..... میرا دل کیتا کہ مائی
نوں ایس بارے کجھ چُچھاں..... پر اوہنے ادھ کھلی باری ول مونہ کر کے گھنگنا
شروع کر دتا۔ کھانسی رُکی پر مائی نے مونہ باری ول ای رکھیا۔ گجھیاں شاں دی پیڑ
مینوں لتاں بانسواں وچ محسوس ہوئی تے سویر والی گل یاد آون لگ پئی..... میں
نویں پُل توں ٹیشن پہنچنا سی۔ اوس ویلے کنیاں صرف کن من کن من کردیاں
ورھدیاں سن پئیاں۔ ایڈی طوفانی بارش دا کوئی امکان نہیں سی لگدا..... میں کاٹھی
کاٹھی ٹردیاں نویں پُل ول جا رہیاں ساں۔ ٹیشن جان والی بس نویں پُل تائیں پہنچ چکی
سی۔ ”پونے اٹھ والی ریل کار اُتے جاؤن لئی ایس بس وچ بہنا ضروری سی۔“ ایہ
سوچ کے میں بس ول نس پیا۔ میرا تے بس دا اینا ای فاصلہ سی ٹردا رہندا تے بس نکل
جان دی۔ بس دے نیڑے پہنچیا تے کڑا کے، ار بجلی چمکی، بدل گرجیا تے میرا تراہ نکل
گیا۔ سڑک دے نال دی کچی جگہ توں تھکھیا تے بُری طرحاں بھومیں تے ڈگیا.....
قسمت چنگی سی۔ اوتھے کوئی اٹ روڑا موجود نہیں سی۔ رگڑاں ای لگیاں سن.....
بس وچ سوار تے ہو گیا..... پر ٹیشن پہنچیا تے ریل گڈی چلن وچ صرف پنج منٹ
باقی سن.....

میں تیزی نال ورھدا سی پیا۔ اک واری فیرو رھدے میںہ وچوں نسیاں ٹکٹ
گھر تائیں جانا سی۔ ٹکٹ لے کے نسیاں ریل کار وچ سوار ہونا سی۔ سویر والیاں
رگڑاں یاد آگیاں تے ویگن اُتے جان دا فیصلہ کړلیا۔ میں پوری نس بھج پاروں دی
ٹرین تے نہ جاسکیا۔

حیاتی دا سفر بڑا نوکلا تے عجیب ہوندا اے۔ کئی واری بندہ اوہناں راہواں ول

مڑ جاندا اے جہناں بارے کوئی سوچ وچار نہیں کیتی ہوندى۔ ایہ اتفاقہ رستے کئی واری حیاتی ٹوں نوياں جتاں ول تے کئی واری ماضی دیاں بھلیاں اوہناں گلیاں وچ لے آوندے نیں جتھے خوشیاں، محبتاں، سچائی تے غرضاں توں بغیر دوستیاں ہوندىاں نیں۔

میں ویگن وچ بیٹھا اپنے ای خیالاں وچ ڈبیا ہویا ساں۔ گڈی شارٹ ہوئی تے مینوں پتہ چلیا کہ اوہ سواریاں نال بھر چکی اے۔ لوکاں دیاں مجبوریاں اوہناں ٹوں ایٹھے تیک لے آئیاں سن۔ اے تائیں مینہ تیزی نال ورھدا پیا سی..... سڑکاں اُتے وی پانی کھڑا ہو گیا سی..... ڈرائیور ویگن ٹوں ہولی ہولی چلاندىاں مین روڈ ول جا رہیا سی۔ آسمان اُتے بدلاں دیاں ون سونیاں شکلاں بن رہیاں سن۔ اوہ کدی چیتے وانگوں پھلانگدىاں تے کدی شیر وانگوں گرجدىاں وکھالی دیندىاں۔ چتے کالے بدل آپس وچ گلوکڑیاں پاوندے کسے مصور دے تجریدی آرٹ وانگوں لگ رہے سن اوہناں وچ جارحیت سی۔ انج لگدا سی کہ اج اوہ سارے ورھدىاں ورھدىاں مٹ جانا چاہندے نیں۔ جی ٹی روڈ اُتے آندىاں ای ویگن دی سپیڈ تیز ہو گئی۔ پر فیروى کنیاں ادھ کھلی باری وچوں مائی دے مونہ اُتے پے رہیاں سن۔ نہ اوہنے باری بند کیتی تے نہ ای اوہنے مونہ ٹوں صاف کرن دا جتن کیتا۔ بس بے پرواہ ہو کے بیٹھی رہی۔ مونہ اُتے پئیاں جھڑیاں وچ پانی دے قطرے چمکاں مار رہے سن۔ بڑھاپے نال لک انج اُڑیا ہویا سی کہ سیٹ نال چنگی طرحاں ٹوہ وی نہیں سی لگدی۔ اک میلا کچھلا چھوٹا جھیا تھیلا اوہدی گودی وچ پیا سی۔ جہدے اُتے اوہنے دوویں ہتھ انج رکھے ہوئے سن جو یں ٹوہ نہ لگن دی کمی ہتھاں نال ای پوری کیتی ہووے۔

میں باری راہیں آسماناں ول پھیلدے بدلاں تے فیروى مائی ول گوہ نال ویکھیا۔ مینوں ورھدے بدلاں تے مائی دی حیاتی وچ سانجھ محسوس ہوئی۔ خورے کنج کنج دے بدل مائی دی حیاتی وچ کوں کوں وس چکے سن۔ میں اک واری فیروى خیالاں وچ ڈب گیا۔ اک زمانہ سی جدوں وس والے بدلاں نال آسیں وی نچن ٹپن لگ پیندے

ساں۔ جہڑے سکول وچ میں پڑھدا ساں اوتھے بوہتے بوڑھ دے درخت ای سن۔
 جہناں ہیٹھ پرائمری تائیں کلاساں لگدیاں سن..... جدوں کوئی پچھدا کہ تیجی کلاس
 کتھے وے یا چوتھی کتھے؟..... اسیں کنڈے تیجی کلاس چھوٹے بوڑھ ہیٹھ تے
 چوتھی کلاس وڈے بوڑھ ہیٹھ..... اوہ زمانہ وی عجیب سی۔ اسماناں اُتے پھیلدے
 کالے بدل ویکھ کے دل وچ خوشیاں پھٹن لگ پندیاں سن۔ بدلاں دے ورھدیاں
 ای چھٹی ہو جاندی سی..... انج دیاں چھٹیاں دی خوشی بدلاں نال جڑی ہوئی سی۔
 ایس لئی بچپن وچ کالیاں گھٹاواں مینوں ڈاڈھیاں چنگیاں لگدیاں سن میں ایس بارے
 کدی نہیں سی سوچیا کہ ایہناں دا ناٹھ کس موسم نال اے..... تے ایہناں دے
 وسن دا کیہ اثر اے..... فیراک ویلا انج دا آیا کہ جاندی بہار وچ وسدے بدل
 پریشان کرن لگ پئے..... ہويا انج سی کہ میں اودوں نوویں کلاس وچ پڑھدا
 ساں..... میرا کلاس فیلو طاہر کلاس وچ بیٹھا ہنجو کیردا پیا سی..... ساریاں یاراں
 بیلیاں اوہنوں روون دی وجہ کچھتی پر اوہنے کجھ نہ دسیا..... کجھ دیر بعدوں ماسٹر
 صاحب کلاس وچ آئے۔

”خیر اے طاہر پتر.....“ طاہر دیاں بجیاں تے سُرخ اکھاں ٹوں ویکھ کے
 اوہناں آکھیا۔

”سرجی..... اج کل کنکاں دیاں واڈھیاں دا موسم اے..... بارشاں نے
 ساڈیاں تے پتہ دیاں لوکاں دیاں فصلاں ٹوں برباد کر چھڑیا اے..... پتہ دے
 لوکاں دیاں آساں تے خوشیاں ورھدے پانی نال ای رڑھ گئیاں نیں..... اج وی
 مینہ زوراں وچ اے..... باری راہیں بدلاں ول ویکھدیاں تے سسکیاں لیندیاں
 اوہنے آکھیا..... تے ماسٹر صاحب دیاں اکھاں ہنجوواں نال بھر گئیاں.....

”تیرے دکھ دا مینوں ڈاڈھا احساس اے..... تے میں اندروں ٹوٹے ٹوٹے
 ہو گیا واں..... پر طاہر پتر تیری گل مینوں گرما رہی اے..... حوصلہ دے رہی اے
 کہ اوہ لوک وڈے ہوندے نیں جہڑے دوجیاں دا دکھ وی روندے نیں تے اپنی

ذات توں اگانہ سوچدے نیں.....“ ایہ کھنڈیاں ماسٹر صاحب اک کرب نال کلاس دے اک پاسیوں رُردے دوجے پاسے چلے گئے پر ماسٹر ہوراں دی ایہ گل میرے دل وچ آھنا پا کے بہہ گئی..... طاہر مینوں بڑے چر توں نہیں سی ملیا. سنیا سی کہ اوہ کسے محکمے وچ ملازم ہو گیا اے.....

”ایہ ٹیوٹا تے رُکوائیں پتر.....“ مائی ہوراں پوٹلی توں ہتھ چکدیاں تے میرا موڈ ہا ہلاندیاں آکھیا.

”خیر اے ماں جی!“ میں خیالاں وچوں نکلدیاں پچھیا خورے کیوں اج میں بار بار خیالاں وچ ای دُبا چلا جا رہیا ساں....

”اوتری شوگر جان نہیں چھڑدی..... دو گھٹ پانی پی لیئے تے پیشاب آجاندا اے.....“ مائی نے ہولی جہی اواز وچ آکھیا.

”اُستاد جی ذرا ویگن روکنا..... مائی ہوراں.....“ میں گل ادھوری کیتی پر ڈرائیور سمجھ گیا.

”پٹرول پمپ آن والا اے اوتھے گڈی روکنا واں.....“ اوہنے آکھیا تے فیر کجھ دیر بعدوں اوہنے گڈی پٹرول پمپ اُتے روکی. مائی نے پوٹلی ویگن دیاں سیٹاں تھلے رکھی تے فیر سیٹاں دا سہارا لیندیاں ویگن وچوں باہر نکلی تے ورہدے مینہ وچ ہولی ہولی رُنا شروع کر دتا..... ایس منظر پاروں میں عجیب قسم دے دباؤ ہیٹھ آ گیا..... حیاتی دی فنڈ نظراں سامنے گھمن لگ پئی. ایہدا مڈھ ہووے یا اخیر سہاریاں دی لوڑ رہندی اے..... کجھ دیر تائیں ویگن وچ سواریاں خاموشی نال بیٹھیاں رہیاں.

”خیر ہووے مائی ہوراں چوکھی دیر ای لادتی اے.....“ اک درمیانی عمر دی عورت بولی.

”ایس بڈھاپے وچ کسے ٹوں نال لے کے آنا چاہیدا سی مائی ہوراں ٹوں کجھ ہو جاوے تے فیر.....“ اک بندہ بولیا.

”وڈیریاں دی وی نوہاں پتراں نال نہیں بن دی۔ کپڑیاں دی پوٹلی چکی تے
اک گھرتوں دو بجے گھر.....“ اک جوان مُنڈا بولیا۔

”وڈیرے کیہ کرن..... اج کل دے جواناں نوں وی اک لگی ہوئی اے.....
نہ اوہ شرماں تے نہ اوہ حیاواں..... کیبلاں لگیاں نیں..... کیہ کیہ نہیں دکھایا جا
رہیا.....“ اک وڈیری زنانی بولی۔

”شکر اے..... مائی ہو ریں آرہے نیں.....“ اک سواری بولی تے سارے
چُپ ہو کے بہہ گئے۔ مائی گڈی وچ سوار ہوئی تے گڈی چل پئی۔
”ماں جی..... تئیں کتے سفر کر رہے اوکے گھر دے جی نوں نال لے آنا
سی.....“ میں آکھیا۔

”میرا کوئی پتر نہیں..... دو دھیاں ای نیں..... اوہناں نوں اپنے نال کتھے
کھل کردیاں پھراں..... اک دا خاوند مر گیا تے اوہ دو نیاں لے کے میرے کول آ
گئی تے دو جی؟..... اچھا چلو جو اللہ نوں منظور اے.....“ ایہ کہندیاں مائی دی آواز
بھرا گئی تے گڈی وچ بیٹھیاں سواریاں وی خاموش ہو کے بہہ گئیاں۔ اوہناں دی
تسلی جو ہو گئی سی۔

”پترا.....“ میرے ول ویکھدیاں مائی نے آکھیا تے فیر ہنجو کیردیاں چُپ ہو گئی۔
”جی اماں جی.....“ میں آکھیا۔

”کچھ نہیں پتر..... بس ایویں ای..... ایہ کہندیاں مائی خاموش ہو گئی۔ میں
وی اڈیکیا کہ سواریاں اپنے اپنے خیالاں وچ مست ہو جان تے فیر مائی نال گل
کراں۔

ڈرائیور نے ویگن دی رفتار تیز کر دتی تے نالے ٹیپ آن کر دتی۔ کافی دے ایہ
بول سنائی دے رہے سن:

ربا میرے حال دا محرم توں

اندر توں ہیں باہر توں ہیں روم روم وچ توں
توں ہیں تانا توں ہیں بانا سب کجھ میرا توں
کے حسین فقیر نماں میں ناہیں سب توں

مائی دی گل بات تے کافی دے بولاں نے طبیعت وچ اُداسی بھردتی..... تے
اک اجی کیفیت دا شکار کر دتا جمدے وچوں نکلن نوں جی نہیں کردا..... تے بندہ
ایہو ای چاہندا اے کہ اوہ بس اپنے آپ وچ ای گواچا رہے۔ مائی دی ادھوری گل
نے مینوں پوری طرحاں بے نیاز نہ ہون دتا تے اُداس کیفیت وچ جانکاری دی
خواہش وی زندہ رہی۔

”ماں جی.....“ میں ہولی جہی بولیا تے ماں ہوراں نے پوٹلی ولوں نظراں ہٹا
کے میرے ول ویکھیا۔

”خیراے پترا.....“

”ماں جی..... کجھ چر پہلوں تئیں گل کردے کردے خاموش ہو گئے
سو.....؟“ میں مائی نوں پچھیا۔

”پترا کوئی ضروری وی تے نہیں ہوندا کہ اپنی ہر گل دوجے نوں دسی
جاوے..... زبان نوں کنٹرول نہ کیتا جاوے تے بندے نوں بھنڈ چھڈ دی
اے.....“ مائی دی گل بات توں محسوس ہوندا سی کہ اوہ پرانے ویلے دیاں کوئی چار
جماعتاں پڑھی ہوئی اے۔

”ماں جی..... گل ایہ وے کہ کجھ دیر بعد گڈی بس شاپ اُتے پہنچ جاوے گی
تئیں اپنی منزل ول تے میں اپنی منزل ول رُ جاواں گا.....“ ای انسان اک
دوجے نوں ملدے تے وچھڑدے چلے جا رہے نیں..... وچھوڑا تے مقدر اے تے
کیہ فرق پیندا اے کہ اک دوجے دے دُکھ درد وںڈا لئے جان.....“

”تیریاں گلاں بالکل اوس باؤ ورگیاں نیں جہڑا ہاؤ سنگ دے محکمے وچ لگا ہویا

سی..... اوہدیاں گلاں وی سوہنیاں سن تے اوہ آپ وی اندروں اپنا ای سوہنا
سی..... کسے اللہ دی بندی نے اوہنوں جمیا سی..... اوہ تے کسے پتی دا موتی
سی.....“

”ماں جی اوہ ہاؤ تہاؤں کتھے ملیا سی.....؟“ میں تجتس نال پچھیا۔

”ملیا تے اوہ مینوں گھرای سی.....“ سوچدیاں..... ”گل سن پترا.....“
میں اپنی ساری توجہ مائی ول کردتی۔

”بھیڑے چنگے ویلے دا کوئی پتہ نہیں لگدا..... ایہ کدوں آ جاوے.....
میریاں دو دھیاں سن..... بہوں خوشحال تے نہیں سی پر نکتر پانی سوہنا چل رہیا سی۔
میرے خاوند نے ہاؤ سنگ توں قرضہ منظور کروا کے رہن سہن لئی گھر تعمیر کروا لیا۔
اوہ کجھ عرصے بعدوں بیماری نال مر گیا۔ بوہتا ویلا نہ گزریا تے میرا داماد وی چل
وسیا..... تے میری دھی دو نیانیاں نال میرے گھر آ گئی..... دال روٹی چلنی اوکھی ہو
گئی..... تے محکمہ ہاؤ سنگ دیاں قسطاں دینیاں ساڈے لئی ممکن نہ رہیاں.....
دو جی دھی دے تے گھر بیٹھیاں ای سروچ پٹے وال آ گئے نیں.....“ مائی چپ ہو
گئی تے کجھ دیر میں وی چپ رہیا۔

”مائی جی قسطاں دا کیہ بنیا..... محکمے والیاں تہاؤں پریشان کیتا ہونا اے.....“
میں پچھیا۔

”عدالت وچ ساڈے، خلاف فیصلہ ہو گیا..... پر..... اوہنے پریشانی توں بچا
لیا.....“

”کنسے.....؟“ میں پچھیا۔

”ایہو ای گل تے تینوں دسی اے..... عدالت دا بیلف‘ ہاؤ سنگ دا اک
افر..... تے کجھ ہو رہ بندے ساڈے مکان دا قبضہ لین لئی آئے..... میں اوہناں
نوں اپنے گھر دی بیٹھک وچ بٹھایا..... ہاؤ سنگ محکمے دا ہاؤ..... کیہ دساں میں
تینوں پترا..... کوئی فرشتہ سی..... جدوں میں اوہنوں اپنے حالات دے تے

اوہدیاں اکھاں وچ ہنجو آ گئے..... آکھن لگا: تہانوں اپنے حالات دس دی لوڑ نہیں..... تہاڑی ڈیوڑھی وچوں لنگھ کے بیٹھک تائیں آؤندیاں میریاں اکھاں نے سب کجھ ویکھ لیا اے..... فیر بیلف نوں آکھن لگا، جے قانون مطابق ایہ گھر قبضے وچ لیئے تے ایہ مائی تے ایہدیاں دھیاں کتھے جان گیاں..... بیلف آکھن لگا، اسیں تے قانون ہتھوں مجبور آں اسیں کیہ کر سکے آں؟ ساڈا کم حکم دی تعمیل کرنا اے. ہاؤسنگ والا باؤ آکھن لگا ٹھیک اے اسیں سرکار دے بندے آں..... پر ساڈے اندر وی اک دل دھڑکدا اے.... ایہو جے مکانات دے قبضے میں نہیں کرا سکدا..... بیلف آکھن لگا سرکار ساڈی کچھ کربے گی..... باؤ آکھن لگا اوہناں دی کچھ تے اج تیک نہیں ہوئی جہڑے جوکاں وانگوں دھرتی دا خون چوس رہے نیں..... بیلف آکھن لگا باؤ جی تئیں جذباتی ہو گئے او سرکار دے بندیاں نوں اپنی سرکاری ڈیوٹی نبھانی چاہیدی اے. باؤ آکھن لگا بھائی بیلف..... ایس قبضے نوں کجھ دناں لئی ملتوی کر دیئے تے نالے یار ذرا اپنے اندر وی جھاتی مار..... تیرا دل وی ایہو ای چاہندا اے. بیلف آکھن لگا باؤ جی گل تے تہاڑی ٹھیک اے پر جواب طلبی ہووے گی..... باؤ آکھن لگا توں فکر نہ کر اوہ میں بھگت لواں گا. فیر اوہ سارے سرکاری بندے میرے گھر دا قبضہ لین دی بجائے واپس ٹر گئے.

”اوہ دوبارہ نہ آئے.....“ میں پچھیا.

”اوہ ہاؤسنگ والے باؤ نے ساری گل محکمے دے وکیل نوں دسی. چنے ایہ گل اک امیر سخی دل انسان نوں چھٹی راہیں لکھی. چنے ایہ ساری داستان سن کے ایسے سارے لوکاں دے قرضے ادا کر دتے جہڑے مجبوری پاروں قرضے ادا کرن دے قابل نہیں سن.“

”اوس سخی انسان نال تے ہاؤسنگ دے باؤ نال ملاقات ہو سکدی اے.....“

”سخی انسان نال تے میری وی ملاقات نہیں ہوئی..... ہاؤسنگ والے باؤ نال ملاقات ہو سکدی اے.....“

”اوس باؤ داناں کیہ اے.....؟“ میں پچھیا تے مائی سوچن لگ پئی۔
 ”مینوں چیتا نہیں آندا پیا..... ویسے میں کل ہاؤسنگ دے دفتر جانا ایں.....
 کل دس بجے توں وی اوتھے آجاویں..... باؤ نال تیری ملاقات ہو جاوے گی۔“
 ”ماں جی! ہاؤسنگ دے دو دفتر نیں..... ہاؤسنگ اینڈ فزیکل ڈیپارٹمنٹ تے
 ہاؤسنگ اینڈ فنانس کارپوریشن.....“ میں وضاحت کیتی۔
 ”جتھے قرضے ہوندے نیں.....“ اوہنے آکھیا۔

”اچھا..... ہاؤسنگ اینڈ فنانس کارپوریشن دے دفتر..... میں ضرور آواں
 گا.....“ ایہ کہہ کے باری راہیں دیکھیا ہن مینہ تھم چکیا سی تے ٹھنڈی ہوا چل رہی
 سی۔

فیر کجھ ویلا گزرن پاروں گوجرانوالہ آگیا۔ میں مائی نوں سلام کیتی تے کل دفتر
 وچ آن دا چیتا کرا کے گھر نوں روانہ ہو گیا..... اگلے دن میں ہاؤسنگ اینڈ فنانس
 کارپوریشن دے دفتر پہنچیا۔


”سلام ماں جی.....“ میں مائی ہوراں نوں دیکھ دیاں آکھیا۔
 ”اللہ لمی حیاتی کری..... چل پُترا چل میں تینوں باؤ ہوراں نال ملاواں.....
 میں وی ہنے ای پنہی آں مینوں پتہ چلیا اے کہ باؤ ہو ری کمرے وچ ای نیں۔“ مائی
 نے آکھیا تے فیر اسیں دوویں باؤ دے کمرے وچ پہنچے تے باؤ مینوں مائی نال دیکھ کے
 حیران ہو یا۔

”کتھے ہونا ایں یار توں تے کدی ملیا ای نہیں..... تہ ورھے بیت گئے نیں
 اُنج دا اُنج ایں صابر یار..... کوئی فرق نہیں پیا تینوں.....“ ایہ کہندیاں اوہنے
 خوشی نال ہتھ ودھایا۔ میں اوہدے نال ہتھ ملایا پر اوہنوں پہچان نہ سکیا۔

”لگدا اے توں مینوں پہچانیا نہیں..... سکول دا زمانہ وی اک خواب لگدا
 اے..... یار صابر ذرا گوہ نال میرے ول دیکھ.....“ اوہنے آکھیا۔
 میں اوہدے ول گوہ نال دیکھیا..... اوہدیاں اکھاں وچوں ہنجو نکل رہے سن

جڑے مینوں نوویں کلاس وچ لے گئے جدوں ماسٹر صاحب کہہ رہے سن کہ
دوجیاں دا دُکھ روون والے لوک ای وڈے لوک ہوندے نیں جڑے اپنی ذات توں
اگانہ سوچدے نیں.....

”طاہر.....“ میں جوش نال پکاریا تے اوہدے گلے لگدیاں ای حیرت دے
سمندر وچ جا ڈگیا..... جتھے دُکھ دیاں ڈونگھیاں وی سن تے موتی جمیاں سپیاں
وی..... پر ہن اک وڈا موتی میری نظراں دے سامنے سی..... پتی دا موتی.....
لنگھدے ویلے نے اوہدی چمک وچ ہو روی وادھا کردتا سی۔



وچھوڑا

ویگن وچ بیٹھیاں باری راہیں باہر دے نظاریاں وچ گواچیا رہنا اوہدی عادت بن گئی سی۔

اوہ جد وی سفر کردا اوہدی کوشش ہوندی کہ اوہنوں باری دے نال دی سیٹ لہجے۔ اوتھے بیٹھیاں آل دوالے تے دور نظراں وچ ندے بھجے منظر اوہدے ادھورے تے تریہائے جذبیاں ٹوں ڈاڈھا سکون پہنچاندے سن تے اوہدی سوچ تے خیالاں دیاں نویاں راہواں کھلدیاں جاندیاں۔ جدوں کدی لہلاندے کھیت یا دور کوئی پنڈ وکھالی دیندا تے اوہنوں ہور وی سواد آندا۔ اج فیروگن وچ بیٹھیاں باہر دے نظارے ویکھدیاں ہویاں اوہنوں انج لگ رہیا سی جوہں اوہ کوئی فلم ویکھ رہیا اے۔ فلم دی اجی جھڑی اوہ آنہ نکادے کے بال اپنے وچ ویکھیا کردا سی تے سینما گھر وی ایہو جہیا جھڑا اک بندہ موڈھیاں تے چھلی پھردا سی۔ جھنوں اوہ بھونیں تے رکھدا تے تن نکتے نکتے بال اپنے دوویں ہتھاں دیاں بُکاں بنا کے اکھاں اولھے رکھدے تے فلم شروع ہو جاندی۔

فلم وکھان والا لانبھیوں اک نئی جہی موری وچوں ویکھدا جاندا تے اک سلاخ جہی گھماندیاں آکھدا..... ”شالا مار باغ ویکھ..... جہانگیر دا مقبرہ ویکھ.....“ ہن وی نظراں سامنے انج ای منظر گزر رہے سن پر سلاخ گھمان والا تے آوازاں دین والا کوئی وکھالی نہیں سی دے رہیا پر فیروی بولدے منظر سن۔ ویکھن والے ایہناں ٹوں ویکھدے وی نہیں تے سنن والے ایہناں ٹوں سن دے وی نہیں۔ کئی منظر دل تے

دماغ وچ انج کھب جاندے کہ ویلا گزرن دے نال نال اوہ مٹن دی بجائے اپنے رنگ کھلار دے تے بہندے ہوئے احساس دیاں ڈونگھیاں وچ چلے جاندے نیں۔
 اک واری اوہنے گدی وچ سفر کردیاں باری تھانی ویکھیا کہ اک سوانی جمدے ہتھ وچ روٹی دی گنڈھڑی تے سرتے گڑوی پئی ہوئی سی دوروں پیلیاں چوں پٹری تے رُدی آندی نظر آ رہی سی۔ نال ای اوہدی نظر کھیتاں وچ کم کردے اک بندے اُتے پئی۔ جھڑا کم چھڈ کے ٹکڑ پانی دی اڈیک وچ راہ لنگھدی اک سوانی ول ویکھ رہیا سی۔ اوہنوں ایہہ سب کجھ بڑا چنگا لگا۔ اوہدے اُتے اک اجھیا اثر ہويا تے اوہ بڑبڑایا ”رہتل دے پیداواری لوک ایہو ای نیں جھڑے دھرتی نوں اپنا لو دے کے تھاؤں تھامیں ہریالی پیدا کردے نیں۔ اوئے لوکو! میں تھانوں سلام کرنا۔“

اوہ بڑبڑایا تے اوہدے نال بیٹھا بندہ بولن لگا ”باؤ جی! کیہ گل اے؟“ ایہہ سوچ کے اوہ نہتھا جھیا مسکرایا۔ فوراً ہی اوہدی نظر دو بابیاں تے پئی جھڑے اک بوڑھ تھلے پئی ہوئی منجی تے بیٹھے ہوئے سن۔ اک حقہ چھک رہیا سی تے دو جا بڑے سکون نال بیٹھا اک پاسے ویکھ رہیا سی۔ چار چوہیرے چپ دا عالم سی۔ سڑک توں فرائے بھردی ہوئی تیزی نال لنگھدی گڈی تے ہووے ایس سے وچ ہو رہا سماں پیدا کر دتا۔

اوہدا دل کیتا کہ اوہ گڈی رکوا کے ایچھے ای اُتر جائے تے بابیاں نوں سلام کر کے اوہناں کول بہہ کے ڈھیر گلاں کرے پر اوہ تے جاکنگ رپورٹ دین لئی جا رہیا سی جمدی اج آخری تاریخ سی۔ اوہدی بدلی جو ہو گئی سی..... پر فیروی گڈی توں اُتر جان والی خواہش نے اوہنوں اجھیا سواد دتا۔ ہن تیک جدوی الماس دی بدلی ہوئی سی ایہو جے شہر وچ ای ہوئی جتھوں اوہدا آبائی شہر اپنا ای دور ہوندا کہ اوہ ہر روز اپنے گھر نوں جاندا سی پر اوہنوں روز آن جان دا کرایہ بڑا چھدا سی۔ سرکاری ملازم دی حیاتی بڑی حساب کتاب دی ہوندی اے۔ اوہنوں اک ویاہ ای پے جائے تے کئی کئی مہینے گھر دا بجٹ سدھا نہیں ہوندا۔ ہر دیہاڑی کرایہ خرچن دے ڈپریشن توں اپنے

آپ توں باہر کڈھن لئی الماس گڈی وچ بہہ کے ون سونے منظر ویکھن ول اپنے آپ توں متوجہ کر لیندا۔ انج وی اوہنوں دفتری زندگی تے گھردی مصروفیت پاروں اپنی ذات توں وقت دین لئی ویلہ نہیں سی ملدی۔ اوہ گڈی وچ بیٹھیاں کدی منظر اں وچ گواچ جاندا تے کدی اپنے آپ وچ گواچیا رہندا۔

اودھی کیفیت دوہاں صورتاں وچ عجیب ہوندی۔ اجے سے اوہ من ای من وچ خیالاں دیاں پینگھاں تے جھونٹے لین لگدا تے سوچاں ہی سوچاں وچ کتھے دا کتھے جا اڑدا۔

”چلو جی چلو بی بی..... او بھیناں..... اماں جی کھلو جاؤ۔ اک منٹ گڈی کھلو لین دیو.....“ گڈی رُکدیاں ای کنڈیکٹر سڑک دے کنڈھے کھلوتیاں سواریاں نوں واجاں مارن لگ پیا۔ ویگن وچ اگلی سیٹ پچھتے کوئی سیٹ خالی نہیں سی پر ویگن والیاں اگلی سیٹ پچھتے پھٹالایا ہوندا اے۔

اوہ اکثر رستے وچوں ایس پھٹے اُتے سواریاں بٹھا کے بوہتا کماون دی ہوس وچ رُجھے رہندے نیں۔ ایس گل دا اوہناں توں کوئی احساس نہیں ہوندا کہ ویگن وچ بیٹھیاں سواریاں تنگ ہو جان گیاں۔ ایس غیر قانونی کمائی پاروں کئی وار اوہناں دے چالان وی ہوندے نیں پر ایس قانون شکنی توں اوہ باز نہیں آوندے۔ راہ دیاں سواریاں دی مجبوری ہتھوں بہہ جان دیاں نیں۔

”ایہہ بیبیاں سواریاں نیں..... کتھے بٹھاویں گا.....“ اک سواری پچھلی سیٹاں توں بولی تے کنڈیکٹر نے سنی ان سنی کر دتی۔ اوہ ساریاں سواریاں بغیر کسے جھاکے دے فنافٹ پھٹے اُتے بہہ گئیاں تے پھٹا فل ہو گیا۔ تن سوانیاں مڈھلی عمر دیاں سن۔ اک جوان کڑی سی۔ اوہ باری والی سیٹ دے سامنے پھٹے اُتے بہہ گئی۔ اوس کڑی توں ایس گل دی کوئی پرواہ ای نہیں سی کہ اودے سامنے اک مرد بیٹھا ہو یا اے۔ الماس احمد نے اک نظر اودے ول ویکھیا تے فیر مونہہ سجے پاسے پھیر کے لنگھدے ہوئے نظارے ویکھنے شروع کر دتا پر اوس کڑی دی ماحول توں بے نیازی

تے بے پرواہی نے اوہدے اُتے ڈاڈھا اثر کیتا سی۔ ویلے دے لنگھن پاروں کڑی دا
ایسہ انداز اوہدے اعصاب اُتے مسلط ہوندا گیا۔ اوہ دیکھ تے گڈی توں باہری رہیا
سی پر ہن اوہنوں کجھ نظر نہیں سی آ رہیا۔ سارے منظر خور بے کتھے گواچ گئے سن۔ ہر
پاسے ہن دُھند ای دُھند نظر آ رہی سی۔

آخر کار اوہنے ہمت کر کے چور نظراں نال کڑی ول دیکھیا تے اوہدی حیرت وچ
ہور وادھا ہو گیا کہ جوان کڑی ہن وی اپنے آپ وچ ڈبی گڈی دے سارے ماحول
توں بے نیاز سی۔ اوہنوں ایس گل دی کوئی پرواہ نہیں سی کہ اوہدے سامنے اک
جوان آدمی بیٹھیا اے۔

گڈی چلدی جا رہی سی۔ ویلا لنگھدا جا رہیا سی۔ کڑی دی بے نیازی نے الماس
دیاں سوچاں وچ ڈیرا لالیا سی۔ اوہدے دل وچ خواہش پھٹی کہ اوہ انج ای بیٹھا
رہوے تے ویلا رُک جائے پر ویلا تے کدی نہیں رُکدا ہاں کدی کدار ویلے دا کجھ
حصہ دل دی کسے منکر وچ ٹھہر جاندا اے تے اوہدی مٹھی مٹھی چوبھ حیاقی دے نال
نال رُدی رہندی اے۔ الماس نے نظراں گھما کے وگیں وچ بیٹھیاں سواریاں ول
دیکھیا۔ کجھ سواریاں اونگھ رہیاں سن تے کجھ اپنے خیالاں وچ ڈبیاں ہوئیاں سن۔

”اوہ بابی شکیلہ دا پنڈ..... ماں جی!“ اوس کڑی نے باری تھانی اشارہ کردیاں
”آکھیا تے تنوں زنانیاں نے باری ول مونہہ کر دتا۔ الماس نے پہلی واری اوس کڑی
دی بے پرواہی توں پرواہ وچ بدلدیاں دیکھیا تے اوہدیاں نظراں دی باری توں باہر
دور دراز دے نظاریاں ول دوڑ پئیاں۔

اوہ نکا جھیا پنڈ سی۔ کسے ٹیلے اُتے آباد نظر آ رہیا سی۔ اوہدے وچکار چٹے رنگ دا
کوئی دربار کھیتاں وچوں لنگھدی پکی سڑک اوس پنڈ توں جا رہی سی۔ دور تک ہریالی
ای ہریالی تے اگے پنڈ۔ گڈی وچ بیٹھیاں انج لگدا سی جوئیں کوئی سوہنی تے من
کھجیویں سیزی بھوئیں تے نظر آ رہی ہووے۔

”آہ..... توں ٹھیک کہنی ایس رانو.....“ رانو دی ماں نے اوہدی ہاں وچ ہاں

ملاندیاں آکھیا۔

”واپسی باجی ولوں ہوندیاں جاواں گے.....“ رانو نے گل کردیاں ہوياں ماں داموڈھا ہلا کے آکھیا۔ جھڑی اک دم پنڈول ویکھدیاں کسے سوچ وچ ڈب چلی سی۔

”نہ کڑیے تینوں کیہ پتہ..... دھیاں ول جانا سوکھا اے..... فیر کدی سی۔“

”واپسی تے گھرتے آونا ای ایس..... راہ وچ اتر جاواں گے۔ خورے ابے نوں کیہ بجھی جھڑا شروچ رہن لگ پیا۔ ساڈے سارے رشتہ دار پنڈ وچ ای رہندے نیں۔ مینوں اکا شہر نہیں چنگے لگدے تے نالے ساڈے جہیاں ماڑیاں نے شروچ رہ کے تنگ ای ہونا اے۔ بھاء بشیر دے سنڈھے وانگوں جھنوں ہر ویلے کھوپے ای پئے رہندے نیں۔“ رانو نے آکھیا۔

”میں ایویں تینوں باراں جماعتاں پڑھا دتیاں۔ تیری تے کڑیے زبان ای نہیں کھلوندی۔ تیرا ابا بہشتی تے بڑا چنگا سی۔ تینوں کیہ پتہ۔ توں تے شروچ جی پئی سی۔

مُنڈا جہیا سی اوہدا پو مر گیا۔ چار بھیناں ویاہیاں..... قرضیاں وچ دب گیا سی تے لوڑاں نے اوہدا منہ شہر ول موڑ دتا۔ دن رات اوہنے اک کر چھڑیا سی۔ اپنا ویاہ وی آپ ای کیتا تے اگوں فیر رب نے تن کریاں دے چھڑیاں تے فیر تہاڈے لئی مردے دم تیک محنتاں، مشقتاں کردا رہیا۔“ فیر کجھ سوچدیاں آکھیا ”شکیلہ ول جان نوں دل تے بڑا کردا اے پر فیر کدی سی.....“ ایسہ کہہ کے اوہنے رانو ول بے بسی نال ویکھیا۔

”باجی ول جانا سانوں کنا اوکھا لگدا اے۔ حالاں باجی ہوری کتے چنگے نیں۔ کچھلی واری باجی دے پنڈ گئی تے اوہناں میرے لئی گھردی پالی ہوئی دیسی ککڑی پکائی، اج تک اوہدا سواد منہ توں نہیں لیندا۔ باجی ہوراں تے کوئی گلہ نہیں کیتا۔ تئیں تے ایویں ای گلاں نوں اپنے تے سوار کر لیندے او۔“ رانو نے ماں نوں آکھیا۔

”تیرا ابا بہشتی آہندا سی کہ دھیاں ول خالی ہتھ نہیں جلتا چاہیدا بھاویں دیر نال پھیرا پالیا کر۔“ ماں نے رانو نوں سمجھاندیاں آکھیا۔

”اسیں بوہتیاں گلاں آپ ای بنالیاں نیں تے اپنے آپ نوں مصیبتاں وچ پا لیا اے۔ مینوں تے ہر اوہ گل چنگی نہیں لگدی جہڑی آپس دے میل محبت وچ کندھ بن کے کھلو جائے۔“ رانو نے آکھیا۔

”تیری گل ٹھیک اے دھیئے پر ایہہ طور طریقے ساڈے پو دادیوں چلے آ رہے نیں تے لوکاں وچ رہندیاں ایہناں نوں منا پیندا اے۔“ رانو دی ماں نال بیٹھی دوجی زنانی نے آکھیا۔

”چاچی ایہہ کھڑے طور طریقے نیں..... میں اپنی اوس بھین دے پنڈ کولوں چپ کر کے لنگھ جاواں جہدے بغیر مینوں نیندر نہیں سی پندی۔ گرمیاں دیاں راتاں وچ تاریاں ول منہ کر کے اسیں بڑی بڑی دیر گلاں کردیاں رہندیاں ساں۔ اک واری باجی شکیلہ نے مینوں آکھیا سی۔ اک ویلا آوے گا ایہہ جن تے تارے انج ای چمک رہے ہون گے پر اسیں انج اکٹھیاں نہیں ہوواں گے۔ خورے کتھے کتھے بہہ کے ایہناں جن تاریاں نوں ویکھ رہیاں ہوواں گیاں۔ ایہہ سن کے مینوں اپنے دل تے آری چلدی محسوس ہوئی سی۔ میری چھوٹی جہی جان نے وڈے جہاناں کولوں ڈردیاں اپنی باجی نوں گھٹ کے جھپٹی پالئی..... میرے اندر دا خوف نہ گھٹیا۔ ایہہ طور طریقے کیہ نیں۔ مینوں ایہدے نال کوئی سروکار نہیں۔ میں تے اپنی باجی نوں اج ضرور ملنا ایں۔ اج ضرور ملنا ایں۔ ماں جہڑے پیسے میں جوڑے نیں دن رات مشقتاں کر کے..... اوہ کاہدے لئی نیں..... اوس کمائی دا کیہ فائدہ، جہڑی وچھوڑا دور نہ کر سکے..... بھیناں وچکار وچھوڑا.....“ رانو نے آکھیا۔

”رانو تینوں اپنی فکر نہیں..... توں وی تے اک دن.....“ رانو دی ماں نے جملہ ادھورا چھڑ دیاں رانو ول گوہ نال ویکھیا۔

”میری گل چھڑو ماں جی۔ میرا اللہ مالک اے۔ اپنی سوچ وچار چنگی نہیں ہوندى۔ جہڑی سچے تے کھرے جذباں کولوں دور کر دیوے۔ ماں جی اپنے دل ول جھاتی مار کے ویکھو تے نالے یاد کرو جدوں شکیلہ پیکے آوندى اے تے فیر سوہرے

جاندی اے تے تئیں گلی دی مُکرتے کھلو کے اوہنوں دور گلی وچ جاندے ویکھدے
او. گھر آ کے کئی کئی دیر ساڈے نال گل نہیں کردے. مینوں پتا اے ماں جی تہاڈا وی
دل کر رہیا اے پر.....“ رانو بولدیاں بولدیاں رُک گئی.

”توں ٹھیک کہنی اے رانو تینوں جمیلہ دسدی اے تے مینوں توں تے تیری
چھوٹی بہن وی. میں ماں واں تے ماں دیاں نظراں سارے پاسے ہوندیاں نیں.“
اوہنے رانو توں سمجھاندیاں آکھیا.

”خورے اسیں لوکی کیوں آون والے ویلے وچ ای کجے رہنے آں تے کیوں
نہیں سوچدے جہڑا ویلا اسیں جی رہے ہونے آں، اوہدی وی اسیں کدی چاہ کیتی سی
پر اوہ ویلا وی پل پل کردیاں کسے اتھے کھوہ وچ ڈگ پیندا اے. ساڈے جے ماڑے
لوکی فلراں پالدیاں پالدیاں ہڈیاں دی مُٹھ بن جاندے نیں. اوہناں وچوں حیاتی دی
روح انج نکل جاندی اے جویں گنے چوں رس. سانوں نکیاں نکیاں خوشیاں،
خواہشاں، اُمنگاں توں فلراں تے لوڑاں دی قربان گاہ تے ذبح نہیں کرنا چاہیدا.....
میں باجی شکیلہ توں ضرور ملنا اے تے تئیں نہ نہیں کرو گے ماں جی.....“ رانو نے
حیران کن ذہانت نال گل کردیاں ماں توں آکھیا.

”جویں تیری مرضی دھیئے.....“ رانو دی ماں نے رانو توں آکھیا.

الماس انج تے باری دے باہر ویکھ رہیا سی پر اوہدے کن رانو تے اوہدی ماں
دے وچکار ہون والی گل بات سن رہے سن. اوہنوں رانو کولوں اجہیاں گوہ بھریاں
تے من کھچویاں گلاں دی آس نہیں سی. رانو دی اپنی بھین نال محبت نے اوہنوں
ڈاڈھا متاثر کیتا.


کجھ چر بعد ویگن رُکی. پھٹے تے بیٹھیاں سواریاں تھلے اُتر گئیاں. ویگن فیر چلی.
الماس نے باری وچوں پرت کے ویکھیا تے کجھ دیر ویکھدا ای رہیا. دُھند چھٹ
چھلی سی. سارا منظر اپنے پورے رنگاں نال نمایاں سی. رانو نظراں توں دور ہوندی جا
رہی سی. کجھ دیر بعدوں اک نقطہ اجہیا نظر آون لگا. فیر اوہ وی دوریاں وچ گواچ گیا.

الماس نُوں انج محسوس ہو یا کہ اوہدے دل دی حرکت ست ہو گئی اے۔ ویلے دا کجھ حصہ اوہدے دل دی کسے منکر وچ ٹھہر گیا اے۔

”ایہہ کھڑی چوبھ اے۔“ الماس نے اپنے اپ نال گل کردیاں آکھیا تے فیر رانو دی گل اوہدے دماغ وچ گھمنا شروع ہو گئی۔

”ایہہ چن تے تارے انج ای چمک رہے ہوں گے پر اسیں خورے کتھے بہہ کے لیہناں چن تاریاں نُوں ویکھ رہیاں ہوواں گیاں۔“

خیال دی اک کرن چمکی۔ دماغ دی سکرین آسمان وانگوں پھیل دی گئی جتھے ان گنت ستارے چمک رہے سن۔ اوہناں ستاریاں دی روشنی وچ رانو نظر آئی۔ اوہ کھیتاں وچوں لنگھدی پکی سڑک اُتے چل رہی سی جھڑی پنڈ نُوں جاملدی سی۔ اوہ ہن چٹے دربار دے نیڑے سی۔ جتھے اوہدی باجی شکیلہ دا گھر سی۔ اوہدے چہرے تے سچے جذبے اٹھکیلیاں لے رہے سن۔ بھیناں وچ وچھوڑا دور ہو رہیا سی۔ اوہنوں انج لگا کہ اوہدیاں تنوں دھیاں رانو پچھتے مسکراندیاں سرگوشیاں کردیاں چلیاں جا رہیاں نیں۔ ہر پاسے چمکدے ستاریاں دا سلسلہ دکھالی دے رہیا سی۔ جھڑے دور دور ہوندیاں وی اک دو جے نال جڑے ہوئے سن۔



کھج

تیز رو چھک چھک کردی ہولی ہولی چل رہی سی۔ میں سوچی پے گیا۔ اگست
 آوندیاں ای پہاڑاں ول کھج پے جاندی اے۔ ہریالی ویکھن ٹوں جی تڑندا اے۔ دریا
 دے کنڈھے کھلو کے دور تائیں چڑھدے ڈبڈے سورج ٹوں ویکھن لئی دل بے قرار
 ہو رہیا ہوندا اے۔ پورا ورھا پلس تے سول محکمیاں نال مغز ماری کرنی پندی اے
 تے کم ای کم وجود ٹوں اندروں باہروں تروڑ مروڑ چھڑدا اے۔ مینوں انج لگدا اے
 کوئی پنجالی گل وچ پئی ہوئی اے تے بس گھمی جا رہیا واں تے ہڈاں وچوں تیل نکلا
 جا رہیا اے۔ حیاتی ہولے ہولے سرکدی جا رہی اے۔ ہرپاسے نکلے وڈے دا چکر چل
 رہیا اے۔ کماں دی ونڈ نے انساناں ٹوں وی ونڈ دتا اے۔ بندے اک دوجے توں
 دور ہندے جا رہے نیں۔ ساڈی رہتل دے ہر پاسیوں بندیاں وچوں ایہو سک
 ودھدی جا رہی اے اوہ ایہہ کہ ”پیسیاں دا ڈھیر لگ جاوے“ تے اوہناں دا قد اُچا
 نظر آوے۔ ہر ورھے پہلے توں بوہتا عزت دے ایس معیار توں اکتا جانا واں تے
 مینوں اگست آون دی اڈیک لگ جاندی اے۔ اودوں عدالتاں بند ہو جاندیاں نیں۔
 گھٹ توں گھٹ پیسیاں وچ بوہتے توں بوہتا پھرن ٹوں جی کردا اے۔ زمین اُتے انج
 دیاں نکراں لبھن ٹوں جی کردا اے۔ جتھے انساناں دے وچکار محبتاں تے پیار ہووے۔
 بندے وڈے ہوون پر وڈے دکھالی نہ دیون۔ میں نگر نگر وادی وادی نسیا دوڑنا پھرنا
 واں۔ اجنبی بن کے کسے اجنبی نال ملدیاں مینوں احساس ہوندا اے کہ انساناں دے
 وچکار بنائیاں ہوئیاں جھوٹھیاں ونڈاں مٹ رہیاں نیں۔ میں گئی واری اپنے آپ

ٹوں پچھیا انج کیوں ہوندا اے تے اُلجھ کے رہ گیا کجھ گلاں میرے سامنے ہو روی
ظاہر ہوئیاں کہ اک دو بے ٹوں جانن والے انسان اک دو بے کول عزت کران دی
جھکھ دا کیوں شکار نیں..... اپنے آپ ٹوں چنگا ثابت کرن لئی اک دو بے نال کیوں
موازنہ کرنا شروع کر دیندے نیں..... انج کیوں نہیں ہوندا۔ جد اوہناں وچ کسے
دو بے ٹوں جھکان دی خواہش پیدا ہووے تے اوہ اجنبی بن جان..... سب کجھ بھلا
کے اجنبیاں وانگوں ہیری رات وچ دیوا بالن کوئی بھلیا چکیا راہ پھڑلوے تے اوہ ایس
گل ٹوں فیر بھل جان..... پر ایس گل ٹوں سمجھن لئی کدی کدار اپنے ماحول وچ
نسنا پیندا اے شناختاں دے جلوس وچوں نکل کے گم ہونا پیندا اے۔ لوکاں نال مل
جُل کے جدا ہونا پیندا اے تے کدھرے دماغ دا کیوس پھلدا اے تے سماج وچ پھیلے
جھوٹھے اصول ہوا وچ تحلیل ہوندے دکھالی دیندے نیں۔ سوچدیاں سوچدیاں میرا
دھیان وڈے بھائی شاہد ول ٹر گیا۔ ”اگست اے..... اج کل تینوں ویلہ اے“ کراچی
جانا ایس..... ”میرے بھرا شاہد نے مینوں آکھیا سی جہڑا کراچی وچ رہندا اے۔“ کجھ
ورھیاں توں میں دور دا کوئی سفر نہیں کیتا سی۔ ہر واری بالاں دی کوئی نہ کوئی لوڑ
آڑے آ جاندی اے تے ایس واری وی..... ”میں جیب ول ویکھدیاں اوہناں
ٹوں آکھیا“ فکر نہ کر..... توں صرف کراچی پہنچنا اے..... باقی خرچہ میں کراں
گا..... ”اوہناں ہسڈیاں آکھیا۔ اگست دے مہینے وچ ایہہ بڑی معقول آفر سی تے
نالے جتنے کو پیسے میرے کول سن اوہدے وچ ایہو جہیا ای سپانسر ٹور کر سکنا
واں..... میں اپنے آپ ٹوں سمجھاؤن والے انداز وچ آکھیا سی۔

”کھڑی سوچ وچ پھس گیا ایس..... میں کل کراچی جا رہیا واں تے تیریاں
سیٹاں اے سی والے ڈبے دیاں کرا دینا واں تے دس کھڑی تاریخ دیاں
کراواں..... میرے بعد توں وی کراچی پہنچ جاویں.....“ شاہد ہوراں پچھیا۔
”خرم میٹرک دا امتحان دتا اے..... اوہ اج کل ویلہ اے۔ میریاں تے خرم
دیاں اکانومی کلاس دیاں دو سیٹاں تے نال برتھ بک کرا دیو۔“ میں آکھیا۔

”تیرا اے سی والے ڈبے وچ بیٹھن ٹوں جی نہیں کردا. توں ضرور گرمی کھانی اے تے بھیڑا حال بنانا اے.....“ شاہد بھائی نے آکھیا.

”میں اکانومی کلاس وچ ای جاواں گا. مینوں عام لوکاں وچ سفر کرن دا بوہتا سواد آندا اے. ایسہ لوک جلد گھل مل جان والے تے ڈکھ درد وچ شریک ہون والے ہوندے نیں تے نالے میں تے خرم ایس معاملے وچ دوویں سخت جان آں. کدی بالاں نال آیا تے اے سی والے ڈبے وچ ای آواں گے. میں شاہد بھائی ٹوں آکھیا. اوہ میرے مزاج کولوں ڈاڈھے واقف سن. اوہناں اپنی گل تے زور دین دی بجائے سیٹاں بک کران دا اشارہ دے دتا.

سستی نال چلدی ٹرین کراس پین پاروں ہولی ہولی چکدیاں رُک گئی تے میں خیالاں وچوں باہر آگیا. ویلا راستہ دا سی. اک برتھ تے میرا بھتیجا خرم سوں رہیا سی. دوجی برتھ اتے اک بڈھا بندہ بھم گچھا ہو کے سُتا ہویا سی. برتھاں تھلے آمنے سامنے چار چار سیٹاں سن. چار ریزور سیٹاں دا رُخ اوس پاسے سی جدھر ٹرین جا رہی سی. اوہناں وچوں دو سیٹاں ساڈیاں بک سن تے دو سیٹاں اُتے دو عورتاں بیٹھیاں ہوئیاں سن. اک جوان عورت سی تے دوجی مڈھلی عمر دی سی. ایہناں سیٹاں دے سامنے والی چار سیٹاں اُتے دو عورتاں تے دو بندے بیٹھے اونگھ رہے سن. ایہناں سیٹاں دے اک طرف دو سیٹاں آمنے سامنے کھڑکی دے نال سن. جہناں اُتے دو جوان مڈے اک دوجے دیاں سیٹاں اُتے پیر رکھے بیٹھے سن. ٹرین دے رُکن نال سارے ہڑبڑا کے اُٹھ پئے تے اجنبی تے چور نگاہواں نال اک دوجے ٹوں ویکھن لگ پئے. سفروچ انج ای ہوندا اے کجھ دیر خموشی رہندی اے تے فیر کھسر پھسر شروع ہو جاندی اے. دوجی لائن اُتے ٹرین چھیتی نال سکنتاں وچ لنگھ گئی. تین واری ”پاں“، ”پاں“ دی آواز آئی تے ٹرین رُپئی. کھسر پھسر بے تکلفی وچ نہ بدل سکی. سواریاں فیر اپنے اپنے ماحول وچ واپس رُگئیاں. میری آوارگی تے ون سونی چیزاں ٹوں ویکھن دا چاء مینوں سون نہیں سی دے رہیا. رت دی تاریکی وچ چھیتی نال

گزر دیاں ہویاں اُجاڑ بیابان جگہاں تے ہوا دی ”شاں شاں“ طبیعت وچ اک اجہیا اثر پیدا کر رہی سی۔ حیاتی دے نویں نویں زاویئے بن رہے سن تے دماغ دیاں گھنڈاں کھل رہیاں سن۔ کھڑکی توں نظر ہٹا کے میں سجے پاسے دیکھیا۔ جوان عورت دیاں اکھاں نیند نال بو جھل سن پر اوہ سوں نہیں سی رہی۔ اوہنے پیلے رنگ دا پچھلاں والا ویل دا جوڑا پایا ہویا سی تے اوہ ویل دے کپڑے دی چادر اوڑھی ہوئی سی۔ بانہواں وچ رنگ برنگیاں ونگاں سن۔ پیراں وچ کالے رنگ دی ودھراں والی سادہ جُتی سی۔ اوہدی سادگی وچوں اعتماد تے وقار جھلک رہیا سی۔ اوہ بالکل اوہناں خاص لوکاں وانگوں دکھالی دے رہی سی جہڑے حیاتی دیاں اوکڑاں خاموشی نال سہندے نہیں تے رولا نہیں پاندے۔ ویلے دے نال اوکڑاں تے ٹُر جانڈیاں نیں پر ایہناں دی شخصیت وچ اک نکھار پیدا کر جانڈیاں نیں۔ دیکھن والا اوہدے اثر ہیٹھ آجانا اے۔ میں اک واری فیرا رادے نال اوہدے ول دیکھیا۔ بو جھل اکھاں سون دی بجائے اک کتاب دی ورق گردانی کر رہیاں سن۔ کئی واری بندہ کوئی کتاب ایس لئی پڑھدا اے یا ٹی وی دیکھدا اے کہ اوہنوں نیند آ جاوے۔ ایس لئی کہ بو جھل اکھاں ہو روی بو جھل ہو جانڈیاں نیں تے بندہ نیند دیاں مٹھیاں وادیاں وچ ٹُر جاندا اے۔ میں بڑی دیر سوچ خیالاں وچ ڈبیا رہیا پر اوہ رسالہ پڑھدی رہی۔ تے بالکل نہ سُتی۔ میں سوچدا سوچدا سوں گیا تے سُنّا پیا وی سوچدا رہیا پر ایس سوچ نال فلم وی چل رہی سی۔ نہ سوچ میرے اختیار وچ سی تے نہ دماغ دی سکرین اُتے چلن والے منظر..... خواب ایہنوں ای تے کھندے نیں۔

ٹھنڈی خوشگوار واء نے مینوں اُٹھادتا سی۔ صبح ہو چکی سی سامنے والی سیٹاں توں دو سواریاں تے نال والی سیٹاں توں وی دو سواریاں ٹیشن تے اُتر چکیاں سن۔ خرم برتھ توں اُتر کے نال والی سیٹ تے بیٹھا ہویا سی۔

”چاچو..... اُتے والی برتھ تے لیٹ جاؤ۔ تیس ساری رات انج ای بیٹھے رہے او..... لک سدھا کر لو.....“ میرے بھتیجے خرم نے آکھیا ”پتر ٹرین سندھ وچ

داخل ہوون والی اے تے نالے سویر دا نظارہ میں کھوہنا نہیں چاہندا.....“ میں اوہنوں آکھیا۔

”میں اُتے والی برتھ تے سوں جاواں.....“ جوان عورت نے آکھیا جھڑی سامنے والی دو سیٹاں خالی ہوون پاروں میرے سامنے والی سیٹ اُتے بیٹھی ہوئی سی۔ میں اوہدے اچانک مخاطب ہوون دی وجہ نال اوہدی گل نہ سن سکيا۔ تے اوہدے ول ویکھیا۔ اوہنے بولن دی بجائے نگاہواں نال اُتلی برتھ ول اشارہ کیتا۔

”بالکل بالکل..... کیوں نہیں.....“ میں خوشی نال آکھیا تے اوہ برتھ اُتے چڑھ کے لیٹ گئی۔ اوہدے اعتماد تے دلیری نے مینوں متاثر کیتا۔ ٹرین چل دی رہی تے میں دور نگاہواں وچ بجھدے ندے منظران وچ گواچا رہیا۔ ہن ٹرین اندروں سندھ وچوں لنگھ رہی سی۔ سندھی تہذیب میریاں نظراں دے سامنے سی۔ سندھی ٹوپیاں تے کڑھائی والی چادراں والے بندے وکھالی دے رہے سن۔ سامنے والی دو سواریاں وی تے دوجی برتھ تے سُتی ہوئی سواری وی کسے ٹمیشن تے اُتر گئیاں۔ ہن اوہ دوویں عورتاں تے اسیں ڈبے دے ایس حصے وچ رہ گئے۔ سامنے والی سیٹاں اُتے مڈھلی عمر دی عورت سوں رہی سی۔ اوہ سیٹاں مسافراں دے اُتر جان دی وجہ نال خالی ہو گئیاں سن۔ ساڈیاں سیٹاں دے اُتے والی برتھ تے جوان عورت سوں رہی سی..... ویلا خاموسی نال لنگھدا رہیا..... نیندر پوری کرن توں بعد جوان عورت برتھ توں اُٹھ کے تھلے آئی تے ساڈے سامنے بہہ گئی۔ مڈھلی عمر دی زنانی نے وی اکھاں کھول دتیاں پر اوہ سیٹ تے لیٹی رہی۔

”خیر اے اماں جی..... تہاڈی نیندر ای پوری نہیں ہوندی..... جدوں دے ٹرین وچ بیٹھے اوہ..... سوں ای رہے او۔“ میں مڈھلی عمر دی زنانی توں پچھیا۔ ایہہ حوصلہ مینوں اپنی برتھ جوان عورت توں دین پاروں ہو گیا سی۔ اوہ ایہہ گل سن کے نیمھا جھیا مسکرائی تے کچھ نہ بولی۔

”اسیں بڑے دناں دے سفروچ آں۔ پنجاب وچ لگدے لگدے لائیاں توں ملن آئے

ساں۔ کیتھے کیتھے نہیں جانا پیا۔ سفر نے ادھ مویا کر چھڈیا اے۔ ورنہ اُتے والی برتھ تے سون دی بجائے کھڑکی راہیں صبح دی آوندی ٹھنڈی واء سائوں وی چنگی لگدی اے۔“ اوہنے ہلکی جہی مسکراہٹ نال گل کیتی۔ اوہدی اک پچی تے شیشے وانگ صاف مسکراہٹ سی۔ پاکیزگی نال بھری ہوئی۔ جھڑی اوہدے چہرے تے نکتے نکتے دائرے بناندی لہراں وانگوں پھیلدی تے خوشبوواں وانگوں کھلردی چلی گئی۔

”تماڈا ناٹھ پنجاب نال اے.....“ میں اوہنوں ٹھیسٹھ پنجابی لہجے نال گل بات کرن دی وجہ نال پچھیا۔

”میرے وڈیاں دا ناٹھ جہلم نال سی۔ میں تے سندھ وچ ای پیدا ہوئی تے وڈی ہوئی.....“ اوہنے آکھیا۔

”فیرتے تئیں سندھی وی چنگی طرحاں بولدے ہوو گے.....“ میں تجتس نال پچھیا۔

”میں سندھی ای نہیں پشتوتے اردو وی روانی نال بول سکدی آں..... میرا شناختی کارڈ سندھ دا اے..... ایہدے اُتے سندھی لکھی ہوئی اے.....؟“ اوہنے پرس وچوں کڈھ کے اپنا شناختی کارڈ مینوں دکھاندیاں آکھیا۔

”خالده پروین.....“ میں شناختی کارڈ توں اوہدا ناں پڑھدیاں اوہدے ول ویکھیا تے اوہنے اثبات وچ سر ہلایا تے میں حسرت نال سوچیا میں وی اوہدے وانگوں ملک دیاں دوجیاں زبانناں وی بول سکدا۔ ایہہ تے جنید دا بھلا ہووے جنے مینوں اردو زبان دے نال نال پنجابی وچ لکھن لئی آمادہ کیتا۔

”تئیں کھڑی سوچ وچ پے گے او..... زبانناں سکھنا کوئی اوکھا کم نہیں..... زبان نال محبت کرنی چاہیدی اے۔ فیر زبان خود بخود تماڈے رگ و ریشے وچ وڑ کے خون وچ شامل ہو جاندی اے.....“ خالده پروین نے وضاحت کردیاں آکھیا۔

”ایہہ گل کئی ورھیاں توں پنجابی نال محبت کرن والے پنجابیاں نوں آکھ رہے نیں..... پر.....“ میں خالده پروین نوں اپنی گل سناوندیاں ادھوری چھڈ دتی۔

”کوئی وی شخص کے سوچ خیال توں اصلی صورت وچ اپنی ماں بولی وچ ای پیش کر سکدا اے۔ ویکھو ناجی۔.... کوئی وڈا خیال کسے بارش دی بوند وانگوں دماغ وچ ڈگدا اے۔ ماں بولی اوہنوں اپنی گود وچ لے کے لوری دیندی اے۔ اوہ خیال ماں بولی نال ای دماغ وچوں نکل کے کاغذ اُتے آجائے تے اوہ اصلی تخلیق ہووے گی۔....“ خالدہ پروین نے گل کردیاں نہتھی جہی مسکراہٹ نال میرے ول ویکھیا۔

”تماڈی تعلیم کیہ اے۔....“ ایڈی وڈی گل توں بعد میں پچھتے بغیر نہ رہ سکيا۔

”بی اے۔.... ساڈے خاندان دے بوہتے لوک محکمہ تعلیم نال وابستہ نیں۔.... شادی ہو گئی تہ۔.... اگانہ نہ پڑھ سکی۔....“ اوہنے آکھیا۔

”تماٹوں ہائر کوالیفیکیشن حاصل نہ کر سکن دا افسوس نیں۔....“ میں اوہنوں پچھیا۔

”بالکل نہیں۔.... علم ڈگریاں دا محتاج نہیں۔.... میں ہن وی کجھ نہ کجھ پڑھدی رہندی آں۔.... ویسے وی انسان توں جو کجھ لہجے اوہدے اُتے شاکر رہنا چاہیدا اے تے آؤن والی حیاتی توں اوہدے وچوں ای تلاش کرنا چاہیدا اے۔....“

خالدہ پروین نے آکھیا۔ اہدیاں گلاں وچ بڑا وزن سی تے اوہ حیاتی بارے بڑا واضح نظریہ رکھدی سی۔

”تیس ہن کتھے جا رہے او۔....“ میں اوہنوں سوال کیتا۔

”کراچی تے فیر بدین۔....“ اوہنے دسیا۔

”بدین تے پانی وچ ابیا ہویا اے۔....“ میں اوہنوں پچھیا۔

”جو اللہ توں منظور اے۔.... بدین جا کے ای اصل حالات دا پتا لگے گا۔“

اوہنے تھوڑی جہی فکر مندی نال آکھیا۔

”بنیادی طور اُتے تیس پنجاب دے او۔.... پہلے سندھ تے فیر بدین جا

وے۔....“ میں خالدہ پروین توں پچھیا۔

”میرے خاوند دا روزگار بدین وچ اے۔ ایس لسی ساٹوں اوتھے وینا پیا۔....“

اماں ہوراں دا دنیا وچ کوئی نہیں..... ایسہ وی ساڈے کول ای رہے نیں۔ ایہدا
ناں عابدہ اے.....“ خالدہ پروین نے دسیا۔

”پتر ایسہ بڑے چنگے لوک نیں..... ایسہ مینوں نہ ملدے تے حیاتی دی ایسہ
شکر دوپہر خورے کج گزردی.....“

عابدہ نے آکھیا..... کجھ دیر خاموشی رہی تے میں کھڑکی دے باہر نظاریاں ول
دیکھنا شروع کر دتا..... کپاس نال بھرے میداناں، انباں دے باغاں تے کھجوراں
دے درختاں ٹوں ٹرین پچھے چھڑدی نسی جا رہی سی۔ کئی جگہاں تے نکیاں نکیاں
جھونپڑیاں تے وڈے وڈے کڑاہ ویکھے۔ کڑاہواں تھلے اک بل رہی سی۔

”ایسہ لوک کڑاہواں وچ کیہ گرم کر رہے نیں.....“ میں خالدہ پروین ٹوں
پچھدیاں کھڑکی راہیں باہر ول اشارہ کیتا۔

”ایسہ کھجوراں ٹوں پانی وچ گرم کر کے چھوارے بنا رہے نیں۔ ایس واری
بوہتیاں بارشیاں پاروں کھجوراں خراب ہوون دا اندیشہ اے..... ایس لئی بوہتے
لوک کھجوراں دے چھوارے بناوندے دکھالی دین گے.....“ خالدہ پروین نے
کتاب اک لانبھے رکھدیاں میرے ول متوجہ ہوندیاں آکھیا۔

”تماڈے مائی باپ سندھ وچ آباد ہو چکے نیں اوہناں دی وی کوئی واہی نیجی لئی
زمین ہے.....“ میں خالدہ پروین ٹوں پچھیا۔

”میرے باپ دی پنج مربع زمین اے..... پر سیم تھور پاروں ایہناں اُتے واہی
نیجی برائے نام اے..... حکومت ولوں ہلے تائیں کوئی ٹھوس قدم نہیں چکایا گیا.....
خالدہ پروین نے دُکھ نال شکوے والے لہجے وچ آکھیا۔

”اک گل تے دسو..... ہاری نال کیہ ہو رہیا اے۔ تئیں سندھ وچ جمے پلے
تے جوان ہوئے..... تماڈیاں معلوماتاں بڑیاں ٹھوس تے اپنے ماحول اُتے مشاہدہ
بڑا ڈونگھا اے.....“ ایسہ گل بغیر کسے سوچ تے منصوبہ بندی توں میرے منہ وچوں
نکل گئی ”کدے نال کیہ ہو رہیا اے۔ ایس توں اسیں سارے واقف آں.....“

الیکٹرانک میڈیا دا دور اے۔ ظلم کسے وی شکل وچ ہووے، کسے وی جگہ تے ہووے ظلم اے۔ انساناں نوں حقیر کوئی سرمائے دے زور نال یا کوئی جاگیر دے پھیلاؤ نال بناوے یا کوئی اختیار دے نشے وچ سمجھے..... ایسہ رویہ تے مزاج قابل نفرت اے..... دنیا وچ آزاد ہون والے انسان دا کسے انسان اگے جھکنا مینوں اُکا پسند نہیں۔ اج دی دنیا اونچ نیچ دی دُنیا اے۔ وڈیاں طاقتاں نے کمزوراں نوں اپنے پنجیاں وچ دبوچیا ہویا اے۔ نالے حکم دتا اے کہ اوہ چیخنا وی بند کر دین..... ایس ویلے اُمنگاں تے خواہاں نوں جوان رکھن دی لوڑ اے.....“ خالدہ پروین نے بڑے ٹھہراؤ نال اپنا موقف پیش کیتا۔ مینوں انج لگا کہ میں کسے کلاس وچ بیٹھا ہویا واں تے کوئی تاریخ فلسفے دا استاد بغیر اپنی علمیت دی دھاک بٹھائے محبت نال اپنی گل کلاس نوں سمجھاؤن دی کوشش کر رہیا اے۔ اوہدیاں گلاں دا میرے اُتے ڈاڈھا اثر ہویا..... تے میں کجھ لہجیاں لئی خاموش ہو گیا۔

”ٹیس کتھے جارہے او..... تے کتھوں دے رہن والے او..... میں تے پچھیا ای نہیں.....“ خالدہ پروین نے میری خاموشی پاروں ایسہ سوال کر دتا۔

”گو جرانوالہ دے رہنے والے آں..... تے کراچی جارہے آں۔“

”کراچی تک دا سفر اکٹھا گزرے گا..... بڑی خوشی ہوئی.....“ خالدہ پروین نے آکھیا۔

”کیوں نہیں.....“ میں آکھیا۔

”کراچی کلہ دے لئی جارہے او.....“ خالدہ پروین نے پچھیا۔

”میرا وڈا بھرا کراچی رہندا اے..... اک تے اوہدی فیملی نال ملاقات ہو جائے گی تے دوجی گل ایسہ وے کہ پورا ورہا کم کر کے تھک جانا واں تے ماحول توں اکتاہٹ ہو جاندی اے۔ جگہ بدلی کرن نوں جی کردا اے تے ایسی جگہ دی تلاش رہندی اے جتھے سکون ہووے..... تے کوئی چھوٹا وڈا نہ ہووے.....“ میری گل نال میرے اندر دا ڈپریشن وی باہر آ گیا۔

”تے فیر تئیں ٹھٹھ ضرور جانا..... اوتھے کینجر جھیل اے..... جامعہ مسجد اے..... مشہور قبرستان اے..... تے ہور بڑیاں تاریخی جگہاں.“ خالدہ پروین نے آکھیا۔

”تئیں آکھیا تے ہن ضرور جاواں گے..... دن میرے کول چار پنچ ای نیں۔“ میں ارادہ وی کیتا تے مجبوری وی دسی۔

”ٹھٹھ دی ربڑی ضرور کھانا.....“ خالدہ پروین نے انج آکھیا کہ ربڑی کھان دی خواہش پیدا ہو گئی۔

”کینجر جھیل بارے کجھ پتہ جے.....“ خالدہ پروین نے پچھیا تے میں لاعلمی نال خاموش رہیا۔

”کینجر جھیل اک ملاح کینجر دے ناں اے۔ سنی سنائی گل اے تئیں وی سن لو۔ ہو یا انج کہ راجہ رنجیت سنگھ ول بیٹی ہوئی تے رانی نے ایس ڈر نال کہ راجہ اوہنوں مروانہ دیوے، کپڑیاں تے ضروری سامان نال اوہنوں کشتی وچ پا کے دریا دیاں لہراں دے حوالے کر چھڈیا۔ ایسہ بچی اک ملاح کینجر تیکر پہنچ گئی جہدی کوئی اولاد نہیں سی۔ اوہ بڑا خوش ہو یا تے اوہنے اوہاناں ٹوری رکھیا تے اوہدی پرورش کیتی۔ ٹوری وڈی ہوئی تے اوہنوں کوڑھ پے گیا۔ ملاح اوہنوں اوس ویلے دے بزرگ جی۔ اے شاہ کول لے گئے۔ ٹوری تندرست ہو گئی تے نویں چھڑی اوہدے اُتے آ گئی۔ اوہ بڑی سوہی لگن لگ پئی۔ اوس ویلے دے حکمران جام تماچی نوں ایس گل دا پتہ لگا۔ اوہنے ٹوری نال ویاہ دا پیغام بھجوایا۔ کینجر ملاح نے انکار کر دتا تے آکھیا ٹوری دا ویاہ کسے ملاح نال ای ہو سکدا اے حکمران نال نہیں۔ جام تماچی نے جھیل دے کنارے دو جے ملا حواں نال مچھیاں پھرنیاں شروع کر دتیاں تے فیر کینجر نے ٹوری دا ویاہ جام تماچی نال کر دتا۔ ٹوری نے وصیت کیتی کہ اوہدے مرن توں بعد اوہنوں جی۔ اے شاہ دے دربار وچ دفن کیتا جائے۔ ٹوری جی۔ اے شاہ دے دربار وچ دفن اے۔ جام تماچی نے ایس جھیل دا ناں اپنے سوہرے کینجر دے ناں

اُتے رکھیا۔ جھیل کینجر کافی ٹوٹیاں وچ سی۔ حکومت نے ایہنوں اکٹھا کیتا تے جی۔ اے شاہ دربار تے اوہدے وچ ٹوری دی قبر جھیل دے وچ آگئی اے۔ جھیل دے کنارے کھڑے ہو کے جی۔ اے شاہ دے دربار ول دیکھنا جمدے وچ ٹوری دی قبر اے۔ تہاؤں ایہہ بوہت چنگا لگے گا۔“ خالدہ پروین نے ٹوری جام تماچی دی کہانی بیان کردیاں اک واری فیر ہلکی جہی مسکراہٹ نال آکھیا۔ شیشے وانگوں صاف جی انسانی مسکراہٹ کسے کمپلیکس داشکار نہیں سی۔ ٹھٹھہ شہر میرے دل وچ وسدا گیا۔

”اوہ دیکھو.....“ خالدہ پروین نے کھڑکی راہیں باہر ول اشارہ کردیاں آکھیا۔ کچھ بال ہتھ ہلا ہلا کے ٹرین وچ بیٹھیاں ٹوں سلام کر رہے سن۔

”سچے جذبے..... بے غرض سلام.....“ میں آکھیا۔

”تیسیں درست آکھیا اے..... سماج ٹوں چنگا بناؤن لئی ایس طرح ای محبت نال ہلدے ہتھاں دی لوڑ اے۔ بوہت تھوڑے ہتھ ایسے ہوندے نیں جہڑے جواں ہوندیاں وی انج ای ہلدے رہندے نیں۔ وگرنہ..... لوڑاں تے مصیبتاں ایہناں ٹوں بے جان تے دولت تے اختیار ایہناں ٹوں بے حس کر دیندا اے.....“ خالدہ پروین نے اپنے مشاہدے دی قوت نال اپنی گل ٹوں سوہنے انداز نال پیش کیتا۔ اوہدے نال گلاں کردیاں کئی گھنٹے گزرن دا احساس نہ ہویا۔ سٹیل مل نظراں دے سامنے آئی تے پتہ چلیا کہ کراچی پہنچ گئے آں۔ ”بڑا چنگا ویلا گزر گیا..... ایس گل دا افسوس ہو رہیا اے کہ سفر دے مڈھ وچ ای گل بات کیوں نہ شروع ہو گئی۔“ خالدہ پروین نے آکھیا۔

”انج ہونا قدرتی اے۔ سفر دے مڈھ رات جہڑے مسافر کسے دوجے مسافر ٹوں سیٹ دینا پسند نہیں کردے ویلا گزرن پاروں اوہناں ٹوں گھر دا ایڈریس وی دے دیندے نیں۔“ میں آکھیا تے ایس ورن خالدہ پروین کھل کے ہسی۔

”بدین چکر لگے تے ساڈے ول ضرور آنا.....“ خالدہ پروین نے آکھیا۔

”ضرور..... ضرور.....“ عابدہ نے وی آکھیا جہڑی ہن نیندر توں بیدار ہو چکی

سی۔

”گو جرانوالہ دے لوک وی بڑے مہمان نواز نیں کدی چکر لگاتے ضرور آنا.....“ میں آکھیا۔

”حیاتی بڑی عجیب ہوندی اے۔ کجھ دیر پہلوں سانوں اک دوجے دا پتہ وی نہیں سی تے ہن اک دوجے کولوں وچھڑن دا دکھ وی اے۔“ خالدہ پروین نے آکھیا۔

”تماڑی شادی بدین وچ ہوئی۔ بال بچے تئیں اوتھے ای چھڑ آئے او.....“

میں پچھیا۔

”بال بچے میرے کوئی نہیں..... چند ای ورھے تے شادی نوں ہوئے نیں۔“

خالدہ پروین دے گل بات کرن وچ کوئی گلہ شکوہ نہیں سی۔ شاکر لوک شاکر ای رہندے نیں۔ ہاں دوجیاں دا دکھ ویکھ کے اوہ دُعا ضرور کردے نیں۔ کجھ دیر بعدوں ٹرین ڈگ روڈ تے پہنچ چکی سی۔ سفرو وچ کپڑے خاصے گندے ہو چکے سن۔ ٹرین دے واش روم وچ جا کے منہ ہتھ دھوتا تے جین دی پینٹ تے چیک دار شرٹ پا کے واپس سیٹ اُتے آ کے بہہ گیا۔

”توں وی کپڑے بدل لے.....“ میں خرم نوں آکھیا۔

”چاچو“ میں ہن چاچو دے گھر جا کے ای بدلاں گا..... اُنج وی میرا سوٹ رنگدار اے.....“ خرم نے آکھیا۔

”کراچی دا سمندر ویکھ کے ای نہ ٹر جائیں..... بیٹا چاچو نوں لے کے ٹھٹھ ضرور جائیں.....“ خالدہ پروین نے خرم نوں آکھیا جہڑا شرمیلے انداز نال مسکران لگا۔

”تئیں تے ٹھٹھے نوں ساڈے اندر و سادتا اے..... ایہنوں تے ہن ویکھنا ای پئے گا.....“ میں آکھیا۔

حالاں دیا نہیں..... صرف ٹھٹھے دی لگن لگی اے..... جدوں دیا تے اندروں تپ جاؤ گے..... تماڑے اندر دیاں کیفیتاں نوں منزل ملدی نظر آوے گی۔

ٹرین دی رفتار ہولی ہونی شروع ہوئی۔ کراچی کینٹ دا ٹمیشن آؤن والا سی۔ خالدہ

پروین تے اسیں ایس ٹیشن تے ای اُترنا سی۔ ٹرین ٹیشن تے رُکی تے اسیں سارے ای اُتر گئے۔ میرا بھرا اپنی بیٹی انم نال ساڈی اڈیک وچ اوتھے کھڑا سی۔ خالدہ پروین نال بھرا دا تعارف کرایا۔ پروین نے انم نوں پیار کیتا تے نگاہواں نیویاں کر کے رخصت دی اجازت منگی تے فیراوہ دوویں عورتاں ٹیشن توں باہر نکلن والے رستے ول چل پئیاں۔ حیاتی وچ پہلی واری ایسہ احساس ہويا کہ کسے عورت نے عورت ہوون دی وجہ نال نہیں بلکہ کسے ہو ر ای حوالے نال متاثر کیتا اے۔

”چلو جی چلئے.....“ شاہد بھائی نے آکھیا تے میں اوہدے نال رُپیا۔ اسیں اوہدی کار تے اوہدے گھر گلستان جو ہر پہنچے۔

ون سونے کھانے ساڈی اڈیک وچ سن۔ بھرجائی افشاں ساڈی خوب تواضع کیتی۔ دو دن ساڈے کھان پین دے اہتمام وچ ای لنگھ گئے۔ نہاری، سیخ کباب، مرغِ روست، کڑاہی گوشت، بریانی، چائینز تے فروٹ کریم ساڈے لئی خاص طور تے تیار کیتے گئے پر چچی گل جے کہ ایسہ کھانے میرے اندر دی جھکھ دور نہ کر سکے۔ میں تے گھمن پھرن آیا ساں مینوں تلاش لگی ہوئی سی۔

”یار مینوں ٹھٹھ لے چلو.....“ میں اپنے وڈے بھرا شاہد نوں بے تکلفی نال آکھیا۔

”ٹھٹھے کیہ اے.....؟“ ضرغام نے ہسدے ہوئے آکھیا۔ جہڑا میرے مامے دا پُتر سی تے نالے میرے بھرا شاہد دا سالادوی سی۔ اوہ دس ورہیاں بعد امریکہ توں پاکستان آیا ہويا سی تے فیرو بارہ باہر جاؤن دیاں تیاریاں کر رہیا سی۔

”تینوں کیہ پتہ..... توں کھڑا اوتھے گیا ویس.....“ میں اوہنوں آکھیا۔

”یار جان وچ تے کوئی حرج نہیں تیرے کول صرف دو دن ای تے ہو ر نہیں۔ اک دیھاڑی وچ جان آؤن کریئے تے رات نوں واپس آؤنا پیندا اے۔ اج کل اوتھوں دے حالات وی چنگے نہیں۔ تینوں قائد اعظم دے مزار تے کلفٹن لے چلنا واں۔ ٹھٹھ جاؤن دا پروگرام اگلی واری تے رکھ لے۔“ شاہد نے آکھیا۔

”سمندر تے وی کیہ اے..... لوکاں نے کئی گندگی پھیلانی ہوئی اے
اوتھے.....“ ضرغام نے آکھیا۔

”یار توں تے پہلے ای ساڈے دو دن گوا دتے نیں..... رات نوں نہیں جانا
کلفٹن رش ہوندا اے..... دن نوں چلاں گے تے فیر سویرے سٹارہیا تے اٹھن دا
ناں ای نہیں ساں لیندا کتھے کیہ اے۔ ایہنوں ویکھن والی اکھ چاہیدی اے۔ امریکہ جا
کے توں ظاہری سوہن سپن دا عادی ہو گیا ایں..... اسیں اپنے ویکھن والی شے ہر
جگہ ای لہے لینے آں.....“ میں ضرغام نوں آکھیا تے اوہ ہلکا جہیا ناراض ہویا۔ فیر
ٹھٹھہ خیالاں وچ ای پھس کے رہ گیا۔ بھائی شاہد ساٹوں قائد اعظم دے مزار تے لے
گئے۔ اسیں ملک لئی تے ایس شہر لئی دعا کیتی۔ جتھے اسیں کھلوتے ساں کلفٹن جا کے
سمندر دے ساحل تے کھلوتے رہے۔ میں دور توں ساحل ول آوندیاں لہراں نوں
دیکھدا رہیا۔ لہراں آوندیاں کدی پیراں تائیں کدی گوڈیاں تائیں بھگوندیاں واپس
چلیاں جاندیاں۔ جے لہراں واپس ہوندیاں تے پیراں تھلویں ریت کھسکدی جاؤندی۔
مینوں لہراں دے اُتار چڑھاؤ تے خالدہ پروین دیاں گلاں وچ کوئی سانجھ محسوس
ہوئی۔ انسانیت دے ایس سمندر وچ اوہدیاں گلاں لہراں وانگوں سی۔ لہراں بندیاں
نوں بھگوندیاں ہویاں کناریاں نال مل جاوندیاں سن تے اوہدیاں گلاں حد بندیاں
نوں ڈھاندیا ہویاں کناریاں دی تلاش وچ سن۔ خورے کئی دیر میں ساحل تے کھلوتا
کیہ کیہ سوچدا رہیا۔ فیر اسیں گڈی تے بہہ کے واپس گھر ول رُپے تے راہ وچ میجر
شہباز دے دفتر گئے۔ جہڑا میرا کلاس فیلو سی۔ میجر شہباز نے دسیا کہ اوہ بہوں مصروف
اے تے اوہ کل رات توں ہن تائیں سٹا نہیں۔ اج دی رات وی اوہنوں جاگنا اے۔
اگر اوہ سوں گیا تے لکھاں لوکاں دا مستقبل ہنیریاں وچ رُج جاوے گا۔ اوہدی گل سن
کے میں اوہنوں کجھ پچھن دی بجائے اجازت منگی تے نالے آکھیا کہ کل تائیں ویلھا ہو
جائے تے میرے بھرا شاہد دے گھر آوے۔ اگلے دن کجھ مہمان شاہد بھائی دے گھر
سعودی عرب توں آ گئے۔ ہو ر گھمنا پھرنا ناممکن وکھالی نہیں سی دے رہیا۔ کول پیسے

وی تھوڑے سن. صبر شکر کر کے بہہ گئے. دن سوتے کھانے فیر نظراں سامنے سن پر میرے اندر سلایا ٹھٹھہ مینوں بے چین کر رہی سی. شام ٹوں میجر شہباز دا فون آیا کہ اوہ مینوں ملیر کینٹ لے جاوے گاتے اوتھے بہہ کے گپ شپ لاواں گے. ادھ گھنٹے بعد میجر شہباز 'شاہد بھائی دے گھری.

”یار تینوں سیون شریف لے چلیے. کیوں کیہ خیال اے.“ میجر شہباز نے کمرے وچ بہندیاں ای مینوں آکھیا.

”اٹھے ٹوں کیہ چاہیدا اے..... دو اکھاں..... حضرت لعل شہباز قلندر دے دربار تے حاضری نال سیر سپاٹا.....“ میں خوشی نال آکھیا تے نالے مینوں امجد کلیم دی گل یاد آئی جہڑا ہر ورھے میلے تے سیون شریف آؤندا سی تے مینوں آکھدا سی کہ تئیں کسے سال میرے نال سیون شریف چلنا ایں..... تے میں آکھدا سی ”ان شاء اللہ“ پر دل وچ خیال آؤندا اوتھے جانا کوئی سوکھاتے نہیں..... میرا ان شاء اللہ کہنا مینوں اوتھے کچھ کے لے جا رہی سی. ”تے فیر سویرے اٹھ و بے تیار رہیں“ میجر شہباز نے آکھیا.

”کل دا سارا دن تیرے نال اے..... تے پرسوں فیر دس و بے گوجرانوالہ تیز رو راہیں واپسی اے.....“

”ٹھیک اے.....“ میجر شہباز نے آکھیا.

”یار لکھاں انساناں دی بھلائی والی گل سنا.“ میں میجر شہباز ٹوں آکھیا.

”سندھ دا بہوں سارا رقبہ سیم تے تھور دی وجہ نال بیکار رہندا اے. گورنمنٹ نے اہدے لئی کئی واری منصوبہ بندی کیتی. پہلاں سیم دا پانی جھیل منچھر وچ سٹیا تے مچھیاں مر گئیاں. اوتھے دے ماڑے ملا حواں رولا پایا تے نالے مچھیاں دا مرنا حکومت دے وارے وچ نہیں سی. فیر سیم دے پانی ٹوں دریا سندھ وچ سٹیا. دریائی مچھیاں مر گئی تے پانی وی خراب ہويا. ہن حکومت نے فیصلہ کیتا اے کہ سیم دے پانی ٹوں سمندر وچ سٹیا جاوے. حکومت نے تخمینے لوائے. اک ادارے دی ڈیوٹی لگائی

تے اوہنے 170 ارب روپے دا خرچہ دیا۔ دوجے دی ڈیوٹی لگائی تے اوہنے 175 ارب روپے دا خرچہ دیا تے فیر آرمی دی انجینئرنگ کور نوں آکھیا تے اوہنے صرف 14 ارب روپے دے تخمینے نال ڈرین بنا کے ایس سیم دے پانی نوں سمندر وچ سٹن داپک کر لیا۔ عوامی حکومت آون پاروں ایسہ منصوبہ سول محکمے کر رہے نیں پر فوج ایہدی نگرانی کر رہی اے۔ اصل وچ گل ایسہ سی کہ نواں کمانڈر آگیا سی تے اوہنوں بریفنگ دینی سی۔ میری بریفنگ اُتے نویں کمانڈر نے مینوں ہلاشیری دتی اے کہ ایس وڈے کم نوں مکمل کروتے کل میں ایس سارے منصوبے دی عملی شکل دیکھن لئی جا رہیاواں۔

”ایسہ خبر پروین لئی کئی وڈی ہووے گی۔ سندھ سیراب ہو رہیا اے.....“ میں بڑبڑایا۔

”کھڑی سوچیں پے گیا ویں.....“ شہباز نے پچھیا۔

”کچھ نہیں.....“ میں آکھیا۔

”اچھیا ر صبح سویرے جانا اے..... توں ہن ملیر کینٹ جاؤن دا پروگرام ملتوی کر دے.....“ میں شہباز نوں آکھیا۔ میجر شہباز نے چائے وغیرہ پیتی تے اوہ سویرے جلدی تیر ہوون دا کہہ کے چلا گیا۔

اگلے دن میں تے میجر شہباز جیپ وچ بیٹھے سیون شریف ول جا رہے ساں۔ ایس ویلے اسیں سپرہائی وے تے ساں جھڑی حیدر آباد توں شروع ہو کے کراچی تک آندی اے۔ سپرہائی وے دے اک مقام اُتے ایکسٹن، ایس ڈی او تے اوہناں دا عملہ میجر شہباز دی اڈیک وچ کھلوتا سی۔ اوہناں دے نال میجر شہباز سیم دے پانی تے اس ڈرین دا جائزہ لین لئی جا رہے سن جھڑی سیون توں کراچی تک بنائی جا رہی سی۔ ساریاں گڈیاں چل پیاں۔ متعلقہ افسراک جیپ تے کارتے سن اوہناں دیاں گڈیاں اگانہ سن تے پچھے پچھے میجر شہباز دی جیپ آ رہی سی۔ ہن اسیں سارے انڈس ہائی وے تے ساں تے فیرون سونے تھاواں اُتے ایکسٹن تے اوہدا عملہ ہالی وے توں

اُتر کے گڈیاں ٹوں اوس مقام تے لے جان دے جتھے سیم دا پانی کھلوتا سی۔ تھور والیاں زمیناں دا وی جائزہ لیا گیا۔ کئی واری فٹ فٹ کھلوتے سیم تے برسات دے پانیاں وچوں وی لنگھنا پاتے کئی واری ایسی جگہاں اُتے وی رُکے جتھے ڈیرین بنائی جا رہی سی یا جتھوں ڈیرین لنگھنی سی۔ کئی جگہ زمین وچ پتھر دی سی۔ اوہناں پتھراں ٹوں کریناں گھیٹ گھیٹ کر اگانہ سڈیاں ڈیرین بناؤن دا اوکھا کم کر رہیاں سن۔ ایس مقام اُتے میں دوست محمد چانڈیو ٹوں وی ملیا جتھا ایس منصوبے دی کامیابی لئی دلوں دعا گو سی۔ اوہ انساناں نال پیار کرن والا اندروں باہروں سوہنا انسان سی۔ سن دے مقام اُتے میجر شہباز ار یکیشن ڈیپارٹمنٹ وچ کجھ دیر لئی رُکے۔

”ڈیرین بناؤن دا کم چھیتی توں چھیتی مکمل کیتا جاوے تاکہ سندھ دیاں زمیناں سیراب ہو سکن۔ او تھوں دے عوام دی حیاتی بہتر ہو سکے۔ میں ایس کم وچ کسے قسم دی رُکاوٹ برداشت نہیں کراں گا..... ایسہ اک نیشنل کاز اے۔ ایس منصوبے دے مکمل ہون تک میں چین نال نہیں سوواں گا.....“ میجر شہباز نے بڑے مضبوط عزم نال آکھیا۔

”ان شاء اللہ سر..... ایسہ ساڈی خوش قسمتی اے کہ ساٹوں تہاڈے جہیا افسر ملیا اے۔“ ایکسٹن نے آکھیا میجر شہباز دیاں گلاں سن کے مینوں ڈاڈھی خوشی ہوئی تے اوہ ویلایا دیا جدوں اسیں سکول وچ بیٹھے ہوئے ساں تے اوہ کہہ رہیا سی کہ اوہ آرمی وچ جانا چاہندا اے تے ایسہ ای اوہدی سب توں وڈی خواہش اے۔ مینوں اج اوہدی انسانی سوچ پاروں اوہدا آرمی مین ہونا ڈاڈھا چنگا لگاتے میں اوہنوں دل ای دل وچ شلباش دیندیاں انج پکاریا جویں اوہنوں سکول وچ پکاردا ساں..... مینوں شہباز دے عزم تے خالدہ پروین دی سوچ دیاں حداں ملدیاں محسوس ہوئیاں۔

”میں حالاں راہ وچ کافی سارے کم دا جائزہ لینا اے تے خاصی دیر ہو جانی اے..... تے تئیں ایہناں دے نال سیہون شریف چلے جاؤ۔ ایسہ سیہون شریف ای جارہے میں..... تے میں وی دو تین گھنٹے بعدوں او تھے پہنچ جاواں گا.....“ میجر

شہباز نے آکھیا تے میں اوس بندے نال باہر چلا گیا تے اوہدی کار وچ بہہ گیا۔ دفتر دا اک ملازم وی کار وچ بہہ گیا۔ کجھ دیر خاموشی نال لنگھے تے فیر میں اوس علاقے بارے اوہناں دے نال گل بات شروع کر دی۔ دفتری ملازم حیات محمد نے میری علاقے وچ دلچسپی لین دی وجہ نال دسیا کہ لکی شاہ دے مقام تے اک غار اے جہدے وچ ہر ویلے اے سی وانگوں ٹھنڈی واء چلدی رہندی اے۔ اوہنے لکی شاہ دے مقام اُتے گڈی رکوائی تے اسیں اوس غار وچ گئے۔ غار وچ حقیقتاً اے سی وانگوں ٹھنڈی واء چل رہی سی تے باہر آکے امید ابوہتا احساس ہو یا جدوں گرمی تے گھٹن محسوس ہوئی۔ فیر اسیں سیہون شریف ول روانہ ہوئے۔ رستے وچ پہاڑاں اُتے خود بخود بنن والے سوہنے کٹاواں نے مینوں ڈاڈھا خوش کیتا۔ پہاڑ تے میں پہلے دی شمالی علاقیاں وچ دیکھے سن پر ایہہ کجھ ہوری طرح دے سن۔ ایہناں نوں دیکھ کے اوہ ویلایاد تصور وچ آوند اسی جدوں انسان نے اپنے سفر دا مڈھ بنھیا سی۔

”ایہہ جھیل منچھر دا پانی جا رہیا اے۔ جہڑی ایشیا دی سب توں وڈی جھیل اے.....“ حیات محمد نے آکھیا۔

”اے حضرت لعل شہباز قلندر دے دربار توں کتنی گودور اے.....“ میں حیات محمد نوں پچھیا۔

”کار اُتے کوئی ویہہ پنہی منٹ لگن گے.....“ اوہنے آکھیا۔

”مبھر صاحب نے کوئی تین چار گھنٹے نوں آنا ایس۔ اسیں دربار تے حاضری دے کے کجھ وقت اوتھے وی گزار آواں گے.....“ میں حیات محمد نوں آکھیا۔

”جویں تہاڈی مرضی.....“ اوہنے آکھیا۔

کجھ دیر بعدوں اسیں سیہون شریف پہنچ چکے ساں۔ حضرت لعل شہباز دا دربار نظراں سامنے سی۔ عبدالقادر چنا ساڈی اڈیک وچ کھڑا سی۔ اوہ سانوں لے کے دربار وچ گیا۔ اسیں اوتھے پھل پائے تے دُعا منگی۔ اوس فضا وچ اجہی پاکیزگی تے مستی سی جہڑی میرے اندر دی ٹٹ بھج نوں منظم کر رہی سی۔ مینوں انج لگا کہ میرا اندر تپدا

جا رہیا اے تے ورھیاں دی جی میل لٹھ گئی اے..... میں اک پاسے بہہ گیا۔ اک ملنگ دوڑا آیا تے میرے کول آ کے بہہ گیا۔ اوہ منہ نال آ آ کر رہیا سی تے اشاریاں نال کجھ بول رہیا سی۔

”ایہہ سرکاری بندے نیں..... افسر نیں..... فوجی افسر دے مہمان نیں.....“ حیات محمد نے وضاحت کردیاں اشاریاں نال اپنے دوہاں مونڈھیاں تے ہتھ پھیر دیاں تے نالے ہتھ تے گول گول نشان بناؤندیاں آکھیا۔ وڈے افسر دی وضاحت ہونڈیاں ای ملنگ نے فضا وچ غصے نال ہتھ ماریا تے فیر مونڈھیاں تے ہتھ پھیر دیاں ”آ آ“ کردیاں آکھیا۔ ”ایہہ کجھ نہیں..... سارے انسان برابر نیں.....“ تے فیر مستی نال سارے دربار ول ہتھ نال اشارہ کیتا تے ”آ آ“ کردیاں آکھیا۔ ”وڈے ایہہ نہیں“ صوفی درویش لوکاں انساناں وچکار انا تے وڈیائی دیاں دیواراں نوں توڑیا تے اک دو بے نال پیار کرن دا درس دتا میں کجھ دیر اوتھے بیٹھا رہیا۔ عبدالقادر چنانے حضرت لعل شہباز قلندر دی درگاہ نال وابستہ دوجیاں درگاہواں وی دکھایاں تے اوہناں تے اسیں حاضری دتی..... فیر اسیں دوبارہ کار تے بیٹھے تے جھیل منچھرول رُپے۔ عبدالقادر چناوی ساڈے نال سی میں گھروں کسے منصوبہ بندی نال نہیں ساں چلیا۔ کوئی کچھ سی جھڑی مینوں کچھی جا رہی سی۔ کجھ ویکھن دی اُمنگ۔ کجھ سنن دا چاء..... جدوں بندہ روٹین دی زندگی توں کٹ کے پتنگ وانگوں اسماناں دے ہچکولے کھاوند اے تے ہواواں تے فضاواں دیاں رس بھریاں لوریاں اوہنوں ای سنائی دیندیاں نیں تے نویں فاصلیاں تے نویاں مسافتاں دا وی اوہنوں ای پتہ لگدا اے۔ اسیں چھیتی منچھر جھیل پہنچ گئے۔ ایشیا دی سب توں وڈی جھیل میری نظراں دے سامنے سی۔ جھیل دے کنارے مچھیریاں دیاں جھونپڑیاں سن جھڑیاں ”سر“ تے ”کانیاں“ نال بنیاں ہوئیاں سن۔ مچھیریاں دے ننگ دھڑنگ بال ایدھر اودھر پھر رہے سن۔ ایتھوں دے لوک مچھیاں پھڑکے حیاتی دیاں لوڑاں پوریاں کردے نیں۔ جوان مُنڈے کڑی دا ویاہ ہوندا اے۔ اوہ کشتی وچ ای چکر لگاوندے

حیاتی گزار دے نہیں۔ کئی بالاں نے کشتیاں وچ ای جنم لیا اے تے پانی دیاں لہراں ویکھدے جوان ہوئے ”اک نظرے ایسہ تصور بڑا رومانوی لگدا اے پر خورے مسلسل ایہتے رہن والیاں لئی ایسہ گل نہ ہووے۔ سرکار نوں ایسویں جہیاں سہولتاں ضرور دینیاں چاہیدیاں نہیں کہ سوہنے منظر اں نال لوکاں دی حیاتی دا معیار اوہناں دے فطری ماحول مطابق بہتر ہووے۔“ میں چنانوٹوں آکھیا۔

”بالکل سر.....“ اوہنے آکھیا۔

میں کجھ دیر جھیل دے کنڈے آوارہ گرداں وانگوں پھردا تے جھونپڑیاں ول اجنبیاں دی طرح ویکھدا رہیا۔ اوتھے دے لوک تے نکتے نکتے بال وی میرے ول ایہناں ای نگاہواں نال ویکھدے رہے تے فیر کجھ دیر بعدوں نکتے نکتے بالاں میرے نال ٹرنا شروع کر دتا۔ اجنبیت دی مٹھی مٹھی لو نے دل نوں گرمانا شروع کر دتا۔ جمدیاں ڈونگھیاں وچوں خالص جذبے بھاپ وانگوں نکل رہے سن جڑے پورے جئے نوں بھگونڈے ون سونے سواہیہ نشان بناؤندے مینوں اپنی لپیٹ وچ لے رہے سن۔ اجنبی نگاہواں وچ اک دوجے لئی صرف محبت سی۔ کوئی کسے نوں جھکاؤنا نہیں سی چاہندا۔ جھیل دیاں لہراں وانگوں اک دوجے وچ وس جانا چاہندے سن۔ میں اوہناں بالاں نوں پیار کیتا تے ویلے دی کمی پاروں مڑا ریکیشن دے دفتر آگیا۔ میجر شہباز وی اوتھے پہنچ چکے سن۔ دوپہر دا کھانا اسیں چار دوجے کھادا۔ کھانے وچ بجے مرغ، گوشت نال چولاں دی روٹی تے سبزی وی سی جہناں وچوں سانوں سندھ دی خوشبو آئی۔ ویلا کافی ہو چکیا سی ہن سانوں کراچی وی پہنچنا سی۔ میجر شہباز اپنا دفتر کم مکمل کر چکے سن۔ فیر اسیں جیپ تے بہہ کے کراچی ول وانہ ہوئے۔

”تماڈا ٹور کنج دا رہیا.....؟“ میجر شہباز نے پچھیا۔

”سوچاں توں وی اُتے..... بس اک چیز ویکھن نوں رہ گئی اے.....“ میں

آکھیا۔

”اوہ کیہ.....؟“ میجر شہباز نے پچھیا۔

”یار ٹھٹھہ جاؤن توں بڑا جی کردا سی. ہن سویرے دس وجے تیز رووچ سیٹاں
 بک نہیں. تھورے جے دن سن چھیتی نال ای گزر گئے. ٹھٹھہ ویکھن دا چاء پورا نہ
 ہو سکيا.....“ میں آکھیا.

”ٹکٹاں کینسل کرا دیو..... تے کجھ ہور دن کراچی رہ جاؤ. ٹھٹھہ واقعی ای
 ویکھن والا شہر اے.“ میجر شہباز دے ٹھٹھہ بارے جذبات نے میرے اندر دی اگ
 توں بھڑکا چھڑیا.

”سیٹاں میرے لئی کینسل کرانا ممکن نہیں..... پرسوں عدالت نے کم شروع
 کر دینا اے تے نالے کراچی آون توں پہلے ای کجھ چھٹیاں گزار چکيا واں.....
 پروین کشدی سی ٹھٹھہ ضرور جاویں.....“ آخری فقرہ میرے ہونٹھاں وچوں خورے
 کسے طرحاں پھسل گیا.

”ایسہ کون اے.....؟“ میجر شہباز نے مسکرا ندیاں آکھیا.

”ٹرین وچ ہمسفر بنی سی. سچی انسانی قدراں دی مداح اے. اپنی ذات تے
 اوہنوں ڈاڈھا اعتماد سی تے کسے قسم دا اوہنوں کمپلیکس نہیں سی. اوہنے ٹھٹھہ تے
 جھیل کینجھر دا ذکر انج کیتا کہ اوہ میرے اندر وس گئے نیں.....“ میں آکھیا.

”رات اپنے وچ ای اے..... اسیں ہن ٹھٹھہ راہیں کراچی چلاں
 گے.....“ میجر شہباز نے میرے شوق دا اندازہ کردیاں مینوں آکھیا تے میرا لوں
 نوں خوشی نال نچن لگیا. کوٹری دے مقام توں اسیں جی ٹی روڈ والی سڑک اُتے آ
 گئے. انڈس ہائی وے بنن توں پہلے گڈیاں ٹھٹھہ راہیں کراچی آوندیاں سن. روڈ کوئی
 چنگا نہیں سی پر ٹھٹھہ پہنچن لئی شارٹ کٹ ایہو سی. کراچی راہیں ویلے سر ٹھٹھہ پہنچنا
 ممکن نہیں سی. جی ٹی روڈ اُتے جھکے کھاوندیاں ویلا لنگھدا رہیا. جس علاقے وچوں
 ہن اسیں لنگھ رہے ساں اوہ بکلی جان پاروں ہنیریاں وچ ڈبیا ہویا سی میری نگاہ اسماں
 ول اُٹھی. چودھویں دا چن پوری آب و تاب نال چمک رہیا سی. چن دی مٹھی چانی
 اوہدے آئے دوالے پھیلی ہوئی سی. انج لگدا سی کہ اسماں دے ایس تھوڑے جے

حصے ٹوں ون سونے رنگاں دے ورقاں نال سجایا ہویا وے۔ کدی میں زمین تے پھیلے
ہیرے ول تے کدی چن ول ویکھدا۔

”کیتھے گواچ گئے او.....؟“ میجر شہباز نے پچھیا۔

”یار شہباز چن ول تے ویکھ..... ایہو جی چانی کتاباں وچ ای پڑھی اے تے
ویکھی اج اے.....“ میں آکھیا۔

”واہ..... واہ..... سوہنی چیز وکھا دتی جے.....“ کینجر جھیل تے ایہہ منظر
تہانوں ہور وی سواد دیوے گا۔ ایہہ تے نصیباں دی گل اے رات دا ویلا.....
کینجر جھیل تے چودھویں دا چن.....“ میجر شہباز نے سواد لیندیاں آکھیا۔ فیر گلاں
باتاں کردیاں اسیں کینجر جھیل پہنچ گئے۔ جیپ کھڑی کر کے اسیں ریٹ ہاؤس وچ
گئے جہدے پچھلے پاسے جنگل لگے ہوئے سن تے جھیل دا پانی اوہناں جنگلیاں دے نال
نال بہہ رہیا سی۔ اسیں جنگلیاں دے کول پئی ہوئی کرسیاں تے بہہ گئے تے جھیل ول
تکدے رہے۔ ریٹ ہاؤس دے اک ملازم نے دور جھیل ول اشارہ کردیاں دسیا کہ
اوہ جی اے شاہ دا دربار اے۔ جہدے وچ ٹوری دی قبر اے۔ رات دے ایسے
جھیل وچ ٹوری دی قبر ول تکدا رہیا۔ اوس پاسیوں آون والیاں لہراں کنڈیاں نال
ٹکراوندیاں اپنا آپ مٹاؤندیاں پانی دا حصہ بن جاؤندیاں۔ پانی فیر لہراں دی صورت
وچ ٹکراؤن لئی تیار ہو جاؤندا۔ مینوں انج لگا جویں پانی لہراں دے روپ وچ عاشقاں
وانگوں جھیل دے کنڈیاں نال ٹکرا رہیا اے۔

”ایہہ تے ہن کنارے ای دس سکدے نیں کہ اوہ کیہ کہہ رہیا اے۔“ میں

بڑبڑایا۔

”لگدا اے کینجر جھیل دا اثر ہو گیا اے.....“ جھیل دے کنارے بنیاں

ہوئیاں ہٹس (huts) ول چلو۔ ریٹ ہاؤس توں چوکھاوتے مزہ آئے گا.....“ میجر

شہباز نے مینوں مخاطب کردیاں آکھیا۔


”چلو فیر چلیے.....“ میں آکھیا۔

”تسِیں چلو..... میں تہاڑے مگرای آناواں.....“ میجر شہباز نے آکھیا۔
 میں ریسٹ ہاؤس توں باہر نکلیاتے جھیل دے اس پاسے چلا گیا جتھے جھیل دے
 کناریاں توں دور ہٹس بنیاں ہوئیاں سن۔
 ”تسِیں پہنچ ای گئے ناں.....“ ایس اواز نے مینوں حیران کر چھڈیا۔ سامنے
 پروین کھلوتی سی۔ میں حیرت نال اوہدے ول ویکھیا۔
 ”بدین وچ پانی آگیا سی تے اسیں ٹھٹھے اپنے عزیزاں کول آگئے ساں۔“
 ”اج چن دی چودھویں سی۔ کینجہ جھیل تے آؤن دا ساڈا پروگرام بن گیا
 سی۔“ اوہنے ایسہ کہندیاں ہوئیاں اپنے عزیزاں ول اشارہ کردیاں آکھیا۔
 ”بڑی خوشی ہوئی.....“ میں آکھیا۔

”جہڑی خوشی مینوں اے..... اوہدا شاید تسِیں اندازہ نہیں کر سگدے۔ اوہ
 خوشی ایسہ وے کہ مینوں اپنی گل کہن دا موقع مل گیا اے..... کدی کدار بندہ
 کوئی گل کہنا چاہندا اے پر اوہ دل وچ ای رہ جاندی اے..... مینوں خوشی ایسہ جے
 کہ تسِیں مینوں اک عورت سمجھ کے نہیں انسان سمجھ کے ویکھیا اے..... کاش
 لوک عورت توں انسان سمجھ کے وی ویکھن..... میں ہنے آئی.....“ ایسہ کہندیاں
 خالدہ پروین ہٹ ول ٹر گئی۔

میں جھیل دے کنارے کھلو گیا۔ جھیل دیاں لہراں میرے پیراں توں
 نکر اوئندیاں آ جا رہیاں سن..... اوہناں دی شاں شاں نے رات توں سحرزدہ کر
 چھڈیا سی..... اوپر چودھویں دا چن اپنی مٹھی چاننی ونڈ رہیا سی۔ سچے اشتیاق دی
 نمائندہ پروین ہٹ کول کھلوتی سی۔ میجر شہباز انسانی فلاح دے منصوبے نال اک
 پاسیوں چلیا آ رہیا سی۔ میرے تصورات وی میرے نال رل گئے..... دور جام تماچی
 مچھیاں پھڑ رہیا سی۔ منچھر جھیل دے وچ کشتیاں وچ بیٹھے جوان جوڑے امن دے
 گیت گارہے سن۔ سیہون شریف وچ پین والی دھمال دی آواز ودھدی جا رہی سی
 سارے لوک اکو پیڈ سٹل تے گھمی جا رہے سن۔ ہر پاسے پیار ای پیار سی۔ میرا دل کیتا

میں ایسے ای دائرے وچ گھُمیاں گھُمیاں حیاقی گزار دیواں..... اک کھچ سی جہڑی
 مینوں ایسے لے آئی سی تے اک دوجی کھچ میرے اندر جنم لے رہی سی کہ ایسہ محبتی
 دائرہ پھیلدیاں پھیلدیاں دنیا نوں اپنی لپیٹ وچ ل ل وے۔



پتہ

زندہ لمحے

ہر مہینے اوہدے نال انج ہوندا سی کہ جُلتے لگی زوراں آور خرچیاں دے اتنگ
 پاروں تنخواہ دی ڈوری فٹاٹ ہتھوں سرکدی جاندی تے پوری نہ ہون والی لوڑاں
 دا خالی پنا ای اوہدا منہ ویکھدا رہ جاندا سی۔ بچیاں دی سکول فیس، دُدھ دے پیسے، بجلی
 گیس دے بل تے ان پانی دا خرچہ کڈھ کے اوہدے کول کجھ نہیں سی بچدا۔ بھاویں
 کڑکدی دُھپ ہوندى تے بھاویں خون جمادین والی ٹھنڈا ہونوں مہینے دے پہلے چند
 دن بہار وانگوں تے باقی سارے دن خزاں وانگوں لگدے سن۔ تنخواہ ملن دی خوشی
 کسٹوں نہیں ہوندى پر ایسہ وکھری گل سی اوہ نہ رولا پاندانہ شکوہ کردا سگوں حیاتی
 دے سارے رنگاں دا سواد لیندا۔ اوہ ہمیشہ بوڑھ دے درخت وانگوں بھوئیں اُتے
 قدم جما کے اپنے آل دوالے ہون والے سارے تماشے، ہنگامے ویکھدا رہندا نالے
 گلاب دے بوٹے وانگوں اپنے جُٹے اُتے اُگے کنڈیاں دا دُکھ روُن دی بجائے اپنے
 نکتے نکتے سوہنے عملاں دے پھل بکھیردا رہندا۔ کئی واری اوہ اپنی بیوی توں ہس کے
 کہندا:

”میرے ہتھ تے صرف تنخواہ دی گرمائش ای آئی اے..... چلو ایسہ ای کافی
 اے..... سارے کم تے نبڑ گئے نیں ناں.....“ اج فیر جد اوہنے ایہو ای فقرہ
 دوہرایا تے اوہدی بیوی روزینہ نے آکھیا:

”تسیں تے ہس کے گل گوا دیندے او..... اج تیک تسیں کیہ بنایا اے.....
 ایس ڈھائی مرلے دے پیو دے مکان وچ سر لکا کے بیٹھے او..... تماڈے بھرا نے

کئی واری دے لفظاں وچ حصے دی گل کیتی اے..... ہن تہاڑے کول کیہ اے..... کوئی پنج برلے دا کتے مکان ای بنایا ہوندا..... تے اج کوئی ماڑی چنگی آس ہوندی.....“

”توں فکر نہ کر سب ٹھیک ہو جاوے گا..... سرکاری سکیم وچ پلاٹ اپلائی کیتا ہویا اے.....“ منیر حسین نے آکھیا۔

”اوتھے لکھاں ملازماں درخواستاں دتیاں ہوئیاں نیں..... تئیں تے ایویں ای آساں لا کے بیٹھے او..... جے قرعہ اندازی وچ ناں نکل وی آوے تے پیسے کتھے.....؟“

”مایوسی دیاں گلاں نہ کریا کر..... آساں ای حیاتی ٹوں ٹوردیاں نیں..... میرا جی پی فنڈ وی اے تے کجھ سبب ویلے نال وی پیدا ہو جاندا نیں.....“

”تئیں تے لمیاں گلاں کردے او..... ہن کیہ کریئے. تاں مہینیاں بعدوں میرے بھرا دا ویاہ اے..... اپنے لئی تے بالاں لئی ابے تیک کوئی شے نہیں بنائی..... پر تہاڑوں تے کوئی فکر ای نہیں..... میں ہمیشہ تہاڑی منی اے..... پر ایس واری..... اپنے تے بالاں دے سارے چاء پورے کرنے نیں.“

”ابے تاں بڑا ویلا پیا اے..... توں تے ایویں اپنے دماغ اُتے پریشانیاں سوار کر لینی ایس.....“

”ویلے دا کیہ اے..... اوہنوں تاں پر لگے جے..... تئیں وہیندے نہیں جے پئے..... فائزہ تے مارہ ول..... کل ابے نکیاں نکیاں سن تے اج دو جے گھر جان والیاں بن گئیاں نیں..... پر تہاڑوں کیہ..... تئیں تاں سکون دی دُنیا و سا کے بیٹھے رہو.....“

”کالھی نہ پیا کر..... تے نہ اپنا خون ساڑیا کر..... انج مسئلے حل نہیں ہوندے..... نالے جو کجھ ساڑے ہتھ وچ اے اوہ ایس کرنے آں پئے.....“

”تہاڑوں تاں ذرا وی اندازہ نہیں..... کوئیں پئی حیاتی تُردی اے..... جوڑن

دی کوشش وی کردے آں..... پر فیروی کجھ نہیں جڑدا..... سویرے توں شام تائیں
 کولہو دے بیل وانگوں گیلے پئی کٹنی آں..... ہڈاں وچ پیڑاں پئے گئیاں
 نیں..... رنگ روپ اڈ گیا اے..... کوئی پھل فروٹ کھائیے تاں منہ اُتے رونق
 وی آئے..... رشیداں دی نوہ نہ ول تکیا جے جدوں دی آئی سی تے سُکئی سڑی
 سی..... لوکی گلاں کردے سن..... ہن ویکھو اوہ لگدی نہیں جھڑی ویاہ کے لیاندی
 سی..... اچھل دی کمائی کھا کھا کے اوہدیاں گلکھاں نکل آئیاں نیں..... منہ تے
 روپ آ گیا اے.....“

”ناشکری نہ کریا کر۔ ساڈے کول کیہ نہیں..... چھت وی اے، ان پانی وی
 لبھدا اے..... بچے وی پڑھ رہے نیں..... سرکار دی نوکری اے..... ایکسائز وچ
 کلر کی ای سہی..... پر فیروی لوک عزت کردے نیں.....“

”تئیں ہو ر کمایا وی کیہ اے..... اپنے سنگی ساتھیاں ول ویکھیا جے اوہناں
 دیاں زنانیاں کوں عیثاں پئیاں کردیاں نیں..... ایسہ بڑی چنگی گل اے کہ تئیں
 حرام نہیں کھاندے..... پر حیاتی دیاں لوڑاں پوریاں کرن لئی نوکری دے نال نال
 کجھ ہو ر کم وی کرو.....“

”شکر اے..... توں وی کسے گل اُتے خوش ہوئی آپس..... ساڈے لئی ایسہ
 ای کافی اے..... کیہ کریئے اج دے انسان نے آپ ای اپنے آپ توں ویلنے وچ
 پھسایا اے۔ آل دوالے دیاں خوشیاں توں منہ موڑ کے مادی سہولتاں دی تلاش
 وچ رُجھ کے قدرت دیاں بخشیاں نعمتاں توں بے نیاز ہو گیا اے.....“

”تئیں اپنا فلسفہ اپنے کول رکھو..... تے مینوں ایس دُنیا وچ رہن دیو.....
 اسیں ایستھے ای رہنا اے تے ایستھے ای ورتنا اے.....“

منیر حسین نمٹا جھیا مسکرا کے کجھ دیر لئی چپ ہو گیا۔

”ابو جی..... ابو جی..... میری گڈی نہیں لے کے آئے.....“ سب توں
 چھوٹی کڑی کڑی منھی نے آکھیا۔

”اگلی واری تنخواہ ملن اُتے سب توں پہلاں اپنی ننھی لئی بولن والی سنہری والاں والی گڈی لیاواں گا..... آجا میری دھی..... آجا.....“ اپنے ول پیار نال بلاندیاں اوہنے آکھیا۔

”پچھلی واری وی تئیں ایسہ ای آکھیا سی.....“ ننھی ناراض ہو کے تے اپنی جگہ آکڑ کے کھلو گئی..... اوہنے ساریاں لوڑاں تے خواہشاں توں تنخواہ نال ای جوڑیا ہویا سی ایس لئی ننھی توں وی اوس بارے تھوڑی بہوں شدبد ہو گئی سی۔ اک واری اوہنے اپنے پو توں پچھیا سی ”تہا توں تنخواہ کون دیندا اے.....؟“ تے اوہنے ننھی توں دسیا سی کہ ”حکومت“۔

”حکومت کون ہوندى اے.....؟“ ننھی پچھیا سی۔

”توں جد وڈی ہوویں گی تے فیرتینوں دساں گا.....“ اوہنے آکھیا سی۔
 ”مینوں ہنے ای دسو.....“ ننھی نے ضد کردیاں آکھیا سی۔ اوہنے تھوڑی دیر سوچیا سی، فیر آکھیا سی ”حکومت اوہنوں کھندے نیں جھڑی سارے ملک دے لوکاں دی چنگیائی لئی کم کرن لئی بنائی جاندی اے.....“
 ”میرے لئی وی..... میری سہیلی کرن لئی وی..... سب دے لئی.....؟“ ننھی نے پچھیا سی۔

”بالکل بالکل.....“

”حکومت کوں کم کردی اے.....؟“ ننھی دے ایسہ گل پچھن اُتے منیر حسین سوچی پے گیا۔ اوہ اوہناں لوکاں وچ نہیں سی کہ بچہ کوئی سوال پچھتے تے اوہنوں جھڑک کے چپ کرا دین۔ اوہ ہر ممکن حد تک بچے توں مطمئن کرن دی کوشش دا ہامی سی..... ساریاں اخباراں ایسے گل نال بھریاں ہوندیاں نیں کہ حکومت کیہ کر رہی اے..... تے کوں کر رہی اے پر اوہ اجے ننھی دے نکتے جے کلیاں وانگوں دماغ وچ صرف خوشبوواں دا بئیرا دیکھنا چاہندا سی..... تے نالے اوہ ننھی توں ہن کیہ دے.....

”ابو جی ہار گئے.....“ ننھی نے تالی وجاندیاں آکھیا سی۔

”ہاں ہار گیا.....“ اوہنے جیب وچوں بسکٹ دا پیکٹ کڈھ کے ننھی نوں دیندیاں آکھیا سی۔

”لو اپنا انعام.....“ ننھی خوش ہو گئی تاں اوہ وی خوش ہو گیا سی۔ اج فیر ننھی نوں راضی کرنا ضروری سی ایس لئی اوہنے آکھیا:

”پکا وعدہ..... گڈی وی لیاواں گاتے کیک وی..... اگلے مہینے میری دھی دی سالگرہ وی اے.....“ اوہدے کہن دا انداز انج سی کہ ننھی ضد چھڈ کے پیو دی گود وچ آ کے بہہ گئی۔

”اوہ وعدہ نہ کریا کرو..... چہنوں پورا کرنا اوکھا ہو جاوے۔ کوئی پنجاہ سٹھ روپے والی گڈی لیا دینا..... ست سو روپے والی امپورٹڈ گڈی لیاؤن دی کھڑی لوڑ اے.....“ روزینہ نے منیر حسین نوں سمجھاندیاں آکھیا۔

”تیری گل اپنی جگہ ٹھیک اے..... پر کدی کداری بالاں دی وی منی پے جاندی اے..... ایسہ گل میں تینوں فیر دساں گا.....“ پر اوہ گل دسیوں بغیر رہ نہ سکیا تے روزینہ دے نیڑے ہوندیاں بہوں ہولی آواز وچ بولیا کہ ننھی نہ سن سکے.....

”سحر کول وی ایہو جہی امپورٹڈ گڈی اے..... تے ہن ننھی دی خواہش جاگ اُٹھی اے.....“

”مینوں پتہ اے۔ لوڑاں پوریاں نہ ہوون تے حیاتی کلہدی.....“ روزینہ آکھیا۔

”چہنوں سب کجھ وی لبھدا اے اوہ وی ناخوش اے۔ نکیاں وڈیاں خواہشاں تاں پوریاں کریئے..... لوکاں نے ایویں لوڑاں ای ودھالیاں نیں..... حالاں ایسہ لنگھدے سارے لمحے ای حیاتی نیں..... ننھی دا ناراض ہونا تے اوہدا راضی ہونا..... تنخواہ دا ملنا تے ہتھوں سرک جانا..... تیری چھدیاں تے بوہتیاں عملی گلاں سب ای حیاتی دے رنگ نیں..... ایہناں رنگاں وچ ای لکے چھپے کجھ لمحے

زندہ لمحے بن جانے نہیں..... بس بندہ دل کھلار کے سماج دے سپن لئی کم کردا
 رہوے..... تے بوڑھ دے درخت وانگوں وٹو وٹ ہو کے وی لنگھدے ویٹے
 دیاں کڑکدیاں دھپاں ٹوں اپنے جٹے وچ لپیٹ کے تے ٹھنڈیاں چھاواں دوجیاں لئی
 ونڈدا رہوے.....“

منیر حسین نے اپنی اُچی تے سوہنی گل ختم کر کے روزینہ ول سراہے جان دے
 انداز وچ دیکھیا۔

”میرے سونے دے ہار وچ لگے سارے موتی ڈگ پئے نیں۔ ایہو ای موتی
 ڈگے ہار نال میں کئی ویاہ دیکھے نیں۔ بھرا دے ویاہ توں پہلے ہار وچ موتی ضرور پوانے
 نیں.....“ روزینہ نے شکایتی لہجے وچ گل کردیاں..... منیر حسین دیاں سوہنیاں
 تے موثر جذبات نال بھریاں گلاں دا کوئی نوٹس ای نہ لیا۔

”سونے دے بہوں استعمال نے کئی بابلاں دے لک بھن کے رکھ دتے
 نیں..... تے جوان کڑیاں ٹوں بن ویاہے بڑھاپے وچ دھکیل دتا اے.....
 ماٹریاں دے ساہ سکا چھڑے نیں..... کنیاں دے دماغ خراب کر دتے نیں.....
 خورے کھڑیاں عورتاں سن جھڑیاں چھلاں دے گجرے پا کے ای خوش سن.....“
 ایہہ عورتاں تہانوں ہن کہانیاں وچ ای لبھن گیاں..... دنیا وچ رہ کے دنیا
 نال چلنا پیندا اے..... گلاں نہیں کروانیاں میں..... ایہہ تبدیلی اودوں ای آئے
 گی..... جدوں تہاڑے جے لوکاں دی گنتی چوکھی ہو جاوے گی..... پر ایہہ لگدا
 نہیں.....“ روزینہ دی گل سن کے منیر حسین ہس کے کہن لگا۔

”ایہہ تے ویلا ای دے گا.....“ اوہ روایتی خاوندان دی طرح اپنی بیوی دے
 گل پن دی بجائے اوہدیاں کوڑیاں تے سڑیاں گلاں دا جواب دی حوصلے تے مدلل
 طریقے نال دیندا ایس لئی زنانی نال اوہدی مکالمہ بازی جھگڑیاں تے لڑائیاں دیاں
 حداں تائیں نہ پہنچدی..... ہاں کدی کدار ہلکی پھلکی ناراضگی ہو جاندی جمدے نال
 ازدواجی حیاتی بد مزہ تے کرکری ہون دی بجائے بوہتی نکھر کے سامنے آ جاندی.....

اوہ اپنے یاراں توں اکثر کھندا ہوندا سی..... ”چپ تے کھلوتے پانیاں وانگوں زندگی
 وی کوئی زندگی اے۔ نکتے نکتے گلے، شکوے، شکایتاں ای امیدے تارے موتی نیں۔
 جہڑے ایہنوں سجاندا تے لشکاندا نیں۔“ اوکڑاں تے مسلیاں نے منیر حسین
 توں کدی وی چڑچڑے پن دا شکار کر کے ماحول توں غافل نہیں سی کیتا..... اوہ
 اپنے آل دوالے توں ظاہری تے ڈونگھی دوہاں نظراں نال ویکھدا، اوہدا جس
 لیندا..... بازار وچ رُردے پھردے ون سونیاں تے رنگ برنگیاں شیواں ویکھنا تے
 اوہناں دا بھاء پچھنا اوہنوں بڑا چنگا لگدا سی۔ اوہ اوہناں شیواں بارے وی پچھدا.....
 جہناں توں اوہ بوہتے پیسے نہ ہون پاروں خرید نہیں سی سکدا..... ہر پاسے موسم
 دے پھلاں نال بجیاں ریڑھیاں توں ویکھدیاں اوہ گھنے باغاں دا تصور کردا۔ اوہدے
 اندر لے جذبے تے ون سونی اُمنگاں کسے پھل دے رس وانگوں رسدیاں اوہدے
 دل و دماغ توں بھیوں دیندیاں..... اوہ کروڑاں دیاں گلاں کردے لوکاں تے
 وڈیاں وڈیاں بلڈنگاں تے پلازیاں دے رعب تھلے کدی نہ آیا..... سگوں اوہناں
 توں وی انج ویکھدا جویں اوہ بازار وچ نہیں کسے میلے اُتے آیا ہووے.....
 عورتاں، بچیاں تے بندیاں دی چہل پھل تے شور شرابے اوہنوں چنگے لگدے
 سن..... جہڑے اوہنوں زندگی دی اکساہرتا توں توڑے ہوئے محسوس
 ہوندے..... پر کدی کدار اوہ سماجی دباؤ ہیٹھ آجاندا..... نکتے نکتے بال جد جھتیاں
 پالش کرن والے سامان دیاں پیٹیاں گل وچ پائے تے بھجے چنے دے چھابے تے
 بالٹیاں اُٹھائے اوہدے دفتر آندے تے اوہ پیار نال اوہناں دے سر تے ہتھ
 پھیردا..... تے ایس گل تے کڑھدا کہ سماجی انصاف کدوں ہووے گا..... اوہنوں
 ہر ویلے ایسہ دھیان رہندا سی کہ کسے ویلے اوہدے کولوں کسے بندے دا دل نہ
 دُکھے..... کیوں جے اوہ ایہنوں بہوں وڈا گناہ سمجھدا سی۔ اوہ ایکسائز دی کلرکی وچ
 بڑا خوش سی..... تے اپنا کم ایمانداری نال کردا سی..... اک واری اوہ اپنے دفتر
 دے باہر کھلوتا سی..... اک بڈھی مائی نے اوہدی بانہ پھڑلئی تے اپنے دوجے ہتھ

نال شلوار دی ڈب وچوں سو سو روپے دے کجھ نوٹ اوہنوں چاہ پانی کہہ کے دین دی
کوشش کیتی..... تے اوہ نہتھا جھیا مسکرایا تے اوہنے مائی کول اپنی بانہہ چھڑاندیاں
آکھیا.....

”ماں تیرا کم ہو جاوے گا..... ایہناں پیسیاں نال توں کوئی ہو ر لوڑ پوری کر
لئیں..... پندراں سالاں دی نوکری وچ بس اک واری اوہدے کولوں غلطی ہوئی
سی..... اک مڈھلی عمر دی زنانی اوہدے کول آئی.....

”تماڑی بڑی مہربانی..... میرا کم ہو گیا اے.....“ ایہہ کہندیاں اوہنے کجھ پیسے
منیر حسین دے ہتھ وچ پھڑا دتے..... اوہنے بے دھیانے مٹھی بند کر لئی.....
عورت نے کیہ آکھیا، اوہنوں کوئی پتہ نہ لگیا..... سوچن والے بندے نال کدی
کدار انج ہو جاندا اے..... ایس کمزوری پاروں اوہنوں اپنی زنانی دی اکثر ایہہ گل
سنی پیدی سی، ”جدوں گھر آ جاؤ تے دفتر دے رولے تے سوچاں اوہ تھے ای چھڑ آیا
کرو.....“ ماحول اُتے ڈونگھی نظر رکھن والا بندہ کدی اوہدے وچ ایہنا کجھ جاندا
اے کہ ایس خوبی پاروں ای ماحول توں کٹ جاندا اے تے سوچاں وچ ڈبیا نامناسب
کم کر گزردا اے..... تھوڑی دیر بعدوں منیر حسین ٹوں مٹھی وچ بند رقم دا
احساس ہويا..... اوہ اک دم اُٹھ کے اوس عورت ٹوں لبھن لئی نسیا جسنے ایہہ رقم
اوہنوں کم ہون پاروں خوش ہو کے دتی سی..... پر اوہ جاچکی سی..... منیر حسین
نے اوہ پیسے ایس اُمید اُتے سنبھال کے رکھ دتے کہ خورے اوہ عورت اوہنوں
کدی مل جائے..... اوہنے اوہدا پتہ لبھ لیا سی..... پر جد اوہ اوہدے گھر پہنچیا تے
اوہنوں پتا لگا کہ اوہ عورت ایہہ گھر چھڑ کے کسے ہو ر جگہ جاچکی اے. جد وی مہینے دا
خرچہ مک جاندا تے اوہدا دھیان ایہناں سنبھالے ہوئے پیسیاں ول جاندا..... لوڑاں
بڑیاں ڈاڈھیاں ہوندیاں نیں..... ایس لئی اوہ ایہناں پیسیاں ٹوں جلدی اوس
عورت تیک پہنچانا چاہندا سی..... پر کئی مہینے لنگھ گئے. اوہ عورت منیر حسین توں نہ
ملی تے اوہنے تھک ہار کے اوہ رقم کسے ماڑے بندے ٹوں دے دتی..... اپنے نال

ایسہ ارادہ کیتا کہ اوہ دفتر وچ چوکناتے ہوشیار ہو کے بہوے گا.....

سارا دن کم کالج کر کے جد اوہ راتی منجی اُتے لیٹدا..... تے سون توں پہلاں کجھ دیر اکھاں بند کر کے لما پیا رہندا..... دوجیاں لئی اوہ سُتا ہوندا پر اپنے لئی جاگ رہیا ہوندا..... ایسہ لمحے بڑے سوہنے ہوندے نیں۔ ایہدے وچ جاگدیاں اکھاں نال سُفنے ویکھے جانڈے نیں۔ واقعات دی ترتیب مرضی نال ہوندی اے۔ ایس لئی خوشیاں ای خوشیاں تے ساریاں اُنکلیاں گھيو وچ ہوندیاں نیں۔ بندے نوں جو کجھ دن دی بھج دوڑ وچ نہیں لبھدا..... ایہناں لمبیاں وچ لبھ جاندا اے پر منیر حسین ایہناں وچ سُفنے نہیں سی ویندا۔ اپنے دن بھر دے کماں دا محاسبہ کردا سی..... سماجی دُکھاں تے روگاں دا حل سوچدا سی..... اک واری اوہ انج ای سون دا بچ کر کے رات نوں منجی اُتے لیٹیا ہویا سی کہ روزینہ نے اوہدے نیڑے ہوندیاں آکھیا سی کہ مینوں پتہ اے تئیں تے ہوئے نہیں سگوں اکھاں میٹ کے کسے سوچ وچ پنے ہوئے او..... ایسہ سن دیاں اوہدا ہاسہ نکل گیا سی تے منیر حسین اوہنوں آکھیا سی ”بھیلے لو کے تیرا وی مشاہدا کمال دا اے..... توں ساڈی اوہ دنیا وی فتح کر لئی اے..... جہدے وچ اسیں آزادی نال گھم پھر سکدے ساں.....“ منیر حسین ایس گل نوں جان دا سی کہ مشرقی عورت دی ایسہ خواہش ہوندی اے کہ اوہدے خاوند دا ہر پل اوہدے واسطے ہووے..... ذاتی زندگی وچ مداخلت والا فلسفہ اوہدے لئی کوئی اہمیت نہیں رکھدا..... اوہنوں خاوند توں دور تے اپنے اپنے دائریاں وچ گھمنا پسند نہیں..... بلکہ اک دوجے دا ہو کے رہنا چنگا لگدا اے..... ایس لئی اوہنے اپنی بیوی دی گل دا بُرا نہیں منایا سی بلکہ ایس صورت حال دا وی سوا لیا سی۔ اوہنے روزینہ دیاں ٹچکراں تے غصے نال بھریاں گلاں توں ناراض ہون دی بجائے مکالمہ بازی نال اوہدے اندر دی ہواڑ کڈھ کے ماحول نوں خراب ہون توں بچا لیا سی..... اصل وچ ہر پاسے پُنگردی، پھیلدی سماجی حیاتی دا مُڈھ ازدواجی حیاتی اے..... جھڑی اج دے دور وچ ون سونے مسلیاں، مشکاں، اوکڑاں دی گرداب

وچ پھسی چکر پئی کھائی جا رہی اے۔ ایہنوں حوصلے، ہمت، برداشت نال ایہدے
 وچوں کڈھ کے کھلے پانیاں اُتے چلن والیاں ٹھنڈیاں ہواواں دا سنگی بنایا جاسکدا
 اے تے ایہو گل سماج دے سوہن سپن لئی اک نیمہ دا مقام رکھدی اے.....
 حیاتی چنگی تے سوکھی ہووے تے ویلے دے لنگھن دا پتہ نہیں لگدا..... پر جے
 اوکڑاں ہون یا جے تنخواہ مُکی ہووے تے ملازماں نوں انج لگدا اے کہ حیاتی دی
 ٹرین ہولی ہولی چل رہی اے۔ لمحے منٹاں وانگوں تے منٹ گھنٹیاں وانگوں لنگھ رہے
 نیں پر منیر حسین ایہناں گلاں دے باوجود حیاتی نوں اک اجے تے نوپلے سواد نال
 گزار رہی اے..... اوہ ہر مہینے دی دوجی تاریخ نوں شلوار قمیض اُتے ویسٹ کوٹ
 ضرور پاندے۔ تنخواہ نوں محفوظ رکھن لئی اوہ ایہنوں ضروری سمجھدا سی۔ پچھلا مہینہ
 اوکھا سوکھا لنگھ گیا سی..... ہن نویں چڑھدے مہینے دی تنخواہ اوہدی ویسٹ کوٹ دی
 اندروالی جیب وچ سی تے اوہ خوشی خوشی ہسپتال دے کولوں لنگھ رہی اے.....

”باؤ جی..... میری کچھ مدد کر دیو..... پیسیاں دی سخت لوڑ اے۔“ منیر حسین
 چلدیاں چلدیاں رُک گیا..... اوہنے منگن والے نوں پنج روپے ویسٹ کوٹ دی
 باہروالی جیب وچوں کڈھ کے دتے۔

”سرجی! میں منگن والا نہیں..... ضرورت مند آں..... مجبور آں.....
 میری بیوی اُمید نال اے..... آپریشن ضروری ہو گیا اے.....“ اوہ فیربول اُٹھیا۔
 منیر حسین نے واسکٹ دی اندروالی جیب دی باہروالی سائیڈ اُتے ہتھ لا کے
 تسلی کیتی کہ تنخواہ اوہدی جیب وچ ای اے۔ اوہے نال ای کئی لوڑاں، ننھی دی بولن
 والی گڈی، سونے دے ہار دے موتی..... سالے دے ویاہ لئی باللاں دے کپڑے
 بناؤن دی تیاری تے ہو ر کئی مہینہ وار خرچیاں نے اوہدے دماغ نوں اپنے قابو وچ
 کر لیا۔ اوہ کئی قدم بے دھیانے اگانہ ول ٹُریا۔

”باؤ جی.....“ دُکھاں نال بھرے ہوکے وانگوں اوس بندے دے منہ وچوں
 نکلیا تاں منیر حسین نے چونک کے اوہدے ول دیکھیا..... اوہدے جے حساس

بندے دے دل و دماغ وی کجھ لمیاں لئی آپس وچ ٹکرا گئے..... دماغ وچ بالاں تے بیوی دیاں خواہشاں تے لوڑاں کسے جلوس وچ احتجاج کرن والیاں وانگوں اڈیاں چُک چُک کے تے ہتھ ہلا ہلا کے رولا پان لگ پئیاں۔ تاں دوجے پاسے دل دی بستی وچ کوئل دی کوک وانگوں نرم من کھویں تے سچے جذبے پچھانہ پرت کے کجھ کرن لئی کہہ رہے سن..... جدوں سماج اونچ نیچ، آپا دھاپی، لٹ مار، مادہ پرستی تے گندیاں رسماں وچ گر جاندا اے..... ہر پاسے ذاتی فائدے تے پیسے دی گل ہوندى اے..... اوس ویلے حساس لوکاں دی تھوڑی جہی گنتی ایسی وی ہوندى اے جہڑے ایس ماحول توں قبول نہیں کردے سگوں اوہدے وچ رہندیاں ای گھڑدے رہندے نہیں تے قدم قدم اُتے ون سونی اوکڑاں، مصیبتاں دا شکار ہوندے نیں..... تے دل کھلار کے فیصلے کردے نیں۔ منیر حسین دے دماغ دے کسے کونے کھدرے وچ ایسہ خیال وی اُبھریا سی کہ اوہ کن لپیٹ کے گھر رُ چلے جتھے کئی ادھوریاں خواہشاں اوہدی اڈیک وچ نیں..... پر دل دی بستی وچوں کوئی جذبہ نکل کے اوہدے پورے جُٹے اُتے چھا گیا تے اوہدے اثر ہیٹھ ای اوہ پچھانہ ول پرت کے اوس بندے کول آیا..... جمدیاں اکھاں وچ اُمید دی چمک تے خوف دیاں پرچھائیاں اک ساتھ دکھائی دتیاں۔ اوس بندے توں جتھے اپنی التجا دے پورے ہون دی آس سی تے دوجے پاسے ایسہ ڈر وی سی کہ ایسہ باؤ جھیا بندہ اوہنوں طعنہ نہ دے دیوے کہ توں چنگا بھلا ہو کے منگدا پیا ایں..... پر منیر حسین نے دل وچ بھلن والے دیوے دی لوء وچ منگن والے دی اکھیاں وچ کسے ویاہ دیاں بتیاں وانگوں جلدی بجھدی آس توں پڑھ لیا سی..... اوہنوں یقین ہو گیا سی کہ ایسہ بندہ سچ کہہ رہیا اے.....

”چلو جی ہسپتال چلیے۔ اوتھے میرا اک ڈاکٹر واقف اے۔ جہڑی کوئی دوائی وغیرہ ہسپتال توں نہ مل سکی اوہناں لئی وی کوئی چارا کر لواں گے.....“ اوہنے پیسے ہتھ تھمان دی بجائے اوس بندے نال ہسپتال جان دا فیصلہ کیتا، جمداناں نذیر احمد سی..... اوہ ہسپتال اپڑے۔ منیر حسین توں واقف کار ڈاکٹر نہ ملیا پر اوہنے اپنی گل

بات تے بھج دوڑ نال کجھ دوائیاں تے ضروری متعلقہ سامان ہسپتال توں مفت حاصل کیتا..... پر فیروی اوہنوں کجھ رقم اپنی تنخواہ وچوں خرچ کرنی پئی۔

گائنی وارڈ دے باہر منیر حسین تے نذیر احمد پنج اُتے بیٹھے ہوئے سن..... منیر حسین سوچی پیا ہویا سی کہ ”حیاتی کیہ اے..... کتے آسائشاں ای آسائشاں نیں..... تے کتے جھکھ نے ڈیرے لائے نیں..... ہن سماج وچ تبدیلی آنی چاہیدی اے..... لوکاں دی حالت بہتر بنان لئی ہر سطح اُتے کم ہونا چاہیدا اے.....“ سامنیوں نرس آنندیاں ویکھ کے منیر حسین دی سوچاں دا سلسلہ ٹٹ گیا۔

”تمناؤں اللہ نے کڑی دتی اے.....“ نرس نے جُتھے دل نال آکھیا جنوں ایس گل دا افسوس سی کہ اوہنوں خورے کجھ نہیں لہجے گا.....

”جو اللہ دی مرضی.....“ نذیر احمد آکھیا..... جمدے لہجے وچ نہ غم سی تے نہ خوشی..... بس اک بیگانگی سی.....


”نذیر احمد..... ایہ تے اللہ دی رحمت اے.....“ منیر حسین نے آکھیا۔
”اچھا جی.....“ اوہنے آکھیا۔

”وکیہ نذیر احمد..... ویلا بدلدیاں کوئی پتہ نہیں لگدا..... مینوں اوس عورت دی گل ابے تائیں یاد اے..... جھڑی اپنی پنجویں کڑی ہون اُتے روپئی سی..... پر ہن اوسے کڑی دے جوان ہون اُتے اوہدی ذہانت نے کامیابی دیاں گلاں کردی اے..... کیوں جے اوہ کڑی اج اک مشہور ڈاکٹر اے..... اوس عورت نوں اج اوہناں ہنجواں اُتے پچھتاوا اے جھڑے اوہنے اوس کڑی دے جمن پاروں وگائے سن.....“ ایسہ گل سن کے نذیر احمد دے جذبات وچ اک خاص قسم دی تحریک ہوئی جھڑی اوہدے چہرے توں نمایاں سی۔ نرس ابے تائیں اوہتھے کھلوتی سی..... منیر حسین نے دو سو روپیہ نرس توں دتا تے اوہنے خوشی نال لیندیاں آکھیا..... ”باؤ جی! تئیں ٹھیک ای کہندے او..... پنج پنج پتر جمن والیاں تے اوہناں دے ہون اُتے لڈو ونڈن والیاں ماواں توں پتراں دے ہتھوں روندیاں ویکھیا اے.....“

”اصل گل کردار تے تربیت اے..... کڑی ہووے یا مُنڈا.....“ منیر حسین
 آکھیا تے نذیر احمد نوں جذبیاں نال اُٹھدیاں گائیں وارڈول گیا.....
 اج منیر حسین دا دل ڈاڈھا خوش تے مطمئن سی..... اوہ جد گھر وڑیا تے ننھی
 آکھیا ”اباجی..... میری گڈی لیائے او.....؟“

”ہاں لیاؤندی اے..... پر اوہ بولدی نہیں روندی اے..... ویلے دے نال
 نال بولناوی سکھ جاوے گی.....“ منیر حسین آکھیا۔

”اوہ گڈی تے نہ ہوئی... اوہ تے بے بی ہوئی.....“ ننھی نے آکھیا۔
 منیر حسین ننھی دی ذہانت اُتے ہس پاتے فیر اوہنے ساری گل سبب نوں سنا
 دتی..... ننھی بڑی خوش سی... اوہدی زنانی وی اوہدے ایس کم اُتے... راضی سی
 پر خرچیاں پاروں پریشان سی..... ایہہ مہینہ پہلے مہینیاں نالوں وی سخت و کھالی دیندا
 سی..... خرچیاں دی پتنگ پاروں جہدی ڈوریتھوں سرک چکی سی..... پر منیر
 حسین خوش سی کہ اوہنے جذبیاں دی گل سن لئی اے۔ تاں ہن اوہدی لنگھادی حیاتی
 وچ ایہہ لمحے زندہ لمحے بن گئے نیں جہڑے اوکڑاں تے دُکھاں وچوں اپنا رستہ
 بناندے سماج دے اُفق اُتے راہنمائی ستاریاں وانگوں جگماندے رہن گے۔



لالی


سُورج ڈُب چُکیا سی..... پرندیاں دے گروہ لہندے پاسے کھلری ہوئی لالی وچ
 نہاندے ہوئے چڑھدے پاسے ول اُڈن وچ مست سن۔ بدلی دا عمل شروع ہو چُکیا
 سی۔ ہنیرا خاموشی نال اسمان ٹوٹ اپنی لپیٹ وچ لے رہیا سی..... جمیل اکثر ایس منظر
 دا سواد لین لئی گولڈن باغ وچ تُر جاندا..... کدی کدار رفعت جہاں وی اوہدے نال
 ہوندی۔ اوہ دوویں باغ وچ بیٹھے سورج ٹوٹ ڈب دے ہوئے دیکھدے..... جہڑا اپنا
 جُتہ ساڑ کے تے گرمی توں محروم کئے اسمان دے اک کونے وچ اک نلیاب شو پئیں
 بن چُکیا ہوندا..... ون سونے پرندے شور کردے اوہناں کول چلے آندے جہناں
 نال اوہ ڈاڈھے مانوس ہو چُکے سن۔ جدوں پرندے آپس وچ چُچھاں ملاندے تے
 گولڈن باغ محبت دے گیتاں نال بھر جاندا۔ سب جذبیاں تے جنوں ہتھوں مست ہو
 جاندا جمیل تے رفعت جہاں دی پرندیاں دی دنیا وچ چلے جاندا جتھے جغرافیہ تے
 تاریخ توں آزاد محبتاں دے سلسلے ہوندے۔

اج فیر جمیل تے رفعت جہاں انب دے درخت ہیٹھے بیٹھے سن۔ اک پرندہ کتوں
 اُڑدا آیا تے درخت اُتے بہہ گیا۔ اوہناں ایس مہاند رے دا پرندہ پہلے کدی نہیں سی
 دیکھیا۔ اوہ اُچی اُچی چمکن لگا۔ جمیل حالی تے رفعت جہاں نوں محسوس ہو یا کہ اوہ کجھ
 کہہ رہیا اے اوہناں دے وی جذبے پرندے دی دُکھاں بھری چمک نال مل گئے۔
 ”اے انساناں دے سماج وچ رہن والیو..... مدیت وچ گم ہو کے قدرتی حسن
 توں منہ موڑن والیو..... تئیں جہڑے سنہرے جال بنائے ہوئے نیں..... تئیں خود

ایہدے وچ قید او..... کاش..... تہادی اکھیاں وچ ویکھن دی طاقت ہوندی.....
 تئیں ایس بیضوی دُنیا نُوں ویکھ سکدے..... جہدے وچ ست سمندر نیں.....
 ساڈے ول ویکھو اسیں بے شعور سہی..... پر تہادی طرح غلام نہیں..... آزاد
 پھرنے واں..... اکھاں کھولوتے غور نال ویکھو..... خورے تہانوں کجھ نظر آ
 جاوے.....“

اک پاسیوں روڑا آیا..... اوس پرندے نُوں وجا جھڑا اوتھے ای ڈھیر ہو
 گیا..... اک مُنڈا ہتھ وچ غلیل پھڑی پرندے نُوں چکن لئی آیا جمیل نے اگانہ
 ودھ کے پرندے نُوں چک لیا.....

”اوئے ظالم..... توں کیہ کردتا اے.....“ اوہنے مُنڈے نُوں آکھیا.
 ”انساناں دے سماج وچ سچ بولن والیاں نُوں ایہو ای صلہ دتا جاندا اے.....
 رفعت جہاں نے ایہہ کہہ کے مردہ پرندے نُوں جمیل کولوں لیا تے فیر سینے نال لا
 لیا..... لہندے پاسے کوئی لالی نہیں سی..... لالی تے ہن پرندے دے منہ اُتے
 سی.....“



خیال دی بوند

”خورے کئی صدیاں تے زمانیاں توں زمین کسے وڈے حجاز وانگوں روشنیاں دے مرکز دولائے گیرے لا رہی اے۔“ خیال دی اک بوند کمال دے بلغ وچ ڈگی۔ سوچ لہراں وانگوں پھیلدی گئی۔ اوہنوں بہوں دور تائیں دکھائی دینا شروع ہو گیا۔۔۔۔۔ ہزاراں مخلوقاں اپنے ارتقائی عمل وچوں گزردیاں تے سینکڑیاں تہذیباں جنم لیندیاں تے مٹدیاں کسے فلم وانگوں اوہدے دماغ دی سکرین اُتے دکھائی دتیاں۔

”حالاں تیک زمین دی رفتار وچ استقامت تے گھمن دا جذبہ اے۔۔۔۔۔“

خیال دی اک دوجی بوند ڈگی تے کمال بولدا چلا گیا۔

”زمین اُتے وس والیاں لئی ایہہ خوش بختی دی گل اے۔۔۔۔۔ کہ ابے تائیں کسی پروانے نے زمین دے کن وچ واج نہیں ماری۔۔۔۔۔ ورنہ روشنی پالین دا جنوں اوہنوں کسے فنادے کوچے وچ لے جاندا۔ ابے تائیں سورج زمین اُتے محبت نال بھریاں کرناں ای بکھیر رہیا اے۔۔۔۔۔ ہر پاسے اک تماشا لگا اے۔۔۔۔۔ انسانی عقل سرتوں پیراں تائیں جستجو وچ ڈبی ہوئی اے۔ زمین وچ غاراں کڈھ کے رہن والا بندہ اوہدے اُتے محل بناؤن لگ پیا اے۔۔۔۔۔ پر سماجی ظلم۔۔۔۔۔“ ایہہ کہہ کے اوہ رُک گیا۔ خیال دی بونداں دا سفر رُک گیا سی۔۔۔۔۔

کجھ ویلا لنگھن پاروں اوہنوں احساس ہويا۔۔۔۔۔ کہ اوہ کشمیر کارنروچ بیٹھا ہویا اے جہڑا ٹیشن دے کجھے پاسے اوہدے تے اخیر وچ اے۔۔۔۔۔ ہو سکدا اے کہ کرہ ارض اُتے جغرافیائی حوالے نال ایہدی کوئی اہمیت نہ ہووے۔۔۔۔۔ پر شہر وچ

ایہدے علمی تے ادبی مقام توں انکار نہیں کیتا جاسکدا..... مڈھ وچ تے ایسہ اک
ٹی ہاؤس ای سی..... پر فیر ادیبوں، شاعراں توں خورے کیہ بجھی کہ اوہناں ایس
ٹوں ادبی، علمی کماں دا مرکز بنا لیا۔

کشمیر ہاؤس کیہ سی..... بس اک ٹین دی چھت سی جہدے تھلے پندراں ویسہ
کرسیاں تے دو تین میز پئے ہوئے سن..... ادیب، شاعر تے دانشور ایچھے آندے،
چاہ پندے، سوچ وچار کردے تے ادبی گلاں وچ رُجھے رہندے۔ کمال کدی کدار
ایچھے آندا سی اوہدے گھر وچ غربت سی..... گھر دا خرچہ ٹورن لئی اوہ چھوٹی کلاساں
دے بچیاں توں پڑھاندا سی۔ کتاباں جمع کرنا اوہدا مشغلہ تے سرمایہ سی.....

اوہ سال دا اخیر لا دن کشمیر کارنر وچ گزار رہیا سی ہلکی ہلکی کن کن من من ہو
رہی سی۔ ٹین دے چھت اُتے مینہ دے قطریاں دی آواز کسے فطری موسیقی وانگوں
طبیعت اُتے اثر کر رہی سی۔ درختاں وچ لکے تے کونے کھد ریاں وچ بیٹھے پرندے
چمک چمک کے خوشی دے گیت گارہے سن۔ دور ترین دی آواز دل و دماغ توں اک
نویکی کیفیت بخش رہی سی..... باؤ شریف چاہ دی چسکی لیندیاں اوس دی ٹٹ بھج
اُتے اپنا جائزہ پیش کر رہیا سی..... پر کمال کشمیر کارنر وچ ہون والیاں بحثاں توں
بے خبر موسم دی عنایتاں تے رنگینیاں وچ ڈبیا ہويا سی.....

”میری ماں بیمار اے..... دوائی لئی پنج سو روپے دی لوڑ اے..... میں گداگر
نہیں آں..... حالات ہتھوں مجبور آں.....“ سب نے چونک کے اوہدے دل
ویکھیا..... باؤ شریف نے تے نسیم گلزار نے اوہنوں اک اک روپیہ دے دتا اسلامی
فلاحی ریاست دے تصور تے میڈیکل سہولتاں بارے گل بات شروع کر دتی.....
کجھ ویلا لنگھن پاروں سارے اوس نوجوان توں بے نیاز ہو گئے..... تیز تے
ٹھنڈی واء نے اوس جوان توں ٹین دی چھت تھلے کھڑا رہن لئی مجبور کیتا ہويا
سی..... کمال لئی رنگینیاں بے معنی ہو گئیاں۔ اوہنوں ہرپا سے اپنی ماں دا چہرہ دکھالی
دینا شروع ہو گیا..... جھڑی کجھ ورھے پہلوں ہمیشہ دی نیند سوچکی سی.....

ہن خیال دیاں کئی بونداں ڈگیاں..... تے کمال پکار اٹھیا ”میں جاننا واں کہ ایسہ صرف ماں دی ہستی اے جہڑی کائنات دے وڈے تے سچے جذبیاں دا ملاپ اے..... اگر کوئی دودھ پیندا بچہ اظہار کر سکے تے اوہ دس سکدا اے کہ ماں دے دل وچ محبت دیاں ڈونگھیاںیاں وچ کائنات کوں سمٹ سکدی اے.....“ کمال خود کلامی وچوں باہر آیا اوہنے اک نظر کشمیر کارنر وچ کھڑے جوان اُتے پائی جھدیاں پلکاں نے اوہدے ڈگن والے ہنجواں نوں سنبھال رکھیا سی۔

”توں گداگر نہیں..... توں مدد لئی جتے لفظ ورتے نیں اوہ کوئی پیشہ ور منگن والے دے نہیں..... بلکہ کسے مجبور انسان دے نیں..... تیری تے کائنات لٹ رہی اے.....“ کمال دے دماغ وچ اُبھرن والیاں لہراں آپس وچ ٹکرائیاں۔

”پر میں کیہ کر سکنا واں..... اہج تے مہینے دا اخیر لاؤن اے..... میں تے پہلاں ای ہمسائے کولوں قرض لیا ہویا اے..... میرے لئی تے ایسہ وڈی رقم اے..... دماغ وچ ہلچل مچ گئی۔


”کتے انج نہ ہووے..... اک اک روپیہ اکٹھا کردیاں ایہدی ماں دُنیا توں گزر جاوے.....“ اک انسانی جذبے نے چیخ مار کے اوہدے دل وچوں نکلیاں آکھیا۔

”ہاں ہاں..... میں سمجھ کر سکنا واں.....“ خیال دیاں کئی بونداں اک لکیر دی صورت اختیار کر گئیاں۔ اوہ نوجوان دے کول گیا۔

”توں ایہتے ای بسہ..... میں تیرے لئی پنج سو دا بندوبست کر کے واپس آونا آں.....“ ایسہ کہہ کے کمال ہوش وچ بھجدا گھر پہنچیا تے اپنی کتاباں والی الماری دے سامنے کھلو گیا۔

”اے کتابو..... تئیں میری حیاتی دا وڈا سرمایہ او..... میں تہاڈے کولوں ای زندگی گزارن دے راز سکھے..... میں تہاڈے کولوں انی پرانے زمانے توں لے کے اج تیک وڈے لوکاں دے کارنامے سنے..... میں تہاڈے کولوں..... ہاں تہاڈے

کولوں..... کائنات دا حل جانیا..... میں تہاڑے کولوں اظہار دی طاقت دا فن
 سکھیا..... تہاڑے کھڑے کھڑے احسان گنواواں..... ٹیس مینوں..... محبتاں،
 قربانیاں تے ہمتاں دے درس دتے..... اج میں تہاڑے کولوں قربانی منگن آیا
 واں..... اک جگہ توں دوجی جگہ منتقل ہو جان دی قربانی..... ایہدے نال اک
 ماں دی حیاتی بچ جاوے گی..... اج قربانی دا مظاہرہ کرو..... تاں جے لوک ایہہ کہنا
 چھد دین کہ عملی حیاتی وچ تے کتابی حیاتی وچ فرق ہوندا اے..... ”کمال نے ایہہ
 تقریر کرن توں بعد کتاباں ٹوں الماری وچوں کڈھنا شروع کر دتا..... اوہ اک اک
 کتاب ٹوں الماری وچوں کڈھنا شروع کر دتا..... اوہ اک کتاب ٹوں بو سے دیندا
 تے گٹھڑی وچ رکھدا جاندا..... کتاباں دا ایس ڈھیر وچ وڈے وڈے مفکراں،
 دانشواراں، ادیباں دیاں تخلیقتاں اک ماں دی حیاتی دی بھیک منگن چلیاں
 سن..... خورے کتاباں ٹوں مجبوری وچ وکن دا احساس نہیں سی جدوں دوکاندار
 ایہناں عظیم کتاباں ٹوں ویکھیا..... تے اوہنے ایہناں ٹوں خریدن توں انکار کر
 دتا..... صرف چند درسی کتاباں، گائیڈاں تے ٹیسٹ پیپراں ٹوں خریدن اُتے
 رضامندی ظاہر کیتی..... اوہ سوچن لگا کہ زمانہ کننا بدل گیا اے..... لفظاں دے
 موتی بازار وچ نہیں وکدے..... ہن اوہ نوجوان وی مدد کر سکدا سی..... اوہ اک
 عجیب نشے وچ کشمیر کارنرول سن لگ پاپا..... بارش رُک چکی سی..... کسے چیز ٹوں
 پالین دے احساس نال اوہدے دماغ وچ خوش کن خیالاں دی بوند باندی شروع ہو
 چکی سی پر بیضوی جہاز سماجی حقیقتاں توں بے خبر گردش وچ مست سی۔



چوتھی دُنیا دے انسان

”چلو باؤ جی چلو.....“ ٹانگے والے نے گھوڑے دیاں واگاں کھچدیاں تے ٹانگا روکدیاں آکھیا..... شفقت سڑک توں ذرا ہٹ کے اک پاسے کھلوتا ہویا سی..... زیادہ تر کوچوان اوہنوں پہچان دے سن تے اوہنوں ویکھدیاں ای ٹانگا روک لیندے سن. اوہ روزانہ ای اقبال ٹاؤن توں ٹانگے وچ بہہ کے شہر جاندا سی جتھے لوکل گورنمنٹ دا دفتر سی..... اوتھے کم کردیاں اوہنوں کئی ورھے بیت چکے سن..... پر ہن وی اوہدی حالت اُنج ای سی جو یس کل ای بھرتی ہویا ہووے..... شادی توں پہلاں موٹر سائیکل خریدن دا چاء سمندری لہراں وانگوں اوہدے اندر اٹھیلیاں لیندا رہندا..... پر اوہدی خواہش لہراں وانگوں ساحل نال ٹکرا کے ڈونگھے پانیاں دا حصہ بن کے دوبارہ اُبھرن لئی تیار ہو جاندی..... اوہ خیالاں وچ کئی واری موٹر سائیکل اُتے بیٹھا سڑکاں اُتے اوہنوں نساندا رہندا..... سپنے تے سپنے ای ہوندے نیں..... جہناں دے مکدیاں اوہ حقیقی زندگی وچ آجاندا..... اوہنے خواہش توں حقیقت دا روپ دین لئی کوئی گھٹ کوشش نہیں سی کیتی..... اپنی تھوڑی جہی تنخواہ وچوں وی کجھ نہ کجھ بچاندا رہندا..... پر ایسہ بچتاں حیاتی دیاں لوڑاں اگے نہ کھلو سکیاں. جہڑیاں اوہناں توں اک مقررہ حد تائیں پہنچن توں پہلاں ای ہڑپ کر جاندیاں..... بس اک واری انج ہویا سی..... اوہنے موٹر سائیکل خریدن لئی رقم جمع کر لئی سی..... پر قسمت دھوکھا دے گئی..... موٹر سائیکل دیاں قیمتاں وچ وادھا ہو گیا سی..... شفقت نے قرض چُک کے اپنی ادھوری خواہش نوں پورا کرن دی

کوشش کیتی..... پر اوہدا چھوٹا بھرا بیمار ہو گیا..... جمع شدہ رقم دا گراف تھلے ڈگنا شروع ہو گیا۔ اوہدا چھوٹا بھرا صحت یاب ہو گیا پر شفقت دے دل وچ کسے چیز نوں پا لین دا احساس بے بسی دی صورت وچ ڈھل گیا۔

”فنافٹ باؤ جی.....“ شفقت نوں ہولی ہولی ٹانگے ول آندیاں ویکھ کے کوچوان نے آکھیا۔ ٹانگے وچ صرف اک ای سواری گھٹ سی۔ باقی پنجوں سواریاں زنانہ سن..... اوہناں وچ کوئی پنکھڑی گلاب دی نہیں سی..... غزالی اکھیاں، گلابی رخسار، رس بھرے ہونٹھ والی کوئی گل نہیں سی..... بلکہ اوہناں دے چہرے خشک، مرجھائے تے شفقت دی ادھوری خواہش وانگوں کچلے ہوئے سن۔ پیوند لگے لیڑے جسم دے کئی حصیاں نوں ڈھانپن وچ ناکام سن..... دو زنانیاں دے پیراں دے وچ جُتی وی نہیں سی..... اوہ کسے تہی دُنیا دی بجائے چوتھی دُنیا دی مخلوق لگ رہیاں سن..... چوتھی دُنیا دے لفظ استعمال کر کے اوہ خود سوچی پے گیا..... دنیا ونڈاں وچوں نکل کے اک ای کیوں نہیں ہو جاندی..... حیاتی اپنی رعنائیاں دے نال سب اُتے مہربان کیوں نہیں ہوندی۔

”آؤ بابی بہہ جاؤ.....“ اگلی سیٹ اُتے کبھے پاسے بیٹھی ہوئی عورت نے سرکدیاں ہویاں اوہنوں نیسٹھن دی جگہ دیندیاں آکھیا..... اوہدے وچ ماڑی جہی کھچ جوانی پاروں لگ رہی سی..... شفقت اوہدی بیباکی تے بے نیازی پاروں وی چکیا..... پر فیر پائیدان اُتے پیر رکھ کے ٹانگے اُتے سوار ہو گیا..... اوہ اپنی سیٹ اُتے بہوں سمٹ کے بیٹھا..... تاں جے اوہدا بدن گھٹ توں گھٹ جوان کڑی نال ٹکرائے۔ اوہدے دل و دماغ اُتے اخلاقی تقاضے مسلط ہو چکے سن..... کڑی نوں جویں کوئی پرواہ نہ ہوئے۔


کوچوان نے اپنے منہ وچوں مخصوص قسم دی آواز کڈھی تے گھوڑے نے نسا شروع کر دتا..... اوہنوں چھانٹا مارن دی کوئی لوڑ نہیں سی۔

”تیرا گھوڑا بڑا سوہناتے سمجھدار لگدا اے..... منہ وچوں نکلی ہوئی آواز نوں

ای کافی سمجھدا اے.....“ شفقت نے کوچوان ٹوں آکھیا۔
 ”کرو سیوا تے کھاؤ میوا.....“ باؤ جی ادھی کمائی تے گھوڑے ٹوں کھوا دینا
 واں.....“ کوچوان نے فخریہ انداز وچ آکھیا..... شفقت نمٹا جھیا مسکرایا۔
 ”باؤ جی اک گل دسی چاہنا واں تہاٹوں..... ساڈے پنڈ وچ اک زمیندار
 حیات محمد رہندا سی..... پورے پنڈ وچ اوہدی گھوڑی دی بہوں شرت سی..... اوہ
 بجھدی تاں انج لگدی کہ اُڑدی اے..... اک واری اوہ گھوڑی اُتے سوار چلا آ
 رہیا سی تاں اوہنے ویکھیا کہ کجھ ڈاکوواں نے اوہدا رستہ روک لیا اے..... اوہدے
 بچن دی اک ای صورت سی.....“ پرانے قصہ سنان والیاں دی طرح اوہنے رُک
 کے ساریاں ول ویکھیا..... ساریاں سواریاں اوہدی گل دا سواد لے رہیاں سن۔
 ”اوہدی گھوڑی اوس وڈے نالے ٹوں پھلانگ جاوے جمدے اک پاسے پنڈ
 سی.....“ ایسہ کہہ کے اوہ فیر رُک گیا.....
 ”فیر کیہ ہویا.....؟“ شفقت نال بیٹھی ہوئی کڑی نے تجتس نال پچھیا.....
 جویں ہن نالہ اوہنے ای پار کرنا اے.....
 ”حیات محمد نے اپنی گھوڑی ٹوں آکھیا..... بجنی..... اگر توں اج نالہ ٹپ
 جاویں..... تاں قسم اللہ دی ساری حیاتی تیری سیوا کراں گا..... تینوں آزاد چھڈ
 دیواں گا..... تے تیرے اُتے کوئی سواری نہیں کرے گا..... ایسہ کہہ کے اوہنے
 بجنی دا رُخ نالے پاسے کر دتا..... بجنی نے بھجیاں نالے دے اک پاسیوں دو بے
 پاسے چھال لا دتی..... اوہنے نالہ تے ٹپ لیا..... پر ڈاڈھی زخمی ہوئی..... اج
 وی بجنی پنڈ دادنخاں وچ آزاد پھر رہی اے تے حیات محمد اپنا وعدہ نبھا رہیا
 اے.....“ کوچوان نے گل ختم کر کے شفقت ول ویکھیا..... جہڑا آپ وی ہن
 اوس گھوڑی اُتے اپنے آپ ٹوں سوار محسوس کر رہیا سی.....
 ”بڑی کمال دی گھوڑی اے..... کدی تہاڈے پنڈ آیا تے ضرور ویکھاں
 گا.....“ شفقت نے کوچوان ٹوں خوش کرن لئی آکھیا۔

”واہ واہ..... خوب جوڑا اے..... زبردست کنٹراسٹ.....“ سڑک دے
 اک پاسے کھڑے نوجوان نے شفقت حسین تے اوہدے نال بیٹھی کڑی دل اشارہ
 کردیاں دو بے نوجوان ٹوں آکھیا..... فیر دوویں نوجوان قہقہہ مار کے اک دو بے
 دے ہتھاں اُتے ہتھ سٹن لگ پئے.....

”او احمق مُنڈیو..... تہانوں کیہ پتہ..... تہاڈے سامنے حیاتی دیاں ظاہری
 حالتاں ای حیاتی اے..... سماج ٹوں زندہ رکھن والے جذبے دل تے دماغ دی
 دھرتی وچوں پھٹدے نیں..... مادیت نے تہانوں انھا بہرہ کردتا اے۔ ایس لئی حیاتی
 دا اصل رُخ تہاڈی نظراں توں اولھے ہو گیا اے..... شفقت خود کلامی وچ غرق
 سی..... اچن چیت ٹانگہ سپیڈ بریکر توں تیزی نال گزریا تے جمپ لگیا۔ شفقت نال
 بیٹھی کڑی غیر متوان ہو کے کبھے پاسے ڈگی..... شفقت نے اپنے آپ ٹوں ہو ر
 کبھے پاسے کرن دا ارادہ کیتا تاں جے کڑی اوہدے جسم نال نہ ٹکرائے پر اوہ اپنی
 ایس سوچ توں باز رہیا..... کیوں جے بجلی دی تیزی نال اک خیال اوہدے ذہن وچ
 جنم لیا کتے کڑی اوہدی ایس عمل ٹوں غربت نال نفرت دا اظہار نہ سمجھ لوے.....
 اوہنے جھٹ کڑی ٹوں سہارا دین لئی اپنی چھاتی سجے پاسے کر لئی..... کڑی اوہدے
 پہلو وچ آڈگی..... سچی انسانی قدراں خوشی نال جھوم رہیاں سن..... وضع داری
 دے بُت ٹٹ چکے سن..... شفقت حسین تیسری دُنیا توں چوتھی دُنیا وچ وڑ چکيا
 سی..... جتھے جان لئی کسے موٹر سائیکل دی نہیں بلکہ خالص تے نگھے جذبیاں دی لوڑ
 سی۔



اکلاپے دی اگ

رُت خزاں دی سی..... اوہدے اندر دیاں حسرتاں تے اڈیکاں خورے کدوں
 دیاں پُنگر کے تے ودھ پھُل کے ہن ٹنڈ منڈ درختیاں دیاں نگھیاں تے سُکیاں شاخاں
 وانگوں وکھالی دے رہیاں سن۔ اوہ اک اجے بوڑھ دے درخت تھلے بیٹھا ہویا سی
 جہڑا کئی ورہیاں توں کھجور دے درخت توں ولھینا مار کے اُتاتنہ ول ودھیا ہویا سی۔
 اوہنوں جدوں وی اکلاپا ڈسدا اوہ ایٹھے آ کے بہہ جاندا..... ایس عجیب و غریب سنگم
 توں ویکھ کے سوچی پے جاندا..... پر اج تے ایٹھے آ کے وی اوہنوں تڑفالاگ ہویا سی۔
 سنائے اوہدے اندر ”شاں شاں“ کر کے وجدے پئے سن۔ پتیاں دے ڈگن دی آواز
 نال اوہنوں حیاتی ہولی ہولی سرکدی محسوس ہو رہی سی۔ اوہ او تھوں اُٹھ کھلوتا۔ فیر
 ہولی ہولی اپنے گھر ول ٹرنا شروع کر دتا۔ اوہدے گھر توں ادھا میل اگانہ جنگل
 شروع ہو جاندا سی۔ جنگلات دے محکمہ نے خاص انتظام کیتا ہویا سی کہ کوئی خطرناک
 جنور آبادی ول منہ نہ کر سکے۔ شیراں دے گجن دی آواز آبادی تائیں سنائی دیندی
 سی۔ جہڑی جنگل توں تھوڑی دور سی۔ ایٹھے ہر پاسے کھلے گھرتے چوڑیاں سڑکاں سن۔
 جدھر ویکھو درخت ای درخت تے پھُل بوٹے سن۔ سوہن سپن، خاموشی تے تازہ
 ہوا دے سنگم تے ماحول توں من کچواں تے فطری بنا دتا سی.....

شافع علی ہر روز ایس پارک وچ آندا تے فیر گھم گھما کے گھر آ جاندا..... پر اج
 اوہ ڈاڈھا اُداس سی..... اوہدا ناشتہ کرن توں وی جی نہیں سی کردا پیا۔ چاہ پی لینی
 چاہیدی اے..... تاں جے مُنڈے جُٹے توں سکون ملے..... ایہہ سوچ کے اوہنے

اپنے لئی چاہ دا کپ بنایا۔ فیروپڑے وچ پئی اک کرسی اُتے بہہ گیا۔ اوہ ہمیشہ ناشتہ اپنے لئی آپ ای بنانداسی۔ بس دوپہرویلے اک چھوتی بستی وچوں بولانا می بندہ آندا سی جہڑا دوپہر، شام دا کھانا اوہدے لئی تیار کردا، گھردی ہلکی پھلکی جھاڑ پونجھ کردا تے کپڑا لتاوی دھو جاندا۔ ایہناں دو تین گھنٹیاں توں اڈ شافع علی کلا ای اپنے آپ وچ گھردا رہندا۔ چاہ دا گھٹ لاندیاں اوہنے ویڑے وچ لگے پھل بوٹیاں ول اُداس نظراں نال دیکھیا۔۔۔۔۔ تے اپنے آپ نوں آکھیا ”اج ایہناں اُتے رُت خزاں دی اے پر کجھ ویلے بعدوں ایہناں بہاروی دیکھنی اے۔۔۔۔۔ پتہ نہیں میرے اندردیاں رُت خزاواں کدوں بہاراں وچ بدلن گیاں۔۔۔۔۔“ چاہ دے کپ، مٹھی دھپتے ماحول دی چُپ نے اوہدیاں سوچاں نوں دبی چنگاریاں وانگوں سلگا دتا۔۔۔۔۔ اوہنے غربت وچ اکھیاں کھولیاں سن۔ دن کم کرن وچ تے راتاں پڑھن وچ گزاریاں سن۔ ویلا چنگا سی۔ شافع علی نوں انکم ٹیکس دے محکمے وچ کلرکی لہہ گئی۔ بچتاں کیتیاں، اک جنگل دے نیڑے ستاجہیا قسطن وچ پلاٹ لے لیا۔ ویاہ ہو یا۔ بچے ہوئے تے بچتاں اوکھیاں ہو گئیاں۔۔۔۔۔ پلاٹ اُتے مکان بناؤن دی خواہش چھیتی پوری نہ ہوئی۔۔۔۔۔ اُتوں بیوی مر گئی۔۔۔۔۔ پہلاں اک بچہ باہر گیا۔۔۔۔۔ فیرو دوجا وی ٹر گیا۔۔۔۔۔ وڈے مُنڈے نے باہر ویاہ کر لیا۔۔۔۔۔ اوہ ہن دوجے مُنڈے دا ویاہ پاکستان وچ کرنا چاہندا سی۔۔۔۔۔ ایہہ ای اوہ آس سی جہدے سہارے اوہدی حیاتی اگانہ ودھ رہی سی۔۔۔۔۔ مُنڈیاں کھلا پیسہ دھیلا بھیجا۔۔۔۔۔ تے ایہہ جنگل نیڑے پلاٹ خوبصورت کوٹھی وچ بدل گیا۔۔۔۔۔ پر اکلاپے تے سناٹے اوہدے سنگی ساتھی بن گئے۔۔۔۔۔ دو پرندے درختاں اُتے پھڑپھڑائے۔۔۔۔۔ تے کجھ سکے پتر تھلے ڈگے۔۔۔۔۔ اوہدیاں سوچاں دا سلسلہ ٹٹ گیا۔۔۔۔۔ کپ وچ پئی باقی چاہ ٹھنڈی ہو گئی سی۔۔۔۔۔ اوہنے پانی وانگوں اوہنوں پیتا۔۔۔۔۔ تے فیراکھاں بند کر کے کرسی نال ٹیک لادتی۔۔۔۔۔ کنا ویلا انج ای لنگھ گیا۔۔۔۔۔ ہن وی اوہدا جسم ٹٹ بھیج رہیا سی۔۔۔۔۔ دل وی ڈول رہیا سی۔۔۔۔۔ اکھیاں سُرخ ہو چکیاں سن۔ اوہناں وچوں سیک نکل رہیا سی۔ چاہ دے کپ نے کوئی خاص

اثر نہیں سی کیتا۔ اوہنے اپنے اک ہتھ نال دو جے بازو دی نبض پھڑپھڑیاں آکھیا ”مینوں
تاں تاپ چڑھ گیا اے..... چاہ دے نال کال پول دی گولی وی کھانی چاہیدی
سی.....“ ایہہ سوچ کے کرسی توں اٹھیا۔... گلاس وچ پانی لیا۔ فیر الماری کھولی
جتھے دوائیاں دے ون سونے پتے پئے ہوئے سن۔ اوہ ڈاکٹر کول اودوں جاندا جدوں
چو کھا بیمار ہو جاندا..... اوہنے او تھوں کال پول دی گولی لئی، زبان اُتے رکھی تے پانی
دے گھٹ نال اپنے اندر نگل لئی..... فیر اوہدی نظر الماری وچ اک پاسے رکھے
خطاں دے بندل اُتے پئی..... ایہہ اوہدے پتے تے وڈے مُنڈے دے خط سن
جہڑے اوہناں کینیڈا تے امریکہ توں اوہنوں لکھے سن۔ اوہنے ایہہ سارے خط
سنبھال کے رکھے ہوئے سن..... چھوٹے مُنڈے سرمد دے ہن وی بڑے خط
آندے سن پر وڈے مُنڈے احمد نے جدوں دی گوری ویاہ لئی سی، اوہ ہن مہینیاں
بعد ای خط لکھدا سی..... اوہ وی چند سطران دے رسمی جے خط..... پر سرمد دے
خطاں وچ دیس دیاں یاداں، پیو دی شفقتاں بارے نگھے تے ڈونگھے جذبیاں دا اظہار،
مرحومہ ماں دی اپنے نال محبت وچ لنگھے ویلے دیاں گلاں..... آون والے ویلے
دے سُفنے..... شافع علی ایہہ سب کجھ پڑھ کے بڑا خوش ہوندا..... سرمد اوہنوں
ون سونیاں کئی شیواں بھیجدا..... پر اوہ ہر واری ایہہ ای لکھدا..... کہ اوہنوں
کسے شے دی لوڑ نہیں۔ بس اوہ جلد پاکستان آ جائے..... تاں جے اوہناں ٹوں اوہ
مل سکے..... اوہنوں احمد دی دھی تے اپنی پوتری زیب ٹوں ملن دا بڑا چاء سی۔ اوہ
ہن ٹوں دس ورھیاں دی ہو گئی سی..... احمد اپنے پیو ٹوں کئی ورھیاں توں ٹالدا آ
رہیا سی تے سرمد اپنی مجبوریاں دا رونا روند سی..... بس انج ای کنا ویلا لنگھ گیتے
اوہدیاں اڈیکاں اکلاپے وچ رچ وس کے روگ بن دیاں جا رہیاں سن۔

اوہنے پتران دے خطاں دا بندل چکیا فیر بیڈ اُتے گول تکیے دی ڈھولا کے بہہ
گیا..... اوہنے سارے خط اپنے سامنے کھار دتے، اک اک کر کے خطاں ٹوں
پڑھدا..... تے اک پاسے رکھدا جاندا..... کدی مسکراند، کدی اُداس ہوندا تے

کدی بے چین ہوندا..... خطاں دے نال نال اوہدے چہرے دی کیفیت بدلدی رہندی..... ہن اوہدے ہتھ اوہ خط سی جھڑا اوہنوں کجھ مہینے پہلوں ملیا سی تے بڑی تفصیل نال لکھیا سی..... ایہ خط اوہدے بیٹے سرمد دا سی..... اوہنے خط پڑھنا شروع کیتا.....

”مینوں باہر آئے کئی ورھے ہو گئے نیں..... حیاتی مشینی انداز وانگوں لنگھی جا رہی اے۔ پیسے دا گراف اُچا ہوندا جا رہیا اے..... پر میرے اندر ہو رہے پیسے کمان دی خواہش ودھدی جا رہی اے..... دل کردا اے کہ بس تہاڈے قدماں وچ پیسیاں دا ڈھیر لا دیواں..... تئیں ساری زندگی تھوڑی جہی تنخواہ وچ گزارہ کیتا اے..... مہینے دے آخری پندراں دن تئیں اک اک کر کے پہلی تاریخ دی اڈیک وچ گزار دے سو..... تہادی ساری حیاتی ایس اڈیک دی نظر ہو گئی سی..... اوس لنگھی حیاتی نوں پلٹایا تے نہیں جاسکدا..... میں چاہنداں کہ تئیں اپنی آون والی حیاتی نوں بھرویں انداز وچ گزارو..... میں اک بندل بھیج رہیاں جہنوں تئیں کھولو گے تاں تہاڈی طبیعت خوش ہو جاوے گی۔ پیسے وی گھل رہیاں۔

اک گل دا مینوں اعتراف اے کہ اے تائیں ایتھے میرا دل نہیں لگا۔ ایتھوں دا ماحول مینوں اوپرا اوپرا لگدا اے..... ہر بندہ اپنے اپنے دائرے وچ بھاگھمی جا رہیا اے۔ دُکھ درداں تے محبتاں دی کتے سانجھ وکھالی نہیں دیندی۔ کدی کداریں ایس سارے ماحول توں اکتا جاناں پر واپس آنا کوئی سوکھا نہیں..... میرے کانڈ پتر وی بننے نیں..... اے میں لیگل وی ہونا اے..... فیر کئی خواہشاں ادھوریاں مینوں چین نہیں لین دیندیاں..... میں وی ہن پیسیاں دے وادھے لئی تے لیگل ہون واسطے کولہو دے بیل وانگوں چکر کھائی جا رہیاں.....

مینوں احساس اے کہ تئیں کلم کلے حیاتی دا ڈھنگ پورا کر رہے او..... ایس لئی تئیں مستقل اپنے لئی کسے ملازمہ دا چارا کر لو..... رقم دی کوئی چٹنا نہ کرنا.....“

”پیسے..... پیسے..... خورے تہانوں کیہ ہو گیا اے..... غصے نال شافع علی

نے آکھیا..... فیر اوہنے سارے خط اک پاسے رکھ کے تے چھت ول گھورنا شروع
کردتا..... پر ایس خط وچ اک گل اوہنوں چنگی لگی سی کہ اوہدے پتر دے دل وچ
واپس پر تن دی خواہش موجود اے.....

شافع علی دا پورا جُشتہ تپ رہیا سی۔ کال پول دی گولی نے اُجے تائیں اثر نہیں سی
کیتا..... گولی اثر وی کیہ کر سگدی اے۔ ایہہ کوئی جراثیماں دا حملہ تے نہیں
سی..... اکلاپے دی آگ سی جھڑی ہو لے ہو لے پورے وجود وچ پھیل چکی سی۔
جدوں ایہہ آگ بھنچ رہی ہوندی اے، یاداں دیاں آہواں پھوکاں وانگوں گرم جُشتہ
دی آگ وچ بھانبر مچا دیندیاں نیں..... بندے نوں انج لگدا اے کہ اوہنوں تاپ
چڑھ گیا اے..... شافع علی ایس کیفیت وچ ای رُڑھدا چلا جاندا..... جے اوہنوں
جھاڑو پھرن دی آواز سنائی نہ دیندی.....

بولا ویڑے وچ وکھرے، سُکے، پیلے پتیاں نوں بوکھرنال اکٹھا کر رہیا سی اوہنے
اوہناں نوں اکٹھا کر کے ڈرم وچ سٹیا تاں فیر دوویں ہتھ ٹوٹی تھلے دھوئے۔ اوہ کجھ
ورہیاں توں شافع علی دے کول ای کم کر رہیا سی۔ لوک اوہنوں بولا ای آکندے
سن۔ اوہنے ایس ناں نوں قبول کر لیا سی تاں ہن آپ وی دوجیاں نوں ”بولا“ ای
دسدا سی..... اوہ کنوں بولا تے نہیں سی..... بس کری کدار عادتاً ”کیہ آکھیا
جے.....؟“ کہندا سی۔ ایس عادت پاروں اوہ بولا مشہور ہو گیا سی..... بولے دے
پنج بچے سن۔ اوہ اپنی نکی جہی دُنیا وچ بڑا خوش سی.....

جد بولا شافع علی دے کمرے وچ آیا تاں شافع علی بیڈ اُتے لماپیا ہویا سی.....
انج جاپدا سی جو یں اوہ چھت ول ویکھ رہیا اے پر اوہ تے سوچاں وچ کھویا ہویا سی۔
”تیا جی..... خیر اے نا.....؟“ شافع علی نوں لماپیا ویکھ کے بولے نے آکھیا۔
ایس ویلے اوہ کدی لما نہیں سی پیا ہوندا..... بلکہ کسے کم وچ رُجھیا ہوندا سی۔

”بس بولے! اج موڈ ٹھیک نہیں.....“ شافع علی نے آکھیا تے بولا بیڈ اُتے
پواندی پاسے بہہ گیا۔

”تایا جی..... میں لتاں دبا دیواں.....“ بولے آکھیا تے شافع علی خاموش رہیا تے بولا لتاں دبان لگ پیا۔

”تایا جی تہاڈیاں لتاں گرم نیں..... لگدا اے تہانوں تاپ چڑھ گیا اے.....“ بولے آکھیا۔

”ایہہ تاپ تاں ہے..... پر ہوری قسم دا.....“ شافع علی نے جواب دتا۔
 ”کیہ آکھیا جے.....؟“ گل سنن دے باوجود عادتاً بولے آکھیا، فیر خود ای بول اٹھیا:

”کھڑی قسم دا.....؟“

”بولے بندے دا دل، دماغ ہر ویلے سوندیاں جاگدیاں سفنیاں نال بھریا رہندا اے..... جدوں سُفنے ٹٹ جاندے نیں..... آساں دم توڑ جاندیاں نیں..... تاں فیروی ایہو جہیا تاپ چڑھدا اے.....“ شافع علی نے سمجھاندیاں آکھیا۔

”پر تایا جی..... تہاڈے دوویں مُنڈے باہر لے ملک وچ نیں، پیسے دھیلے دی کوئی کمی نہیں..... ون سونیاں شیواں تے پیسے تہانوں بھج دے رہندے نیں..... تئیں خوش رہیا کرو.....“

”بولے خوشی صرف پیسیاں تے چیزاں نال ای نہیں ملدی..... بندے دا دل کردا اے کہ کسے چھوٹے نال پیار کرے کسے نال دُکھ سُکھ پھولے، کسے نال گلہ کرے..... کسے دے کم ٹوں سرا ہے..... حیاتی شور کرے، اٹھیلیاں لیندے اور وگدے پانی وانگوں ہونی چاہیدی اے..... پر جدوں ایہہ سب کجھ وی نہ ہووے تاں وی بندے ٹوں تاپ چڑھ جاندا اے.....“

”تایا جی..... چھوٹے باؤ ہوراں ٹوں لکھو کہ اوہ آجان.....“ بولے نے لتاں دبان دیاں آکھیا۔

”اوہناں دے دماغ وچ پیسے دا بھوت وڑ گیا اے..... ٹھیک اے پیسہ بہوں کجھ اے..... پر سب کجھ نہیں.....“

”تیا جی..... تئیں ٹھیک ای کھندے او..... لوڑاں تے اوکڑاں ہر ویلے
 بندے نوں تنگ کردیاں رہندیاں نیں..... ہر شام ویلے جدوں بالاں کول بیٹھی دا
 تے سارا تھکیواں لہہ جاندا اے.....“ ایہہ کھندیاں بولے نے ہولی ہولی پر زور نال
 اپنیاں مٹھیاں دے کلاوے وچ شافع علی دیاں پنیاں نوں دباندیاں آکھیا.
 ”بولے وئی سرور آگیا اے..... تیری گل دا وی تیرے گھٹن دا تے ہن
 بس.....“

”تیا جی..... حالاں گھٹیا ای کیہ اے..... ابے میں تہاڑا سروی دبانا
 اے..... گھر دا کم تے اپنی جگہ..... تہاڑی خدمت کرن نوں وی جی چاہندا
 اے..... تئیں ہمیشہ پیار ای کیتا اے تے کدی مینوں ملازم نہیں سمجھیا.....“
 ”بولے..... حیاتی انساناں نال پیار تے دُکھ سُکھ ونڈن دا ناں اے.....
 خورے لوکاں نے نکلی نکلی خوشیاں توں کیوں منہ موڑ لیا اے. ہر ویلے بس کسے شے
 نوں حاصل کرن دے جنون وچ سڑدے جاندا نیں..... تے چنگ مند دا کوئی
 احساس نہیں. بولے وئی..... پتہ نہیں کیوں لوکی ایس دھوکھے وچ پئے نیں.....“
 ”تیا جی تہاڑی گل ذرا دکھری جی اے پر دل نوں چنگی لگی اے.....“ ایہہ
 کھندیاں بولے دیاں انگلیاں تھلیوں شافع علی دے متھے دے پین والے وٹ
 پھسلدے گئے..... بولا ہتھ نال نہیں انگلیاں نال متھے نوں دبا رہیا سی..... انج
 لگدا سی جویں اوہ متھے راہیں سردی پیڑنچوڑ کے باہر کڈھ رہیا اے.....

”سروچ درد تے بوہت سی..... پر ایہہ تیری انگلیاں دا کمال اے ایہہ درد
 وی مٹھا ہو گیا اے.....“ شافع علی نے ہسڈیاں آکھیا. بولا ڈھڈوں خوش ہو گیا.
 اصلی وچ بولے دی سنگت نے اوہدے اکلاپے دی شدت وچ کمی کردتی سی.
 ”چھوٹے باؤ ہوراں دا کوئی خط پتر نہیں آیا.“ بولے بیتابی نال پچھیا. شافع علی
 دے متھے اُتے فکر مندی دے نشان بولے دیاں انگلیاں دی حرکت وچ گواچ گئے.
 ”ہمیں دنوں توں اڈیک لگی ہوئی اے..... ہن خط پتر تے گھٹ ای لکھدے

نہیں..... بس فون ای آندا اے..... زمانہ بدل گیا اے بولے..... ہن تاں ای میل دا زمانہ اے. کھندے نیں ابا جی کمپیوٹر رکھ لوو..... پر خورے میرا دل کیوں ایس پاسے نہیں آندا.....“

”تیا جی..... میری خالہ دا مُنڈا بہوں پڑھا کو اے..... اوہ ہر ویلے ایس کمپیوٹر نال ٹک ٹک کردا رہندا اے..... کھندا اے..... بھاء بولے توں ایہو ای سمجھ..... ساری دنیا ایہدے وچ بند اے..... میں تے کہنا آں تئیں وی لے لو واہو آہرے لگے رہو وگے..... تہاڈے لئی کھڑی مشکل اے..... تئیں وی پڑھے لکھے او نا.....“

”ایس معاملے وچ میرا حال وی ان پڑھاں والا اے.....“
 ”تئیں ذہن بناؤ تے کمپیوٹر لیاؤ..... بشیر نوں آکھاں گا اوہ تہا نوں تھوڑا بہوں سمجھا دیوے گا.....“

”اچھا چلو کجھ سوچنے آں..... بس بولے وئی بس..... توں تاں گھٹ گھٹ کے طبیعت ٹھیک کر دتی اے.....“ بولے نے شافع علی دا سر دبانا چھڑ دتا تے فیر اُٹھدیاں آکھیا:

”لو تیا جی..... میں کوئی ہانڈی روٹی دا سر بندھ کر لوں.....“ ایہہ کہہ کے اوہ باورچی خانے ول ٹر گیا.

شافع علی نے ٹی وی آن کیتا جہڑا اک کونے وچ لگے لوہے دے ریک اُتے پیا ہویا سی..... ریک اینا اُچا لگا ہویا سی کہ ٹی وی لیٹ کے دیکھن وچ کوئی دشواری نہیں سی ہوندی..... ایس لئی شافع علی لیٹ کے ٹی وی دیکھن لگ پیا..... واہو ویلا لنگھ گیا.....

”تیا جی..... ہانڈی پکا دتی اے..... روٹی ٹیبل تے لا دیواں.....؟“ بولے آکھیا.

”نہیں بولے توں جا..... اجے میرا روٹی کھان نوں دل نہیں کر رہیا.....“

شافع علی آکھیا تے بولا ٹر گیا..... بولے دے جان توں کافی دیر بعد شافع علی نے تھوڑی جہی روٹی کھادی تے فیر شام تائیں بیڈ اُتے لما پیاٹی وی ویکھدا رہیا۔ شام ویلے ٹیلی فون دی گھنٹی وجی۔

”ہیلو..... سرمد پتر اے..... اللہ خوش رکھے.....“ شافع علی نے بیڈ دے نال پئے ہوئے ٹیلی فون اُتوں ریسور چکدیاں آکھیا۔
 ”ابا جی تماڈا کیہ حال اے.....؟“ سرمد دی آواز ریسور وچ سنائی دتی۔
 ”بس پتر ٹھیک اے.....“

”تماڈی آواز کجھ بدلی بدلی تے بھاری بھاری لگ رہی اے..... طبیعت تاں ٹھیک اے نا.....؟ ابا جی!“

”کوئی فکر والی گل نہیں..... بس ذرا ٹمپرچر ہو گیا سی.....“
 ”اپنا خیال رکھیا کرو..... کوئی مستقل ملازم وی رکھ لو..... بولا تاں وقتی طور اُتے ای تماڈے کول آندا اے۔“
 ”بولے دے ہوندیاں کسے ہو ر ملازم دی لوڑ نہیں..... توں اپنی سنا پتر..... اوتھے جی لگا ای کہ نہیں.....؟“
 ”مڈھ وچ تے ہرویلے اکھڑیا ای رہندا ساں پر ہن.....“
 ”ہن کیہ.....؟“

”ویلا لنگھن دے نال نال کئی گلاں دی سمجھ آنی شروع ہو جاندی اے حقیقت پسندی نال سوچنا بڑا ضروری اے.....“
 ”بالکل بیٹا..... بالکل بیٹا..... جتھے بچپن، لڑکپن لنگھیا ہوندا اے اوہ ویلا تے مقام کسے خوشبو وانگوں بندے وچ رچیا ہوندا اے..... بندہ لکھ چاہے اوہدے وچوں باہر نہیں آسکدا.....“

”اوہ تاں گل ٹھیک اے ابا جی..... پر.....“
 ”پر کیہ.....؟ توں فکر نہ کر..... تیری پسند نا پسند دا مینوں پورا پتہ اے..... کیہ ہو یا جے تیری ماں نہیں..... توں بس پاکستان پہنچن والی گل کر..... سارا

انتظام میں آپی کر لواں گا۔ توں ایویں ای شرمان لگ پیا ایں..... مغرب وچ رہ کے وی توں اُنج دا اُنج ای ایں..... چنگی گل اے پُتراں توں اُنج ای ہونا چاہیدا اے.....“ کجھ دیر شافع علی ریسور وچ کوئی آواز نہیں آندی..... تے اوہ سرد توں کہندا اے:

”کیہ گل اے توں چپ ہو گیا ایں پُتر.....؟“

”اباجی! میں تہانوں کجھ کہنا چاہندا ساں..... چلو فیر سہی.....“

”فیر والی کھڑی گل اے..... توں کھل کے گل کر..... جویں توں چاہیں گا اُنج ای ہووے گا۔“

”اباجی تئیں ایہتے آؤ نا..... ایہتے صفائی ویکھ کے تہاڈا دل خوش ہو جاوے گا۔ ہر قسم دی سہولت ایہتے موجود اے.....“

”جیندے رہو پُتر..... تئیں ہن میرے کول آؤ..... مینوں صرف تہاڈی اڈیک اے.....“

”اباجی..... ایہہ اک فلاحی ریاست اے..... ایہتے میڈیکل سہولتاں بندے دا حق نیں..... تہانوں دل دی تکلیف رہندی اے۔ ایہتے تہاڈا بہوں سوہنا علاج ہووے گا.....“

”سرد پُتر..... میرا علاج ڈاکٹراں کول نہیں..... بس تہاڈے کول اے۔“

”اباجی! تئیں تاں ہمیشہ اُنج ای ٹال دیندے او..... سوچیا جے کتنی پلوشن اے تہاڈے دوالے..... ون سونیاں بیماریاں پھٹ رہیاں نیں.....“

”نہ پُتر سرد نہ..... تیری گل سچ وی کیوں نہ ہووے..... پر دیس وچ بہہ کے دیس بارے اُنج دی گل سننا مینوں چنگا نہیں لگا..... فیر میرا پُتر ایہہ گل آکھے.....“

”اباجی میرا علاقہ بہوں صاف ستھرا اے..... تئیں ایہتے آؤ تاں تہانوں پتہ لگے..... اج دی دنیا بڑی بدل گئی اے..... جذباتی گلاں نال چمڑے لوک بہوں

پچھتے رہ جانے نہیں.....“

”سرمد پتر! جذبیاں بغیر حیاتی انج ای اے..... جویں ویلنے وچوں نکلیا گئے دا پھوک..... انج لگدا اے جویں توں کجھ بھل گیا ایس پتر..... توں ایہتے آویں گا..... تاں سب ٹھیک ہو جاوے گا.....“

”اباجی میرا حالاں ایہتے آؤن دا کوئی فوری پروگرام نہیں.....“
 ”چل توں لیٹ آ جاویں..... پر کسے نوں کجھ پچھے دیے تے چنگے رشتے لبھن وچ وی تے کافی دیر لگ جاندی اے.....“

”اباجی میں تہاؤں کس طرح دساں.....؟“

”سرمد پتر! میں تہاؤا پیو وی آں تے تہاؤا دوست وی..... تے نالے پیو پتر وچ اولھا کھدا..... فیر مینوں تیری شرط دا وی پتہ اے..... توں بس تسلی رکھ.“


”اباجی اوہ.....؟“

”اوہ کیہ پتر.....؟“

”گل ایسہ وے کہ مینوں اک چنگی پروپوزل آگئی اے..... مینوں ایہتھوں دا ماحول وی اوپرا نہیں لگدا..... کڑی امریکن نیشنل اے..... چالھی ورھے ہو گئے نیں اوہناں دی فیملی نوں ایہتے آباد ہویاں.....“ سرمد بولدا جا رہیا سی پر شافع علی نوں انج لگ رہیا سی جویں اوہنوں کجھ سنائی نہیں دے رہیا۔

”جیندے رہو پتر.....“ شافع علی نے ایسہ کہہ کے ریسورٹلی فون اُتے رکھ دتا..... اکلاپے دی اک نے اوہنوں پوری طرح اپنی لپیٹ وچ لے لیا..... اوہ بیڈ اُتے اک ہارے ہوئے بندے وانگوں ڈگ پیا۔

شام ویلا سی..... رُت خزاں دی سی..... اوہدے اندر دیاں حسرتاں تے اڈیکاں خورے کدو دیاں پنگر کے تے ودھ پھل کے ہن ٹنڈ منڈ درختاں دیاں نگھیاں تے سکیاں شاخاں وانگوں دکھالی دے رہیاں سن.....



گھمن گھیریاں

کڑاہی وچ بھجڈے کالے چنیاں اُتے کجا پھیردے ہوئے اوہدا جتھے کسے لاٹو وانگ گھم رہیا سی۔ کجے اُتے اوہدے ہتھاں دی پکڑ ڈاڈھی تے بھار انج سی جوہیں گھمیاں گھمیاں اوہ چنیاں دا کچو مر کڈھ کے کڑاہی وچ پئے لون نال برابر کر دیوے گی۔ بھٹھی وچوں نکلدے سیک نے اوہدے چہرے نوں پہلوں ای لال سُہا کیتا ہویا سی۔ اوہ کسے روباٹ وانگوں لگ رہی سی..... اک فیڈ کیتے ہوئے مشن وانگوں اپنی دُھن وچ مگن۔ ماسی میراں کندھ نال ٹیک لا کے بیٹھی ہوئی سی تے کجھ دناں توں ایہ کُری اوہدی جگہ بیٹھی دانے بھن رہی سی۔ میں چلدیاں چلدیاں رُک گیا تے بھٹھی توں کجھ دُور اک پل تھلے کھلو گیا۔

”ہر چیز ای گھم رہی اے..... زمین سورج دے دوالے“ چن زمین دے دوالے..... تے بندہ.....؟ میں سوچاں وچ ڈب گیا۔ خورے میں کائنات وچ موجود شیواں دیاں گھمن گھیریاں وچ گوا چا کتھے دا کتھے اپڑ جاندا جے میرے سامنے بھٹھی نہ ہوندی۔ میں کئی مہینیاں توں ایسے راہیں دفتر توں گھرتے گھرتوں دفتر جا رہیا ساں۔ ایہ راہ لوکاں دیاں مجبوریاں نال بنیا سی۔ لاری اڈے توں سیشن کورٹ پہنچن لئی دو سواریاں بدلتیاں پیندیاں نیں تے آوندیاں وی ایہ ای صورت ہوندی اے۔ جے کر لاری اڈے توں وڈی سڑک پار کر کے کچی گلی وچ آئیے تے وڈا جہیا گیٹ وکھالی دیندا اے۔ اُنج تے گیٹ راہ بند کرن لئی لایا گیا اے پر اوہدے دوہاں دروازیاں نوں ریلوے پھاٹک وانگوں اک موٹی زنجیر نال بندھ کے تالا لایا ہویا اے۔ اوہناں دے

وچکار اینا کو رستہ بنیا ہویا اے کہ اوہدے وچوں جھک کے لنگھیا جاسکدا اے تے کئی سائیکل سوار دھک دھکا کے اپنی سائیکل وی ایہدے وچوں کڈھ لیندے نیں۔ اصل وچ گیٹ لان والیاں ٹوں وی اوہناں ہزاراں لوکاں دیاں مجبوریاں دا احساس سی جھڑے ایس راہیں پیدل اپنیاں منزلاں نوں آؤندے نیں تے حیاتی دیاں لوڑاں پوریاں کرن لئی تیتلا تیتلا بچاؤندے نیں۔ گیٹ وچوں لنگھدیاں ای دور سامنے تیک رڑا میدان وکھالی دیندا اے جتھے ایہ مکدا اے۔ اوہدے اگانہ ٹیشن اے۔ گیٹ وچوں لنگھدیاں ای سچے پاسے مسجد اے۔ مسجد دے باہر اک بزرگ صبح تے لوڈے ویلے لاؤڈ سپیکر وچ بولدے وکھالی دین گے۔ دوویں ویلے آن جان والیاں دا واہوا رش ہوندا اے۔ ایہ بزرگ فانی دنیا تے آخرت دی دائمی حیاتی دا اوہناں ٹوں احساس دلاندے رہندے نیں۔ او تھوں لنگھن والے کئی لوک کدی کدار بزرگ دے اک لانبھے پئی صندوق کڑی وچ کجھ نہ کجھ پا جاندے نیں۔

سچے پاسے رُردے جائیے۔ اگے کجھ جگہ ریلوے والیاں نے تیل دا کم کرن والیاں ٹوں پٹے تے دتی ہوئی اے۔ جہدے وچ اوہناں تیل دیاں گڈیاں کھڑیاں کیتیاں ہوئیاں نیں۔ ایس جگہ وچ داخل ہوون لئی رستہ کچی گلی وچوں ای آؤندا اے۔ ایس دیاں پچھلیاں دیواراں دے نال نال پیدل چلن والیاں دا رستہ چلا جاندا اے تے اک جگہ رستہ تکیوں دی شکل بناؤندا اے تے ایس تکیوں وچ ماسی میراں بھٹھی سجائے بیٹھی اے۔ جہدے سامنے دور ٹیشن وکھالی دے رہیا اے تے سچے پاسے لائنیں دا جال وچھیا ہویا اے۔ جہنوں شارٹ کٹ لان والے پار کردے نیں۔ او تھوں لنگھن والے ماسی میراں ٹوں پچھان دے نیں۔ جھڑی ٹریفک دے ہنگامیاں توں الگ تھلگ اک کونے کھدرے وچ اپنی نکی جہی دنیا و سا کے بیٹھی ہوئی اے۔ ہر پاسے سناٹا اے۔ دو تن منگتے لائنیں ول جاندے راہ وچ وکھالی دیندے نیں۔ اک منگتی کڑی دی ٹٹی لت تاں میں کئی مہینیاں توں ویکھ رہیا واں۔ پر لت ٹٹی ہووے تے ٹھیک ہووے۔ چلو جی ایچتے خورے کیہ کیہ ہو رہیا اے۔ لنگھدی ٹرین دی

”پاں“ ”پاں“ نال میرے خیالاں دا سلسلہ ٹٹ گیا۔ میری اکھاں اگوں دھند چھٹی۔ ماسی میراں دیوار نال ڈھولا کے سوچاں وچ ڈبی سی۔ اہدے وچ شک نہیں کہ بھجے چنے چبنا بڑا سوادى لگدا اے پر جے ماسی میراں دی بھٹھی میری راہ وچ نہ ہوندى تے خورے میں وی ایس سوادوں محروم رہندا۔ حیاتی جھڑی سپیڈ نال موت ول نسی جا رہی اے اوہنے بندے نوں ایس جنجال وچ پادتا اے کہ اوہ گواچ گیا اے تے مونہ دے چسکے لئی وی اوہ وڈے وڈے ہوٹلاں ول ویکھ کے ترس رہیا اے تے اوہ سواد تے خوشی جھڑی اوہنوں تھوڑے پیسیاں وچ مل سکدی اے اوہدے کولوں بے خبرے لنگھی جا رہیا اے۔

پچی گل اے مینوں کئی جہی دُنیا وسا کے اپنے کم وچ رُجھے لوک، بھاویں کسے پیل دے تھلے بہہ کے جھتیاں گنڈھن، تنورتا کے روٹیاں لان، مٹی نوں ون سونیاں شکلاں دین، کولے بھنا کے چھلیاں بھنن یا بھٹھی سجا کے دانے بھنن رہے ہوں اوہ زمین دے سچے واسی لگدے نیں۔ ہر ویلے زمین اُتے بیٹھے زمین نال پیار کردے نیں تے اوہدی ٹھنڈک اوہناں دے وجود دا حصہ بن جاندی اے۔ جھڑی اک دائرہ بناؤندیاں اوہناں دے اندر دی اک ٹوٹ گھیرے رکھدی اے۔ جد سارا دن سرکاری کرسی تے بہہ بہہ کے بھنجنے نیٹھن نوں جی کردا اے تے فیرا لسیاں جگہ مینوں چنگیاں لگدیاں نیں۔ انج محسوس ہوندا اے کہ ایہناں وچوں کئی لوکاں نے حیاتی وچ ای حیاتی دی روح لہ لئی ہونی اے۔ اپنا مچ مار کے بھونیں دے ہو کے رہ گئے نیں۔ جھڑے لوکی اڈیاں چک کے، بانسواں کھلار کے زمین نوں دبان دی کوشش کردے نیں اوہناں دی اک دیھاڑی ویلے دے ٹھڈے کھا کے زمین وچ ای لما پینا اے۔ میں ہولی ہولی رُدا اخیر ماسی میراں دی بھٹھی کول اپڑ گیا۔

”پنچ رُپے دے دانے باؤ نوں دے دے.....“ میں ہمیشہ ای ماسی کولوں پنچ رُپے دے دانے لیندا ساں تے ماسی میرے پنچدیاں ای پنچ رُپے دے دانے مینوں پھرا دیندی سی۔ اج اوہنے ایس کڑی نوں آکھیا سی جھڑی اوہدی جگہ بیٹھی

دانے بھُت رہی سی۔

”ویہ رُپے دے دانے..... تازہ بھُت کے.....“ میں آکھیا تے ماسی نے چونک کے میرے دل ویکھیا۔
 ”گھر والی تے بچیاں نے فرمائش کیتی سی.....“ میں اِنج آکھیا جویں میرے اندر کوئی چور ہووے۔

”ہلا بہہ جا چن پُترا..... تیرے داناں دا پراگاہنے کڈھدی اے۔“ ماسی نے میرے دل دی گل کیتی تے میں زمین تے وچھی اک بوری اُتے بہہ گیا۔
 ”ایتھے بہہ جا پُترا.....“ ماسی نے اک چوڑے پتھر ول اشارہ کردیاں آکھیا۔
 ”ماسی ایتھے ای ٹھیک واں..... بھوئیں تے نیسھن دا وی اپنا اک سواد اے.....“ میں آکھیا۔

”ہلا جویں تیری مرضی.....“ ماسی نے آکھیا۔ تے میں ہن زمین دے چے واسیاں وانگوں اوہدے اُتے بہہ گیا۔
 ”کیہ کردا ایں.....“ ماسی نے بے تکلفی نال پچھیا۔
 ”سرکاری افسر آں.....“ میں آکھیا۔

”توں تاں افسر ہو یا پُترا..... پُترا تیرا بھوئیں تے بہنا چنگا نہیں لگدا.....“ ماسی نے آکھیا۔

”کیوں ماسی افسر انسان نہیں ہوندا..... اوہ روندی وی اے تے ہسدا وی اے..... اوہنوں جھکھ وی لگدی اے تے اوہدا دل وی دھڑکدا اے۔ جے اوہ بھوئیں تے رُ سکدا اے تے اوہ بھوئیں تے بہہ وی سکدا اے۔ جے اپنی دُنیا بھوئیں تے بیٹھی ان پانی کما رہی اے تے مینوں کیہ اے تے نالے ماسی ایہ گلاں اوہناں لوکاں گھڑیاں نہیں جھڑے انساناں دے وچکار اونچ نیچ دی ونڈ پانا چاہندے نیں تے اسیں لوکی سوچے سمجھے بغیر ایہناں دے اثر ہیٹھ آجانے آں۔“ میں آکھیا تے دانے بھند دی کڑی کڑا ہی وچ دا تری پھیر دیاں رُک گئی۔ مینوں اِنج لگا جویں زمین گھمادی

گھمڈی رُک گئی ہووے۔

”جیوندا رہ پُتر..... اللہ اُچیاں شاناں کری۔ ہونا تے انج ای چاہید اے پر بچیا ایہ دُنیا اے..... ایہتے خورے کیہ کیہ رو لے نیں۔ بندہ سوچدا کجھ اے تے ہوندا کجھ اے.....“ ماسی کجھ کھندے کھندے چپ ہو گئی۔ اوہدیاں اکھیاں کھلیاں سن۔ جھڑیاں باہر ویکھن دی بجائے دماغ دے اندر اُبھرن والے منظر اُتے لگیاں ہوئیاں سن۔ اوہ اندر لا منظر ماسی دیاں اکھیاں نے ویکھیا تے اوہ سہم کے کجھ دیر لئی بند ہوئیاں فیر اوہناں باہر ول ویکھنا شروع کردتا۔

”ماسی تئیں کھڑی سوچ وچ ڈب گئے سو..... میری گل بُری تے نہیں لگی.....“ میں آکھیا۔

”نہیں چن پُتر..... بس سوچاں پچھا نہیں چھڑ دیاں..... کوئی گل..... یاں فیر کوئی رُک بندے نوں پچھانہ ول موڑ دیندی اے.....“ ایہ کھندیاں ماسی دے مُونہ اُتے جھڑیاں ودھدیاں تے اُداسی نال بھردیاں گئیاں۔ لونب وچوں نکلدے دھوئیں تے بلدیاں لکڑاں دی کڑکڑ نے ماحول نوں سوگوار کردتا۔

”مینوں اپنا پُتر سمجھوتے دسو اوہ رُک کھڑی اے جھڑی تہاڈے اندر دا روگ بنی ہوئی اے..... تہاڈے دل دا بھار ضرور ہولا ہووے گا.....“ میں آکھیا۔

”پُتر..... ایہ رُک ای میرا سرمایہ اے..... ایہدے نال ای میں سونی آں تے ایہدے نال ای میں جاگنی آں..... میرے سینے وچ رُک ای تے رہ گئی اے..... ایہدا مینوں کوئی بھار نہیں تے نالے ہولا ہو کے کیہ لینا.....“ ماسی دی ایس گل نال مینوں انج لگا جو یں بھٹی زمین تے نہیں ماسی دے سینے وچ بھٹی ہوئی اے..... جھڑی اپنے اندر سلگدی اگ اُتے لوکاں نوں دانے بھُت بھُت کے دے رہی اے..... زمین دے سچے واسی اپنے دُکھاں، درداں تے اوکڑاں دی بھٹی اپنے سینے وچ لا کے، اک لانب بھُتجے بہہ کے، کماں وچ رُجھے اندروں ای اندر گھلدے جاندے نیں۔ انج ای گھلدیاں گھلدیاں اوہناں زمین دے سینے وچ لسیاں

پے جانا اے۔

”چل ماسی مینوں دس..... توں نہ سہی میں ہولا ہونا چاہنا واں۔ تیری پریشانی نے میرے دماغ ٹوں بھارا کرتا اے.....“ میں ماسی ول ویکھدیاں آکھیا تے ماسی دے چہرے اُتے چھائی اُداسی دے انھیریاں اُتے مسکان کسے شہاب شتاقب وانگوں چند لچیاں لئی چمکی۔

”پڑھیا لکھیا ایں نا..... گل کڈھوان دا ول آوندا اے..... چل پتر توں پچھیا اے..... تے بھوئیں تے بہہ کے پچھیا ای..... تے تینوں ہن دس وچ مینوں کوئی سوڑ وی نہیں.....“ ماسی نے آکھیا تے دانے بھندی کڑی نے ویسہ رُپے دے چنے چنگیر وچوں چھاننے نال کڈھ کے کڑاہی وچ سٹے تے نالے بلدیاں لکڑیاں ٹوں بھٹھی وچ بنی موری تھائیں اگانہہ کیتا۔ تاں جے کڑاہی تھلے سیک وچ وادھا ہووے فیر ماسی بولنا شروع ہوئی تے بولدی چلی گئی۔

”میں اک یتیم کڑی ساں..... میرے دوروں لگدے لاناں نے مینوں پالیا تے میرا ویاہ اک ماڑے جے ریڑھی والے نال کرتا۔ میرے لئی اوہ ای میرا سب کجھ سی۔ رب نے ساٹوں پتر دتا سی۔ اوہاناں بشیر احمد رکھیا۔ میرا بندہ اکثر بیمار رہن لگ پیا۔ بڑا دوا دارو کیتا۔ پر رب سوہنے ٹوں منظور نہیں سی۔ اوہ دُنیا توں گزر گیا..... پنڈ دے لوک میری امداد کردے رہے۔ صدقے زکوٰۃ وی دے جاندے۔ میں اپنی حیاتی اپنے پتر لئی وقف کردتی۔ مینوں اوس دیہاڑی دی اڈیک سی جد میرا پتر وڈا ہووے تے کجھ کما کے لیاوے تے میں لوکاں کولوں زکوٰۃ تے صدقے نہ لواں۔ میری خواہش رب سوہنے نے پوری کیتی تے میرا پتر اٹھ جماعتاں پڑھ کے کسے موٹر مکینک کول شاگرد ہو گیا تے کجھ مہینیاں بعد اوہ گھر خرچہ دین لگ پیا۔ میں لوکاں کولوں زکوٰۃ صدقے لینے چھڈ دتے۔ کجھ مہینے ہو ر گزرے۔ خورے اوہنوں کیہ ہویا۔ منجی تے لما پیا بھڑک کے مجھتی وانگ تڑفیا تے ”ماں“ کہہ کے ٹھنڈا ہو گیا۔ میری دنیا انھیر ہو گئی.....“ ماسی ایہ کہندیاں ہو کے لے کے رون لگ پئی۔

”چپ کر ماسی. نصیباں دی گل سی..... رون نال ساڈے نصیب تے نہیں بدلنے.....“ دانے بھندی کڑی پہلی واری بولی تے ماسی نے اپنے ہنجو اپنی چادر نال پونجھے۔

”تے پتر..... قدرت نوں خورے کیہ منظور سی. میں زکوٰۃ صدقے فیر لینے شروع کر دتے. جہڑے پتر دی کمائی پاروں چھڑ دتے سن. اک دیھاڑی دو عورتاں گلاں کردیاں میرے کولوں لنگھیاں. اک دوجی نوں کہہ رہی سی ”ہائے نی کتے بُرے نصیب نہیں ایمدے فیر صدقے زکوٰۃ لینا شروع کر دتے سو.....“ ایہ گل سن کے میرا اندر پھٹ پیا تاں فیر پتر..... اللہ سوہنے نے ہمت دتی تے ایہ بھٹھی لائی اے..... ہن پتر دی یاد نال حیاتی دے دن گزر رہے نیں..... ایہ رڑک ای سہی..... پر ایہ رڑک ای میری حیاتی اے.....“ ماسی نے اُداسی نال آکھیا تے مینوں چپ لگ گئی. کجھ سمجھ وچ نہیں سی آ رہیا ماسی نوں کیہ آکھاں.

”پتر میرا کم چنگا چل رہیا اے..... لانگھا اے تے بڑے لوک ایتھوں لنگھدیاں بھجے چنے لے کے جانڈے نیں. میرے کول واہوا پیسے اکٹھے ہو گئے سن. میں ایس رستے وچ ٹھنڈے پانی دا کولر لوا دتا اے. گرمی وچ ہلکان ہوندے بندے جدوں ٹھنڈا پانی پیندے نیں تاں میرے سینے وچ ٹھنڈ پے جانڈی اے. میں ایہو کجھ ای کر سکیں ساں پتر.....“ ماسی نے گل کردیاں میرے ول دیکھیا.

”کجھ پیسے میں سکینہ لئی رکھ دتے نیں.....“ ماسی میراں نے ایہ گل کئدیاں سکینہ ول اشارہ کیتا تے سکینہ نے اک نظرے ماسی ول دیکھیا تے فیر داتری لون وچ بھجڈے چنیاں وچ پھیرنا شروع کر دتی.

”ایس نمائی دی داستان وی انہونی اے. میرے وانگوں یتیم بچی سی..... ویاہ ہويا. سہاگ رات نوں بندہ مر گیا. لوکاں دیاں زباناں نہیں سی رُکدیاں. کیہ کیہ نہیں آکھیا اوہناں. ایمدا کیہ قصور اے تقدیر ولوں ایہو ای منظور سی. ایہنوں ایتھے لے آئی آں. میں تے ہن بہہ گئی واں. ایہ بھٹھی ہن ایمدی اے.....“ ماسی

میراں نے گل کردیاں میرے ول گوہ نال ویکھیا۔

”کیہ گل اے پُترا..... تُوں چُپ ای ہو گیا ایں..... کوئی ہُوں ہاں وی نہیں کردا.....“ ماسی نے حیرانی نال مینوں آکھیا۔

”ماسی کدی کدار ہوں ہاں وی کرن تُوں جی نہیں کردا..... جی کردا اے..... سر تھلے سٹ کے بیٹھا رہواں..... اوہناں لوکاں دے سامنے جھڑے دُکھاں دی چادر ولھیندیاں بگل مار کے حیاتی تُوں گیرِی جا رہے نیں..... تے اوہناں دی حیاتی کھوہ وانگوں اپنے سینے وچوں پانی کڈھ کے بنجر زمیناں تُوں ہریالی بخش رہی اے.....“ میں ماسی تُوں آکھیا تے سیکنہ نے گوہ نال میرے ول ویکھیا۔

”میں تے سوچیا سی کہ میراں اپنا دُکھ لے کے بھوئیں وچ لیٹ جائے گی..... پر پُترا..... خورے جسم بھوئیں نال مل کے مٹی ہو جاندا ہے پس تے دُکھ ایہتے ای رہ جاندا ہے نیں..... تے بندے ایہناں دوالے ای گھمڈے رہندے نیں..... ایہ تے بس دُکھاں دیاں گھمن گھیریاں نیں..... ایہناں وچ ای گھمڈیاں اللہ سوہنے داناں لینا چاہیدا اے..... تے اوہدی مخلوق نال پیار کرنا چاہیدا اے.....“

”ماسی..... تہاڈی گل تے سولاں آنے ٹھیک اے..... پر بستہ آخر بندہ ہوندا اے..... کتھوں تائیں صبر کر سکدا اے.....“ میں آکھیا۔

”نہ پُترا نہ..... ایویں دی گل نہیں کری دی۔ اللہ سوہتا ناراض ہو جاندا اے..... اپنے دُکھاں تُوں اپنے من وچ گھول کے پی جانا چاہیدا اے.....“ ماسی نے آکھیا تے سیکنہ نے خالی خالی نظراں نال میرے تے ماسی ول ویکھیا..... تے فیر اوہنے کڑاہی وچ بھجڈے کالے چنیاں اُتے کجا پھیرنا شروع کر دتا..... اوہدا جشہ کسے لاٹو وانگوں گھم رہیا سی۔ کجے اُتے اوہدے ہتھاں دی پکڑ ڈاڈھی تے بھار اِنج سی جوں گھمڈیاں گھمڈیاں اوہ چنیاں دا کچو مر کڈھ کے کڑاہی وچ پئے لون نال برابر کر دیوے گی.....

خبر

چند ماہ قبل مجھے دفتر کی ساتھی وکیل سیدہ سدرہ نثار صاحبہ جو مقابلے کا امتحان پاس کر کے سرکاری وکیل منتخب ہو گئیں ہیں (آج کل بطور اسٹنٹ پبلک پرائسیکوٹر گجرات ہی تعینات ہیں) نے مطلع کیا ”گجرات میں نئے تعینات ہونے والے ڈسٹرکٹ پبلک پرائسیکوٹر جناب بابر جاوید ڈار بھی لکھاری ہیں اور انکی طبع آزمائی کا میدان مادری زبان پنجابی ہی ہے، ان کی کہانیوں میں منظر کشی بڑی دلکش اور حقیقت کے قریب ہے۔“ اس غائبانہ تعارف پر جواباً میں نے کہا ”کیا آپ کے سینئر پنجابی زبان کے Thomas Hardy ہیں؟“ تو میرا جواب سن کر موصوفہ نے کہا ”وہ مجھے ڈار صاحب کی کتاب پڑھنے کیلئے دیں گی“ اور ساتھ ہی بتلایا کہ ڈار صاحب بھی عارف علی میر صاحب سے ملاقات کے مشتاق ہیں۔

ہم دونوں ایک ہی استاد جناب عارف علی میر ایڈووکیٹ ہائی کورٹ کے شاگرد ہیں مزید براں میر صاحب المیر ٹرسٹ لائبریری مرکز تحقیق و تالیف، گجرات (قائم شدہ 1996ء) کے بانی و منتظم ہیں، ہذا لائبریری زیر سرپرستی محترم شریف کنجاہی، پروفیسر حامد حسن سید، پروفیسر ڈاکٹر مظفر حسن ملک شروع ہوئی جواب تک ماشاء اللہ تحقیقی پچاس کتب و مقالہ جات وغیرہ بلا قیمت طالبان علم و ادب کیلئے شائع کر چکی ہے۔

چند روز بعد ہی ڈار صاحب نے اپنی ادبی ملاقات سے قبل اپنی شائع شدہ کتاب ”ننگے پیر“ میر صاحب کی خدمت میں بذریعہ سدرہ صاحبہ بھیجی، جس میں سے میں نے ایک دو کہانیاں پڑھیں جن کی منظر کشی واقعتاً اچھی اور حقیقت کے قریب لگیں، ایک دو روز بعد ڈار صاحب سے اپنے دفتر میں ہی ملاقات ہو گئی تو میں نے ان کو گفتگو بارے بتایا اور اپنی رائے دی کہ

آپ نے اپنی کہانیوں میں جو خوبصورت منظر کشی کی ہے جس سے مجھے آپ حقیقتاً پنجابی کے تھامس ہارڈی (Thomas Hardy) لگے، اللہ تعالیٰ آپ کو اور اچھا لکھنے کی توفیق عطا فرمائے!

اس طرح میرا ڈار صاحب سے ایک قریبی تعلق بن گیا اور میں نے المیر ٹرسٹ لائبریری کے زیر اہتمام اپنی تحریر کردہ کتاب ”داستانِ حیات۔۔۔ لال خان ملک“ پیش کی، جسے ڈار صاحب نے نہ صرف پسند کیا بلکہ اپنے دستخطوں سے اپنی دونوں کتب ”سپی داموتی“، ”ننگے پیر“ عنایت کی، جس کے لئے میں ڈار صاحب کا از حد مشکور و ممنون ہوں!

کتاب کے حوالے سے بات چیت ہوئی تو میں نے ڈار صاحب کو انکی تحریر کردہ مذکورہ کتب کو طالبانِ علم و ادب کیلئے انٹرنیٹ پر شائع کرنے کے بارے رائے دی تو ڈار صاحب انٹرنیٹ کی دنیا کی باریکیوں بارے آگاہی نہ تھی جس وجہ سے میری رائے کو عملی صورت کی شکل دینے کی ذمہ داری بھی مجھی کو سونپ دی، اس کتاب کو میں نے PDF(Portable Document Format) Version ترتیب دیا، اسی PDF Version (طبع دوم) میں ہذا کتاب کی رونمائی کی کاروائی مع تصاویر، ”سپی داموتی“ پر لکھے تبصرے و مضامین پیش خدمت ہیں۔ آخر میں ڈار صاحب کی صحت، علمی و ادبی کاوشوں کو جاری رکھنے کیلئے دعا گو ہوں۔

خط ان کا بہت خوب، عبارت بہت اچھی
اللہ کرے زورِ قلم اور زیادہ

ندیم اللہ ایڈووکیٹ ہائی کورٹ، گجرات

qlc786@yahoo.com

facebook: <https://www.facebook.com/786nadeemullah>

بزمِ فقیر پاکستان ولودو کہانیاں دیاں کتاباں دی مکھ وکھالی تقریب

8 دسمبر ہفتے والے دن بزمِ فقیر پاکستان تے مہینہ وار ”پنجابی“ انٹرنیشنل دے زیر اہتمام سٹینڈ کالج وحدت روڈ لاہور وچ ڈاکٹر دلشاد ٹوانہ دیاں دو کتاباں ”پچھتاوا“ تے ”نیندراں نہیں آؤندیاں“ تے بابر جاوید ڈاردی کتاب ”پسی داموتی“ دا مکھ وکھالی اکٹھ ہویا جہدی صدارت سٹینڈ کالج دے چیف ایگزیکٹو تے بزمِ فقیر پاکستان دے صدر امین جاوید ہوران کیتی۔ تقریب دے اچھے پروہنے ڈاکٹر دلشاد ٹوانہ تے بابر جاوید ڈارد ہوریں سن۔ تقریب وچ لاہور شہر توں اڈ پنجاب دے دوجے شہراں وچوں آئے ادیباں، شاعراں، سوجھواناں، وکیلاں تے پروفیسر اں دی وڈی تعداد نے شرکت کیتی۔ تقریب دی بسم اللہ کردیاں محمد جنید اکرم ہوراں سارے مہماناں نوں جی آیاں نوں آکھیا تے اوہناں داسوا گت کیتا۔ اپنی گل بات وچ اوہناں عہد کیتا کہ اللہ دے حکم نال بابائے پنجابی ڈاکٹر فقیر محمد فقیر دے پنجابی ودھاتے پنجابی زبان دے فروغ دے مشن نوں ہمیشہ جاری و ساری رکھن گے۔ اوہناں بزمِ فقیر پاکستان دی کتابی اشاعت بارے دسیا کہ ادارے دیاں چھپیاں کتاباں دی تعداد پنجاہ توں ٹپ گئی اے تے ایہدے نال ایس ورھے پنجابی انٹرنیشنل رسالے نوں وی پچھلے چھ مہینیاں توں باقاعدہ چھاپ رہے آں۔ تقریب دی کمپیئرنگ پروفیسر عباس نجمی ہوراں بخوبی نبھائی۔ عابد حسین چشتی نے تلاوت تے تلاوت قرآن پاک مگروں نعت رسول مقبول پیش کیتی۔ صدر ماہی نے عارفانہ کلام گاکے مکھ وکھالی اکٹھ دی شروعات داسوہنا سماں بنھ دتا۔ تناں کتاباں تے ملی جلی رائے دین والیاں وچ

صابر لودھی، پروفیسر جنید اکرم، فرخندہ لودھی، اعزاز احمد آذر، پروین ملک، حسین شاد، اقبال قیصر، منموہن سنگھ خالصہ، عدل منہاس لاہوری تے اقبال راحت ہورین سن۔ مہمانان اعزاز ڈاکٹر دلشاد ٹوانہ تے بابر جاوید ڈار نے سارے مقرر راں دا شکریہ ادا کیتا تے تقریب دا اہتمام کرن والے منتظمین نوں سلاہیا۔ تقریب دے صدر امین جاوید ہور راں صدارتی خطاب وچ آکھیا کہ پنجابی زبان دی ترقی تے ودھائے تے رائٹراں دی پذیرائی لئی ایہو جے اکھ ہر مہینے ہوندے رہنے چاہیدے نیں تے اوہناں تقریب دے پر بندھک نوں خراج تحسین پیش کردیاں آکھیا کہ بیماری دے باوجود محمد جنید اکرم دی پنجابی محبت تے پنجابی زبان دی خدمت ہمیشہ یاد رکھی جاوے گی۔ (رپورٹ: بیراجی)

(ماخذ: مہینہ وار ”پنجابی“ انٹرنیشنل جنوری 2008ء، صفحہ 34)

بزم فقیر پاکستان تے مہینہ وار پنجابی انٹرنیشنل وٹوں

پنجابی کہانیاں دے مجموعے

پچھتاوا

(پروفیسر ڈاکٹر دلشاد ٹوانہ)

سپی داموتی

(بابر جاوید ڈار)

دے مکھ وکھالی اکھ دا اہتمام کیتا جا رہیا اے

ویلا: 4 بجے شام نوں ❖ اُن پانی 6 بجے

۸ دسمبر ۲۰۰۰ بروز جمعہ

سٹینڈرڈ کالج آف کامرس

مقام تقریب

32/B نیو مسلم ٹاؤن ڈاک خانہ سٹاپ وحدت روڈ لاہور

تشریف لیا کے ساڈا مان ودھاؤ

اڈیکوان

محمد جنید اکرم
بیراجی



مچھن دس لئی

0322-8078863
0345-4089270

نمونہ دعوت نامہ رونمائی کتاب ”سپی داموتی“



بابر جاوید ڈارا بنایا ایئر ڈروول کر دے ہوئے

تیری ماں بولی اے بیبا، لکھاں وانگتہ رول پنجابی
پڑھ پنجابی، لکھ پنجابی، غیرت مندا بول پنجابی

انٹرنیشنل

پنجابی

54

جنوری 2008ء



اعزاز احمد آذر
دا تفصیلی انٹرویو



بزم فقیر پاکستان ولوں ڈاکٹر دلشاد نوانہ
دی کتاب ”چھتاوا“ تے باہر جاوید ڈار
دی کتاب ”پسی داموتی“ دی مکھ وکھالی
تقریب دیاں تصویری جھلکیاں

سٹیج تے باہر جاوید ڈار، فرخندہ لودھی، ڈاکٹر دلشاد نوانہ، امین جاوید تے عباس نجمی بیٹھے نہیں۔ جد کہ پروین ملک خطاب کر رہیاں نہیں



محمد جنید اکرم، پروین ملک، اعزاز احمد آذر، ڈاکٹر جاوید اکرم، فرخندہ لودھی، باہر جاوید، ڈاکٹر دلشاد نوانہ تے چیف ایگزیکٹو امین جاوید



عابد حسین، چشتی، صفدر مای، اقبال راحت، عدل منہاس، لاہوری، اقبال قیصر، عباس نجمی، منموہن سنگھ خالصہ تے حسین شاد

تصاویر و نمائے کتاب ”پسی داموتی“

بحوالہ: مہینہ وار ”پنجابی انٹرنیشنل“ جنوری 2008ء


ڈاکٹر دلشاد ڈوانہ دی کہانیاں دی کتاب ”پچھتاوا“ تے بابر جاوید ڈاردی کہانیاں دی کتاب ”پستی داموتی“ دی مکھ دکھالی تقریب دیاں تصویریں جھلکیاں



چیف ایگزیکٹو مین جاوید ڈاکٹر دلشاد ڈوانہ 'فرخندہ لودھی' تے بابر جاوید ڈار



محمد جنید اکرم تے صابر لودھی



ڈاکٹر جاوید اکرم، مین جاوید، محمد جنید اکرم تے بیراجی



پروفیسر غلام محی الدین، مین جاوید، ڈاکٹر جاوید اکرم تے بیراجی



حسین شاہ، ڈاکٹر دلشاد ڈوانہ، پروفیسر عباس محی بیراجی، ارشد کھوکھر، اقبال راحت، محمد عارف شاہ تے عدل منہاس لاہوری



سید اسلام شاہ، بابر جاوید، ارشد حسین شاہ، بیراجی، ارشد کھوکھر، محمد عارف شاہ، اقبال راحت، عدل منہاس لاہوری

تصاویر و نمائی کتاب ”پستی داموتی“

بحوالہ: - مہینہ وار ”پنجابی انٹرنیشنل“ جنوری 2008ء

www.freepdfpost.blogspot.com

تقریب رونمائی

گوجرانوالہ (جنرل رپورٹر) ڈپٹی ڈسٹرکٹ پبلک پراسیکیوٹر جاوید ڈار کی پنجابی زبان میں کتاب ”پسی داموتی“ اور پروفیسر ڈاکٹر دلشاد ٹوانہ کی کتاب ”پچھتاوا“ کی تقریب رونمائی مقامی کالج میں منعقد ہوئی، تقریب میں معروف ادیبہ فرخندہ لودھی سمیت اعزاز احمد آذر، ڈاکٹر جاوید اکرم، پروین ملک،

اقبال قیصر، صابر لودھی اور محمد جنید اکرم نے اظہار خیال کیا جبکہ ڈسٹرکٹ پبلک پراسیکیوٹر چودھری فیاض احمد وڑائچ، ڈپٹی ڈسٹرکٹ پبلک پراسیکیوٹر پرویز اقبال چدھڑ رانا دلشاد احمد خاں، عمران علی، تصدق حسین چٹھہ، رانا ذوالفقار علی، اسسٹنٹ پبلک پراسیکیوٹر عزیز میں ممتاز رانا، زیب النساء و کامران محمود اور ڈپٹی ڈائریکٹر اینٹی کرپشن انسپیکشن گوجرانوالہ نثار احمد گوندل اور عباس نجمی نے شرکت کی۔

روزنامہ ”ایکسپریس“ 2007ء

بابر جاوید ڈار کی تصنیف ”پسی دا موتی“ شائع ہو گئی


گوجرانوالہ (نامہ نگار خصوصی) معروف ادیب اور قانون دان بابر جاوید ڈار کی نئی تصنیف ”پسی دا موتی“ شائع ہو گئی ہے ان کی کتاب پنجابی (بقیہ نمبر 39) لانے کا ایک حربہ ہے۔

روزنامہ ”سماج“ 19 ستمبر 2007ء

سماج 39

افسانوں پر مشتمل ہے جس میں سترہ کہانیاں شامل ہیں ”پسی داموتی“ پر ڈرامہ نگار حسین شاد فرخندہ لودھی اور جنید اکرم نے تبصرہ تحریر کیا ہے بابر جاوید ڈار نے بتایا کہ کتاب عنقریب سارکیت میں آجائے گی اور قارئین کو پسند آئے گی۔

بابر جاوید ڈار کی کتاب ”پسی داموتی“ شائع ہو گئی



گوجرانوالہ (پ ر) بابر جاوید ڈار کی پنجابی کہانیوں کی کتاب ”پسی دا موتی“ شائع ہو گئی کتاب میں معروف افسانہ نگار فرخندہ لودھی،

روزنامہ ”گوجرانوالہ ٹائمز“ 31 اکتوبر 2007ء

مشہور ڈرامہ نگار حسین شاد، بیراجی اور رسالہ پنجابی کے ایڈیٹر محمد جنید اکرم کے تبصرے بھی شامل ہیں۔ قبل ازیں بھی ان کی اردو افسانوں کی کتاب ”آزاد کر نہیں“ شائع ہو چکی ہے۔

”پسی داموتی“ بابر جاوید ڈار کی تراث

بابر جاوید ڈار کی ”سپی داموتی“
بابر جاوید ڈار کی پنجابی کہانیوں کا مجموعہ ”سپی داموتی“
شائع ہو گئی ہے۔ اس میں فرخندہ لودھی، بیراجی، حسین شاد، محمد
چنید اکرم کی آراء درج ہیں۔ کتاب میں 17 پنجابی کہانیاں
درج ہیں۔ بیراجی کے بقول بابر جاوید ایڈووکیٹ کی کہانیوں

پچی داموتی
پچانی کہانیاں
پچانی کہانیاں
پچانی کہانیاں

رو نمائی ہوئی شینڈر ڈ کالج لاہور میں ہوئی۔ جس میں معروف ادیبہ فرخندہ لودھی مشہور ڈرامہ نگار پنجابی کہانی کار حسین شاد اعجاز احمد آزر ڈاکٹر جاوید اکرم پروین ملک اقبال قیصر صابر لودھی بیراجی اور محمد جنید اکرم نے اظہار خیال کیا گو جرنالہ سے ڈسٹرکٹ پبلک پراسیکیوٹر چوہدری فیاض احمد وڑائچ ڈپٹی ڈسٹرکٹ پبلک پراسیکیوٹر فرزانہ شاد احمد خان عمران علی تصدق حسین چٹھہ رانا ذوالفقار علی پرویز اقبال چدھڑ اسٹنٹ پبلک پراسیکیوٹر فرزینہ ممتاز رانا زیب التسا کامران محمود اور ڈپٹی ڈائریکٹر انجینیئر کرپشن ثار احمد گوندل کے علاوہ کئی دیگر افراد نے شرکت کی۔ کمپیئرنگ کے فرائض عباس مجھی نے انجام دیئے۔

روزنامہ ”سہاج“ 31 دسمبر 2007ء

کتاب دانان: پسی داموتی

لکھاری: بابر جاوید ڈار، ناشر: بزم فقیر پاکستان

”پسی داموتی“ بابر جاوید ڈار ہوراں دی پہلی پنجابی کہانیاں دی کتاب اے جہدے وچ اوہناں دیاں نکلیاں وڈیاں 17 کہانیاں نیں جیہڑیاں جدید طرز دیاں معاشرتی، سماجی تے جگ بیتی دیاں نریاں کہانیاں ای نہیں بلکہ حیاتی دیاں جیوندیاں جاگدیاں تلخ حقیقتاں دا ڈرامے وانگ دلچسپ بیان اے۔ جہناں وچ اوہ آپ کتے مرکزی کردار وچ ہیر و نظر آندے نیں تے کتے ولن دار وپ دھاردے دسدے نیں۔ بابر جاوید ڈار ہوراں نوں کہانی گھڑن دا چنگا ڈھنگ آوند اے جیہڑا کہانی پڑھ کے قاری نوں اصل مقصدوں سوچن تے مجبور کر دیندا اے ایس پر اگے وچ مختلف موضوعاں دیاں رلیاں ملیاں کجھ دلچسپ کہانیاں دی نیں جہناں دے پڑھن نال طبیعت بلکل بور نہیں ہوندی تے قاری کہانی وچ کردار دے مشاہدات تے تجربات وچ وسعت علمیت تے دانشوری پاؤں خوش رہندا اے۔ اوہناں دی کہانی دا اسلوب وڈے کہانی کاراں وانگ مٹھے سبھاتے سمندر اں دی روانی ورگا اے۔ جیہڑا کہانی پڑھدیاں قاری نوں اپنا ویلا ضائع ہوند محسوس نہیں ہوندا بلکہ بابر جاوید ڈار ہوری کتے کتے علامتاں رمزاں نال اپنی کہانی وچ اپنی علمیت پاروں سہپن تے قاری دے دل تے یاد رہ جان والیاں گلاں نقش کر جان دے نیں۔ جیہڑا بڑا سلاہن جوگ اے اوہناں دی کہانی وچ اوہناں دے وکالتی کم دیاں نویاں نویاں داستاناں، اوہناں دے اپنے مشاہدے وچ بھج کے کہانی دانک نقشہ اُلکدیاں تے آل دوال دے مسئلیاں دیاں خوبصورت تصویراں بناندیاں رہندیاں نیں تے انج لگدا اے کہ قاری کہانی پڑھ نہیں رہیا بلکہ ڈرامے دے سین وانگ

جیوندے جاگدے کرداراں وچ ویکھ رہیا اے ایس لئی بابر جاوید ڈار مینوں دو جے کہانی کاراں توں منفرد تے ہر لحاظ نال ممتاز جاپیا اے۔

”کچا مروڈ“، ”حلف“، ”جھاتی“، ”پسی داموتی“، ”کھچ“، ”اکلاپے دی اگ“۔ ایسیاں کہانیاں نیں جیہڑیاں بلاشبہ شاہکار کہانیاں وچ شامل کیتیاں جاسکدیاں نیں۔ جے کسے ڈائریکٹر ڈرامے دا ایہناں کہانیاں دی ڈرامائی تشکیل ول دھیان آجاوے تے بابر جاوید ڈار ہوری حقیقت وچ بلاشبہ دناں وچ اُچے کہانی کاراں وچ شامل ہو جان۔ اپنی گل دے سرناویں اوہ کتاب دے پبلشر تے اپنے دیرینہ دوست بارے لکھدے نیں کہ: ”میں جنید اکرم دے خلوص بارے کیہ دساں ایہوای تے اوہ شخصیت اے جہنے میرے اندر دے کہانی کارنوں ہمیش جگائی رکھیا اے۔ دُعا دے سرناویں حسین شاد ہوری لکھدے نیں کہ بابر دیاں کہانیاں ہولی ہولی کھلدیاں نیں کسے چنگی کہانی دا حسن وی ایہوای اے کہ اوہ اپنا گھنڈ ہولی ہولی چکے۔ دھماکہ کرن والیاں کہانیاں وی بھاویں اپنا اک اثر رکھدیاں نیں پر جو سواد اباریک بنی نال لکھی کہانی دا آوند اے اوہ دھماکہ خیز کہانی دا نہیں آوند۔“ کچا مروڈ“، ”حلف“ توں اڈاؤ ہناں دی ہر کہانی اپنی وکھری شناخت رکھدی اے۔ فرخندہ لودھی، ”پسی داموتی“ دے سرناویں لکھدیاں نیں کہ پنجابی کہانی دی جوہ وچ بابر جاوید ڈار اک بوہت درد مند دل رکھن والا اج دا بندہ اے پر نال ای اک فلسفیانہ فکری رجحان لے کے پنجابی کہانی نوں معتبری دین دے ارادے نال پڑوچ آیا جا پدا اے اوہ دے کول جذبات دی اہمیت، عقل دے ایکشن تے ری ایکشن دا بڑا ڈونگھا شعور اے۔ حساس کہانی کار ہون کر کے بابر جاوید ڈار پیار دا پرچارک اے۔ محبت دا ڈونگھا شعور تے ڈونگھا احساس جیہڑا کہ بابر جاوید ڈار

کول ہے۔ ہُن ایہدی اپنی چون اے کہ اوہ اپنے قاری نوں کیوں تے کس انداز وچ ہینڈل کر کے اپنا ہم خیال بناندا اے ایہدیاں ساریاں کہانیاں احساس دی شدت دیاں ترجمان نیں۔ اوہدیاں کہانیاں دیاں سطران وچ اک انقلاب دی لوڑ دی پکاراے۔ جس انقلاب دی لوڑ نوں بابر جاوید ڈار نے شدت نال سمجھیا اے کہ اوہ ذہنی تے تعلیمی انقلاب اے، اقتصادی انصاف والا انقلاب۔ ویلے دے نال جیہڑی تعلیم تے عمل دی لوڑ کسی سماج نوں اگے ودھان لئی ہوندی اے بندہ اوہدیاں لوڑاں پوریاں کرن لئی جنا کو جہاد کرسکدا اے بابر ڈار اس جہاد توں کسی وی کہانی وچ غافل نہیں۔ کہانی کار جماندرو احساس اے اوہ اپنے پاتر نال رل کے حال دہائی نہیں پاند۔ سگوں سوال بن جاندا اے تے اپنے قاری اگے ایہہ اچھ سوال رکھدا اے یا اک تبدیلی دل دھیان دواندا اے، تبدیلی جس دی انسانی برادری نوں چراں توں اڈیک اے ہر شعور مند بندے اندر بھیتی دُکھ وانگر موجود اے اوہا رویہ تے اعتماد دس پارہیا اے کہ اوہ ایس راہ تے لما چر چلے گا، ہر پڑاء تے روشن نشان چھڈے گا۔“ کتاب دے شروع وچ بسم اللہ دے سرناویں محمد جنید اکرم لکھدے نیں ”بابر جاوید ڈار آپ وی اک کہانی وانگ اے۔ اوہدی زندگی نکلیاں نیاں کہانیاں نال بھری ہوئی اے۔ چوکھیاں کہانیاں دامرکزی کردار اوہ آپ ای ہوندا اے کدھرے اوہ اپنے آپ نوں ہیرو بنا کے پیش کردا اے حقیقت ایہہ وے کہ اوہ اپنی حقیقی زندگی وچ وی اک کامیاب ہیرو اے تے ادبی حوالے نال وی نویکلا کہانی کاراے۔ اوہ واقعی پسی داموتی اے تے اوہدی ایہہ کتاب پنجابی کہانی کاراں دی صف وچ اک قابل قدر اضافہ اے۔ کتاب دایک ٹائٹل راقم دا لکھیا ہو یا اے ایس تبصرے وچ میں اپنیاں کجھ سطران وی پیش کرن دا اعزاز حاصل کراں گا۔ اوہ ایس

طرحاں کہ بابر جاوید ڈار ہوراں اپنی کتاب پسی داموتی وچ اپنے ابتدائی دور وچ ای وڈے نامور کہانی کاراں وانگ نہ بھلسن والیاں کہانیاں لکھ کے پنجاب دی لوکائی دے دلاں تے ہمیشاں لئی دا تحسین دے جھنڈے گڈ دتے نیں تے پنجابی ادب کہانی کھیترو وچ چھیتی ای اوہناں اپنی وکھری تے منفرد کہانی کار دی پچھان کروالئی اے اپنیاں کہانیاں وچ اوہناں دا پیغام ایس نکلتے ول اشارہ کروالے کہ معاشرے دے جھوٹھے دعویدار پہلاں خود اپنی اصلاح کرن ول توجہ دین۔“ کتاب دی اشاعت اگست 2007ء دی اے۔ ایہہ چار رنگ پیسٹنگ ٹائٹل نال 80 گرام دے چھٹے کاغذ دی 160 صفحیاں دی کتاب اے لکھاری نے انتساب اپنے عزیزاں دے ناں کیتا اے اوہ لکھدے نیں کہ اوہ سارے ہُن ایس دنیا وچ نہیں پر اوہناں دیاں محبتاں تے یاداں دے دیوے ہمیش میرے دل دی بستی وچ بلدے رہن گے۔

(ماخذ: مہینہ وار ”پنجابی“ انٹرنیشنل۔۔۔، نومبر 2007ء)

”پسی داموتی“ بارے

عدل منہاس لاہوری

۔۔۔ جتھوں تک ”پسی داموتی“ دا تعلق اے تے ایہداناں ای ایڈاسوہنا اے کہ

میں ایس بارے اپنے وچاراں دی کیہ روشنی پاواں۔ پسی داموتی تے ہوندا ای سُچاتے
سوہنا اے۔ ظاہر اے پسی داموتی اپنی دکھ دوے گا، پڑھن والیاں دے دماغ روشن کرے
گا۔ میں سورج نوں چراغ کیہ دکھاواں:

پسی اکھ دے سچے موتی

تیری یاد چ پروچے موتی

تارے توڑ لیا نہیں سکدا

میری پہنچ توں اُچے موتی

ہار دی مہک تے موجاں لیندے

چنچل ہارے لُچے موتی

عدل جہاں نوں ذرے سمجھیں

بکھرے ہوئے نیں سچے موتی

(ماخذ: مہینہ وار ”پنجابی“ انٹرنیشنل جنوری 2008ء، صفحہ 17)

پسی داموتی

بناشک پنجابی نوں اے وی شاعری دی زبان کہیا جاندا اے تے دھڑ ادھڑ شعری پراگے وی چھپ رہے نیں پرہن پنجابی زبان دادامن نثری صنفیاں توں وی ویہلا نہیں رہیا۔ ہر سال کہانی تے ناول دیاں چنگیاں کتاباں وی سامنے آرہیاں نیں۔ منجھے ہوئے لکھاریاں دے نال نال نویں منڈے وی بہت سونہی کہانی لکھ رہے نیں۔ بابر جاوید ڈار بھاویں زیادہ معروف کہانی کار و جہوں اپنی شناخت نہیں بنا سکے کیوں جے اوہناں دیاں ساریاں کہانیاں اکو پرچے وچ ای چھپیاں نیں پر اوہ لمے عرصے توں کہانی لکھ رہے نیں تے پنجابی داہر سنجیدہ قاری اوہناں دی کہانی پڑھ چکیا اے۔ بیتے ورہے بابر جاوید ڈار دا کہانی پراگا ”پسی داموتی“ چھپ کے سامنے آیا اے جس وچ اوہناں دیاں ستاراں کہانی شامل نیں۔ بابر جاوید ڈار ہوراں کہانی وچ بہتے تجربے نہیں کیتے۔ نہ فلسفہ جھاڑیا نیں تے نہ ای علامتاں اوہلے کہانی لکائی اے۔ اوہناں تاں حیاتی دے دکھ سکھ بڑے سدھے سادے انداز نال کہانیاں وچ بیان کردے نیں۔

لکھاری کیوں جے وکالت دے پیشے نال تعلق رکھدا اے تے اوہداواہ روز دیہاڑی عدالتاں دے چکر لاؤندے لوکاں نال پیندا اے جیہڑے کتے دوجیاں دے ظلم دا شکار ہوندے نیں تے کتے آپوں ظالم بن کے لوکائی دی حیاتی دکھی کردے نیں۔ ایسے پاروں بابر جاوید ڈار نے دکھاں دیاں بہتیاں کہانیاں اُلکیاں نیں۔ لوکاں دے کرب نوں محسوس کر کے واحد متکلم داصیغہ ورتدیاں جدوں ایہناں دکھاں نوں کہانیاں داروپ دتا اے تے اپنی سیانف نال اکھرا لیکے نیں کہ قاری اوہدے نال ٹرن تے مجبور ہو جاندا اے۔ بابر جاوید ڈار دے ایس مجموعے دایں سواگت کردا اے تے مینوں آس اے کہ اوہ اگوں جدید پنجابی کہانی پڑھن گے وی تے نویاں تکنیکاں دی ورتوں نال پنجابی کہانی دامن بن گے۔

بابر جاوید ڈار دے ایس کہانی پراگے نوں بزمِ فقیر ولوں چھاپیا اے۔ 2007ء وچ چھپی ایس

کتاب دے کل صفحے 160 تے مُل 150 روپے لے۔

(ماخذ: رسالہ ”لکھاری“، شمارہ: اپریل 2008ء)

پسی داموتی

تبصرہ نگار:- فرزند علی شوق

بابر جاوید ڈار کیونکہ قانونی شعبے یعنی وکالت سے وابستہ ہیں اس لئے کسی مسئلے کی تہہ میں اتر کر اس کی گرہ کشائی کرنا، ان کی فطرت میں شامل ہے وہ اپنی ذات کو کردار کے قالب میں ڈھالنے کے ساتھ ساتھ کردار سے بے تکلف ہو کر اس کی روح میں اتر جاتے ہیں جس کے نتیجے میں از حد دلچسپ فضا تخلیق ہو جاتی ہے، الفاظ محسوسات کا آئینہ خانہ کا متبادل ثابت ہوتے ہیں۔ یہ رومانیت کا سہارا نہیں لیتے جس کو یوں بھی کہہ جاسکتا ہے کہ ان کی کہانیاں معاشرتی اتھل پتھل کی عکاس ہیں۔ ہاں اگر کہیں رومانیت ہے تو اس معاشرتی ٹوٹ پھوٹ کے پس منظر ہیں۔

بابر جاوید ڈار کی زیر نظر کتاب ”پسی داموتی“ 17 کہانیوں پر مشتمل ہے ہر کہانی اپنے پلاٹ سے باہر نہیں جھانکتی مگر دوسرے کو دعوتِ فکر ضرور دیتی ہے کہ وہ ان کہانیوں کی بالکونیوں میں کھڑے ہو کر پورے معاشرے کا منظر نامہ دیکھیں۔ اندازِ بیاں سادہ اور عام فہم ہے اسلئے کہانیاں آنکھ سے دل و دماغ کا فاصلہ ایک ہی جست میں سر کی جاتی ہیں ویسے بھی ڈار صاحب حساس ذہن، مشاہداتی آنکھ اور تجرباتی دل رکھنے والے انسان ہیں جو ان کے سینے میں اک معصوم اور ہمدردانہ والے دل کے دل کی شہادت فراہم کرتا ہے چنانچہ وہ مسئلے کی حد تک محدود نہیں رہتے بلکہ اس کے حل کے لیے بھی متفکر نظر آتے ہیں۔ ویسے تو ہر کہانی ایک سے بڑھ کر ایک کی منہ بولتی تصویر ہے تاہم ”حلف“، ”رات دی رانی“، ”پسی داموتی“، ”وچھوڑا“، ”زندہ لمحے“، اور ”گھسن گھیریاں“ خاص طور پر قابل ذکر ہیں۔ ان کے قلم کی جولانیوں میں مزید اضافے کی دعا کے پہلو بہ پہلو خوبصورت کتاب ”پسی داموتی“ کی اشاعت پر مبارکباد۔ (ماخذ: رسالہ ”قرطاس“، شمارہ: جنوری تا مارچ 2008ء)

تبصرہ نگار:- سید عمران حیدر ایڈووکیٹ

بابر جاوید ڈار کا یہ مجموعہ سترہ کہانیوں پر مشتمل ہے یوں تو یہ تمام کہانیاں کسی خاص معاشرہ المیہ کو اجاگر کرتی یا سوئے ضمیر کو جھنجھوڑتی ہیں لیکن خاص طور پر ”حلف“، ”ساز بندیاں و چکار یکراں“، ”جھاتی“، ”اکلاپے دی اگ“، ”پسی داموتی“ اور ”گھمن گھیریاں“ ایسے افسانے ہیں جو اپنے موضوع اور ندرت بیان کے لحاظ سے خاصے کی چیزیں ہیں۔

عدالت میں پیش آنے والے کر بناک حقائق ہوں یا سماجی ناہمواری جس کے
نتیجے میں غریب گھرانوں میں جنم لینے والے بچوں کے مسائل کی ضروریات اور مجبوریاں ان کے

بچپن کی معصومیت اور ننھی ننھی خوشیاں چھین کر ان معاشرے کے بے رحم تھپڑوں کے حوالے کر دیتی ہیں یا پھر ہمارے معاشرے کے غریب انسان کی وہ امید کہ جس کے سہارے وہ تمام عمر گزار دیتا ہے کہ شاید یہ مصیبت اس کی زندگی کی آخری تکلیف ہو اور اسکے بعد حالات بدل جائیں گے مگر اکثر و بیشتر وہ یہی امید لیے اس دنیا سے رخصت ہو جاتا ہے لیکن اس کے حالات نہیں بدلتے ان سب موضوعات کو بابر جاوید ڈار نے انتہائی موثر طریقے سے پیش کر کے خود کو پنجابی ادب میں نمایاں مقام کا اہل ثابت کیا ہے۔

بابر جاوید ڈار کے افسانوں کی ایک خاص بات ان کی جاندار کردار نگاری ہے۔ ہو سکتا ہے کہ کچھ لوگوں کو ان کے کردار جامد اور مثالی محسوس ہوں لیکن یہ حقیقت ہے کہ یہ کردار ہمارے معاشرے کے جیتے جاگتے زندہ کردار ہیں جن کو بابر جاوید ڈار نے الفاظ کے لبادے میں ادبی ابدیت عطا کر دی ہے مثلاً ان کا افسانہ ”جھاتی“ پڑھ کر احساس ہوتا ہے کہ ضروری نہیں کہ کسی بلند معاشرتی مقام یا اعلیٰ منصب کا حامل شخص ہی عظیم ہو اگر ہم اپنے ارد گرد نظر دوڑائیں تو ہمیں بظاہر کئی معمولی معمولی کاموں میں مگن، عظیم انسان نظر آئیں گے ”جھاتی“ کا مرکزی کردار نئی محمد انہی میں سے ایک ہے۔

ہمارے معاشری مسائل ہمارے اپنے ہی پیدا کردہ ہیں اور ہم ہی ان کو ختم کر سکتے ہیں جہیز بھی ایک ایسا ہی ناسور ہے جس کی ہم اپنے رویے سے آبیاری کر رہے ہیں ہم اس کے خلاف بات تو کرتے ہیں لیکن جب عمل کی باری آتی ہے تو ”عقل عیار ہے سو بھیس بدل لیتی ہے“ کے مصداق سو بہانے تراش لیتے ہیں مگر ”اڈیک“ کا کردار نفیس احمد روشنی کی اک کرن بن کر معاشرے کو اصل راستہ دکھا رہا ہے۔ آج کے اس مادیت زدہ اور نفسا نفسی کے دور میں بھی بابر جاوید ڈار کے افسانوں کے اکثر کردار اپنی غربت کے باوجود انسانی ہمدردی کے گہرے جذبات رکھتے ہیں ایثار ان کا طرہ امتیاز ہے ”خیال دی بوند“ کا کمال اور ”زندہ لمحے“ کا منیر حسین ایسے ہی کردار ہیں۔

میری نظر میں بابر جاوید ڈار نے افسانہ یا کہانیاں نہیں لکھیں بلکہ ہمارے آج کے اس مادیت پرست بلکہ مادیت زدہ معاشرے میں بکھرے ہوئے ان گنت معاشرتی المیوں کو پر تاثیر الفاظ کا پیراہن عطا کیا ہے، وہ ایک حساس اور دیانت دار انسان ہیں انہوں نے جو دیکھا اس کو دل کے سوز کی آمیزش کے ساتھ ہمارے سامنے پیش کر دیا ہے، کاش ہم ان معاشرتی المیوں کو محسوس کرنے کے ساتھ ساتھ دور کرنے کی بھی کوشش کریں۔

ماں باپ میں غلیحہ کی کے بعد بچے کی زندگی میں آنے والا تکلیف وہ دور ہو یا
بڑھاپے میں اولاد سے دور تنہا زندگی، واردات محبت کا بیان ہو یا غم روزگار کے جھمیلے، زندگی کی
قوس قزح کے کئی رنگ ہیں، جو ”پسی داموتی“ میں اپنی پوری آب و تاب سے جھلک رہے
ہیں، امید ہے بابر جاوید ڈار کے ذہن کی پسی سے ابھی کئی اور انمول موتی وجود میں
آئیں گے۔

(ماخذ: روزنامہ ”Surprise News“ گوجرانوالہ۔۔۔۔۔ء)

☆ املا دی درستی

صفحہ نمبر	سطر	غلطی	درستی
14	4	سی	حذف
15	1	سی	ساں
//	6	آندے	جانڈے
16	19	سی	حذف
17	20	سی	بنی
//	21	تے ڈونگھا گیا	حذف
19	8	آپوں	اپنے
20	12	تروڑ پھوڑ	تروڑ مروڑ
21	12	تِلھک	تِلک
23	3	کول	کولوں
//	5	ڈھاران	ڈھارن
//	15	سی	سن
24	7	لے کے	بھردا
25	13	سی	حذف
//	//	ایہدا	ایہہ
27	14	سِرک	سِرک

صفحہ نمبر	سطر	غلطی	درستی
27	//	تے سِدھے ہو	خذف
//	20	اے	خذف
//	23	روٹین دی	خذف
//	//	ہٹے۔۔۔	ہٹے ہوئے
28	1	چنگا کراں۔۔	چنگا کراں گے
29	15	وچ	تے ای
30	6	بل	بال
32	8	آکھی	آکھیا
//	14	پتا۔۔	پتا اے
33	1	ودھ۔۔	ودھ عُمر دی
//	2	لگدی	خذف
//	7	لھویٹ	لپیٹ
//	11	سی	ساں
//	12	رکھ ے	رکھ کے
34	1	جی	جہئی
//	12	توں کسے شہردی	توں شہردی
35	3	ہوایں	ہوئیاں
//	19	اہونوں	اوہنوں

صفحہ نمبر	سطر	غلطی	درستی
35	22	چنے	خذف
36	8	گجھ	پہتے
37	3	وچھڑنا	وچھوڑا
38	3	ہوئی گئی	خذف
39	10	گھورا	گھوڑا
40	14	رکھ	بنہ
41	2	کالا	خذف
42	5	لڑیاں	لڑدیاں
43	17	سارکاری	سرکاری
//	23	کریاں	خذف
44	21	گھورے	گھوڑے
45	23	ٹنگا	ٹانگا
45	8	وی	خذف
//	9	وج اٹھے	وجن لگ پوے
46	2	اس	اوس
//	9	وہی لنگھ رہی سی	خذف
//	17	عشق	عاشق
47	1	لان (مدھم)	لان

صفحہ نمبر	سطر	غلطی	درستی
47	22	روڑ دھے	روڑھے
48	8	پرانگے	پرانے
//	//	تجن	خذف
53	13	حقہ	حقے
54	22	بیانی	بیابانی
55	16	اہونوں	اوہنوں
58	22	روسن	روشن
//	23	ودیائی	وڈیائی
60	6	جد	جد کوئی
63	7	ہتھ	ہتھاں
//	//	سارے جنے وچ	خذف
63	10	اتھوں	اوٹھوں
//	22	ایہوای	اوہو
70	14	اے	خذف
//	15	نال	نالوں
71	12	اور	تے
//	15	خدا واسطے	خدا دے واسطے
//	19	کہی	کسے

صفحہ نمبر	سطر	غلطی	درستی
73	3	ہوندا	ہندا
79	1	ہیں	خذف
//	2	توں ہیں	توئیں
85	4	پٹری	پہئے
87	1	سی	خذف
92	2	ول۔۔	ول جان دی
93	17	ٹور	ٹوور
94	9	چکدیاں	چلدیاں
//	17	مڈے	مُنڈے
//	23	رت	رات
98	21	اُتے	تے
99	18	ہلے تائیں	اے تائیں
107	15	تیر	تیار
111	19	وانہ	روانہ
113	21	چوکھاوتے	چوکھاوتھے تے
115	3	لل	لے
116	2	پوری	پوریاں
//	//	والی	والیاں

صفحہ نمبر	سطر	غلطی	درستی
116	3	سی	خذف
//	10	رُون	رون
//	11	بکھیردا	کھڑاندا
119	4	تے	خذف
//	10	سی	خذف
//	12	ہی	خذف
//	19	دیں	دیوے
120	1	سی	خذف
121	12	گُریاں	گُڑیاں
122	5	ڈونگھی دوہاں	ڈونگھیاں
123	2	کول	کولوں
124	17	نہیں۔۔	نہیں سی
125	5	یا	خذف
126	3	دولا	رولا
//	17	بھلن	جاگن
128	14	راہنمائی	خذف
129	22	مدیت	مادیت
134	6	چھد	چھڈ

صفحہ نمبر	سطر	غلطی	درستی
136	9	پیراں دے وچ	پیراں وچ
136	17	چکيا	جھکيا
137	21	گھورے	گھوڑے
139	20	سنگم تے	سنگم نے
//	22	پيا	خذف
140	2	چھوتی	چھوٹی
//	5	گھردا	گھریا
142	10	تہادی	تہاڑی
//	21	ڈھنگ	ڈنگ
143	7	آہواں	ہاواں
144	17	اور	خذف
//	18	وی	خذف
146	1	ای	خذف
148	23	بہوں	بڑا
150	2	بھاں	ہتھاں
//	7	گری	گروی
155	20	موڑ	موٹر

☆ کتاب دے چھپن توں بعد ٹائپ تے املا دیاں غلطیاں داپتہ لگیا۔ اوہ ضمیمہ وچ درستی دی صورت وچ پیش کیتاں جاریاں نیں!

ساڈیاں کتاباں

- تاریخ گوجرانوالہ/ڈاکٹر فقیر محمد فقیر (اردو تاریخ) -/150 روپے (نواں ایڈیشن زیر اشاعت)
- دیوے تھلے/ڈاکٹر فقیر محمد فقیر (شاعری) -/150 روپے (نواں ایڈیشن زیر اشاعت)
- کلام فقیر (جلد اول) ڈاکٹر فقیر محمد فقیر (شاعری) -/400 روپے
- موآتے/ڈاکٹر فقیر محمد فقیر (شاعری) -/150 روپے
- صدائے فقیر/ڈاکٹر فقیر محمد فقیر (شاعری) -/125 روپے
- ستاراں دن/ڈاکٹر فقیر محمد فقیر (شاعری) -/150 روپے (زیر اشاعت)
- پائے گلے/ڈاکٹر فقیر محمد فقیر (شاعری) -/150 روپے (زیر اشاعت)
- گل پونجی/بشیر منذر (شاعری کلیات) -/200 روپے
- چھج تاریاں دا/ڈاکٹر وزیر آغا (شاعری) ایڈیشن ختم
- جمالی ربی جمال تیرا/محمد عبدالباسط باسط (نعتیہ شاعری) (ایڈیشن ختم)
- پتن چہاں دا/محمد جنید اکرم (شاعری) (نواں ایڈیشن زیر اشاعت)
- نہ بجاں گنڈھڑی پھول/محمد جنید اکرم (شاعری) (زیر اشاعت)
- سدھراں دی ستھ/نور محمد نور (انڈیا) (شاعری) -/130 روپے
- شہرتے سفنے/حسین شاد (کہانیاں) -/150 روپے
- سورج چن گواچے نیں/رمضان شاکر (غزلاں دادیوان) -/200 روپے
- کتن ول دھیان/ڈاکٹر آفتاب نقوی مرحوم (کھوج پرکھ) -/130 روپے
- بکل دے وچ چور/کنول مشتاق مرحوم (ڈرامہ) (ایڈیشن ختم)
- پنجابی کہانی کارناں/ڈاکٹر دلشاد ڈوانہ (کھوج پرکھ) -/100 روپے
- نیندراں نہیں آنڈیاں/ترجمہ ڈاکٹر دلشاد ڈوانہ (شاعری منجیت کورٹوانہ) -/80 روپے
- میں کپاہ تے چاننی/شائستہ حبیب (شاعری) -/100 روپے
- بولاں کہ نہ بولاں/سلیم آہنگ (مزاحیہ شاعری) (ایڈیشن ختم)

- مکھانے/عباس مرزا (ادبیات) -/100 روپے
- دسوکنبھوں دتساں/رانی ملک (شاعری) -/150 روپے
- نہ پتے نہ چھاں/رانی ملک (شاعری) -/250 روپے
- قولاں دی بدھی/اقبال دیوانہ (مزاحیہ شاعری) -/100 روپے
- دل سمندر تھا/محمد اکرم ثاقب (اردو شاعری) -/100 روپے
- غم جاناں غم دوراں/محمد صدیق (اردو شاعری) -/60 روپے
- غزل تے پنجابی غزل/عبدالحمید سرشار (کھوج پرکھ) -/250 روپے
- فیر کیہ ہو یا/عبیدہ سید (کہانیاں) -/100 روپے
- ایہ کہانی نہیں/اکمل شہزاد گھمن (کہانیاں) -/130 روپے
- روپ سروپ/شگفتہ نازلی (نکیاں کہانیاں) (ایڈیشن ختم)
- آس/جاوید صدیق بھٹی (شاعری) -/80 روپے
- ڈھیک چالیاں/جاوید صدیق بھٹی (کالم) -/100 روپے
- پایا تھا تجھے کھونے کے لیے/زبیدہ بیگم (آپ بیتی اردو) -/120 روپے
- حسین لمحے حسین یادیں/زبیدہ بیگم (آپ بیتی اردو) -/100 روپے
- رباعیات تاثیر/صدیق تاثیر (رباعیاں) -/200 روپے
- سرود آگہی/طارب جمالی (اردو شاعری) -/120 روپے
- کچ دے محل/محمد شریف انجم (شاعری) -/80 روپے
- سفنہ طیبہ دے/محمد شریف انجم (نعتاں) -/100 روپے
- پسی داموتی/بابر جاوید ڈار (کہانیاں) -/150 روپے

چھپواک: بزم فقیر پاکستان

125/3-B2، ٹاؤن شب لاہور

فون نمبر: 042-5150271

موبائل: 0322-8078863

بابر جاوید ڈار ہورائے نوجوانوں کی کہانی لکھ دیاں اے زیادہ عرصہ نہیں ہو یا پراوہناں اپنی پلٹھی دی کتاب ”بھئی داموتی“ وچ اپنے ابتدائی دور وچ ای وڈے نامور کہانی کاراں وانگ نہ بھلسن والیاں کہانیاں لکھ کے پنجاب دی لوکائی دے دلاں تے ہمیشاں لئی داؤد تحسین دے جھنڈے گڈ دتے نیں تے ایہدے نال بزم فقیر پاکستان نے ایہہ کتاب چھاپ کے پنجابی ادب کہانی کیتر وچ چھیتی ای اوہناں دی وکھری تے منفرد کہانی کار دی پچھان کروا دی اے۔

بابر جاوید ڈار ہوری گوجرانوالہ دی جانی پچھانی وکیل برادری وچ تے پہلاں ای سرکڈ ہوئیں چنگے وکیل، دانشور تے اُچے سیاسی تجزیہ نگار منے جاندے سن محمد جنید اکرم ہورائے ایس وکالتی سنگت پاروں مہینہ وار پنجابی انٹرنیشنل وچ کہانی کار دی حیثیت نال پٹھے کئی ورہیاں توں چھاپ کے اوہناں نوں کہانی کار برادری وچ مستقبل رکن بنادتا سی تے اوہ ادب برادری وچ وی بڑے آدمان نال سہانے تے پچھانے جان لگ پئے سن۔

بابر جاوید ڈار نے اپنے آل دوآلے دی رحلت، ویسب، روزانہ دے وکالتی ماحول تے اپنے موکاں دیاں نویاں نویاں کہانیاں سنن پاروں اپنی کہانی تے جیڑا اثر قبولیا اے اوہدا بھرواں تاثر، تجربیاں تے مشاہدیاں دا کھلار، لوکائی دیاں پیڑاں داسیک، شہری حیاتی دی حقیقی تصویر، وطن پرست جذبیاں دا اظہار، انسانی فطری رنگ، معاشرتی ظلم نیاں، دکھ تے مہنگائی دیاں اتھرواں وچ بھجیاں چیکاں، تاریخ ثقافت تے معاشرتی ھیتاں دے رنگ اوہناں دیاں کہانیاں وچ اپنے زیادہ اکھڑویں نظر آوندے نیں کہ جے میں اپنے بیان نوں وضاحت تے حقیقت دارنگ دین لئی اوہناں دیاں کہانیاں دے جیوندے جاگدے کرداراں دی شکل دی ھٹی گچی گل کردیاں ہر کہانی دا تھوڑا تھوڑا وی ذکر کراں تے فلیپ دیاں گتیری دیاں سطران متحمل نہیں ہو سکدیاں۔ اوہناں دی ہر کہانی وچ پنجابی زبان تے ادب دی محبت تے آل دوآل دا الشکار کتاب دے کئی صفحیاں تے پڑھن لکیاں اکھیاں نوں تے دل نوں متاثر کردا اے تے اوہناں دا پیغام ایس نکلتے ول اشارہ کردا اے کہ معاشرے دے جھونے دعویدار پہلاں خود اپنی اصلاح کرن ول توجہ دین۔

بابر جاوید ڈار ہورائے داوکیلاں دے اوس گروپ نال تعلق اے جہنے آج سٹھ ورہے مگروں پاکستان دی عدلیہ تے میڈیا نوں آزادی دوائی ایس لئی میں آس کرنا کہ اوہناں دیاں کہانیاں دے موضوع دی سچائی تے معیار نوں منکھ رکھ کے سورج منکھی معاشرے دے ادبی منصف اوہناں دی کتاب ”بھئی داموتی“ نوں انعام دی ٹکڑی وچ تولدیاں ہو یاں اوہناں دی نویکلی سوچ نال ضرور انصاف کرن گے۔

منکدی گل ایہہ وے کہ ایس اجو کے دور دی کہانی وچ سو بھوان ادب برادری تے پنجابی ادب دے نویں کہانی کاراں نوں بابر جاوید ڈار توں آون والے ویلے وچ ایسے طرحاں دیاں مقصدی تے جاندار جدید کہانیاں دیاں چنگیاں تے زیادہ اُمیداں نیں تاکہ اوہ ایسے طرحاں اپنی مادری زبان تے نویں نویں موضوعاں پاروں آن والے ویلے دی کہانی وچ اُمنلا وادھا کردے رہن۔

بیراجی

ISBN-978-969-9030-01-7

